







C.A. 66=6. 7028

Jul 208
m 21





LIVINI
MEYERI

E SOCIETATE

JESU

POEMATUM

LIBRI DUODECIM.



BRUXELLIS,
Typis EUGENII HENRICI FRICK,
Typographi Cæsarei. 1727.

Cum Approbatione & Privilegio.

OPERIS DEDICATIO. iij
PERILLUSTRI VIRO AC DOMINO,
DOMINO OLIVERIO
BARONI DE REYLOF
MÆCENATI ET PATRONO SUO COLENDISSIMO,
LIVINUS MEYERUS.



Nihil à veterum usu & consuetudine alienum facio, Vir Perillustis, quando has Musas meas ad te defero, tantumque mihi sumo, ut, de tuo erga me animo multis argumentis securus, eas & nomini tuo inscribere, & potenti patrocínio non verear commendare. Sic enim olim Poëtarum Principes, quorum divina Poëmata, quamvis sat tuta firmaque per se, & supra omnem invidiæ morsum posita erant, ea tamen Mæcenatibus suis, ipsique etiam Cæsari Augusto, insigni ingeniorum æstimatori, legimus dedicasse: tum quòd hoc humanitatis officium grati animi candor exigeret; tum etiam ut ipsorum elegantissimæ lucubrationes majorem quemdam illustrioremque à tantorum Patronorum dignitate ac majestate splendorem

IV OPERIS DEDICATIO.

dorem commendationemque acciperent. Etenim ipse Ovidius, vir cælestis ingenii, Augusti Cæsaris triumphum, quem in exilio præclarissimo carmine celebraverat, Romam ad Rufinum poëtam mittens, eum ipsius tutelæ non dubitavit commendare his versiculis:

Est opus exiguum, vestrisque paratibus impar.

Quale tamen cumque est, ut tueare rogo.

Firma valent per se, nullumque Machaona quarunt:

Ad medicam dubius confugit æger opem.

Non opus est magnis placido lectore poëtis:

Quamlibet invitum difficilemque tenent.

Nos, quibus ingenium longi minuere labores,

Aut etiam nullum forsitan ante fuit.

Viribus infirmi, vestro candore valemus.

Quem mihi si demas, omnia rapta putem.

Quam potiori titulo hos ego versus adoptare, & ad te, qui inter præcipuos hujus seculi poëtas numeraris, & possum & debeo confugere: cum Musæ meæ, quæ conditione sua non sunt admodum commendabiles, nisi patrocínio tuo sustineantur, meritò timere possint ne eandem, quam tot aliorum scripta, sortem experiantur, ut eodem occidant quo nascuntur anno. Sunt enim ea indole critici hujus temporis, ut faciliùs aliena arrode-

re

OPERIS DEDICATIO. V

re atque deprimere, quàm componere meliora, suaque ipsimet audeant in lucem proferre. Sicut ergo judicia horum, qui nullo edito hujus artis specimine spectabiles sunt, non magnopere curanda ac formidanda existimo; sic eorum, quorum scripta publica Parnassum & Heliconem olent, criticam veneror, & censuram amplector; paratus horum stare & cadere testimonio, quidquid ipsi aut retinendum, aut corrigendum duxerint. Hoc nomine, Vir eruditissime, hasce lucubrationes meas, quas inter alias frontis severioris occupationes horæ furtivæ pepererunt, judicio tuo, quod hic plurimum valet, ultro volensque submitto; minimè anxius an lectoribus aliis sint displicituræ, si has tibi utcumque placuisse constiterit. Te enim (quod citra adulationem dicere liceat) omnium disciplinarum abripit ingenitus ardor & studium: & illud quidem tam pertinax, tamque assiduum, ut nullum tibi diem elabi patiaris, cujus partem aliquam non consecres aut pervolutandis tam sacris quàm profanis historiis, aut enodandis Philosophorum

VJ OPERIS DEDICATIO.

placitis, aut perscrutandis sublimioribus
sacrae Theologiae ac divinarum Scriptu-
rarum oraculis, aut denique perfruendis
deliciis Musarum. Hinc nullum est pu-
blicum certamen literarium, ad quod
editis thesibus provocantur eruditi, in
quo te argumentantium coetui cum laude
non inferas. Quantum verò tibi nascenti
arriserint Musae elegantiores, testantur
varia à te edita in lucem poemata, ju-
dicio comprobata omnium qui Pegaseo
fonti vel tantillum extrema labia admo-
verunt. Specimina duo hactenus inedita,
quæ ad me pridem mittere dignatus es,
fronti hujus opusculi præfixa Lector in-
veniet, eaque tam suo in genere tersa
atque polita, ut ne Argus quidem repe-
rire in iis possit quæ carpat, præter lau-
des meas, quibus me measque Musas,
magis pro affectu in me tuo, quàm pro
meritis & rei veritate celebrare voluisti.
Accipe igitur, Vir præclarissime, hunc
qualemcumque conatum meum, & pa-
tere ut prodeat nomini tuo inscriptus hic
libellus, sitque apud posteros æternum
tuorum in me meritorum testimonium ac
monumentum.

DE

DE LIBRIS DE IRA JUDICIUM

*Gravium virorum , qui Acta eruditorum edunt
Lipsiæ, ad annum 1694. quo tempore hoc poë-
ma primum lucem aspexit,*

INter animi vitia , quibus natura hominis insigniter deformatur , & vel in brutorum conditionem abjicitur , vix aliquod vehementius est nocentiusque quàm *Ira*. Unde & reperti sunt omni tempore inter sapientes viri prudentiæ , & eruditionis opinione inclyti , qui præclarè de humano genere merituri disertissimis verbis docuerunt , quomodo malo tam præcipiti medicina afferri debeat. Inter illos principe loco collocandus est *L. Annaeus Seneca* , cujus inter libros Philosophicos *tres de Ira* primi conscripti sunt à viro rerum honestarum intelligentissimo , certè primi omnium in ejus operibus exhibentur. In iis enim vero non monstrattantum , quomodo *Ira* sit noscenda , sed monet etiam , quomodo fugienda sit , quæque remedia adversus hostem tam sævum sint expromenda , ex quibus duo imprimis nominat : ne videlicet irascamur , & porro , ne in ira peccemus ; quæ omnia & pulcherrimè & utilissimè per totum illud opus exequitur. Quum verò argumentum hoc à nemine hætenus syllabarum atque vocum concentu pertractatum sit , id eò lubentius occupavit atque elegit sibi doctissimus *Livinus de Meyer* è Societate Jesu , Poëta felicissimus. Nam præter Poëmatis suavitatem , quâ delectare Lectores studuit , etiam rei ipsius , de qua agere instituit , utilitate impensè prodesse poterit.

Ipse quoque in *tres libros* dispescuit opusculum, in quorum *priori in causas Iræ* atque irritamenta solerter inquit, quæ tam levia, tam tenuia aliquando esse docet, ut mirum sit, hominum animos iisdem ad iracundiam commoveri posse. Post libro *secundo ad signa Iræ* progreditur, quibusque indiciis agnoscenda sit, & quæ *damna* exindè consequantur, graviter ostendit. Tum verò libro *tertio remedia* contra Iram instillat, & ut compescendus sit cum ratione effervescens animi impetus, suavissimis monitis inculcat. Nec verò mirum alicui videri debet, quod Elegiaco metro usus sit: Nam præterquam quod materiæ propositæ gravitas ea non sit, ut Heroici metri majestatem efflagitet; exemplis etiam Poëta noster defendi potest. Quod enim hoc carminis genus non ad luctus solum & amores, sed ad argumenta etiam graviora atque frontis severioris accommodari queat, & Propertii Pugna Aëtiaca, & Ovidii Fastorum libri abundè comprobant. Cæterum quàm feliciter in hoc poëtandi genere versatus fuerit Auctor, elegantissimi versus loquuntur, in quibus certè ad veterum illorum elegantiam perspicuitatemque adspirat; si non & aliquos in his rebus superat; ut adeò Lectoris otium, quod legendo huic poëmati impendet, & amœnitate sua & utilitate satis superque compensaturus sit. Votum modo adjicimus, ut reliquas sapientiæ partes eâdem venæ florentissimæ felicitate excolere Vir eruditissimus pergat.

R. P. LIVINO MEYERO

E' SOCIETATE JESU

JACOBUS WALLIUS

Cùm se Poëtam corpore senem, animo juvenem
eleganti carmine celebrasset.

A Nnos si memorem, bene quos memorare senectus
Longa solet, quem dat cursum natura, peregi.
Nec conviva satur dubiâ desurgere cœnâ,
Nec vitæ plenus vitâ migrare recusæm.
Ducitur interea mihi tertia Nestoris atas,
Meque (quod ô superi!) superis poscentibus addet.
Evocor hinc aliò. Quid me, Livine, moraris,
Et mihi nescio quid fingis superesse juventæ?
Qui quondam leviter circum præcordia sanguis
Intepuit, friget. Tardâ subeunte senectâ
Omnia tardescunt: & sum quoque magna querela
Parsque fidesque meæ: torpent ad carmina vires.
Nil adèd aspirant Musæ Phæbusque canenti.
Non eadem semper blandos clementia cæli
Fundit humo flores: nec semper vatibus idem
Est vigor. Aoniis minuuntur collibus umbra:
Non lauro decus æternum est: odor interit: aret
Deciduis truncus foliis: è fontibus ipsis
Parcius interdum manant Aganippides undæ.
Quod sibi cantari sèro sub vespere jussit
Dulcem inter citharæ strepitum, plaususque suorum
Pacuvius dapibusque sibi vinoque parentans,
Funeris & ritu supremo elatus honore,
Vos cari vates, vixit, mihi dicite, vixit.

*Ab nimis ex vero! neque enim simulamina leti
Ludicra me teneant, nec justa novissima ficto
Prævertam planctu. Certus manet exitus omnes.
Seriùs, aut citiùs vacuas implebimus urnas.
Vos ô, ne memori factus cinis eximar ævo,
Livini carmen cineri superaddite nostro.*

Ut longiùs hoc poëmation ducerem, nihil venustius excogitare poteram, quàm illud, quod Seneca cum villico suo colloquium habuit, quo molliter ac facetè senectutis suæ se admonitum refert.

Quocumque, inquit, me verto, argumenta senectutis meæ video. Veneram in suburbanum meum, & querebar de impensis aedificii dilabentis. Ait villicus non esse negligentia sua vitium. Omnia se facere, sed villam veterem esse. Hæc villa inter manus meas crevit. Quid mihi futurum est, si jam putria sint ætatis meæ saxa? Iratus illi proximam occasionem stomachandi arripio. Apparet, inquam, has platanos negligi: nullas habent frondes. Quàm nodosi sunt, & retorridi rami: quàm tristes & squalidi trunci. Hoc non accideret, si quis has circumfoderet, si irrigaret. Furat per Genium meum se omnia facere, in nulla re cessare curam suam, sed illas vetulas esse. Quod inter nos sit, ego illas posueram, ego illarum primum videram folium. Debeo hoc suburbano meo, quod mihi senectus mea, quocumque adveneram, apparuit. Epist. 12.

Exarsit mihi, fateor, exarsit animus, ut hæc cùm legerem, & sæpiùs relegendo prolixiora, jucundioraque facerem, poëticâ paraphrasi copiosius efferrem. Sed ut Senecæ sua, sic mea mihi senectus apparuit, ac sensi ægrè me posse ubi rem & amœnam, quæ se mihi offerebat, materiam in pedes cogere, tametsi id vellem quàm maximè. Nimirum pro elegante ac suavi tua Elegia par aliquid me tibi rependere æquum erat.

Non

Non enim illa mihi honori tantum & voluptati, sed etiam admirationi fuit, quod inter asperos horrentesque philosophorum dumos felici ingenio venâque profusa sit. Virgilianum illud hîc valeat,
Resonant & acanthida dumi.

Quod pro illâ paucos & tenues versiculos reponam, ætati meæ potiùs, quàm inertiae tribuendum, quippe qui annos Nestoreos attigerim. Non enim, ut poetæ nostri amant multa *ὑπερόχως* dicere, seculum annis centum, sed triginta tantummodo definitur, ut Græcorum Latinorumque scriptorum testimoniis probat Cerda * noster. At quis inhorrescente brumâ, cui effeta & sterilis nostra hæc senectus comparatur, aut vernos odoriferosque flores, aut æstivo sole percoctas fruges, aut ulmos pampineo gravidas autumnos expectet? Convenit quoque te mihi dilationis senibus innatæ gratiam facere, atque audire te velim Syram Plautinam, cum tardiore illius incessum increparet Dorippa.

† Dor..... *Quin is ocius?*

Syr. *Nequeo me castor: tantum hoc onus est, quod fero.*

Dor. *Quod onus? Syr. annos octoginta & quatuor: Et eodem accedit servitus, sudor, sitis.*

Hîc Musa mea exilit, & gravioribus de causis præ Syra se tarditatis culpâ exsolvendam putat. Natu enim, inquit, sum grandior, si de ætate agitur; si de servitute, nescit Syra, quàm operosum sit famæ & existimationi servire, cum scribendum est carmen erudito lectori placitum. Nescit itidem quanto sudore in sublimem nubemque cacumine superantem Parnassum connitendum sit: quod cum denique perventum est,
 ne

* Lib. 8. *Aeneid.* V. 508.

† In *Mercatore* *Ac.* 4. *Sc.* 1.

xij
ne inter canendum vocis via siti præcludatur,
Caballini fontis haustus pro nectare est.

Quod his addam, nihil est præter vota, quibus suppliciter Deum precor, ut, quoniam ea quæ quisque sibi, eadem & amanti optare debet, senectutem diuturniorem & valentio rem meâ tibi proroget. Vale igitur tuo publicoque bono, amicorum optime, & me memoriâ apud Deum complectere perpetuâ.

R. P. EMMANUELIS
VAN OUTERS S. J.
E L E G I A

A D

P. LIVINUM MEYERUM

Ex eadem Societate.

I Nunc, & Musas livor dic esse sepultas,
Iratos Belgis, improbe, finge Deos.
Hoffschius occiderit : tamen ars non occidit omnis.
Hoffschius heredem repperit, arsque suum.
Wallius ad tumulum sensim declinet eundem :
Impatiens tumuli Musa superstes erit.
Becanus Sicula felix imitator avenæ,
Fam sibi; jam summam credat adesse diem :
Summa dies adsit; non omnis silva tacebit,
Non omnis, raptò vate, tacebit ager.
Meyerus superest (Superis sit gratia!) Gaudæ
Laudibus ingenii gloria spesque suæ.
Wallius, Hoffskiades, Becanus vivet in illo.
Tres unus referet : par tribus unus erit.

Perlege;

Perlege, si dubitas, hæc carmina perlege livor,
 Si potes hoc ullo jure negare, nega.
 Sapius illa quidem legi, rursusque relegi,
 Assiduâ numquam non relegenda manu,
 Carmina quæ Naso, sua quæ velit esse Tibullus,
 Carmina quæ pretio quolibet Umber emat.
 Et quoties relego, miror magis : & mihi dico,
 Vix tulit huic Belgæ Roma superba parem.
 Quantus adest numeris decor, & quæ gratia verbis!
 Quam facilis cursu divite vena meat!
 Aureus est sermo, nitor aureus, aurea lima,
 Aurea res, qualem suggerit unus amor.
 Nil biat, obscurum nihil est, nil longius aquo,
 Invitum nihil est : omnia sponte fluunt.
 Nil affectatum est : sed culta renidet ubique
 Simplicitas, qualem Roma vetusta probet.
 Ne tibi blandiriingas, Livine, sodalem.
 Quæ venit, ex merito laus tibi tota venit.
 Blandiri numquam didici, neque demere cuiquam
 Partem aliquam justæ laudis : utrumque malum est.
 Hei mihi! te numeris laudat mea Musa coactis.
 A numeris quantum dissidet illa tuis!
 Cur mihi tam sterilis, cur tamque malignus Apollo est?
 Me miserum, soli cur favet ille tibi!
 Sed non invideo : faveat magis. O mea felix
 Patria! si dotes noverit illa tuas.
 Audiat hunc unum posthac precor : illius ore
 Certa sibi Phœbum Pieridesque loqui.
 Nequidquam teneros non ille docebit alumnos
 Arida, pro veris fontibus, antra sequi.
 Infectos vitio rivos & sordida stagna
 Negligit, insanum quæ modò vulgus amat.
 Hoc duce Parnassi, si quo duce, culmina scandes.
 Novit quam tenuit, quæque tenenda via est.

PERILLUSTRIS DOMINI
D. OLIVERII
BARONIS DE REYLOF
A D
LIVINUM MEYERUM.

ODE.

*S*ic est : ad tumulum cogimur indies
Livine, & celerem precipitat gradum,
Quâ cuncti rapimur, dura necessitas.
Non, si nos atavis regibus editos
Inter conspiciæ fulgura gloria
Sors evexerit, aut Mars adamantino
Thoracem clypeo munierit, satis
Vitamus Libitinam. Omnibus, heu! semel
Calcanda est avida prona necis via.

Sic Divis placitum. Pars melior tamen
Nostri post cineres atque obitum manet,
Lethi nec didicit spicula perpeti.
Sunt multis etiam dona, quibus nequit
Mors inferre manus. Hos ciet ingenti
Dives copia se per liquidum aëra
Magnis regna super tollere honoribus,
Stellarumque globos & faciem poli
Metiri radio, scire quid imbrium
Tempestas, trifidi quid sit edax furor
Teli, quod celeri Jupiter impetu
In subjecta vibrat; quo Rhodope, & Mimas,
Atlantisque tremit rubiferum caput,
Et percussa gemunt acrocerama.

Causas

*Causas mens aliis tendit in abditas.
Quod natura, homines ludere pertinat,
Telluris mediâ nocte recondidit
Audaces penetrant, regnaque Tethyos
Intentata prius navibus, & sali
Æstus pervolitant mente reciprocis,
Vincentes studiis asperioribus
Chaldaeos numeros ac Babylonios.*

*Te dulces latebræ, templaque Phocidos,
Parnassique vocant antra biverticis,
Musarumque chorus. Flumine Pegasus,
Et rivo liquidi nectaris imbuit
Te Meyere : quibus fontibus ebrius
Assurgis volucris celsior alite.*

*Seu te Calliope non paribus modis
Iram sollicitat vincere ; seu ruis
Torrenti similis, qui rapidum jugis
Per prærupta soli & saxa sonantia
Cursum præcipitat, nec timidus sequi
Plenum nectareo flumine Pindarum,
Divinique chelym tangere Horatii :
Sive invitet opus nobile Virgilii
Augusta in trabea Caesaris ad pedes
Te præcepta novo tradere Principi,
Queis olim imperii sceptrum potentia,
Et famam patrii nominis impleat :
Seu sacra Alsatium ad fulgura purpure
Evectum celebres. Hinc superest tibi
Immortalis honos : hinc tibi gloria,
Quam non invida mors, nec fuga temporis
Nostris eripiet sera nepotibus.*

*Dignum laude virum Musa vetat mori.
I facunde senex : sub nive candida
Quæsitam studiis sume superbiam.
Lauro si viridi Pierides comam
Cingant, atque tuum judice Apolline*

XVJ

*Nomen Melpomene vatibus inserat,
Haud impar meritis officium tuis
Divæ præstiterint. O mihi si pares
Formatum ad numeros ingenium foret,
Æqualique potens ludere barbitō!
Sublimi peterem sidera vertice.*

O D E II.

Ejusdem ad eundem.

I*lla quæ clarum meditans Maronem,
Carmina umbroso chelys in recessu
Nostra deduxit, meliora sub te
Judice current.*

*Si probes versus, facies sonantes
Debiles chordas humilesque cantus:
Doctus immensum timidis poëtis
Addere calcas.*

*Jam tibi canis nivibus senectus
Hinc & hinc raros operit capillos,
Et duplex vitrum juvat imminuti
Luminis usum.*

*Integer mentis tamen usque toto
Pristinum spiras animo calorem,
Dum bis octavum meditatur ætas
Claudere lustrum.*

*Vatis Andini celebras cothurnos?
Illius versus referunt nitorem,
Nec minus calum petis invidendis
Nisibus audax.*

*Me per excultos mea Musa versus
Non eo fructu studiosa duxit.
Ista conantem vetat ad supremum
Tendere culmen.*

*Dum suam cantat Lalagen Horatî
 Omnibus curis amor expeditus,
 Victor auritas facit ire quercus
 Monte solutas.*

*Vere dum primo sonat inter altas
 Musa Livini numerosa silvas,
 Audiunt illam volucres, stupentque
 Dulce canentem.*

*Non magis passer tener est Catulli
 Lesbiæ nixus digito puellæ,
 Non magis culto Nemefim celebrat
 Ore Tibullus.*

*Magna Nasoni monumenta fama
 Non satis tuti peperere amores,
 Et, quibus surdas, gemitus, fatigat
 Cæsaris aures.*

*Tu tibi doctis elegis perenne
 Comparas nomen, pariter legendus
 Donec admittet bona censor equi
 Carmina Phœbus.*

*Ceteris dispar, tua quod pudicos
 Instruit mores, neque Musa castos
 Inquinat fontes, & ubique miscet
 Utile dulci.*

*Phyllidis tædæ macerent juventam
 Dum procos blando fovet ore fallax:
 Læsa Briseis lacrymis vagantem
 Poscat Achillem.*

*Phædra sit molli metuenda flammâ,
 Quæ furit circa jecur ulcerosum:
 Hero Leandri petat à remoto
 Oscula ponto.*

*Quæ trahunt fontes animas ad Orcum,
 Tu domas certis monitis, & Iræ
 Temperas æstum dominante freno
 Providus ultor.*

* *

Hæc

xviii

*Hæc tuis olim cecidit sagittis,
Quas vibras tenso metuendus arcu,
Jamque disparet cithara potentis
Territa pulsu.*

*Sic cui centum caput efferatum
Muniunt angues, fidibus canoris
Orphei cessit tremefactus ima
Fanitor aula.*

*Pallidus vinci sua regna Pluto
Sensit intortis Furias flagellis
Ire dejectas, metuisse totâ
Cum Styge manes,*

*Sceptra ne secum rapiens avarus
Raptor obscuros populet penates,
Conjugis quando repetita sursum
Ora reducit.*

*Me tuo credam gremio receptum
Magna nancisci, cui parva debent
Unda Permessi liquidique fontes,
Et juga Pindi.*

J. G. KERCKHERDERE
I N MEYERI
INSTITUTIONEM PRINCIPIS
EPIGRAMMA.

CÆcus Odiseiam cecinit jam debilis ævo,
Dum minus alta tonans, nec sat Homerus erat.
Tu primâ, Meyere, fuisti ætate Tibullus:
Cycneisne comis incipis esse Maro?
Fabula jam vera est: longo qui tempore Musas
Fugerat, en senior jam canit albus olor.
Carmine carnifices fregisti junior iras:
Nunc scelerum, vindex, proteris omne genus.
Occidit, heu! lecturus erat qui carmina Princeps.
O veniat tantum qui legat alter opus!

ODE PRÆVIA

AD REVERENDUM ADMODUM PATREM
NOSTRUMMICHAELEM ANGELUM
TAMBURINUM

PRÆPOSITUM GENERALEM

SOCIETATIS JESU.

Nunc Diva vati Calliope fave,
 Tuque ô merentes carmine qui viros
 Apollo subducis silentis
 Imperio tenebrisque mortis.
 Donare vitam tu fidibus novam,
 Obliviosæ victor inertiae

Gaudes, & heroum perenni
 Nomen amas celebrare cantu.
 Siquando, sacrâ nunc opus est lyrâ,
 Totoque Phœbo : dicere dum mei
 Famamque, virtutemque Patris
 Aggredior, meritasque laudes.

Tu qui cohortis militiam regis
 Loiolianæ, summus & arbiter
 Sparfos per Europen & Indos
 Imperio moderaris æquo
 Jesu sodales : me sine Michaël,
 (Quando ampla vati materies datur)
 Munus quod exerces supremum, &
 Angelicas memorare dotes.

Olim magistrum discipulis schola
 Te sacra vidit pandere dogmata;
 Quo nullus ambages resolvit
 Ingenio magis expedito.

* * 2

Non

Non te latebat quidquid in abdito
Scriptura sensu sancta recondidit.

Estensis hinc te Cardinalis

Theiologum sibi legit unum.

Mox celsiori conspicuus gradu,
Provincialis lenis, & efficax,

Amabili semper rigore

Imperium bene temperasti.

Dein * Thyrsus aptum jure Vicarium

Toti regendo substituit gregi,

Quem ferre tot duros labores

Deficiens prohibebat ætas.

Quo morte rapto; protinus omnium

Votis ad unum respicientibus,

Patrumque conspirante cœtu,

Eligeris, sine lite, Præses.

Te quippe tanto nullus in agmine

Inventus isto munere dignior,

Ipso Senatu purpurato

Concilioque probante Divûm.

Atqui sciebant quantum humeris onus,

Quantisque molem casibus arduam,

Ni te levaret nota virtus,

Tempore difficili subires.

Mars dum potentûm pectora Principum

Pacis rescisso fœdere dividit;

Vulgus suorum jura Regum

Prosequitur, rapiturque discors.

At non tuorum pectora, partium

Turbavit ardor. Turbinis inscii

Stetere concordēs, amico

Te te animos sociante nexu.

Dixisse crebrò te memorant tuis:

Sacrationem militiam Deo

Jurasse

* Thyrso Gonzales Prapósito Generali Societatis Jesu aetate & laboribus fracto, statutus est Vicarius Generalis.

Jurasse læti, cur moremur
 Mittere res hominum caducas?
 Tot nationes sint licet indole,
 Cultuque, linguâque, & patrio solo,
 Stellisque distantes, nec omnes
 Ingenitus ferat unus ardor:
 Quid tum? una cunctos patria nos manet
 Cælestis. Illuc tendite fervidi,
 Certentque cum Gallis Iberi
 Quis prior hanc potiorque miles
 Expugnet arcem: quisve potentior,
 Victis tyranni Tartarei minis,
 Tellure contemptâ per altos
 Regna polos meliora captet.
 Est barbararum copia gentium
 Ignara veri Numinis, ultimis
 Reposta terris, quas rubenti
 Sol oriens abiensque curru
 Lustrat jacentes; sed tenebræ graves
 Cæcutientûm pectora detinent
 Affixa falsorum deorum
 Cultibus, & Veneri nefandæ.
 Ite ite quò vos impietas vocat
 Delenda: ritus tollite barbaros,
 Mentisque cæcâ nocte pressas
 Ad fidei revocate lumen.
 Hæc una sanctis fixa laboribus
 Sit meta. Curâ dispare gaudeant
 Quicumque fidum bellicosis
 Regibus obsequium dicarunt.
 Sic filiorum corda potentibus
 Impulsa dictis exstimulas Pater,
 Et vocis exemplique luce
 Non pateris proavûm nepotes
 Cælo probandis cedere moribus.
 Quin usque per te Relligio stetit

Expers reformandæ senectæ , &
 Flore vicens animata primo.
 Quæ te piorum cura sodalium
 Servire sanctis fecit honoribus,
 Quos vidit hinc migrare virtus
 Et fugiens sine labe vita?
 Motus paterna sollicitudine
 Mox par tuorum nobile Pontifex,
 Kostkamque Gonzagamque Divûm
 Addidit ordinibus colendos.
 Tu lustra, raro munere Cælitûm,
 Quamvis bis octo jam numeres senex,
 Totosque viginti per annos
 Præpositus socios gubernes:
 Privata quævis commoda negligis
 In te severus : nam neque parcior
 Quisquam ciborum vel soporis,
 Quo reliquis brevior gaudes.
 Vultu sereno semper amabilis,
 Lenisque cunctis : semper & arduos,
 Obstante nequidquam senectâ,
 Impiger aggredieris labores.
 Osor quietis, singula perspicax
 Lustrare per te suetus, & omnium
 Provinciarum res sagaci
 Unus agis, dirimisque curâ.
 O tota quantum progenies suo
 Debet parenti ! scilicet omnibus
 Prodesse gaudes, nec remotos
 Destituis procul orbe Belgas.
 Belgæ perissent turbine Martio,
 Furente navis pressa velut Noto,
 Cum sæva tempestas carinam
 Verberat, & tabulis ruinam
 Minatur, alto naufragium mari
 Sparsura ; si non æquoris arbiter

Neptunus iratas amico
 Numine comprimeret procellas.
 Ille ut fugatis æthere nubibus
 Solem reduxit; lætitiâ fremunt
 Nautæ, coronatâque puppi
 Incolumes subiêre portum.
 Sic nostra te Provincia Præfide,
 Quassata longi fluctibus asperis
 Belli, reviviscens serenos
 Ire dies recreata gaudet.
 Quæ jure grates solvere debitas
 Non cessat, omni sollicitans ope
 Divos, ut albentis senectæ
 Canities tibi prorogetur
 Plures in annos : dum rutilantibus
 Formosa stellis te superâ domus
 Tellure migrantem receptet
 Ordinibus socium beatis.



APPROBATIO CENSORIS.

QUOD Lipsienses, viri sanè doctissimi, qui eruditorum opera & censent & compendio referunt, de tribus Libris *DE IRA* judicium pridem protulerunt, quod videlicet *ad veterum Poëtarum elegantiam, perspicuitatemque adspirent; si non & aliquos in his rebus superent*: id jure meritissimo de novem reliquis Libris, quos *LIVINUS MEYERUS*, Vir in Theologica non minùs palæstra quàm in Poëtica arte excultissimus, conscripsit, censerebunt omnes, qui vel tantillum de Heliconio fonte biberunt. Etenim hoc ipsi singulare est, quòd ubique misceat utile dulci, nec minùs Lectores ad morum honestatem incitet, quàm cantando delectet. Ita censeo. Lovanii Kalendis Augusti 1727.

HERMANNUS DAMEN
Sacra Theologia in Universitate Lovaniensi Doctor Regens, Decanus sancti Petri Lovanii, & Privilegiarum præfate Universitatis Conservator, nec non Librorum Censor.

FACULTAS

R. P. Præpositi Provincialis Societatis Jesu.

EGO infrascriptus Præpositus Provincialis Societatis *JESU* in Provincia Flandro-Belgica, potestate ad id mihi factâ ab admodum *R. P. N. Præposito Generali Michaële Angelo Tamburino*, Facultatem concedo, ut *P. LIVINI DE MEYER* Societatis nostræ Sacerdotis Poëmatum Libri duodecim, eruditorum ex eadem Societate nostra virorum judicio probati, per *Eugenium Henricum Fricx* hâc vice typis excudantur. In cujus rei fidem Literas manu mea subscriptas & Sigillo officii mei munitas dedi Antverpiæ 28. Augusti, anno 1727.

PETRUS MAELCAMP.



L I V I N I
M E Y E R I

E' SOCIETATE JESU
LYRICORUM LIBER UNUS.

ODE I.

AD PERILLUSTREM VIRUM
OLIVERIUM BARONEM DE REYLOF,
MÆCENATEM.


Ne tenues Musas meas supra meritum efferrat.



Uid me immerentem coetibus inferis
Amice vatum? cui neque Gratia
Risere nascenti, nec ora
Fonte sacro tetigere Musæ.
Non nubibus me Pegasus arduis
Tollit jacentem. Serpere sit satis
Tellure, mirarique longè
Pindaricos per inane nifus.
Vis sacra Phoebi quem rapit, audeat
Tentare pennis sidera. Me juvat
Inter myricas impolito
Fessum animum relevare cantu.

A

Audax



Audax, & impar viribus impetus
 Altè volantem perdidit Icarum.

Me terret excussus paternis
 Igne Jovis Phaëton quadrigis.
 Infirmittatis qui memor est suæ,
 Tutum modesto carpit iter pede,
 Vitatque nigrantes procellas,
 Nec trifidi pavet ignis ictum
 Securus alti fulminis. Hospitem
 Me si virenti villa sub ilice

Condat latentem; sat beatus.
 Non superos meliora posco.
 Tu nostra cautus desine carmina
 Laudare. Nudum me sine lividos
 Sentire morsus, & novorum
 Grande supercilium Catonum.
 Placere paucis est hodie datum.
 Sic Phœbus, & te Pierides ament,

Curare contemnat profani
 Judicium tua Musa vulgi.
 Vis insolentis cæca licentiæ
 Audet Maronem carpere : nec meis,
 Tuisque Mæcenas Camœnis
 Dente nigro, mihi crede, parceret.
 Jungamus arcto fœdere dexteras,
 Nos ne moretur livor inertium,
 Quin usque tranquilli petamus
 Otia, deliciasque Pindi.

Gratemur & si quis melioribus
 Nos antecellat carminibus : neque
 Insanientis more turbæ
 Invidiæ rapiamur æstu,
 Doctis parati cedere lauream.
 At si imperitus nos agitet canis,
 Spernamus insultus inermes,
 Ut catulos sonipes minores.

LIBER UNUS.

O D E II.

AD SCCELERATOS,

Quod justas pœnas effugere diu non possint.

Quisquis effreni nimium juventâ
Fisus, æterni imperium tonantis
Spernis insultans, & inane credis

Tartara nomen:

Aureas semper fuge suspicari
Ponè venturas sine nube luces.

Nîl diu lætum ineditatur annus,

Et brevis ætas.

Ociùs fastum premet insolentem
Sæva vis morbi, scelerumque vindex.
Heu! moras nescit (mihi crede) lentas

Ira Deorum.

Fulmen occulto jaculantis ictu
Senties dextram. Fugient retrorsum
Candidi soles, nec amica quondam

Tempora veris

Floridas umquam referent quadrigas.

Asperæ morfu jecur ulcerosum

Different curæ, Furiæque nexis.

Angue capillis.

Non tibi cordis pavidum tumultum
Molliet Bacchi liquor, aut Cupido,
Quæque olorinis Dea findit udim

Æthera pennis.

Nîl opis luxus, nihil (heu!) Juventas

Flore succinctos religata crines,

Nîl feret cantus choreæque, seræ

Noctis amantes.

4 L Y R I C O R U M

Sive nigrantes fugias ad Indos,
Seu reus terras penetres sub imas,
Pœna veloci pavidum sequetur

Ocior Euro.

Vidimus sævos trepidare Reges
Fata, suspectique dolos veneni.
Trinacris testis, Siculæque mensæ
Pallidus hospes.

Ore jejuno positas Tyrannus
Horruit fraudes, licet inquietum
Cingeret miles latus, & timendus
Ense fatelles.

Ipsa mens culpæ memor, æstuanti
Volvitur motu, rapiturque discors
More bacchantum : nec amara portant
Somnia pacem.

Non scelus vitæ fatis expiabit
Pœna præsentis. Levis illa mors est
Quæ semel solvet sanie fluentes
Corporis artus.

Finis expertes feret hora luctus
Ultima. Hinc raptos lacerabit olim
Pœna Cocyti, triplicique rictu
Cerberus ultor.

Vultur æternis Tityum cruentat
Unguibus, lentusque trahit renascens
Vulnere ex ipso jecur, & voraci
Ilia rostro.

Fertur Ixion celeri rotatu,
Sisyphus saxum grave semper urget,
Tantalum vexat sitis, imminentis
Et fuga pomi.

Manibus non est requies scelestis.
Tu brevis vitæ memor & fugacis
Temporis, cujus mora non retardat
Ulla volatum,

Corrige insanos animi tumultus,
 Vindicem culpæ metuens severum :
 Dumque fas , longas venientis ævi
 Effuge pœnas.

O D E III.

AD ADOLESCENTES

Poëtica artis amantes , ut à libidine avocentur.

TUripibus intactos conservet amoribus annos
 Nullâque pulsus ferveat libidine,
 Ingenio vivax si quis puer artibus olim
 Polire mentem carminum decentium
 Cogitat, & sacras penetrare ad Apollinis arces :
 Ubi rigat antra semper uda Pegasus,
 Et sua virgineæ contendunt plectra sorores,
 Nervisque colles obstrepunt loquacibus.
 Crede mihi, castos amat hic Deus : & benè Cypron
 Pindumque vasto separavit æquore.
 Arduus & nubes parnassus despicit , audax
 Puer volatu ne minetur assequi,
 Qui malè cœlestes invadere creditur arces ;
 Terrena lætus subjugare corpora,
 Ut scelus exemplis mollirent turpe Deorum,
 Finxêre Divos (heu nefas!) adulteros.
 Non auro puduit , non Cycni condere pennis
 Jovem, relictis Cœlitum cubilibus.
 Ista fuit veterum probrosa licentia : quorum
 Commenta constat non probasse Delium.
 Postera ne veteres imitentur sæcla Poëtas,
 Musæ nepotes admonere me jubent.
 Eia agite , æthereo de semine nata juvenus,
 Libidinosa peste corda solvite.
 Inquinat hæc animum, & tetrâ caligine mentem

Fuscate : lutosi ut vaporibus palus
 Litoreis atros aspirat floribus ignes ,
 Quos luce Titan fuscitaverat suâ,
 Vincula solvamus Veneris servilia, Dextro
 Pindum occupare quid moramur alite ?
 Quò Deus, & melior mentis vocat ardor honestæ,
 Stimulisque Virtus incitat potentibus.
 Nectar ubi casiamque pio gustabimus ore,
 Et Gratiarum confidebimus choro :
 Pluraque sublimes mirabimur ; ut neque tristem
 Frondosa brumam sentiant cacumina :
 Canities viridem excipiat neque pigra juventam,
 Nullisque morbus torqueat molestiis.
 Sed florentia prata, sed unum & perpetuum ver,
 Et temperatis aura stat caloribus.
 Non hunc erecto confurgit vertice vulgus,
 Nec sordidus Cupido contulit pedem.
 Hic Paphon atq; Cnidon colit, atq; infamia crebris
 Acuta tempestatibus ceraunia,
 Nos super hæc niveis tollentes corpora pennis
 Quietiore perfruemur æthere,
 Cultaque, venturis nec deficientia sæclis,
 Scribemus æstro concitante carmina,

O D E I V.

IN OBITU SERENISSIMI PRINCIPIS
 B A V A R I Æ ,

*Ex Matre Austriaca, omnium luctu Bruxellæ immatura
 morte sublata.*

B Ruxella questu quid lacrymabili
 Cælum fatigas? desine Principis
 Sperare dilecti salutem, &
 Sera piis dare thura templis.

Nîl vota, nîl suspiria ferreas
Movere leges. Occidit, occidit
Flos patris, & spes ampliandæ
Magna domûs, Bavaræque stirpis.
O! quæ paternos barbitos exprimet
Cantu dolores? Indigetes Dei
Fauniquæ, silvestresque Nymphæ
Dicite, quos gemitus remotis
Audistis antris? ut miserabili
Excessit aulâ, & per juga montium
Heu! perque brumales pruinas
Saxa feris habitata visit.
Ceû quondam amatam Persephonem Ceres
Clamavit altis faucibus rupibus;
Frustrâque devovit rapaces
Ditis equos volucemque currum:
Prædam ille velox non revocabilem
Fuscis stupentem sedibus intulit:
Sic ille formosus paternos
Destituit fugiens amores
Immitis Orci victima flebilis.
Nequidquam amaris pectoris æstibus,
Luctuque singultuque patris
Sonniacæ sonuere silvæ.
Non purpurarum fidere lenies
Inscripta duris fata adamantibus,
Aurove flectes obstinatas
Eumenides, rigidasque Parcas.
Mors sæpè bustis & popularibus
Infert superbis arida postibus
Gressum, triumphatosque Reges
Pauperibus sociat colonis,
Ignara cuiquam parcere; Tænari
Condensat atris limina manibus,
Imosque & insignes metendo
Sceptra super volat & coronas.

Hanc fax, & ignes, & sopor ultimus,
 Noxque una cunctis irremeabilis,
 Diræque circumstant cupressi,
 Et lacrymæ miserorum inanes,
 Ille ô beatus! qui rutilantibus
 Adscriptus astris, atria Principum
 Lustrat supernorum, & sepulcrum
 Parte sui meliore vitat.
 Iosephe quò te simplicitas tulit,
 Et vita nullo noxia crimine:
 Sceptra unde, telluremque spernis,
 Imperii potioris heres.

O D E V.

AD JACOBUM WALLIUM

E SOCIETATE JESU,

Quod in quadam Elegia cum Senem vocassem

P A L I N O D I A.

Adsis rustica Musa, & inficeta,
 Digna collibus exulare sacris!
 Versus nescio quos stupente venâ
 Dictasti misero malos Poëtæ.
 Adsis nunc melior: tuoque vati,
 Illi, quem veteres stupere possent,
 Plectro carmina justiore canta.
 Hujus carpere non quidem libellos
 (Doctos Jupiter! & sacros libellos!)
 Ausa es tu: (quis enim hoc ineptus ausit?)
 Illum sed vetulum ausa nuncupare,
 Et perstringere corporis senectam.
 O factum malè! Crimen hoc piandum.
 Atqui non tacito hoc rubore sensit:
 Quam-

Quamquam diffimulavit, & faceto
Absterfit sale Wallius Poëta.
Non hâc se querulum arte comprobavit,
Immitem, tetricum, vel invenustum;
Sed blandum, facilemque, candidumque,
Cui rident Charites, Lubentiæque,
Cui ridet Lepor ipse, Comitæque,
Et nudo pede Gratia volantes;
Talem denique, quem senem negare
Vel Flaccus, Satyrâ approbante, possit.

Istis hic meritò laceffit aures,
Istos vellicat impetitque morfu,
Vicinos subitò ferire fuetos,
Qui norunt tremulo insequi bacillo,
Et totas malè murmurare luces.
Istos jure putat senes vocari
Iratos, querulos, graves, severos,
Exosos reliquis, sibi molestos,
Prisci temporis optimos patronos,
Præconesque juventulæ peractæ:
Qui nîl parcere vindices fuërant,
Læsi vel digiti impetentis iëtu.
Et ne persequar omnia, explicemque,
Istud queis animo ratum atque fixum est,
Collaudare nihil, nihil probare:
Omnes negligere, & putare parvi,
Ceu fungosve, merasve noctilucas.
Hos horrent pueri & puellulæ omnes,
Horum & funera servuli precantur
Primo Lucifero, Hesperoque sero.

Ausus, Musa, tuos inepta cernis?
Ni te pœniteat, tuumque crimen
Et linguæ vitium procacioris,
Et nigrâ pice nigriora verba,
Novo corrigis expedita cantu:
Tum Phœbus tibi Pegasusque vindex,

Et quidquid juvenum est ubique vatū,
 Et quos Elysiâ recepit umbrâ
 Judex Æacus, arbiterque cymbæ,
 Offensi mala multa comprecantur,
 Et cogant meritas subire poenas,
 Et toto procul exulare Pindo,
 Atque exesse jugo, velut profanam.

Audimur : tremulam impulit fenestram,
 Supplex atque oculo fatente culpam.
 Mox & versiculos venustiores,
 Hos paucos calamo tremante scripsit :
 Imprudens Dea Wallium precatur
 Errati veniam, malæque linguæ,
 Senem dicere quæ sit ausa vatem,
 Omnes qui juvenes virore vincit,
 Omnes qui superat canore vates.

O D E VI.

A D A M I C U M P O E T A M,

Artem Poëticam Macenatibus foveri.

Vates dum canit Ilion,
 Et captiva senis mœnia Dardani :
 Cæsar Virgilio tubam
 Deprompsisse suis ipse penatibus
 Fertur, Chrysolithis gravem.
 Hæc vates cecinit, quod vagus ultimis
 Audivit Boreas plagis,
 Audivit roseis manè cubilibus
 Titan, & Zephyri domus.
 Non hæc Pegaseis gloria fontibus
 Venit, non Heliconiis
 Derivata jugis. (vera fatentibus
 Pindi Numina parcite)

Mæcenas Latiis carmina vatibus
Inspiravit, & ingent

Fœcundavit opes. Scilicet aureis
Phœbo fama potentiùs

Instigat stimulis, atque ederae levant
Circùm tempora nexiles,

Et mansura super gloria posteris.
Testis Gallia, quam beat,

Et spectata bonis instruit artibus
Regis munificentia.

Hortorum hic speciem, & veris amabiles,
Flores, delicias canit :

Hic belli strepitus, & Batavos lacus,
Captivis Aquilonibus,

Gallorum faciles imperium pati,
Rhenus quod stupuit pater.

Hic dulces elegos : hic veterum sales
Mordaci satyrâ implicat.

Nec te præteream culta Neapolis,
Neptunum & virides Deas

Aptam Mæonio dicere carmine,
Prædamque ad cava litora

Inclusam madidis vertere retibus,
Dux quam Cardenides probet.

Heu! quondam cytharæ Belgiacæ decor!
Quô te turpe silentium

Facundam tacito condidit angulo?
Cur mentem, ô focii, vigor

Segnem deseruit? cur calami stupent,
Sacri venaque pectoris,

Et turpi studium cessit inertiae?
Num nos de sterili luto,

Cœlestis vacuos mentis, & ignium,
Divinam composuit manus?

Non hoc credere fas : sed magis impius
Mavors abstulit otia,

Et fortuna bonorum indiga censuum
Musis præsidium negat.

At si versa, malas fors variet vices,
Saturni referens dies :

Tum tu Lisa pater, parvaque Tungria,
Quondam Sidronii domus,

Et sedes focii candida Wallii,
Oris clarior Atticis

Rursus multiplici vate superbies.

O D E V I I.

H O R A T I I

Principis Lyricorum laudes.

F Lacce lyrâ cantuque potens hærentia vivis
Movere saxa rupibus,

Threïciumque nemus

Carmine nativis traducere montibus, ut qui

Acheronta rupit Orpheus;

Thracia quem Rhodope

Olim admirata est animos mollire ferarum.

Tu Pindaro potentior,

Carmen ad Ausonios

Deducis numeros variâ testudine vates :

Ut nuper ales Daulias

Cædem Ityli memorans,

Omnia Dædaleo discrimina gutture vocum

Princeps recenset alitum :

Sic lyra pulsa manu

Nîl humile aut enerve sonat; sublimis & audax

Vexare cantu fidera.

Sive agitas vitium

Censor, & errantis mordes commissa juventæ,

Morum peritus arbiter :

Aurea sive canis

Ob.

Observanda sacris quondam præcepta Poëtis,
Non posteris exactius

Græcia liquit opus :

Aut Mæcenati si comis epistola fertur
Legenda, vel Neronibus :

Omnia plena Deo,

Gratiaq; utilitasq; comesq; ambobus honestum,
Decorque qui vulgum latet,

Sideriusque furor,

Singula divini sunt ornamenta Poëtæ,
Cui Roma vix tulit parem,
Sæcula nulla ferent.

O D E V I I I.

IN PODAGRAM.

Ejus dolores acutissimos ac incurabiles esse.

QUæ dira pestis ossa corrodit mea?
Quæ missa Cocyto lues

Acrem & tenaci glutine adstrictum intimis

Nervis furorem dividit?

Expressa num quis viperis mordacibus

Venena porrexit mihi?

Potensve saga toxicum nocentius

Nostro cruore miscuit?

Non si caminis corpus Ætnæis sonet,

Et monte Cyclopum premar,

Bituminosis aut adurar ignibus

Edace mixtis sulphure,

Serpens medullis penitus exesis malum

Inæstuet ferventiùs.

Noctem, & papaver vincit insomnis dolor:

Nec molle pulvinar juvat.

Quin & tumorem siderum allapsus gravat,

Et

Et horridum silentium.
 Ferocientes interim morsus lues,
 Iramque & arma duplicat.
 Dein mille velox, more Parthorum, vibrat
 (Heu fulminis vim!) spicula.
 Quod si minutis pallium contactibus
 Vel extimam radat cutem,
 Quis credat? & virilis ejulatio
 Clamore tormentum levat.
 Nullumque tantis luctibus solatium
 Adfert amicorum cohors,
 Præter jocos risusque languenti graves.
 Nil & Machaon adjuvat,
 Fastidiosus inclytus liquoribus
 Lenire morbos ceteros.
 O! quis podagram mitis afflictis Deus
 Ad ima vertat Tartara!
 Tormenta quid diversa vates fingitis?
 Cur Sisyphum vexat lapis,
 Fugaxque ramus Tantalum? Pœna omnibus
 Hæc una sit nocentibus.

O D E I X.

A D S U P E R O S

Pro pace.

I Am fatis terrâ pelagoque fufum
 Sanguinis, fat pugnæ. Inhonora quærunt,
 Sparfa quæ totis jacuere campis,
 Offa sepulcrum.
 Mitiùs nostris propiùsque rebus
 Numen aspira. Tibi pœnitentes
 Tendimus dexteras, veniamque culpis
 Ritè precamur.

Sive

Sive te vulgi furor insolentis
Læsit, aut sanctas violavit aras
Ore pollutus, neque thura dignus

Ferre Sacerdos:

Sive contemptâ face nuptiali
Improbis fedit thalamis adulter:
Sive perjuræ nocuere linguæ, &

Alea pernox:

Tu bonus nostris facilisque partem
Tolle commissis: neque fulminanti
Perge tellurem, mala multa passam,

Perdere dextrâ.

Audiit nostræ sonitum ruinæ
Africæ custos Capricornus oræ:

Audiit longè pelago renascens

Phœbus ab Indo.

Vos, quibus supplex famulatur Orbis,
Fervidos lenite Dei tumultus
Principum: jungatque manus Britanno

Gallus amicas.

Hactenùs Martem coluisse fas sit.

Si quid irarum remanebit ultra,

Differant mites meliore pennâ

Per freta venti.

Virginum mores senibus probandos

Alma pax terris feret, & jugali

Lege contentos religabit arcto

Jure parentes.

Pace Saturni remeabit ætas:

Pace fœcundis peraranda sulcis

Aureas messes meditatur, odit-

que otia tellus.

Hinc fames, hinc frugis inops egestas,

Febrium hinc nigræ fugient cohortes,

Et venenatis Erebi colubris

Turgida pestis.

Urbis

Urbibus flammâ tonitruque ahenò
 Dirutis, dextrâ faber expeditâ
 Destinât priscum decus, & sonoros
 Mulciber iētus.

Marte depulso, renovatus Orbis
 Surget oblitis melior ruinis:
 Aridam ut pellem positura acuto
 Vipera saxo

Lætior squamâ nitet, & virenti
 Accipit soles maculosa tergo.
 O! quis in torvos inimica Parthos
 Bella releget!

O D E X.

PACEM BELGIO, POST EXUSTAM
 BRUXELLAM

*Captumque à confœderatis Namurcum, restitutam
 gratulatur.*

O Ptata terris sidera Belgicis
 Luxêre. Tristes hinc querimonix,
 Bellique discedant tumultus:
 Nunc superis dare thura tempus:
 Nunc & sonoro dicere carmine
 Firmata pacis fœdera. Da puer,
 Da plectra, vocalisque lætos
 Barbitos expediat triumphos.
 Tandem Britanno milite solvimur,
 Galloque, Danoque, & Batavus fretum
 Natale, piscosâsque ripas
 Retis amans tetigisse gaudet.
 Pugnata multis prælia messibus
 Contaminârunt sanguine Belgium,
 Aræque divorum perustæ, &
 Versa solo jacuere templa,

Bruxella

Bruxella testis tota furentibus
Absumpta flammis, dum volitant super
Massæque prægnantis metalli
Æthere præcipitant ab alto.
At non tot atris fulminibus minax
Vis dira belli pectora civium
Dejecit, audentemve retro
Vertere iter Bavarum coëgit
Majora fuetum ferre pericula.
Inter ruinas impavidus stetit,
Globosque tormentorum, & acrem
Egit equum medios per ignes :
Privata lætus spernere vulnera,
Liber catenis dum Mosa Gallicis,
Arcesque, perruptæque rupes
Ad dominum redeant priorem.
Vis foederatâ quid valeat manu
Hinc sensit hostis : res ubi serias.
Urgere pugnaces laborant,
Consiliis animisque juncti.
Lux una clades tot miserabiles
Lenivit. ô qui jungitis agmina
Arctoa Belgarum manipulis,
Cur toties inimica vestris
Illusit armis Gallia? quas moras
Incussem inertes? quæve piacula?
Cur clade non unâ minaci
Gallus eques metuendus ense
Vestras cohortes contudit impiger?
Dicamne vobis ad fera prælia
Pallêre vultus, imminentem
Et pavidos metuisse mortem?
Absit. Quid ergo militiæ obstitit
Confoederatæ, quo minus hostium
Deleret alas, & decoro
Lilia dejiceret triumpho?

Bellona præfens quæ regit agmina,
Bellique casus ancipites videt,
Respondit : Inter præliantes
Ferro acies dubiamque sortem
Quæ causa Gallo profuerit , loquar.
Nempe ille voci promptior obsequi
Ductoris, uniusque velox
Imperiis equitare miles
Quocumque belli provocat impetus :
Sive explicatis ordinibus pedes
Staret juvenus : sive rupti
Sulphure diffiluere muri.
Vos sæpe lentum perdidit otium,
Vos cura discors , signaque serius
Collata, divisumque multis
Imperium, arbitriumque pugna.
Nativus illum pro lare proprio
Incendit ardor. Quisnam amor exteras
Pro patria everfisque Belgis
Exstimulet , rapiatque gentes ?
Quæ cura martis ? quæve necessitas ?
Privata quivis (crede mihi) bona
Urgente metitur periclo , &
Temperat utilitas decorum.
Quid exterorum copia militum,
Quondamque vestris foedera dexteris
Commisssa , venalesque turmae,
Et pedites Aquilone missi
Profunt ? inertes languor & otium
Si condit enses ? si patriam procul
Respectat, & molles anhelus
Concubitus thalamosque miles ?
Mercata virtus vitat acinaces
Secura laudis : ludere promptior
Inclusa murorum recessu,
Marte procul calidaque pugna.

Non milite illo Gallus in ultimos
 Ivit Batâvos, cornua dum ferox
 Demisit exsternata Rhenus,
 Et gelidi tremuistis axes.
 Sed bellicosus orta parentibus
 Nervosa pubes, docta sitim pati,
 Solefque, duratamque nimbis
 Canitiem, minimosque somnos,
 Perrupit acri mœnia milite,
 Et stagna longis uda natatibus
 Vicit, triumphatumque turpi
 Implicuit Boream catena.
 Hæc diva dicens, ex oculis procul
 Secessit. At me corripuit timor
 Tutumne sermones referre
 Sit superum, licitumque vati.
 Non Martis ignem, non ego pristinas
 Clades, sed icti gaudia fœderis
 Cantare decrevi, gravemque
 Ex animis remove luctum.
 Quo Musa tendis? desine vulnera
 Vexare tactu, & vindicibus deis
 Dicare festina tropæum,
 Pace data, positoque ferro.

O D E XI.

A D I R A C U N D O S,

Pacem privatis amicorum dissidiis temerandam non esse.

Non sic Turnus in hospitem
 Exarsit Phrygium, Troïca finibus
 Portantem Latiis sacra:
 Non sic cornibus audax adamantinis
 Taurus Thessaliæ Ducem

Afflavit magicis Colchicus ignibus :
 Non sic Hector, & efficax
 Pugnavit Pyrrhi pro ratibus pater,
 Anni quod gemerent decem :
 Ut vos immemores in scelus impulit
 Linguæ cæca loquacitas,
 Oblitosque Deum. Jungite dexteras :
 Ne Phœbus mala crastinus
 Spectet, præteritus quæ tulerit dies.
 O ! mites Zephyri precor,
 Trans Alpes gelidas, litoraue ultima,
 Et solis roseam domum,
 Ferte hinc sanguineis nata furoribus
 Mentis jurgia non bonæ.
 Sic & juncta novis pectora amoribus
 Æternâ coëant fide,
 Ut vincant focii fœdera turturis :
 Nec sint juncta tenaciùs
 Lascivis ederæ brachia populis.
 O ! felix amor arborum !
 Quis vos edocuit nexilibus fidem
 Servare implicitam comis,
 Et binas animâ vivere mutuâ ?
 An vos & volucer puer
 -Intactas pharetrâ noluit aureâ ?
 Atqui jurgia livida
 Absunt. Nos homines, deterius genus,
 Cæci fœdera frangimus,
 Et lædi faciles arma reposcimus,
 Ut si Parthus, & insolens
 Dacus sepositas diripiant opes,
 Aut ictus pede Theſſalus
 Anguis, cum glomerat corpora saucius.
 Sic est : culpa nepotibus
 Majorum luitur : nec finit impius
 Fraternæque reus necis

Frater, nos vacuos vivere criminum.
 Hinc discordia posteros,
 Infelixque odium, & semina pallidæ
 Infecere libidinis;
 Postquam dividuis ara vetus pyris
 Partitis stetit ignibus,
 Maxillæque cruor fusus, in atria
 Scandit summa minax : grave
 Exorans meritis supplicium reis.

O D E X I I.

A D A M I C U M

*Hortantem ut carminum libellum quàm primum luce
 donarem.*

O Uid me difficilis censor inertiae
 Damnas immeritum ? Parce recentibus
 Uvis, exigui quas mora temporis
 Maturas tibi porriget.
 Qui partu celeri nascitur, & novem
 Lucinam citius mensibus evocat :
 Huic raros puero Luciferos dedit
 Parcâ Persephone manu.
 Curas adde graves. Non ego Tusculis
 Vates deliciis rusticus immoror :
 Me nec villa tenet, fontibus & sacra
 Perlucens nemorum comâ.
 Heu ! Pallas studio damnat, & artium
 Divinarum adytis sollicitum implicat.
 Quem Phœbo tribuam, rariùs integer
 Furtim surripitur dies.
 Hæc te scire juvet : carmina ne putes
 Fungorum in numerum crescere noctibus.
 Docti iudicium quis timuit satis,
 Et fastidia sæculi ?

Pelignum, & gremio Mantua quem tulit,
Audax posteritas cenfet, & (ô nefas !)
Divini numeros carpit Horatii,

Quæsitura diu pares.

An, quæ præcipitem fors maneat, vides?
Quare defidiæ tu mihi dedecus
Objectare cave. Tempus inutili
Prudens non tribues moræ.

O D E X I I I.

AD HUMBERTUM GUILIELMUM

*A Precipiano, Illustrissimum Mechliniensium
Archiepiscopum,*

FOrtuna quæ te Belgiacis dedit
Humberte terris, optime Præsulum
Orbi colendorum, & sacrarum
Grande decus columenque rerum?
Te Fraus & Error, te caput artibus
Exculta vaftris Impietas tremit :
Te Styx, & armatæ colubris
Eumenides, scelerumque pestes
Odere. Monstris quippe pedem super
Urges, & Orci proteris agmina
Victor, tot excitis in unum
Hostibus, invidiâque major.
Frustrâ Batâvis orta paludibus
Stridet minaci Vipera sibilo;
Rictuque mordacique linguâ
Bella movet, tumidâque caudâ :
Injurioso prompta volumine
Fuscare nomen, si potis est, tuum.
Sed Candor, & Virtus malignum
Spernit opus, tenebrasque vincit.

Sic

Sic luminum Princeps rutilantium
Sol, dissipatis æthera nubibus
Serenat, & puros ab ortu
Jungit equos radiante curru.
Non te gerentem prælia pro fide
Arisque divûm, turba potens premet
Adversa, fallacique mendax
Ore pios imitata vultus.
Non hostium vis bruta latentium
Audax sacrato illudere vertici,
Mitræque concessos honores
Sacrilego violare morfu,
Infringet alti pectoris impetum
Curamque recti. Testis Iberia,
Alpesque, servatque Belgæ
Quid valeas, ubi marte sacro
Burgunda virtus fulminat. Ociùs
Fugam rapaces præcipitant lupi :
Pratisque gaudentes capellæ, &
Lanigeri recreantur agni.
Armenta saltus tuta perambulant,
Tenduntque summis ubera cruribus,
Dum fidus insani Leonis
Mobilibus nemus arcet umbris.
Te fontium imbres deficientibus
Ciente campis, pabula collibus
Herbæque succrescunt salubres,
Flore cavas variante valles.
Perge ô ! tuorum justa clientium
Fulcire sanctis vota laboribus.
Dî te reservârunt tuendis
Ritibus, Ausonioque juri.

O D E X I V.

AD NOBILEM AC REVERENDUM D.

*Dominum Franciscum Xaverium Martens, cum
anno 1689. sacras Deo primitias solenni
ritu offerret.*

Felix Triptolemi labor!
 Qui glebis Cererem fertilibus dedit
 Post fastidia glandium.
 Hinc fœcunda dapes ambrosias tulit
 Conversa in melius Ceres,
 Postquam (consilio non sine Numinis)
 Sub velamine candidæ
 Hospes non dubius se litat hostiæ
 Terrarum pretium Deus.
 At felix magis (ô) quisquis in æthera
 Jus, atque imperium obtinet:
 Et Regum titulis ille beatior,
 Qui linguæ arbitrio sacræ
 Numen de superis sedibus excitum
 In terras potis infimas
 Unius sonitu flectere vocolæ.
 Non hoc Cæsaribus licet:
 Quamvis Austriacâ nobilis in domo
 Parthis jura fugacibus
 Scribat, Sauromatas & licet ultimos
 Victor servitio premat.
 Hic Istrum imperio: tu Superos regis.
 O! dignus patre filius!
 O! dignus simili progenie pater!
 Quando hic nec vetat inclytis
 (Queis fulsit toties Consul) honoribus
 Æternum vale dicere, &
 Commutare sacrâ divitias togâ,

Re-

Rerum non malus arbiter :

Nec tu, cùm refugis quas tibi serior
Maturabat opes dies,

Cœlestem dubitas militiam sequi,
Virtus quò vocat ardua,

Et pulcris Pietas incitat ignibus.

O Luxûs fuga nobilis!

Et quâvis potior Martis adoreâ!

Quid non, quem Superi semel

Aspersere sui munere nectaris,

Castis audet amoribus?

At tu care tamen quò properes, vide :

Heres nominis unice,

Et stirpis columen non reparabilis.

Ah! ah! parce precor, precor,

Incautis animum stringere vinculis.

Non spes perpetuæ domûs,

Non longis series fracta nepotibus,

Ridentisque favor Deæ,

Immites animos flectit, & asperis

Cœptam consiliis viam?

Atqui fors geminjs blanda fororiis

Ut dudum faveat, vides,

Provectura novos in titulos genus.

Curas quin age cælibes

Depone, & niveum sollicitantibus

Velum pande favoniis.

Frustrâ est. Propositi non violabilis

In sublime tenax ruis,

Et depulsa mali tela Cupidinis

Scuto vertis aheneo :

Audax & volucres spernere Cyprias,

Et risum Veneris brevem.

Quin & te stimulis non levibus pater,

Exemploque modestiæ,

Et pulcris animi dotibus impulit

Parvi pendere noxias,

Tellus quotquot habet, vel mare contegit
Cæco divitias sinu,

Et curis animum tollere lubricis.

Nec fratrum præeuntium

Te virtutis amor, nec pietas latet.

Tu stirpis decus ultimum,

Tu consanguineis natus honoribus,
Fortunam pede nobili

Calcas : tu superis languidus ignibus,
Fascesque, & maris Indici

Gemmas, non stabili lumine splendas,
Rides. Sed quis amabilis

Aures lætitiæ perstrepuerit sonus?

Quò vulgi ruit impetus

Undantis? juvat ô! cernere lucidas
Festis luminibus faces,

Araſque, & Tyrio murice nobiles
Pallas ſacrificantium.

Audis? ut reſonent atria cantibus,
Cum dolci citharæ ſono,

Ut longis fugiant thura vaporibus?

Quò me pompa vocat, ſequor.

En ſacris humeros ſubdit amiſtibus,
Et Xavêrius aureâ

(Ne deſideriis ſit mora longior)

Incedit paterâ gravis.

Fratres officio non inamabili
Hinc, atque hinc ſociant latus.

Portatur manibus viſtima candidis.

Præcurrunt faciles Deæ

Spes, & cana Fides, raraque Caſtitas
Spargens lilia poſtibus.

Illum, quâ properat, Gratia & anxius
Retrò compoſuit Decor,

Et gratis Pietas afflat odoribus.

Jamque aram tenet, & piis
Longè pulsa sonant atria vocibus.
Ut cœlo litat hostiam,
Mutatis fugiunt vina liquoribus,
Sensus quod neget arbiter,
Vanescitque Ceres : certus inanibus
Sub spicis latitans Deus,
Menti, non oculis, conspicuus patet.
O felix! & amantibus
Expectata dies! ô Amor aureis
Huc allabere curribus,
Arcumque & pharetram, non sine vulnere, &
Tinctis nectare spiculis
Adfer : jam liquidas flamma medullulas
Et præcordia vellicet.
Jam jam, ceu violæ quæ modò languidum
Declinant radiis caput,
Aut primis glacies saucia solibus
Rivis mobilibus fluit,
Sic ô! sic tenero vulnere languidus,
Longos inter anhelitus
Suspiret puero sponfus in hospite.
Nec desiderii modus,
Nec finis lacrymis sit, nec amoribus,
Donec jam fugiens dies
Xavêri, vigili cesserit Hespero
Stellis suavè micantibus.
Sic & te juvenem sæpè pater senex
Aris aspiciat sacris
Mulcentem niveâ fidera victimâ.
Felix! qui superas domos
Prudens, & volucris temporis exitum,
Lethique ancipitem viam
Vitæ de roseo limine prospicit,
Metiturque diem die.
Virtus, crede mihi, sola perennibus

Ditat post cineres bonis,
 Cultoremque beat : cetera diffuunt
 Ceu nubes properantibus
 Prætervecta Notis ; cervaque ceu levis,
 Latratu subito excita,
 Cum densis volitans pulveribus fugit.

O D E X V.

AD SE IPSUM JAM SENEM.

Senibus non amplius favere Apollinem.

LUstra bis septem mea vidit ætas,
 Tertium & lapsis superaddit annum,
 Nec mala tussi levor, inquietus
 Nocte dieque.

Ultimam nobis Libitina lucem
 Nuntiat, bustoque minatur horam
 Ire vicinam : tamen usque Phœbus
 Calliopeque

Ducit ad sacras Heliconis umbras,
 Ducit ad fontes : mea nec liquore,
 Quem bibit largè sitiens juvenus,
 Ora rigantur.

Tantali pœnam cupit experiri,
 Captat & rivum fugientis undæ,
 Si quis invito meditatur ævo
 Condere carmen.

Hoc opus poscit bene temperatum
 Sanguinem. Marti velut ille miles
 Gratus, ardenti pede qui frementem
 Tendit in hostem

Nec senex nec jam puer, at virilem
 Exserens ignem, mediumque robur.

Turpis in campo vetulus, senili

Debilis ævo.

Turpior multo, mihi crede, vates

Ore qui rauco strepitat poëtas

Nobiles inter, velut inter albos

Anser olores.

Quid moror toto procul ire Pindo?

Audiunt, ridentque novem sorores,

Quem gravant anni, senio trementem

Tollere vocem.

Dum Lyræ tento sociare cantum,

Hæret ad scabros mihi lingua dentes,

Apta nec metri numeris replendis

Verba sequuntur.

Deficit mentis vigor impetusque,

Qui solet sacros animare vates:

Vena limoso fluitare nescit

Obsita muco.

O vale multum mihi cara quondam

Musa, vosque ô perpetuo valete

Antra Parnassi, vitreique fontis

Pegase vindex.


Non reversurus citharam repono

Subter hâc ulmo. Grave me senectæ

Admonet pondus remove tales

Pectore curas.





LIVINI
MEYERI

E' SOCIETATE JESU

DEIRA
LIBRI TRES.

P R Æ F A T I O
A D L E C T O R E M.

TRibus sequentibus libris , amice lector, de Ira mihi sermo est, humani generis hoste infestissimo. Quod quidem argumentum selegi eò lubentius, tum quia à nullo Poëtarum (quod sciam) tractatum sit hætenùs ; tum maximè quia præter concentum vocum ac syllabarum, quo auribus consulitur, utilitas quoque ad animos legentium derivetur. Quemadmodùm enim nullum est animi vitium quod Irâ vehementius sit atque nocentius, nullum quo rationalis natura deformetur magis ; ita utilius esse quidquam vix potest, quàm malo tam præcipiti medelam afferre, & hoc animorum extinguere veluti commune incendium.

Paucula tantùm monere visum fuit. Primùm, propositæ materiæ gravitatem, licet videri magna possit, eam tamen non esse, ut Heroïci metri majestatem quasi suo quodam jure postulet. Quippe inter causas Iræ atque irritamenta, quæ libro primo commemorantur, tam le-

via,

PRÆFATIO AD LECTOREM.

via, tam tenuia, tam minuta occurrunt, ut quemadmodum est mirum animos his nostros moveri ad iracundiam, ita prorsus videri possit inter formicas tonare, si quis ista sublimiore stylo expresserit. Accedit quod Iræ remedia, quæ libro tertio argumentum præbent, quæque potiores hujus materiæ partes tenent, suaviter animis instillanda sint, ac proindè citharam potiùs requirant quàm tubam. Denique sic res habent hodie, ut Elegiarum metrum non ad luctus solùm atque amores, sed ad argumenta quoque severiora citra Parnassi injuriam accommodetur. Quid enim? (ut ne Propertii pugnam Actiacam & alia ejusmodi plura commemorem) quid inquam, de ingeniosissimo Poëtarum censebimus, qui Fastorum libros, quibus continentur tam varia, tam à luctibus amoribusque aliena, tamen ad citharæ chordas exegit. Quid si etiam Horatii prudens secutus sim monitum, ut de ferendo onere humeros priùs consularem, quàm ad ingentem machinam infirmas vires incautus afferrem? Etenim non eò

PRÆFATIO AD LECTOREM.

oblivionis veni, ut tenuitatis meæ memor non sim. Isti Homerum atque Virgilium feliciùs spirent, quibus altiùs Phœbus intonuit. Mecum præclarè gestum erit, si hastenuiores Camœnas eruditus lector non omninò fastidierit.

Alterum erat quod lectorem monitum volebam, à Poëta Christiano alienum non esse, ut Dianam, Neptunum, Cererem, aut Jovem appellet, exclametque nonnumquam *Dî faciant!* Non enim his loquendi formulis ad scrupulum Poëtæ, ut Theologi solent, utuntur: immò ne antiquiores quidem semper; sed Bacchum pro vino, Neptunum pro mari, Cererem pro frumento usurpant. Quippe aliud est Theologum, aliud Poëtam agere. Enimverò ridiculus is sit, & in Helicone peregrinus, si quis inter fabulas Religione movebitur. Verùm isthæc non moror, multus & difficilis in re nota & pervulgata ne sim. Opto potiùs ac voveo, ut iracundi ad clementiam animique moderationem, dissidentes ad pacem & concordiam revo-centur. Quem fructum si referant Muxæ, hic illis pro lauro erit.

P R O O E M I U M

Librorum de Ira.

IRam quæ moveant causæ, quæ damna sequantur,
 Quaque sit à teneris arte domanda, canam.
 Magnum humeris onus infirmis. O quod mihi Nu-
 Dignum materiâ surgere curet opus! (men
 Vatum Phœbe pater, quo vindice prima feruntur
 Sæcula barbariem deposuisse suam:
 Auspice te cecinere rudes ignota Poëtæ
 Carmina : sim curæ pars ego parva tuæ.
 Tu meritò mitisque Deus, pacisque putaris
 Auctor, & intactæ cultor amicitiae.
 Tu Superos inter citharæ cantûsque repertor
 Flexilibus mulces pectora dura modis.
 Ergo ades, irarumque ortus, totumque venenum
 Detege, nec medicam ferre moreris opem.
 Fallor, an arcanum subiit præcordia Numen,
 Et novus Aoniis collibus ardor adest?
 Ut feret ardor, agar : quamvis quò semita nulla
 Ducit, inexpertas cogor inire vias.
 Anxius in ventos abeat timor : i mea parvo
 Cymba lacu; Musæ vela minora regent.



DE IRA LIBER I.

Causa Iræ.

Semina principio morbi scrutanda latentis,
 Unde oriens subitas excitet ira faces.
 Queis veniat causis, quo vires fomite ducat,
 Unde habeat flammæ pabula certa suæ.
 Hæc iter; infames scopulis tentabimus undas,
 Foeta licet monstros multa minetur hiems.
 Quid tamen antiqui crimen meminisse parentis
 Attinet, audaci pomaque lecta manu?
 Hinc subiit feros scelerum genus omne nepotes,
 Ivit in heredes ut nova culpa suos.
 Hoc pelagus commune mali. Mihi rivulus iræ
 Quæritur. Hanc ripam remus, & aura leget.
 Sunt quibus est radix & causa domestica morbi
 Bilis, & infecti vena cruoris iter.
 Nec bona temperies & justo parcior humor,
 Et quæ corporibus plura nocere solent.
 Sicca nocet macies & vis innata caloris,
 Orbibus & retrò lumina fixa cavis.
 Pallidaque obliquis liventia tempora venis,
 Ossaque per graciles conspicienda genas.
 Scilicet his, si fortè moves, assurgit in iras
 Sanguis, ut exundans cum tumet igne vapor.
 Aut velut admotas rapiunt cita sulphura flammæ,
 Perque leves stipulas lapsa favilla volat.
 Sæpè etiam cum lacte bibit contagia dira,
 Uberibusque puer damna futura trahit.
 Parcite nutrices cunis adhibere molestas,
 Absit & à tectis aspera semper anus.
 Hæc nocet exemplo, succis vitalibus illa:
 Tollenda arbitrio est utraque causa meo.
 Insunt materno vitiorum semina lacti,
 Haustaque furtivâ transitione nocent.

Romu-

Romulus arma tener primis tractavit ab annis,
 Bellaque finitimis movit acerba puer.
 Post nova fraternâ firmavit mœnia cæde
 Barbarus : haud tanti condita Roma fuit.
 Immitemque ferox duxit per prælia vitam.
 Nutricem scires hunc habuisse lupam.
 Discite mansuetæ præbere alimenta parentes.
 Tempore vos illo bile carere decet.
 Si qua furens pueris lactentibus ubera præbet,
 Efferrat ingenium prolis iniqua suæ.
 Et refert quo quisque loco, quo fidere natus.
 Aërii motus corpora nostra regunt.
 Cernis ut oppositis variet regionibus æther,
 Inque suas zonas sectus ut orbis eat?
 Hæc riget ora gelu : pars uritur illa calore :
 Altera temperie gratior aura suâ est.
 Hæc animi pariter capiunt discrimina nostri :
 Iraque fervores sumit ab igne novos.
 Mitior hinc Belgis venit impetus, acer Iberis,
 Decolor & vires fideris Indus habet.
 Quid referam Libyco nascentes igne leones,
 Quasque sinu tigres Africa sicca fovet?
 Serpentesque feros & monstra natantia ripis
 Celat in æstivis Nilus arundinibus.
 Nostra peregrinis caret ora benignior urfis :
 Floret odoratis Belgica terra rosis.
 Quò magis in nostros veniat clementia mores,
 Efficitur patrii conditione soli.
 Ipse vides quid agant læsi contagia cæli,
 Inficit afflatu cum gravis aura suo.
 Lurida dum totos abscondunt nubila soles,
 Noxque procellosis humida fertur equis.
 Corporatunc languent pariter, nec inertia mentes
 Linqvit, & in lucem somnia longa tenent.
 At simul in roseis Zephyrus nitidissimus alis
 Fulsit : adest animis, corporibusque vigor.

38 CAUSÆ IRÆ LIBER I.

Carmina tum subeunt, subeunt Heliconia tempe,
 Et volucres pulso dulciùs imbre canunt.
 Quò raperis? gyro puppis brevior feratur,
 Arctiùs & pressâ contrahe vela manu.
 Non tantùm faciles agitat vis fideris iras:
 Hæc est de minimis causa futura mali.
 Fortiùs irritant animos acuuntque furorem
 Vina, nec ebrietas litibus ulla caret.
 Non tibi de nihilo Liber Deus ille vocatur:
 Nempè quod à cyathis libera verba volant.
 Pessima libertas mentis convitia linguæ
 Sufficit, & rixis uda taberna sonat.
 Tunc subit attonitas præceps audacia mentes,
 Iratâque volant pocula jacta manu.
 Vulnera tunc mappâ deterges cruda rubenti:
 Sobrius at partes manè dolentis ages.
 Vina movent animos furiis, nimiumque calor
 Vitis habet: vino pes ratioque labant.
 Illius imperio fortissima pectora cedunt,
 Rarus & ex illo turbine victor abit.
 Majus Alexandro nil Græcia protulit olim:
 Illi finitimos vincere, ludus erat.
 Ecce triumphatis auroræ ad limina Persis
 Fulminat, & toto victor ab orbe redit.
 Omnia qui vicit, tamen est superatus ab irâ:
 Principium cladis vina fuere novæ.
 Vina ferox suasere scelus cædemque probrosam.
 Hæc nota tot palmis una pudenda fuit.
 Clite jaces, neque te Medæ læsere sagittæ,
 Immeritum rupit Principis hasta latus.
 Principis ebrietas nocuit, nocuere furores,
 Vitaque per causas est tibi rapta duas.
 Victor ut extremos Bacchus penetravit ad Indos,
 Tunc primùm audaces vertit ad arma manus.
 Curribus Eoas coepit tunc jungere tigres,
 Militibusque suis tela gerenda dedit.

Olim

Olim contentus raras dare parciùs uvas,
 Fundebat Nymphis pocula sola suis.
 Capripedesque inter Satyros Faunosque bicornes,
 Collibus in patriis pacis amator erat.
 Hactenùs innocuo mortales fonte bibebant,
 Nec fuerant ullis condita vina cadis.
 Prodigus at postquam populis sua munera misit,
 Et peregrina malo crevit in orbe sitis:
 Tunc pariter lites, pariter venêre furores,
 Pectora cùm flammis incaluêre novis.
 O quoties subitus turbat convivia clamor!
 Nec timet offensus ebria turba lares!
 O quoties feros repetens conviva penates,
 Immeritæ vexat dulcia membra domus!
 Vina nocent, turbantque animos ratione sepultâ.
 Qui poterit vîno parcere, mitis erit.
 Fallere nec tutum est nocituro tempora ludo.
 Semper dissidii semina ludus habet.
 Victor es? audaci surgent fastidia victo,
 Et tua, materies, palma furoris erit.
 Quidquid ages refereſve, animo feret ille maligno,
 Teque reum fraudis suspiciosus aget.
 Non benè jactata est, digitisque morata pependit
 Alea, nec justâ volvitur illa viâ.
 Et numeros carpet, tolletque prioribus unum,
 Qui reliquis palmæ causa futurus erat.
 Nec tibi testanti cœlestia Numina credet.
 Nulla erit arbitrio res dirimenda tuo.
 Ludendique unus leges & tempora ponet,
 Donec in extremæ sidera noctis eas.
 Tum tibi subjiciet patientia læsa furorem,
 Nec poteris longæ tædia ferre moræ.
 Non rarò & ferro pugnabitur: exitus ille
 Crebrò damnandis lusibus esse solet.
 Hei mihi quàm magno spes lucri constat inanis!
 Dum sua victori palma cruenta venit.

Quamlibet hæc rata sint; tamen his graviora super-
 Pluraque libertas quæ tua peccat, habet. (sūt,
 Ecce subit, vexatque recens præcordia febris,
 Alternâ repetens frigida membra die.
 Aut premit articulos, res immedicabilis, humor,
 Difficilisve cavo stat tibi dente dolor.
 Nausea vel stomacho cererem fastidit inani,
 Vel tibi dat somnos tussis anhæla breves.
 Protinûs aut famulum non aptè strata moventem,
 Aut puerum, bilis quem tua stringat, habet.
 Cymbala tinnitu lædunt, lusorque catellus
 Vapulat, & domino quæ placuere, nocent.
 Pocula præcipuè succis ubi dantur amaris,
 Sive parat ferrum, seu parat ignis opem:
 Tum celer erumpit furor in fastidia: nec te
 Illo, quid deceat, tempore cura tenet.
 Quid facitis? frustra verbis lenitis amici.
 Asperitas nullis ista levanda modis.
 Ite procul, tetrico solamina vestra nocebunt:
 Non uxor poterit, non soror apta loqui,
 Non, si cum cithara veniat solator Apollo,
 Pectoris Aoniâ leniat arte malum.
 Corporis infirmam rapiunt contagia mentem:
 Hinc mala difficilis pabula morbus habet.
 Sed tamen & venia est magno concessa dolori,
 Culpaque censores vix habet ista suos.
 At tu ne causâ caveas levioze traharis.
 Sapè graves flammæ parva favilla movet.
 Ecce (quis hoc credat?) varians Fortuna furorem
 Incitat, atque iræ semina casus habet.
 Fortè tibi messis sitientibus uritur agris,
 Et negat optatas aridus annus aquas:
 Aut pecori scabiès, aut turbo grandinis uvis,
 Aut nocuit teneris cana pruina satis:
 Aut lucri cupidum fallit mare, vel rapit hostis,
 Mercibus & gaudent barbara vela tuis:

Ure-

Ureris heu ! queruloque sonat tibi lingua tumultu ;
 Forfan & in Superos verba proterva jasis.
 Si vacat exemplis me teste recentibus uti,
 Accipe ; mendaci non capiere fide.
 Nuper arundiferi recubabam in litore Scaldis,
 In temerè errantes lumina fixus aquas.
 Lintea prospicio summâ candentia pinu :
 Impulerat curvos utilis aura sinus.
 Sed nihil est aurâ fallacius : errat, & omni
 Tempore, quod timeat, navita rector habet.
 Dum loquor, exortis variant Aquilonibus Austri.
 Vertit prora latus : lapsaque vela cadunt.
 Ecce furit, dubiisque parat convitia ventis
 Navita, & in Boream jurgia cæca movet.
 Ac pede ter feriens summæ cava texta carinæ,
 Devovet ad stygios vela ratemque lacus.
 Quid facis ? exclamo, quæ mentem infania versat ?
 Improbe non nostris legibus aura fluit.
 Numinis arbitrio venti veniuntque, caduntque ;
 Et tenet, impulsas aut movet unda rates.
 Irrita sed volucres rapuerunt verba procellæ,
 Nec potuit moniti certior esse mei.
 Atque utinam justis saltem rationibus ira
 Sæviat, & causæ par eat illa suæ !
 At leve nescio quid, vix ut tibi dicere possim,
 In furias animos præcipitare solet.
 Quid fuit ut pectus percussisset ense Timanthes,
 Verterit & proprias in sua fata manus ?
 Causa levis : nequii quem sæpè tetenderat arcum
 Flectere, conatu deficiente senex.
 Commodus immeritos fornacibus uffit ephebos :
 Balnea frigidulis causa fuistis aquis.
 Hunc rapit in præceps turbati causa soporis,
 Illum lapsa cavâ pocula forte manu :
 Pileus hunc vento raptus, vel pallia limo
 Obsita, vicinâ prætereunte rotâ :

Aut

Aut ictum pedibus, dum respicit atria, limen,
 Clavis & angustæ non satis apta feræ.
 Sive oculos subito surgens tibi stringit eunti
 Pulvis, ab obliqua subvolitatque via:
 Seu te detinuit nimbus rus ire parantem,
 Seu festinatum turba moretur iter:
 Sive quis è populo cubito premit: ociùs ira
 Exilit, & geminum lumina fulmen habent.
 Hei mihi! quàm celeri rapiuntur pectora motu!
 Quàm venit à vento magna procella levi!
 Vidi ego qui clausas quatiebat calcibus ædes,
 Tardior occurrens causa minister erat.
 Vidi ego quæ raptos laniabat stulta capillos,
 Quod fuerat tenui faucia pectus acu.
 Comere difficile est dominas, quas forma superbas
 Inflat, & immodici cura decoris habet.
 Pectinis hanc dentes, hanc dura sedilia lædunt,
 Hanc cruciat laxæ ruga relicta togæ.
 Non satis à medio redimicula vertice pendent,
 Gemma nec errantes colligit apta comas.
 Aut nodo properans ancilla erravit in uno,
 Nec speculum justâ præbuit illa manu.
 Poscit ut ora lavet, vel candida brachia tergat?
 Si tepet, accusat; si calet unda, nocet.
 Quamlibet officio studeas, studeasque decoro;
 Nîl satis exactum, quodque probetur, erit.
 Quid referam natos curis rivalibus ignes,
 Dum tuus alterius læsus amore dolet?
 Hoc est cur spreti coëant in cornua tauri,
 Cur sonipes viso calcitret acer equo.
 Hæc Libycos eadem stimulat vindicta leones.
 Res est, crede mihi, plena furoris amor.
 Respice solventes Tyrio de litore Teucros,
 Feminaque insani testis amoris erit.
 Arserat Ænea miserabilis hospite Dido:
 Callidus hanc Paphio læserat igne puer.

Illa quidem regni sceptrum dotale paterni
Obtulit, infidæ dona superba moræ.
Illa etiam infestas ratibus causata procellas,
Differri timidum sæpè rogavit iter.
Aut non ventus erat velis satis aptus ituris,
Aut cava laxatæ texta novanda ratis.
Et quæcumque animum poterant mollire fugacem
Addidit, inconstans si remaneret amor.
Scilicet ardentem Lavinia perculit uxor,
Et prælata suo nupta Latina toro.
Nox erat : urgetur monitu properare Deorum;
Ille jubet demptâ pandere vela morâ.
Sensit amans Dido (quis enim sat fallat amantem?)
Sensit, & ardores non tulit ægra suos.
Ergo ubi curvatis albescere jam freta velis
Conspicit, instantis tristia signa fugæ:
Quò fugis? exclamat, scopulis crudelior ipsis!
Hùc oculos saltem perfide verte tuos.
Dixit, & insanum gladio finivit amorem.
Concidit ipsa suas sanguine sparsa manus.
Scilicet ultor Amor, si quando resistitur illi,
Fulmina de facibus vibrat acuta suis.
Quæ fuit everfæ ratio, nisi femina, Troiæ?
Grajus ut Iliacas perdidit ignis opes.
Quod nisi Priamides Helenen rapuisset adulter,
Nulla falo vindex classis itura fuit.
Qui rapuit captam Briseïda primus Achilles,
Alterius doluit rursùs amore rapi.
Distulit in decimum vindex furor Ilion annum.
Tantû in amante odium, flammaque læsa valet.
Nec minùs ambitio tristes movet atra procellas:
Hæc inimiciæ semina lata jacit.
Regibus hæc Reges committit, & arma ministrat:
Arsuras bellis subjicit illa faces.
Ambitio Actiacæ signum fatale ruinæ
Concinit : Ioniæ quod meministis aquæ.

Vive-

44 CAUSÆ IRÆ LIBER I.

Viveret intacti felix Regina Canopi,
 Anguibus haud victas implicitura manus.
 Viveret, augustæ si non capitolia Romæ
 Sperasset remis vincere posse suis.
 Illa quidem Latias animo jam ceperat arces,
 Classe potens, profugi viribus aucta ducis.
 Victor at Augustus fugientia vela secutus,
 Femineas Nilo compulit ire rates.
 Victa furit, mauroque perit Regina veneno.
 Has mulier poenas ambitionis habet.
 Ipsa etiam immites injuria suscitât iras.
 Læsus honor tanti prima favilla malî.
 Sæpè aliquis ferrumque libens tolerabit & ignes,
 Corporis & poterit parte carere sui:
 Nec cadet adversis animi constantia rebus,
 Mitiaque in medio verba dolore dabit.
 Idem si læsæ subeat discrimina famæ:
 Anguibus asperior, quos rota tangit, erit.
 Hæc est Scylla vorax, hæc irrequieta Charybdis,
 Naufragii tabulas hæc habet unda tui.
 Quamlibet hæc firmas fregerunt saxa carinas.
 Semper ab hac animus vulnera parte tulit.
 Utque animi variant, ita non feriuntur eodem.
 Dissimilis plebem causa movere solet.
 Ecce piger loris baculoque feritur asellus,
 Verberibusque latus, tergoraque icta sonant.
 At sonipes visam virgæ salit acer ad umbram,
 Et faciles motus nobilis ardor habet.
 Dissimulent alii, generosos verba laceffunt.
 His salis obliqui syllaba fulmen erit.
 Infelix animis sedet hinc discordia læsis:
 Pax abit, extremo vix reditura die.
 Donec aves silvæ, maturas messis aristas,
 Oceanus conchas, Hybla fovebit apes:
 Dum Parthi pharetrâ pugnabunt, classe Britanni,
 Dum Batavus patriis retia merget aquis:

Sem-

Semper inextinctas injuria nutriet iras.

Hæc & amicorum funere trita via est;

Hinc triviis crux multa stetit, cædesque loquuntur

Marmora, funestis sanguinolenta notis.

Obruor incepto, nec habet mea cymba regressum,

Et patet in cursus area lata meos.

Aptius æstivo spirantibus aëre ventis,

Populeæ numerum coner inire comæ:

Aut referam citius quot apricis collibus herbæ,

Quot rutilent toto sidera clara polo:

Quàm quot sæva modis subit in præcordia pestis,

Quosque nocens stimulos vita furoris alit.

Paci fastus obest, irasque superbia magnas

Excitat: exemplum non leve Cyrus erit.

Mœnia cincturus motis Babylonia castris

Iverat, & regni liquerat arva sui.

Et poterat locus ille capi, quia nuda vacabant

Mœnia præsidio, plenaque pacis erant.

Amnis iter prohibet (Gynden dixere priores)

Fonte celer largo, vorticibusque frequens.

Pontibus injectis longa est mora: nare per undas

Imperat: hi fluctus Rege jubente secant.

Lactis erant similes niveâ cervice jugales,

Et soliti currum ducere Regis equi.

Abripit ex illis aliquem violentior amnis;

Mergitur hic præceps, vorticibusque perit.

O! quantum armatus valuit furor! urbe relicta

Sæviit in surdas ultor inanis aquas.

Regis ad imperium ripæ finduntur, & undis

Deficiens, ficcum præbuit amnis iter.

Barbarus exultat, vindictaque gratior illi,

Imperium captæ quàm Babylonis erat.

Cyre quid immeritos rabiem convertis in amnes?

Sensus abest illis, iraque vana tua est.

Æquum erat irasci populis hostique merenti.

Tu victor: poenas ille daturus erat.

Nunc

46 CAUSÆ IRÆ LIBER I.

Nunc tibi neglecti periit fortuna triumphi.

Exitus hic cæcis mentibus esse solet.

At repetamus iter; nocituri cuncta furoris
Semina, propositum pandere suadet opus.

Diffimulare nefas : vitium commune revelo.

Accipe, habet sensus candida musa meos.

Plus æquo sibi quisque placet, plus arrogat æquo :

Dotibus & nostris turba superba sumus.

Ut celer à Belgis nigros porteris ad Indos,

Terra suos mores barbara quæque probat.

Quisque lubens audit propriæ præconia famæ,

Rarus in alterius laude disertus erit.

Sive cupis stultum, sive hoc puerile vocari,

Nescio quo cunctos res juvat ista modo.

Laude (quod est mirum) ratione carentia ducas.

Quis putet hoc ipsas edidicisse feras?

Laudatæ modulantur aves, Junonius ales

Attollit pennas ad bona verba suas.

Laude jubæ tolluntur equis, laudataque discit

Vocibus humanis garrula pica loqui.

Altiùs humanas percellit gloria mentes,

Nec tumidus metas ardor honoris habet.

Ille cupit doctus, cupit hic formosus haberi,

Huic sua nobilitas, sit licet empta, placet.

Hic rudis eloquio, se judice, vincit Ulysses;

Divitis hic titulo, Consulis ille tumet.

Ille fugax miles, cinctus tamen ense superbit,

Et sua (quis credat?) cornua pauper habet.

Cumque sit è trivio natus, se fascibus aptum

Credit, & excelsum tollit ad astra caput.

Luce sacrâ, solêâ tundit crepitante plateas,

Pellibus ornatas induiturque manus.

Aspicit insanos ridens vicinia fastus.

Ut graditur, natum Consulis ire putes,

Omnibus aspirat studium natura placendi :

Infimus ut quisque est, maximus esse cupit.

Hoc

Hoc est cur minimam vocis movearis ad umbram,
Irritat flammæ ista favilla tuas.

Experiare licet, te teste fatebere culpam,
Teque reum noti criminis intus ages.

Sæpè etiam ambiguo nocuit vox edita sensu,
Et malus interpret, pejor & hostis eras.

Quid facis imprudens? quid sensu verba sinistro
Accipis, in luctus ingeniose tuos?

Falleris: hic verbo te lædere noluit isto.

Tu tibi, quod non est, fingis inepte scelus.

Sic vaga nocturnus properans per rura viator,

Quam peteret ferro territus, umbra fuit.

Nocte fatigatos sic anxius occupat horror,

Somnus & hostiles fingit adeste manus.

O! ubi simplicitas antiqui candida mundi?

Dum colerent humiles Numina prona casæ.

Illo non aliquis caros lædebat amicos

Tempore, non belli noxia cura fuit.

Pax erat, & nullæ quas fastus parturit iræ,

Nullus ab ambiguis vocibus error erat.

Ancipitesque soni rigido censore carebant.

Grande nefas: tectos velle putare dolos.

Nunc superis terrâ per crimina nostra fugatis,

Alter in alterius vocibus ultor adest.

Nec pudet à veris alienos fingere sensus,

Nec pudet arbitrio quæque notare suo.

Scilicet in pejus declinat serior ætas,

Gensque parum simplex, nec sine fraude sumus.

Fama quoque, & facti veniens temerarius index

Obfuit, & menti vulnera cæca dedit.

Dispereat! linguâ quicumque nocere susurrâ

Sustinet, & medios dissipet aura sonos!

Nec tamen inquiris, veri si criminis index

Venerit: arbitrium prævolat ira tuum.

Nuntiet ut falsum, rumore movebere falso.

Dâ faciant, lentè credulus esse velis!

Quæ-

Quæritis Hippolytum Theseus cur limine pulsum
Perdiderit? facti causa noverca fuit.

Illa quidem falsum narraverat improba crimen:
Devovet hunc furiis non minùs ille suis.

Phædra quid exultas, odioque extinguis amorem?
Gloria privigno parcere major erat.

Tu quoque debueras non tam citò credere Theseu:
Innocuus patriis non raperetur equis.

Cur Cephalum Procris vetiti damnavit amoris?
Auribus infelix credidit ipsa suis.

Dum furit & crimen properat visura mariti,
Vanus, & (heu!) serò cognitus error erat.

Quid moror exemplis? nimium studiosa sinistri,
Et nimis in pejus credula turba sumus.

Suspicio quoque sæpè nocet: si tangeris illâ,
Lædit, & in tacito pectore vulnus alit.

Sive aliquis fixo spectat tua lumina vultu;
Ureris, & fixus crimina vultus habet.

Sive quis è turba populo plaudente cachinnat;
Iudicio risus te petit ille tuo.

Non venit ad cœnam conviva vocatus eandem?
Causa latet: sed te iudice fastus erit.

Huic brevis est sermo? properata silentia culpas.
Nempe aliquid quod te celat amicus habet.

Ille morâ peccat, lentusque salutat euntem.
Tussit hic: tussis sed tibi ficta venit.

Semper ab alterius factis, sint integra quamvis,
Materiam culpæ suspiciosus habet.

Quò non fraus penetrat? verbo non læderis ullo?
Languidus, & socio iudice, lentus eris.

Ille tuos dictis animos stimulat amaris,
Ille dabit cineri sulphura viva tuo.

Arguet & timidum, cita ni vindicta sequatur,
Et cupiet famæ te meminisse tuæ.

Turpis adulator! quid densis vimina silvis,
Aut quid Carpathiis fluctibus addis aquas?

Parce

Parce animum blandis scelerate laceffere verbis.

Ut nihil adjicias, sponte disertus erit.

Non eget impulsu, nimum quoque prona furoris
Semita, sed frenis impedienda fuit.

Altera, sed levior, rixas tibi causa minores
Morum disparitas, ingenique parit.

Inter tot comites poterit tibi quilibet alter
Quidlibet, offensâ non prohibente, loqui.

Hic tibi dissimilis fato & natalibus horis,

Dicat idem : versa fronte severus eris.

Dic mihi quid causæ? nescis. Hoc scilicet unum est:

Non satis ingenio convenit ille meo.

Sic mala natales faciunt divortia stellæ,

Hostis & in cunis nascitur ille suis.

Hoc quoque pacatos non rarò suscitât ignes,

Judicio numquam cedere velle tuo.

Cum semel immotam subiit sententia mentem,

Permanet, atque animo fixa tenaxque sedet.

Si quis in adversum victor rationibus urget,

Displicet; audacem te mala causa facit.

Sæpè furens aliquis causâ deceptus inani,

Substitit, erroris conscius ipse sui :

Pergit, ut errorem celet : pudor ipse furentem

Inciat, & culpæ poenituisse piget.

Adde quod & curæ, nisi si modereris & illas,

Difficilem faciunt, perpetuusque labor.

Præcipuè cum fervet opus, rebusque laborat

Mens intenta sagax ingeniumque vigil.

Tunc neque commotæ sonitum tolerare fenestræ,

Nec potis es vocem, si qua loquentis erit.

Nec moderata dabis responsa rogantibus, & te

Risus secreta lædet ab usquè domo.

Quin etiam eventûs spes irrequieta secundi,

Successuque carens, causa furoris erit.


Fortè feret gladium, jussus dare pallia servus,

Officio præiens ultima verba suo;

50 CAUSÆ IRÆ LIBER I.

Tardiùs aut domini peragens mandata moratur,
 Aut responsa celer, non tamen apta refert.
 Impatiens subit ira animum, procul ire jubetur
 Ociùs à vultu rusticus ille tuo.
 Quid? quod inops victus vacuæque incommoda
 Irritant animos, impatiensque sitis: (mensa
 Nudaque paupertas fociis comitata querelis,
 Cum fert angusto tempore nullus opem.
 Quid valeat furibunda sitis, laticesque negati,
 Exitio didicit rustica turba suo.
 Venerat in Lyciæ campos Latona feraces,
 Inque sinu natos, dulce ferebat onus.
 Fessaque jam dudum longarum errore viarum,
 Optabat miseram fonte levare sitim.
 Aspicit ex imis lucentem vallibus undam,
 Inque paludosæ margine sedit aquæ.
 Forsitan agrestes illic fruticosa legebant
 Vimina, sublimem sole tenente viam.
 Utque genu flexit latices haustura bibendos,
 Obstat, & hauriri rustica turba vetat.
 Indignata Dea est: tamen exorare vetantes
 Sustinet, & veniam supplice voce rogat.
 Munus ait commune peto. Non membra lavare
 Venimus: unda levet quantulacumque sitim.
 Vos ego per parvos qui tendunt brachia natos,
 Ubraque assiduo sicca calore rogo.
 Dixerat: irrident, Divamque paludibus arcent,
 Et pedibus limum stagnaque pura movent.
 Ira siti mota est: & quæ mihi stagna negatis,
 Incolite, & mediis vivite dixit aquis.
 Turpiaque in virides transformat corpora ranas:
 Ora paludoso gurgite rauca sonant.
 Vincitur ipsa siti patientia læsa Dearum:
 Tu tua plus superis pectora posse putas?
 Nec minùs irritant jejunia longa furorem,
 Et faciles iras venter inanis habet.

Lon-



Longa fames sævire lupos & luce vagari
Cogit, & audaces præda cupita facit.
Vidimus ire canes dominosque laceffere morſu,
Et rabidos totâ vulnera ferre domo.
Scilicet & fibras & inania viscera bilis
Permeat, & motu corda furente quatit.
Quid? quod avaritiæ fordes, ne chonesta tuendæ
Cura domûs, paci mentis obesse solet.
Perdita res levis, & lapsæ jactura scutellæ
Angit, & in querulos concitat ora sonos:
Non aliter quàm si Parthus prædator avitas
Auferat, & raptas ignibus addat opes.
Credis & hoc? nummus digitis elapsus apertis,
Volvitur ex oculis, non sine bile, tuis.
Verre pavementum, & laxis admitte fenestris
Lumina: palpantes decipit ille manus.
Intereâ frustra quærentem tædia lædunt,
Iraque de minimâ surgit acerba morâ.
Ille latet tenui rimæ celatus hiatu,
Angulus extremo continuitve sinu.
Non rarò & sceleri scelus est via. Sæpè nocentes
Urget, & in furias Æacus ultor agit.
Noxius Eumenidum stimulis agitatus Orestes,
Non poterat culpæ non memor esse suæ.
Illius ante oculos manes venêre cruenti,
Nigraque perpetuas attulit umbra minas.
Hinc terror, Furiaque, & mens exalta tumultu,
Horrendisque brevis somnus imaginibus.
Pentheia quis nescit, scelerati & fata Lycurgi?
Improbis est furiis notus uterque suis.
Singula quid referam? numerum sua copia vincit,
Semper & exhaustis ulteriora patent.
Nam neque frondosa glandes numerabis in Ida,
Atque oculos fallax vincet arena tuos:
Et tibi conanti causas censere furoris,
Usquè fatigato quod superabit erit.

52 CAUSÆ IRÆ LIBER I.
Præteriturus eram morosæ fata senectæ.

Quis nescit querulum carpere cuncta senem?
At tu, si sapias, quidquid narrare parabit,

Annue : iudicio gaudeat ille tuo.

Arguis? extremos in flammam colliget ignes,
Concutiens canum voce tremante caput.

Quid tamen esse putem cur sit morosa senectus?

Anne quod infirmis mens ratioque labat?

An quod in effeto minuuntur corpore vires,

Morborumque senes triste fatigat onus?

Anne decere putent canis censoribus uti,

Temporis & nostri de levitate queri?

Et meliore notâ describere sæcula lapsa,

Utque recens ætas deteriora ferat?

Quidquid id est, veniam querulæ concede senectæ,

Sic tibi canitiem Dî sine lite ferant !

Pars exacta novi, superest pars altera cursûs.

Hâc mea tantisper cymba moretur aquâ.



DE IRA LIBER II.

Damna Ira.

HActenùs irarum stimulos causafq; canebam.
 Quos petiit portus salva carina tener.
 Majus iter superest. Ventis cita carbasa nautæ
 Tollite : de Pindo fortior aura venit.
 Dum favet, & vires faciunt, nec pectore Phœbus
 Dexter abest; iræ damna dolenda canam.
 Ordior à signis. Sunt & sua signa furori,
 Nec caret indiciis ira propinqua suis.
 Titan nube latens, repetitaque litora mergis,
 Auditique procul murmura rauca maris,
 Prædicunt trepidis ventura tonitrua nautis.
 Intonat exigua certa procella morâ.
 Et sua tempeſtas animo eſt, rabiemque futuram
 Mutato veniens indicat ore color :
 Impatienſque oculi fulgor, fronſque aſpera rugis,
 Hirtaque cæſaries, inſtabiliſque gradus :
 Et tremulæ cum voce genæ, jactatæque latè
 Brachia, & in validos ora ſoluta ſonos.
 Omnibus his ardens animus conatibus iram
 Nuntiat : his ducibus bella propinqua monet.
 Ipſæ etiam dant ſigna feræ : neque calce minaci
 Parcit arenofam lædere taurus humum.
 Annoſoque furens exercet cornua trunco,
 Prælia mugitu ſollicitatque truci.
 Colla paludoſis inflari vidimus hydriſ,
 Et dare percuffo ſibila dira lacu.
 Nec minùs antra feri terrent Hircana leones,
 Unguibz aut fulvâ cum tumet ira jubâ.
 Nonne vides ut fulmineis aper horridus inſtet
 Dentibus, ut nigrâ lumina fronte rotet?
 Uſquè adeò in faciem prodit nescitque latere;
 Adventuſque notas dat furor ipſe fui.

54 DAMNA IRÆ LIBER II.

Non tamen iratis facies erit omnibus una.

Palluit hic : illi vultus & ora rubent :

His clamorosa venit rabies : his muta tremensque :

Hæc vaga & instabilis forma coloris erit.

Non magis apparet variata coloribus iris,

Solis ab adversis cum rubet arcus equis :

Quàm variè dubiâ facies mutatur in irâ,

Formaque diversas accipit una notas.

Diffugiunt torvo Decor & Clementia vultu.

Feta Medusæis anguibus ora putes,

Quid? quod & auctorem lædit, minuitque vigorem

Corporis, & damno pascitur ira tuo.

Quid? quod agit dubiam præceps infania mentem,

Ipsaque lux animi, nube premente, fugit.

Vidimus à rabie totos torpescere sensus.

Nullus in exangui corpore motus erat.

Vidimus & misero pectus trepidare tumultu.

Sunt quoque, quos subito diriguisse ferunt.

Adde quod infirmis pulmonibus ira cruorem

Misit, & in stygiis vulnera lavit aquis.

Lenior ut fuerit, neque peccet funere semper;

Exemplis tamen est illa timenda tibi.

Posse nocere sat est : felix ! quicumque periculo

Alterius, didicit posse carere suo.

Neve putes rectæ domitam rationis habenis

Posse regi : victas non dabit ira manus.

Montanas citiùs freno compescere tigres,

Et poteris fetæ ponere jura lupæ.

Aggeribus veluti ruptis it spumeus amnis

Victor, & effusas per fata volvit aquas :

Cum pecus & prensos imis in vallibus agnos

Abripit, & fragiles procubuere casæ :

Haud aliter frenis victrix ruit ira solutis

Omnibus, & toto volvit in orbe minas.

Non illam gemino populi sub sole jacentes,

Non vitare polis subdita regna valent.

Qua

Quà rubet Eois radiis, quà terra diurnis
 Uritur, Hesperiiis quà cadit axis aquis;
 Quà Boreasque Notusque volant, victricia signa
 Figit, & à tota gente tributa petit.
 Nec minùs ætatem victrix dominatur in omnem,
 Addit & imbelles in sua vincla manus.
 Non pueros, non ira senes, mediamque juventam
 Præterit: imperio cuncta potente premit.
 Nec premit ex æquo. Variant effectibus iræ,
 Et minùs hîc, illic plus feritatis habent.
 Exoritur facilis, facilis quoque deficit idem,
 Et furor in puero nîl nisi verba ciet.
 Impetus in teneris non est violentior annis;
 Sic cita de paleâ flamma, brevisque venit.
 Sæpè tamen lacrymæ pueris oriuntur inultis,
 Et cum non possint lædere, posse volunt.
 Dulce adeò vindicta malum est: minuitq; dolorem
 Lædendi studium, sumptaque pœna placet.
 Cur senibus furit ira minùs? quia scilicet ignis,
 Et vigor in sterili stipite rarus inest.
 Cum movet ira senes, trepidantia verba palato
 Hærent, & gestu res peragenda venit.
 Quod si fortè mali feriunt, baculove minantur,
 Ultima tum vires exêrit ira suas.
 Mox velut in cineres sopitus labitur ignis,
 Sic ætate furor deficiente cadit.
 Femina (grande malum) stimulis agitata furoris,
 Vindictæ cupidâ aptat acerba manus.
 Scilicet hinc genus hoc Bacchas dixêre furentes,
 Penthea quas Regem dilaniasse ferunt.
 Crede mihi, rarò didicerunt parcere læsæ.
 Jure Hecubam dixit fabula prisca canem.
 More canum triviis certant; latrare putares:
 Totaque femineâ compita voce sonant.
 Causa levis satis est, ardent in prælia linguæ.
 Siste gradum, si quis fortè viator ades.

56 DAMNA IRÆ LIBER II.

Ecce subit torvâ violentior illa Medusâ,
 Altera fert raptâ cominûs arma colu.
 Nec mora, turbati rapiuntur fronte capilli,
 Nudaque subductâ brachia veste patent.
 Calcibus immixtis pugnatur, & unguibus uncis,
 Læsaque jactatæ dantur in ora manus.
 Et maledicta volant Ætnæis plura favillis,
 Ut motant Briareus Enceladusque latus.
 Hoc plebs more furit. Meminit matrona decôri.
 Illa supercilio, cum subit ira, tonat.
 Fulminat illa oculis, & longa silentia servat,
 Verbaque majestas pondus habere facit.
 Acrior ira viris, & ad horrida promptior arma;
 Odit verborum prælia : rebus agit.
 Lite viri demptâ, faciunt compendia ferro,
 Telaque pro verbis, scutaque pulsa sonant.
 Cum foret Æacidæ clypei successor habendus,
 (De merito judex Græcia tota fuit.)
 Dicitur his Ajax, castris cum staret Achivis,
 Dulichium verbis increpuisse ducem.
 Si dubia est virtus, clypeus jaciatur in hostes.
 Qui poterit ferro quærere, victor erit.
 Non Ithacus verbis mecum contendat Ulysses.
 Marte probet : cur non, quæ petit, ense refert?
 Dixit, & aspiciens quam texit ab Hectore classem,
 Torva per Idæas lumina volvit aquas.
 Conticuitque, animo vocem prohibente virili.
 Magnum aliquid semper, quæ tacet ira, parat.
 At tu fallaci nimium ne fide sereno.
 Non habet eventus pax violenta bonos.
 Ille cavis vivax latitans sub nubibus ignis,
 Quo minimè credis tempore, fulmen erit.
 Bella intûs cædēsque sonant, occultaque venis
 Crescit, & ardores colligit ira novos.
 Excipit interea, causamque perorat Ulysses,
 Eloquioque Ducum corda potente movet.

Con-

Consilio Danaï, non cæcis viribus hostis
 Vincitur : ingenio diruta Troia cadet.
 Quid juvat Aiace validos jactare lacertos?
 Impetus est sævis, sed sine mente, feris.
 Res est consilii bellum, prudentia vires
 Dirigit, & pugnæ tempora certa notat.
 Arte meâ sacræ signum fatale Minervæ
 Iliacâ in nostras vênit ab arce manus.
 Arte mea cecidêre Phryges : tentoria Rhœsi
 Testor, & occisos nocte silente Duces.
 Singula quid referam? dixit, meministis Achivi.
 Publicus exceptit verba suprema favor.
 Judicibus Danais Ithaco postponitur Ajax :
 Arma viri fortis lingua diserta tulit.
 Tum verò impatiens iræ Telamonius ensẽ
 Arripit (aspectu proxima turba pavet.)
 Ille tacens subito rumpit præcordia ferro,
 Læsaque Troianâ viscera fundit humo.
 Tunc quoq; jam moriens oculos contorsit in hostẽ,
 Atque odium cineri jussit inesse suo.
 Tantum animo latitans valuit furor. Occidit Ajax
 Et furit ad stygios umbra cruenta lacus.
 Quâque licet vivum facibus sectatur Ulyssẽ,
 Et ciet horrentes ad nova bella domos.
 Nec minùs occultis agitur femina flammis,
 Celat ubi ardores mens taciturna suos.
 Tunc caput in patrem cæsi Philomela nepotis
 Jecit, & est epulis turpiter ulta nefas :
 Cum furor inclusus; raptæque injuria linguæ
 Non habuit promptos, quos daret ore, sonos.
 Dum potuit Medea loqui, moderatiùs arsit.
 Sustinuit natos perdere muta suos.
 Quidquid celatur, nocuit magis : utile sæpè,
 Ædibus accensis, pandere tecta fuit.
 Flamma minùs laxata nocet : de carcere vires
 Sumit, & impositum turbine jactat onus.

Femi-

58 DAMNA IRÆ LIBER II.

Femineâ tamen est constantior ira virorum,
 Et levitas illas hâc sua parte juvat.
 Ut citò mutatur variisque affectibus errat
 Femina, sic parvâ præterit ira morâ.
 Firmius ingenium maribus natura feroxque,
 Propositique tenax pectus habere dedit.
 Permanet in longos furor indelebilis annos,
 Inque odium sensim flamma virilis abit.
 Ut semel hæc animos subiit, penitusque refedit;
 Omnia contemptâ fœdera pace ruunt.
 Non satis utilitas, non commoda publica mentem
 Flectere, non ratio, consiliumque valent.
 Pergama quis nescit decimum cecidisse sub annum,
 Prælia cum lustris gesta duobus erant?
 Cur malè tot messes tardî pugnastis Achivi?
 Non venit ad fortes gloria lenta manus.
 Nam licet objecit pro caris pectora muris,
 Causa moræ Danais non tamen Hector erat.
 Oderat impatiens Agamemnona læsus Achilles,
 Oderat: hinc lentè diruta Troia fuit.
 Pugnabant Danai; citharam pulsabat, & ultrò
 Vindictæ studio desidiosus erat.
 Ecce petunt classem Sigæaque litora Troës,
 Dardanias ratibus subjiçuntque faces.
 Hector adest, animoque ferox insultat Achivis,
 Et victor multa cæde superbit ovans.
 Pelides ubi nunc? ubi nunc Vulcanius ensis?
 Olim ter stygio membraque tincta lacu?
 Puppe sedens aliquâ spectat certamina lentus;
 Et vetat ardentes sumere tela manus.
 Dicitur & gaudens clades numerasse suorum.
 O pudor! ô patriæ miles acerbe tuæ!
 Tantine una fuit Briseïs, ut Hectora spectes
 Truncantem sævâ corpora Graia manu?
 Collige te viresque tuas; tibi debitus hic est,
 Hæc & Achilleâ victima digna manu.

Peli-

Pelidem nîl ista movent. Satianda voluptas
 Sanguinis, & patriis ira pianda malis.
 Nonne vides toto furor ut dominetur in orbe,
 Præbeat ut victas sexus uterque manus?
 Omnia cûm superet, motu tamen impare fervens
 Effectu variat, dissimilisque sibi est.
 Hæc ferit ira reos, infontibus illa minatur,
 Hæc brevis est, longâ permanet illa morâ.
 Illa, quod hostis abest, peregrinas fertur ad oras,
 Audax longinquo pandere vela mari.
 Illa palàm gladiis & apertis dimicat armis,
 Cautior insidias ista latenter agit.
 Hæc quod vindictæ non est data copia, frendet:
 Ira suum diris devovet illa caput.
 Est quoque quæ vestes laceret furibunda, Deosque
 Non timeat vanis lædere velle minis.
 Consule præteritos Romana volumina fastos,
 Notaque sacrilegi regna furoris erunt.
 Hic quia tempestas jactaverat æquore toto,
 Augustas scopulis impuleratque rates:
 Neptunum in numero vetuit censere Deorum,
 Sceptraque cæruleo sustulit uda Deo.
 Exhibiturus erat populo spectacula Cæsar
 Ludicra, Romano conspicienda forò.
 Ordinibus geminis geminum processerat agmen,
 Promptaque erant pharetris aurea tela suis.
 Undique gens excita novos visura triumphos
 Venerat: ornatas flore tegente vias.
 Juppiter immissis dirimit spectacula nimbis,
 Festaque lux casu nubila tota fuit.
 Impius excussis Cæsar petit astra sagittis,
 Immeritum pharetrâ sollicitatque Jovem.
 Credibile est lapsas Regem petiisse sagittas:
 Pars populi certè vulnera fronte tulit.
 Ut semel hæc animos rabies incessit ovantes,
 Sidera vix alto tuta fuere polo.

60 DAMNA IRÆ LIBER II.

Religioque fugit terras exosa nocentes,
 Et Pietas aris exulat, ore Pudor.
 Aurea majestas templorum atque aurea signa,
 Vasaque sacrilegâ rapta fuêre manu.
 Nîl adeò sanctum est, quod non violaverit ira.
 Vix licuit tuto sceptrâ tenere Jovi.
 Stulta Gigantei quis nescit prælia belli,
 Cum tumidus cælo Pelion esset iter?
 Enceladus Briareusque & vasto corpore Cæus
 Stabant: pro telo pars bona montis erat.
 Centimanusque Gyges alto prædator Olympo
 Ivit, & audaci terruit astra viâ.
 Quæ fuit, ô vates, fingendi hæc monstra libido?
 Dicite, si veri fabula pondus habet.
 Dicite quid validis pubes Ætnæa lacertis,
 Ossaque Peliaco vertice pressa, velint.
 An quod habent magnas furor atque infania vires,
 Ista Gigantei corporis ossa notant?
 Anne quod impietas comes est adjuncta furori,
 Fingitis in superos prælia gesta Deos?
 At nisi me sacrâ fallit caligine Phœbus,
 Judicio vera est utraque causa meo.
 Parcite divinos falsi damnare Poëtas:
 Vera, sed obtensâ plurima nube, canunt.
 Tartara sic Orpheus, sic Dædalus aëra rupit,
 Æquor Arionæ sic domuêre lyræ.
 Nec tamen antiquos latuit sapientia vates,
 Crede mihi, vulgo non penetranda canunt.
 Discite, post cælo pulsos Jovis igne Gigantes,
 Difficiles ausis turpibus esse vias.
 Discite, sacrilegæ post improba prælia turmæ,
 Opprimat auctores ut gravis ira suos.
 Ter tonuit Jovis alta domus, tria fulmina misit:
 Enceladus contrâ ter ferus arma tulit.
 Fulminis at quarti percussus creditur ictu
 Trinacriæ victum supposuisse latus.

Nep-

Neptunus scopulis Ægæona vinxit acutis,
 Naufraga quem vasti verberat unda maris.
 Porrectusque jacet volucres passurus edaces,
 Infernâ Tityus præda perennis aquâ.
 Talibus exemplis subiectus dicitur orbis,
 Et sua majestas tuta fuisse Jovi.
 Quid tamen ista juvant? nova nos in tela rebelles
 Surgimus, & cælo gens inimica fumus.
 Arma laceffito furor infert cæcus Olympo,
 Nostra profanatos nec timet ira Deos.
 Trita frequensque via est, testes asciscere Divos
 Criminis, & Superis perfida verba loqui.
 Sub pedibus legesq; jacent, Rectumque, Piumque:
 Imperium, exactis legibus, ira tenet.
 Hæc docet audaci perjuria dicere linguâ,
 Hæc docet aspersas ferre cruore manus.
 Imperat illa faces alienis addere tectis,
 Raptaque nocturno præmia ferre dolo.
 Regibus hæc aconita parat, Bacchumque nocentem
 Inficit, & gemmâ mixta venena natant.
 Illa etiam natis contemnere jussa parentum
 Suasit, & in fratres fratribus arma dedit.
 Bella furor Thebana movet, primique parentes
 Fleverunt viduæ funera prima domûs:
 Cùm fratrem ante aras maxillâ crudus agresti
 Perculit, & vindex ivit ad astra cruor.
 Ista quidem nostri primordia pessima mundi,
 Et nova privati bella fuere laris.
 Heu! quantum exemplum nocuit! discordia vires
 Sumpsit, & heredes repperit atra suos.
 Lite vir & conjux verbisque procacibus ardent,
 Inque odium pietas conjugialis abit.
 Læsus amor fractis quærit divortia tædis;
 Quàm cuperet socii vincla soluta tori!
 Jurgia succedunt: utinam quoque verbera cessent!
 Quæque vetant clausæ plura videre feræ.

62 DAMNA IRÆ LIBER II.

Hic quod natali fratrem præcefferit uno,
Arguit, & verbis imperiosus agit.

Majori parêre minor negat : insonat omni
Pugna domo, & tardè conciliatur amor.

An furor Armeniis similis reperitur in antris?
Suspisor ingenium mitius esse feris.

Quæ rabies catulos sub eâdem rupe jacentes
Impulit in socias unguibus ire genas?

Cetera qui vastant deprædanturque leones,
Mutua concordî fœdera pace colunt.

Nos tamen, enixa est partu quos mater eodem,
Non pudet in proprium vertere tela genus.

Non scelerata pudet committere prælia dextris,
Et consanguineis cædibus ire truces.

At Solem puduit, dum currus vertit in ortum,
Noxque Thyesteas occulit alta dapes.

Quodque nefas ausa est tectis Philomela sub altis,
Devovet, & serò post sua fata gemit.

Quid privata cano? velis majoribus ire
Convenit : ecce parat Regius arma furor.

Odrysîus sine lege furens, sine jure Tyrannus,
Perfida neglecto fœdere bella movet.

Jam vires Asiæ, & gaudentes sanguine Parthos,
Et Tanaim, & Nilum sub sua signa vocat.

Thurilegosque Arabes, & semiviros Nabathæos,
Quosque oriens populos Phœbus ab axe videt.

Dives equis divesque viris exercitus, & cui
Terra nequit numerum nostra referre parem.

Parcite Teutonicas timidi numerare cohortes,
Plus numero virtus consiliumque valet:

Magnanimique Duces, nervosæque milite forti
Agmina, Dux quorum quilibet esse potest.

Ille quidem Europam sibi subdere barbarus omnem
Ardet, & Austriacæ tollere sceptrâ domûs.

Ira præit, comitesque Nefas Fraudescq; sequuntur,
Sibilaque anguiferis longa dedere comis.

Quâ

Quà properat, mœstis collucent omnia flammis,
 Arvaque pro rastris, ungula pulsat equi.
 Ense senes puerique cadunt, captiva juvenus
 Ducitur, ablatos ferva catena premit.
 Parthe quid exultas? causæ Deus ultor iniquæ
 Imminet, & lævum Mars tuus omen habet.
 Ecce laceffit justissima prælia Cæsar
 Conseret, & Superos ad pia bella trahet.
 Parcite Dî, nostrosque duces servate secundi.
 Criminibus vacuas profit habere manus.
 Auguror : Eoæ flebunt sua funera matres.
 O quantâ furor hic clade piandus adest!
 Insonuere tubæ : concurritur. Hei mihi quantâ
 Clade gemit tellus! quis tonat ære fragor!
 Sed tamen hinc aquilas video superare minaces,
 Inque Scythas belli grande reclinat onus.
 En Bavarus Lotharusque Duces hortatibus instant,
 Inque acies pronas hasta Latina volat.
 Agmina cæduntur fugientia, nec sua Parthos
 Tela, nec in telis ipsa venena juvant.
 Devehit Euxino subiecta cadavera ponto
 Ister, & infectis ire laborat aquis.
 Scilicet Ismarii virtus numerosa Tyranni
 Concidit, & pacem barbara terra rogat.
 Bellaque jam damnat neglectaque foedera serò,
 Dignaue non unâ præmia clade tulit.
 Quàm benè Dî magni meritis datis omnia justis!
 Causa patrocini nostra potente stetit.
 At vos præcipites in perfida bella Tyranni,
 Nequidquam in vanas impulit ira minas.
 Tot cæsæ Mavorte acies, populataque flammis
 Arva, tot in subitos mœnia versa rogos:
 Tot desolatis squalentia rura colonis,
 Telaque & in timidas vincula jacta manus:
 Omnia sunt culpæ monumenta perennia vestræ.
 Tot scelerum facies ira cruenta parit.

Atque

64 DAMNA IRÆ LIBER II.

Atque utinam Eois furor hic mansisset in oris!

Cur tamen & nostris finibus arma sonant?

Parcite Christiadûm populi, gladioſque cruentos

Ponite : ſat noſtri ſanguinis enſis habet.

Quid fraterna juvat toties in bella coire?

Ite per Euxini litora capta maris.

Ite per & fines Aſiæ Solymæaque regna.

Hîc pretium juſti nobile martis erit,

Palmiferû nemus, & Superis quoq; cognita tempe,

Et jûga cæleſtes quæ tetigère pedes,

Et trepidus jam nunc turbato flumine Nilus,

Quaſque Oriens vobis abſtulit orbis opes.

Dî faciant, armis cedant Byzantia noſtris

Mœnia, barbaricâ non benè capta manu.

Tuque favens Venetis Neptune triremibus adſis,

Sentiat ut Latias Creta ſubacta rates.

Vana precor. Noſtro gliſcit diſcordia mundo,

Et furor ex omni prælia parte movet.

Hinc tonat impulſis iratum claſſibus æquor,

Puppibus illiſis ſaxa Britanna ſonant.

Mille rates coëunt & roſtris roſtra laceſſunt,

Decolor & feſſis Nereûis errat aquis.

Quæque olim celeri fidebat currere remo

Gallia, jam ponto maxima vela parat.

Parte aliâ torvi quatiuntur cornua Rheni,

Accipit & dominos utraque ripa novos.

Nec Latiis Martem licuit vitare colonis,

Iraque trans Alpes agmina celſa movet.

Sæpè Pyrenæi rubuerunt ſanguine montes,

Noſtraque vix pacem Belgica novit humus.

Nullituta quies. Cruor undique, & undiq; cædes:

Diminuunt vires mutua regna ſuas.

Quò tamen hic belli fervor? quid quæritur armis?

Jugera nempe ſoli paucula victor habet.

Hoc pretium pugnæ. Valeant enſeſque tubæque:

Pax mihi, non amplo limite, tuta placet.

Non

Non ego sum quem bella juvent, me propter Ibêrus
Prælia cum Gallo milite nulla geret.

Dives ero, nido modò ne subducta recenti
Ova mihi defint, micaque pura salis.

Quemque priùs duxit salientem linea piscem,
Ille mihi prædâ divite major erit.

Felices quibus ista licent! sed scilicet ira
Invidet, & Belgas non abitura premit.

Ut redeat pax alma tamen mœstosque revifat,
Miles & emeritum sublevet ense latus:

Non idèò totis fugiet regionibus ira.

Hæc etiam mediâ prælia pace movet.

Quid referam fractos civili turbine fasces,

Raptaque per longas membra cruenta vias?

Seditio ut populos in bella domestica movit:

Hoc Thebe, hoc periit Martia Roma modo.

Cæsaris asperfit fusus capitolia sanguis.

Quis credat? Bruto vulnus ab hoste tulit.

Tullius ille potens quondam, cervice recisâ

Nunc jacet: hæc linguæ præmia Consul habet.

Prò pudor! ex illis figuntur pallida rostris

Ora, quibus trepidos juverat antè reos.

Nec Batavis defunt exempla recentia terris,

Tractaque perque vias funera, perque domos.

Hunc furor infixo rapuit crudeliter hamo:

Illum saxa citâ grandine plura petunt.

Scuta foro gladiique sonant. Subit atria victrix

Turba: per ardentes effugit ille manus.

Exoritur clamor facibus per inania jactis,

Consulis & priscae diripiuntur opes,

Et nihil intactum violenta licentia plebis

Præterit: immensum est singula velle queri.

Quid memorem assiduas, quibus ardet curia, lites,

Ortaque civili jurgia rauca foro?

Cum nequeas ferro, nequeas sævire veneno,

Certiùs injustâ lite nocere potes.

E

Hinc

66 DAMNA IRÆ LIBER II.

Hinc empti pretio testes, perjuria, fraudes,
 Quique volant circum publica testæ doli.
 Scilicet & falsi damnatur criminis insons,
 Damnaque fert famæ non abolenda suæ.
 Adde graves calami sumptus, inopesque nepotes,
 Debitaque exhaustæ non reparanda domûs.
 Lis patrias consumit opes, lis prodigit aurum,
 Arcaque sub lento iudice tota perit.
 Quoque magis mirere, uno de cespite rixam
 Inter finitimos ira suborta movet.
 Nec mora, caufidico scribente volumina crescunt,
 Vindicat & nummos pagina quæque suos.
 Conspirant animis certi non cedere, donec
 Hauriat immensas Curia dives opes.
 Non mihi si missæ veniant Helicone puellæ,
 Pegaseæque sacro fonte bibantur aquæ:
 Totaque sic facilis subeat præcordia Phœbus,
 Versibus ut cedat Græcia prisca meis:
 Damna satis cæci valeam memorare furoris.
 Materiâ vires uberiores cadent.
 Confer in Iônio nascentes æquore pisces,
 Confer in Ascræis gramina nata jugis,
 Adde vagos fluctus: numero vincentur, & iræ
 Fertior damnis noxia messis erit.
 Herculeis cecidit pestis Lernæa sagittis,
 Quamvis vulneribus cresceret illa suis.
 Hæc nova millenis cervicibus Hydra renascens.
 Pullulat. Alciden da mihi: victus erit.
 Ne tamen ex omni lateat vos parte venenum,
 Indicio musæ nota fit ira meæ.
 Noscere nunc labor est, post debellabimus hostem:
 Si modò promissam Delius addat opem.
 Vos quoque qui sævæ petitis solamina pestis,
 Antè decet tanti discere damna mali.
 Parte patent aliquâ; totis in viscera cultris
 Ibimus: huc oculos vertite quisque suos.

Ira per obstantes rumpit nocitura propinquos,

Consiliumque odio vera monentis habet.

Nec refert geminæ suafurus fœdera parti,

Sollicitus pacis conciliator eas.

Vidi ego pugnantes stricto concurrere ferro:

Nullus & in populo qui prohiberet, erat.

Scilicet in medios qui se projecit enses,

Mutua dum prohibet vulnera, læsus abit.

Utque agitur cæco pulsâ ratione tumultu,

Omnibus obscuras injicit ira manus.

Cambyfes Syriis uncas præcidere nares

Jusserat, atque imis tollere labra genis.

Grande nefas! tamen in captos ita sæviit hostes.

Pòst ferus ipse suis non minor hostis erat.

Æthiopum populi tumido parere Tyranno,

Jussaque longinqui ferre tributa negant.

Hos procùl à Persis Indus submoverat amnis,

Tutaque ab ingenio gens erat illa loci.

Cambyfes fremit impatiens, amensque repulsâ

Æthiopes subito perdere marte parat.

Jamque ingens nigros exercitus ibat ad Indos,

Quò tulerat vires Persia tota suas.

Quò ruis imprudens? regio caret illa colonis.

Quà properas, densis montibus aret humus.

Non Cereris vitifve ferax, non gramina tellus

Ulla, nec errantes parca ministrat aquas.

Parce sine annonâ temeraria bella movere.

Utilior votis proxima messis erit.

Differ opus, mora sæpè juvat. Declivior annus

Contrahit, autumnò jam properante, dies.

Per tamen arentes exercitus ivit arenas.

Præbebant inopes pabula rara viæ.

Prima fames frondes virgultaque mollia quærit.

Qui poterat ficum carpere, dives erat.

Carduus urticæque graves, tribulique, rubique

Et coria ignoto mollia facta lacu:

Ultima post glandes miseris alimenta fuerunt;
 Pellebant avidam putria stagna sitim.

Pars letho cecidēre : fugæ pars terga dederunt.

His quoque vix macies ossa perusta tegit.
 Funera movissent alios cladesque suorum :

Rex tamen incultis montibus urget iter.
 Sortirique ferus mandat, decimumque necari.

Impia fatales accipit urna notas.
 Sortibus eductis, cecidit pars icta securi :

Vitam pars, comitum morte, superstes alit.
 Quis non has epulas voluit postponere fato?

Hei mihi! quam multis vota fuēre mori!
 Instat adhuc coeptis laniatâ parte suorum,

Dirus, inhumanis barbariorque lupis.
 Sed timuit ne sorte datâ traheretur ad urnam.

Hoc rabies uno victa timore fuit.
 At vos, quid furia valeant, hinc discere cautos

Convenit : alterius dulce valere malo est.
 Hostibus elapsis, in proxima vertitur acer

Impetus, atque omni parte timendus adest.
 Scilicet ut nullo discrimine fulmina lædunt,

Ut feriunt flammis obvia quæque suis.
 Utque trahunt magnæ nimium vicina ruinæ,

Læsaque pars damnum proximitate tulit :
 Sic procūl ire juvat, sic devitare furentes

Convenit : exitio turba propinqua luet.
 Annæum juveni conjunxerat aula Neroni.

Illius hic Princeps : ille magister erat.
 Usus amicitia magnus; Senecamque docentem

Audiit, hinc mores composuitque suos.
 Atque utinam feros probitas mansisset in annos!

At mala principiis obstitit ira bonis.
 Illa peregrinas Annæum misit in oras.

Hunc procūl à Latio Corsica cepit humus.
 Quid tibi nunc virtus præceptaque mitia profunt?

Iram quid domitam legibus esse tuis ?

Quid

Quid laudata juvat clementia ? pelleris exul.

Officio merces redditur illa tuo.

Sed tamen exilio gaude, neque respice Romam.

Eheu ! quàm multum sanguinis illa bibit.

Proximus ut quisque est, ita Cæsaris ociùs armis

Occidet, atque iræ victima prima cadet.

Te quoque, si redeas, lictoris sica cruenti,

Balneaque humano plena cruore manent.

Quin etiam, ut fama est, maternâ cæde Tyrannus

Haud timuit diras commaculare manus.

Scrutatusque uterum, spirantibus ausus in extis

Quærere, delituit quo puer antè, locum.

I nunc, aude aliquem meritis sperare favorem,

Teque piis tutum moribus esse puta.

Quid potuit nato conjunctius esse parente ?

Et tamen à nato vulnera mater habet.

Scilicet arma magis quam fœdera novit, & ira

Ipsa patrocinii jura caduca facit.

Nomina Amicitiae, Fidei, Pietatis, Amoris,

Barbara sunt : nec quo se tueantur, habent.

Creditur hoc etiam ? post fata cruenta suorum,

Ipse suum rupit barbarus ense latus.

Hoc est quod Superi contorquent denique fulmen.

Hic Jovis, Enceladus, vindicis igne jacet.

Istos juxta petit cœlo victore Gigantes

Pœna, nec auctores deserit ira suos.

Fulmina sunt, cæcâ pressi caligine sensus :

Fulmina sunt, furiis mens agitata novis.

Fulmina sunt, actum propria in præcordia ferrum.

Hos furor eventus sanguinolentus habet.

Vindice, crede mihi, rarò caruere furentes,

Casus & aut illis, aut Deus ultor adest.

Finge tamen nullo pœnæ terrore teneri,

Iraque securum præstet ab hoste latus.

Vindicibus careat furor, & dominetur inultus :

Te timeant cuncti : nullus ad arma vocet.

Quàm tamen hoc miserum est, Pœnorū more leō-
 Vivere, nec vacuas cædis habere manus? (num
 Volvere terribiles oculos, semperque minari
 Prælia : sollicitis omnibus ire trucem :
 Fœdus amicitiae violare, odisse propinquos,
 Mitia non aliquo tempore verba loqui?
 Vindicta, exilium, cædes, tormenta, catenæ,
 Occurrunt animo nocte dieque tuo.
 Quàcumque ire paras, tacito te devovet ore,
 Et fugit ut rabidi vulgus ab ore lupi.
 Sive lares petis ipse tuos ; timuere propinqui :
 Sive forum ; trepidi muta figura fori est.
 Curia te refugit tumidum, sociusque senator
 Festinat lateri cautus abesse tuo.
 Omnibus exosus fastiditusque recedis,
 Atque hilares mortis spes facit una tuæ.
 Hæc facies rerum exterior. Crudelior intus
 Hostis adest, animæ pax violata tuæ,
 Terroresque, fugæque, & somnia plena tumultu,
 Et semper pavidi corde micante metus.
 Sivè cibos caperet Sículus conviva Tyrannus ;
 Horruit appositis mixta venena cibus.
 Seu peteret ludos, circum fulgentibus armis
 Stipabat timidum densa corona latus.
 Omnia pertimuit : barbam, tonsore remoto,
 Quis credat natas subsecuisse patri?
 Hæc comes it trucibus justissima pœna Tyrannis,
 Ut timeant jugulo tela parata suo.
 Ipse sibi est animus tortor ; sincera voluptas
 Exulat, & nusquam candida tota venit.
 Qui nocuit reliquis, qui fœdera sanguine rupit,
 Cogitur exemplis anxius esse suis.
 Cur lupus & sævi condunt se montibus urfi,
 Audet in humanos agna venire sinus?
 Nempe quod hæc mitis, noceant mortalibus illi,
 Hæc sit pacis amans, hi fera bella gerant.

Respi-

Respice pallentem fraterna cæde Cainum,
Ut procùl à patrio cogitur ire lare!

Quò scelerate fugis? quò devius orbe vagaris?
Non poteris furias effugere ipse tuas.

Te licet occulto tellus tegat ima recessu:
Hostis qui timidum terreat, intùs erit.

Cetera prætereo nocituri damna furoris,
Ingenio lector concipe plura meo.

Adjice, quæ proprio doluisti doctus ab usu.
Quisque sibi testis candidus esse solet.

Quò meliùs morbos animi perspexeris ægri,
Fortior hòc prisca vulneris ultor eris.



DE IRA LIBER III.

Remedium iræ.

Semina cum causis, & damna secuta furorem,
 Materies numeris bina fuere meis.
 Jam medicina juvet, jam vulnera tollere tempus,
 Jam melior partes Musa medentis age.
 Si potuit vetiti quondam Præceptor amoris,
 Quod cecinit, serò velle perisset opus:
 Quosque Cupidineis malè sparserat artibus ignes,
 Utiliter fufis obruit auctor aquis:
 Cur ego non alios tentem superare furores?
 An minùs Idaliis ignibus Ira nocet?
 Illa tamen monstris caput altiùs omnibus effert,
 Illa ferox nostro sanguine bella gerit:
 Cumque pigro serpant contagia cetera morbo,
 Emicat, & nullas fert violenta moras.
 Pugna gravis superest. Procùl hinc discedite iner-
 Hostibus à magnis gloria magna venit. (tes.
 Jam litui sonuere: vocor ducturus in hostem
 Agmina. Quisquis ades, corripe tela manu.
 Ecce subit stygiis egressa paludibus ardens
 Bellua, vipereas Ira soluta comas.
 Neve parùm possis cognoscere, respice vultum:
 Dimidium palmæ, cognitus hostis, erit.
 Quò fugis? Haud animum timeas firmare tuendo.
 Tota sub aspectus Ira vocanda tuos,
 Igne micant oculi, turgent suffusa veneno
 Pectora, mugitu guttur & ora sonant.
 Spuma cavos, laniesque pererrat candida rictus,
 Formaue nescio quid grande minantis habet.
 Huic comes it socio properans Infania passu,
 Et regit incertæ sola sororis iter.
 Subsequitur Vindicta, necesque & vulnera spirans
 Evomit in Superos impia verba Deos.

Hanc

Hanc circum volitant Furia, quas torva flagello
 Increpat, & stimulis Ira valere facit.

Capta subit Ratio manibus post terga retortis,
 Et trahitur scissis Pax violata comis.

Læsaque Amicitia & contemptis legibus Æquum,
 Et Decor, & durâ compede vincta Fides.

Ecce velut torrens pluvialibus auctus ab Hædis,
 Devia, nec certis finibus Ira ruit.

Quâ properat, prosternit agros & gramina vellit,
 Ultricique ferit stantia saxa manu.

Non, stimulante fame, sic infremuere leones,
 Antraque præcipiti deseruere fugâ:

Nec sic, quem telo vexat gladiator Ibero,
 Taurus ab excussâ cornua jactat humo:

Ut fremit & trepidis regionibus Ira minatur,
 Longaque submoto fœdere bella movet.

Prima fuit rabidum cognoscere cura furorem;
 Proxima, quâ monstrum parte dometur, erit.

Si quid opis montes, si quid Parnassia tempe,
 Si quid habent citharæ Phœbe canore tuæ:

Graminaque Aonidum rorantibus uda sub antris,
 Pegaseæque fugax vena salubris aquæ:

Omnia nunc vires ad opem conjungite vestras.
 Non tenui magnum vincitur arte malum.

Et tibi sunt arcus, & sunt tibi Phœbe sagittæ,
 Iönio constat quas valuiffe mari.

Pythius & spiris nequit vitare pharetram
 Anguis, & hæc dextræ gloria prima fuit.

Adjice præteritæ monumenta recentia laudi,
 Hæc nova præsidio bella gerenda tuo.

Delphica victoris prætexam templa coronâ,
 Addet & ad festos hunc quoque Musa diem.

Hæc ego: stridorem visa est levis aura dedisse.
 Antè oculos Phœbus (non ego fallor) erat.

Non tamen ex humerisabilem suspenderat arcû,
 Tela quoque in vacuâ nulla fuere manu.

Sed

74 REMEDIUM IRÆ LIBER III.

Sed citharam arridens digitis aptabat eburniam,
 Atque ait; auspiciis concidet Ira meis.
 Illa tamen nullis madefiet saucia telis,
 Nec feret optatam nervus & arcus opem.
 Cantus opem feret hanc, citharæq; potentior ictus,
 Quam pharetræ longè tela vibrantis erit.
 Sit truculenta licet fetâque ferocior Hydrâ,
 Scilicet obsequio carminis Ira cadet.
 Æripedes olim domuerunt carmina tauros,
 Hospes ut auratæ vellera vexit ovis.
 Non erat aut galeâ, aut clypeo sat tutus Iason,
 Sat tamen Æsonides carmine tutus erat.
 Carmine sopivit vigilem Medea Draconem,
 Qui poterat squamis vertere tela suis.
 Disce novi vates operis, sine vulneris ictu,
 Iram Pieriâ perdomuisse lyrâ.
 Non ego te Hæmoniaë contundere noxia terræ
 Gramina, non jubeo Phasidos arva sequi.
 Nulla veneficiis ponetur inanibus Ira,
 Innocui Phœbus carminis auctor adest.
 Dixerat: Aonio leviter mea tempora ramo
 Contigit, & celeri cessit in astra viâ.
 At mihi divinus circum calor ossa cucurrit,
 Nec mora, terrenum pectore cessit onus.
 Ergo age quisquis ades, veteris quem poenitet iræ,
 Qui cuperes turpi liber abire jugo:
 Quem desiderium pulcræ tenet acre salutis,
 Votaque non omni languida parte jacent:
 Ne pereas, pestisque malo dominante perennet,
 Accipe præceptis commoda certa meis.
 Opprime, dum nova sunt, vivacis sulphura flammæ.
 Maxima sunt tardæ damna futura moræ.
 Vidi ego succensis affundi flumina tectis:
 Flamma recens modicâ victa dehiscit aquâ.
 Exiguo de fonte patens enascitur amnis,
 Virgaque, non longo tempore, robur habet.

Cre-

Credere quis possit quercum de semine jacto
 Surgere, quis Nilum fonte venire putet?
 Et tamen hæc latos jam porrigit æthere ramos,
 Ille fuit septem conspiciendus aquis.
 Utque novum veteri meliùs sanabile vulnus,
 Sic Iræ melior cura recentis erit.
 Omnia principiis minimo curantur : at hora
 Longior, est vitiis vulneribusque gravis.
 Pectora cum primo fuerint agitata furore,
 Si sapis, haud celerem ferre moreris opem.
 Excutis intactâ nocituram veste favillam:
 An minor est animi cura futura tibi?
 Ah! miser ignoras in quanta incendia crescat,
 Obruta ni primis motibus Ira cadit.
 Virus ab exiguo paulatim in viscera morfu
 Serpit, & exitium læsa medulla trahit.
 Prima sit infirmos igitur superare furores
 Cura, novus quisquis miles ad arma venis.
 Cum benè pacati ceciderunt pectoris æstus,
 Effice ne fragili stet tibi palma loco.
 Ne repetat pugnam, victus modò, fortior hostis;
 Militiæ faciet dexterioris opus.
 Admonitu redit ira levi : si sulphure tangis,
 Vivet : habet flammæ semina certa cinis.
 Tu cave, quæ primùm læserunt, mente revolvās,
 Immeritum nec te multa tulisse putes.
 Nec tibi diffidii causas, tempusque, locumque,
 Nec tibi quæ fuerint verba modumque refer.
 Mens aliò vertenda nocens. Quid imagine gaudes?
 Transit in affectus ista figura malos.
 Nec tibi sit mores, nec sit tibi facta notare
 Alterius, qui te læserit antè, labor.
 Vera tibi ut referas, plus falsis vera nocebunt :
 Alterius culpa est causa futura tuæ.
 Non comites audi rarò meliora monentes,
 Vix aliquis partes conciliantis aget.

Non

76. REMEDIUM IRÆ LIBER III.

Non tu consilii prætexas jura petendi;

Has malè per rimas callida flamma subit.

Omnia lethæo sunt perfundenda liquore :

Palmam, qui poterit non memor esse, feret.

Atque ut plena tuis maneat victoria castris,

Tutus & ex omni parte triumphus eat :

Ne pigeat propriis oculos advertere factis;

Eripiat totos hæc tibi cura dies.

Tu tibi sis judex, in te tibi collige testes,

Teque reum, quamvis non eris, esse puta.

Si benè te damnas, si causam litis obortæ

In tua convertis crimina, salvus eris.

Et juvat ætatem deducere carmen in omnem,

Sentiat ut medicæ quilibet artis opem.

Debita præcipuè est annis vigilantia primis,

Ut pater officii sit memor usquè sui.

Sedulus exploret mentes, fingatque tenellas,

Radicisque malæ germina prima secet.

Parvus, & in cunis, vicit Tyrinthius angues :

Quis credat teneras hoc valuisse manus?

Pòst tamen & fulvos fertur superasse leones,

Atque humeris cœlum grande pependit onus.

Mollibus ex annis spes est censenda futuri.

Nobile depositum cura parentis habet.

Moribus invigilet pueri pater, & bona nutrix,

Venturique doment semen inerme mali.

Sapè animos juvat imperio tentare paterno,

Interdum & studio, quæ rogat ille, nega.

Pœnaque nascentes iras moderata sequatur.

Deficiet curâ prima favilla tuâ.

Cura rudes virgas recto consurgere trunco,

Spemque bonæ dominum messis habere facit:

Vitibus & steriles detondet cura racemos.

Luxuriat brevibus pleniùs uva comis.

Cura facit dominis catulos parere leonum.

Difficilè est canis jussâ dedisse lupis.

Si tamen antiqui valuerunt semina morbi,
 Et furor in capto pectore regna tenet :
 Non ego te, quamvis valido certabitur hosti,
 Immemorem palmæ ponere tela velim.
 Desperare nefas. Timidis victoria numquam
 Risit, & ignavas effugit illa manus.
 Dum favet, & nulli turbant præcordia motus,
 Dum tibi tranquillæ tempora pacis eunt :
 Collige venturæ medicamina providus iræ.
 Me duce, non ullum tempus abibit iners.
 Optima prævertit morbum medicina futurum.
 Anticipa : tardam quis roget æger opem?
 Præcipuè cum liber eris curisque solutus,
 Queis ferias hostem, sedulus arma para.
 Quæris ubi invenias? Plutarchi perlege libros,
 Nec tibi sit Senecam consuluisse labor.
 Cautus eris lectis milesque paratior illis :
 Hi tibi quod fugias, quodque sequare, dabunt.
 Quis vetet & nostros vacuum legisse libellos?
 Forsan & hîc aliquid quod juvet, esse potest.
 Tu cùm sanus eris, menti modò singula sanæ
 Inferre : præsidium, cùm subit ira, dabunt.
 Improvisa magis feriunt mala : mensque periculo
 Anxia præsentis est, consiliumque fugit.
 Cùm furor invasit, serò præcepta petentur
 Mitia ; quod faceres, antè docendus eras.
 Te nunc ira rudem, te nunc deprendet inermem,
 Vulneribusque tuis pectora nuda dabis.
 Ecquis equo, volucris quando ruit ocior aurâ,
 Vincula tum primùm frenaque fera paret?
 Tunc decuit, cùm mitis erat ; cùm carcere clausus
 Præbebat facili colla premenda manu.
 Nunc vagus effreno fertur per devia saltu,
 Nec pondus domini verba monentis habent.
 Ecce premit muros densis exercitus armis,
 Obsidet & clausum pervigil hostis iter :

78 REMEDIUM IRÆ LIBER III.

Stulte quid annonam medios inferre per hostes,
 Præsidiumque tibi lentus & arma paras?
 Pacis opus fuit hoc. Quid inertia tempora damnas?
 Tradentur ducibus mœnia victa novis.
 Tu quoque venturæ victor domineris ut iræ,
 In promptu galeam scutaque miles habe.
 Tu quoq; frena para: frenis fera monstra domantur.
 Principium cladis libera colla dabunt.
 Pessima libertas animis, ut pessima ponto:
 Utraque res vinclis impedienda suis.
 Provida litoribus natura coercuit æquor.
 Litora si desint, omnia pontus erunt.
 Deucalionæ testantur tempora Pyrrhæ:
 Terra superfusis nulla patebat aquis.
 Mens pelago similis: res utraque plena procellis:
 Et suus est animis, & suus æstus aquis.
 Litora quid dubitas rapidæ circumdare menti?
 Injice veloci vincula fessor equo.
 Et tamen ut mentes variant, variabimus artem:
 Non quæcumque tibi vincla, sed apta para.
 Frena quidem Phaëton, sed non tamē apta tenebat:
 Eöis cecidit non minùs ille rotis.
 Quæ medicina juvat reliquos, tibi sumpta nocebit.
 Noscenda est morbi vis & origo tui.
 Nota tibi sensim tua sint mala: seu tibi fastus,
 Seu stimulos iræ subdere vina solent.
 Sive dolor, minimique nocent incommoda morbi.
 Curave difficilem non moderata facit.
 Seu te libertas linguæ fandi que cupido
 Abripit, & pacis jura fovere vetat.
 Sive cupis sapiens aliis prudensque videri,
 Debeat ut sensus quisque probare tuos.
 Exploranda mali sunt semina. Tum tibi leges
 Scribere, tum menti ponere jura decet.
 Ebrietas nocuit? facito convivia vites.
 Diffidium peperit lubrica lingua? file.

Da requiem curis, si sis morosus ab illis:
 Da ludo, si quæ crimina ludus habet.
 Deniq; quodcumq; est animû quod læserit ægrum,
 Hâc miser, ut valeas, parte juvandus eris.
 Utque solent medici, vitiis contraria quære
 Pharmaca: non ægros quælibet herba juvat.
 Fortè movet bilem facilis tibi causa, frequensque,
 Speratæque procùl meta salutis abest?
 Singula diversis adhibe medicamina causis.
 Temporibus tamen hæc sunt adhibenda suis.
 Pauca, sed è multis aptissima selige, nec te
 Propositis onera, ne grave fidat onus.
 Non benè cum turba luctaberis: impete victor
 Singula; vis junctis fortior esse solet.
 Impetus ille nocet subitò sanare volentis
 Omnia: per partes cura medentis eat.
 Cura laborque probi tibi sunt imitanda coloni,
 Cui fuerant empti jugera multa soli.
 Illi vomeribus durisque ligonibus aptus
 Filius, & glebas vertere doctus erat.
 Huic pater arva rudis terræ proscindere mandat,
 Et lolium & steriles tollere falce rubos.
 Ivit ut excoleret squalentes sentibus agros,
 Parsque lacertosi cœpta laboris erat.
 Postque moræ spaitum dum circùm lumina flectit,
 Atque oculis lustrat jugera vasta suis,
 Substitit, ut longo porrectum limite campum
 Videret, & in dura sedit inanis humo.
 Atque ita, quis tantum speret tolerare laborem?
 Dixit: in immensum terra colenda patet.
 Obruerant animos operis molimina magni,
 Et labor aspectu terruit ipse suo.
 Fortè parens illuc studio nova rura videndi
 Venerat, & nati rura colentis opus.
 Ut vacuum sedisse videt, quæ causa quietem
 Suadeat, & cur sint otia tanta rogat.

Filius

80 REMEDIUM IRÆ LIBER III.

Filius immensi causatur jugera campi,
Utque suis impar viribus esset onus.
Risit, & hūc oculos referas stolidissime, dixit:
En erit hæc operis meta diurna tui.
Et prudens divisit onus, partemque colendam
Falcibus exiguam vomeribusque dedit.
Tu quoque paulatim sævæ contagia pestis
Opprime, sat curæ pars erit una tuæ.
Singula cūm possis, frustra simul omnia speras
Vincere, conantem debilitabit onus.
Aspice dum validos cingunt hostilia muros
Agmina, non omni machina parte tonat.
Omnia cūm speret munimina vincere miles,
Arcis ad exiguum fulminat ille latus.
Non erat Alcides primo qui perderet Hydram
Vulnere, per partes occidit illa suas.
Nec tibi momento referet victoria laurum.
Difficiles partus gloria semper habet.
Tu de propositis partem tibi selige multis,
Conveniatque humeris sarcina iusta tuis.
Proximus huic labor est, tibi quæ satis apta putabis,
Singula ab eventu velle probare suo.
Crede mihi, faciet non sola scientia sanum.
Scire licet multis : qui facit, ille valet.
Plus tibi dat longis brevis experientia votis.
Hæc juvat, inque animos altiùs ire solet.
Certius ille minas & saxa latentia ponti
Vitat, qui dubiâ sæpè cucurrit aquâ.
Ille valet multo bellorum interritus usu
Miles, sub galeâ quem senuisse vides.
Segnities superanda tibi est. Jam profilit hostis;
Scuta cape, & validâ tela repelle manu.
Scilicet hærebis primos ad pectoris æstus,
Et cupies animo posse favere tuo.
Et tibi vindictæ succurrent mille figuræ,
Et freni impatiens, pacis & osor eris.

At nisi præceptis accesserit usus honestis,
 Utilius fuerat nîl didicisse tibi.
 Turpius ille cadit, qui, cùm divertere possit,
 Saxa suum prudens lædit ad icta pedem.
 Æger es, & morbi præsens medicina paratur,
 Quôque malum possis tollere, succus adest.
 Quid tibi profuerit lecto vicina reponi
 Pocula, quæ trepido languidus ore fugis?
 Ut valeas, timor hic succi ponendus amari.
 Incipe : erit totus vincere prima labor.
 Aspicias ut solvunt patrio de litore classem,
 Omnis in officio nautica turba suo est.
 Carbasa pars tollunt, pars pendula funibus errant :
 Hic celer obliqui summa rudentis adit.
 Portubus egressi nautæ per transtra quiescunt.
 Quod superest : navem ventus & unda feret.
 Principiis labor omnis inest. Enitere clivo
 Culminis exigui : cetera prona via est.
 Ergo ubi trux animus veteres meditabitur iras,
 Incipe propositis addere facta tuis.
 Viribus hîc opus est, hîc ô fortissime certa :
 Difficilis parvæ pugna futura moræ.
 Mox tibi prætendet victoria læta coronam,
 Inque tuum venient laurea ferta caput.
 Et juvat exemplis animum stimulare priorum,
 Iræ qui dominos imposuêre pedes.
 Respice Socraticæ monumenta perennia vitæ :
 His tibi de tenebris pars quoque lucis adest.
 Nulla cui in toto fuerant commercia cœlo,
 Nec satis æthereâ notus ab arce Deus :
 Dicitur ille tamen, quoties præsenferat iram,
 Verba levi solitus fracta referre sono.
 Dicitur & pressis gestus breviasse lacertis,
 Et modico passus corripuisse gradu.
 Lumina quin etiam blando ridentia vultu,
 Oraque compositæ simplicitatis erant.

82 REMEDIUM IRÆ LIBER III.

Ipse Decor placidâ sensus statione tenebat,
 Ipse Decor pulcro membra coacta situ.
 Artibus his primo cecidit furor irritus ortu.
 Artibus his victor quilibet esse potest.
 Scilicet emoritur, cui non datur exitus, ignis,
 Flammaque, concluso carcere, prima perit.
 Non tamen his semper monitis confidere tutum est.
 Sæpè habet eventus ira repressa malos.
 Ipse vides magnos agitari sulphure montes,
 Et validas turres flamma sepulta movet.
 Si minor est; conclude, perit: si maximus ignis;
 Liber ab effracto carcere victor abit.
 Ipse levem poteris pariter superare furorem,
 Vincere & invalidi semina prima mali.
 Acrior exarsit solitò, atque exæstuat intus?
 Ille furor verbis emoderandus erit.
 Non solet à magno subitò subfidere vento
 Fluctus; erit positâ lenior ille morâ.
 Ergò ubi deprendes totis ardere medullis
 Pectora, da morbo tempora parva tuo.
 Tempore commotæ vis frangitur orta procellæ,
 Sistitur indomiti tempore cursus equi.
 Tempore quis nescit sævas mitescere tigres,
 Et juga paulatim ferre molesta boves?
 Tempore te requiem jubeo sperare furoris:
 Maxima per vires concidet ira suas.
 Hæc etiam est artis non cura novissima nostræ,
 Ne celer ad pœnas, quas dabit alter, eas.
 Lentus ab offensâ crimen punire memento.
 Vindictæ spatium, cum subit ira, dabis.
 Nam ferulâ vultuque minax, & more furentis,
 Alterius culpæ turpiter ultor eris.
 Utilitas factum suadet memorare Platonis,
 Cujus ab ingenio Græcia nomen habet.
 Percussurus erat famuli data terga merentis,
 Sustuleratque avidâ lora parata manu:

Sub-

Substitit, ut sensit motas violentiùs iras,
 Forma que ceu domini percutientis erat.
 Dum reus expectat pœnas vindexque minatur;
 Dum mora fit : vires fregerat ira suas.
 O! quantum ulturo nocet indulgere furori?
 Crede mihi, vindex non moderatus eris.
 Crescit, & egreditur fines properata decori,
 Iraque supplicii nescit habere modum.
 Exiguum est quod amice rogo. Non sumere pœnas
 Te veto : quid modici temporis hora nocet?
 Differ opus : lentè properat vindicta Deorum,
 Nec veniunt celeri fulmina missa manu.
 Æquior ad pœnam, iudexque paratior ibis,
 Pectora cùm cæco tota furore vacant.
 Grande moræ pretium : justâ pendentia lance
 Crimina supplicium, quod meruêre, ferent.
 Offensæ tamen interdum vindicta negetur.
 Sæpè rei culpam dissimulasse juvat.
 Sæpiùs & veniam facilis concede roganti.
 Tunc quoque concedes, cum rogat ille nihil.
 Utque malus persistet, pergatque laceßere dictis,
 Tu tamen excusans mollia verba dabis.
 Ardua res, fateor, verbis quoque mitibus uti :
 Forsitan hinc artes corripiesque meas.
 Si sapias, sint dura licet, præcepta sequeris.
 Ferre solet certam potus amarus opem.
 Lacte leves morbi & succo meliore juvantur,
 Vulnus & exiguum fascia mollis obit.
 At quoties imæ vitium traxêre medullæ,
 Ut valeas, ferri durior usus aget.
 Saucius & sectis patieris partibus ignem,
 Et medici duras esse querere manus.
 At tibi, quicumque es, dominæ qui subditus iræ
 Servis, & longi temporis æger ades :
 Non tua sunt tenui leviter percussa sagittâ
 Pectora; descendit vulnus ad ossa tuum.

84 REMEDIUM IRÆ LIBER III.

Cura gravis superest. Phœbo parete medenti,
Tolletur medicâ carminis arte malum.

Carmine Jëssides Regem placasse furentem
Dicitur, & cantu demeruisse suo.

Sustulerat validis quatiendam viribus hastam.

Ut canit, oblitâ decidit hasta manu.

Ergo ubi læsus eris, ne te malus auferat ardor,
Et cita vindictam concitet ira, cave.

Vel tu dissimula, si clâm peccaverit alter;

Vel pius ignoscas crimina facta palâm.

Nîl tibi decedet; factô laudaberis isto.

Accedet famæ gloria magna tuæ.

Mascula vis animi surgentes tuta procellas

Audit; & ignavum, parcere nolle, putat.

Imperturbatæ felix constantia mentis

A Superis, Divûm munere, missa venit.

Forsitân hoc curas ne prava licentia crescat?

Ne capiat vires libera culpa novas?

Scilicet errores fovet indulgentia: nec te

Vindictæ studium, sed bonus ardor agit.

Hæc cave ne species & amor te fallat honesti.

Virtutis vitium sæpè colore venit.

Celat avaritiam, qui prodigus esse veretur:

Fit petulans, si quis rusticus esse timet.

A vitio tenui distat discrimine virtus.

Fallit, & arbitrio res eget illa gravi.

Dic mihi, quid solers aliena pericula curas?

Ad tua sollicitas vulnera verte manus.

Cùm tibi parta salus, cùm te curaveris ipse,

Alterius tutò causâ salutis eris.

Nunc tibi, quod vincas in te, convitia præstant.

Materies palmæ culpa aliena tuæ est.

Ni facis, ista tuæ velamina callidus iræ

Addis, & ad flammam pabula cæca paras.

Et poteris valida mentem ratione tueri:

Calliope cæcum non tibi monstrat iter.

REMEDIIUM IRÆ LIBER III. 85

Tu modò quas artes Musæ, quas dictat Apollo,
 Ne sine veliferos per freta ferre Notos.
 Vel senior, vel par, annisve minoribus impar
 Hic, aliquo qui te crimine lædit, erit.
 Si minor est, major congressus sperne minores,
 Victaque contemptu turba sit ima tuo.
 Jupiter & turre, & montes percutit altos;
 Prætereunt humiles fulmina celsa casas.
 Aspice nobilium certamina lenta leonum,
 Detrectant magnæ bella minora feræ.
 Securas venit acris equi latratus ad aures,
 Ungulaque immisso non ferit unca canes.
 His licet exemplis convitia vana minorum
 Spernere : te gravitas, quæ tueatur, erit.
 Parcere nec dubita senior juvenilibus annis :
 Ætatis memorem te decet esse tuæ.
 Turpè senem verbis contendere : parce moveri :
 Non levitas canis convenit illa tuis.
 Si matura tamen juvenem te corripit ætas,
 Perfer : habent anni jura minora tui.
 Seu meritis annisque pares ad bella coitis;
 Accipe, quâ superes fortior arte parem.
 Major eris, modò cede prior : qui vincitur irâ,
 Deterior vitio redditur ille suo.
 Sic tibi, quisquis erit verbis mordacibus usus,
 Ad veniam, facilem monstrat Apollo viam.
 Esto reis facilis; prodest favor ille duobus :
 Ipse tui victor, victor & hostis eris.
 Ille graves fuerat qui prorupturus in iras,
 Exemplo discet mitior esse tuo.
 Utile consilium teloque potentius omni,
 Obsequio mentes flectere velle feras.
 Rupibus impulso mucrone recanduit ignis :
 Mollibus in lanis ictus inanis erit.
 Aspicias ut stimulis sonipes vexatus acutis
 Per juga sessorum, per cava saxa ferat?

86 REMEDIUM IRÆ LIBER III.

Idem deductâ per colla ferocia palmâ
 Substitit, & domino paruit ille suo.
 Parva juvant. Hostem blando prior ore saluta,
 Viceris : extinctas sentiet ille faces.
 Sæpè nocens longos odium tenuisset in annos :
 Principium pacis causa minuta dedit.
 Fac possis tria verba loqui, sint mista querelis
 Illa licet : verbis conciliatur amor.
 Obdurant animos inimica silentia : nec jam
 Quà subeant furtim fœdera, rima patet,
 Effice jucundo pereat discordia risu,
 Redde propinanti dulcia vina manu.
 Proderit atque animi sensus, irasque fateri ;
 Non etiam causas exposuisse veto.
 Asperitas absit tantùm, similisque dolenti
 Objice, quæ verbis diluat ille suis.
 Ut benè se purget, de te quoque pauca queretur,
 Et referet rixæ verba molesta tuæ.
 Læsus uterque fuit? veniam concedet uterque
 Proniùs ; ad pacem mutua culpa facit.
 Tardiùs ignoscet, qui totum crimen in hostem
 Conjicit, errores dissimulatque suos.
 Irasci se jure putat, quem læserit alter
 Immeritum : ipse tibi fac videre nocens.
 Ira reum te sola facit ; si cetera desint,
 Indiciu culpæ est hæc satis una tuæ.
 Hæc meruit pœnas : in te licet esse severo :
 Quæ fuit, ultrices sentiat ira manus.
 Hoc genus, hoc studium vindictæ suadet Apollo.
 Dî faciant vindex strenuus esse velis !
 Quilibet ex facili est alieni criminis ultor ;
 Qui sua sustineat plectere, rarus erit.
 Et tamen irato pœnæ tibi proderit usus.
 Cautos pœna reos, ne recidantque, facit.
 Longiùs errantes, procul & venatibus actos,
 Ire docèt gyro pœna minore canes.

REMEDIIUM IRÆ LIBER III. 87

Hæc duræ cervicis equum, quondamque rebellem,
Arbitrio domini frena tenentis agit.

Sit moderata tamen, neque culpam limite lato

Transvolet : immodico multa rigore nocent.

Quæ poteras fuccis, curas malè vulnera flammis.

Viribus & culpæ pœna sit æqua tuæ.

Quem teneas, tibi Musa modū justissima monstrat.

Non ego te flagris terga notare velim.

Nuda nec excussis moneo contundere pugnīs

Pectora, nec duro lædere poste caput.

Suppositove breves somnos corrumpere saxo,

Nec caput immundis spargere pulveribus.

Mitius ingenium Musis. Tu vespere sero

Ante oculos censor facta diurna refer.

Tum tibi succurrat numerum censere furoris,

Sævierit quoties ira, quibusque modis.

Nec lacrymæ defint, sed conscia sidera flentis

Aspiciant vigiles immaduiffe genas.

Pallidaque austerus subeas jejunia vindex,

Et poterit miseram lympha levare sitim.

Si patitur fortuna, stipem largire roganti,

Et tua munificâ crimina plecte manu.

Proderit ambobus pœna hæc, inopique, tibi que ;

Cautior ære dato : ditior alter erit,

Hæc tibi præteritus ratione piabitur error.

Supplicio sensim concidet ira tuo.

Aspicias incultâ tribulos exfurgere glebâ ;

Terra bonas messes vomere læsa dedit.

Hic labor agricolis. Animi tibi cura colendi

Contigit : ingenii nobilioris opus.

Surgit & hîc spinis furor enutritus acutis,

Pectoribusque tuis tetra venena virent.

Incute (quid dubitas?) radicibus incute ferrum.

Perdenda est forti messis iniqua manu.

Quantum animo parcis, pœnasque subire recusâs,

Tantò radices altiùs ira jacit.

88 REMEDIUM IRÆ LIBER III.

Hîc juvat immitem, juvat ô! juvat esse severum!
 Si fapis, hîc Minos, hîc Rhadamanthus eris.
 Quòque magis valeas, tetra mala plurima pestis,
 Damnaque erunt animo cuncta videnda tuo.
 Improbis immerito furor insultavit amico,
 Et memini æternos me violasse Deos.
 Nec timuit furibunda manus propellere mensam,
 Et cava sunt tumidâ pocula jacta manu.
 Causa quoque ambigui nuper fuit ira duelli,
 Paxque mihi fuso sera cruore stetit.
 Adde graves morbos, & ruptas sanguine venas,
 Utque fero restet nullus in ore color.
 Dî faciant! mediâ speculum tibi detur in irâ.
 Gorgonis anguicomæ forma futura tua est.
 Hæc tot damna pati miseris placet? heu grave sævæ
 Servitium dominæ, quam bona nulla juvant!
 Dulcius est servasse fidem, coluisse propinquos,
 Tempora jucundis ducere blanda jocis:
 Pace frui, quâ non superis formosior oris
 Est Dea, nec cupidò gratior ulla mihi.
 Hæc mihi contingat; non conchas litoris Indi,
 Non querar exiguo marmor abesse lare.
 Me mea paupertas supra Regumque triumphos,
 Sublimemque super sceptra cruenta feret.
 At vos purpurei multo jam sanguine Reges,
 Noxia perpetuâ claudite bella serâ.
 Nutibus à vestris felicia sæcula pendent.
 Nîl, dare quod possint, Numina majus habent.
 Pace data, nostris fugient quoque cordibus iræ.
 Hâc ego vos tantum conditione rogo.
 Fallor, an à dextro Concordia risit Olympo,
 Paxque coronatas constitit ante fores?
 Lite vacent aures, inimicaque jurgia cessent:
 Pectoribus fidus vincula nectat Amor.
 Pulsa Fides redeat, redeant Æquumque, Pudorq;,
 Ferrea cum vestris bella valete tubis.

Fœdera qui rupturus ades, procul exul agaris,
 Inter & infames sit tibi rixa lupos.
 Hoc tu supplicium refugis? data fœdera ferva.
 Artibus hoc nostris posse docendus eris.
 Forsitan incautus verbo te lædet amicus,
 Poscentive citam ferre negabit opem?
 Crede gravem subitâ curarum mole teneri,
 Nec cupidum rebus posse vacare tuis.
 Utque vacet, certè mentis vel corporis ægri
 Hunc aliquâ læsum parte dolere puta.
 Atque priora refer tibi quæ benefacta tuisque
 Contulit: hæc memori mente tenere decet.
 Tot bona delicto vilescunt turpiter uno,
 Culpa recens ob quæ dissimulanda fuit.
 Quis furor est rigido pomaria lædere ferro,
 Unus si vacuus fructibus annus eat?
 Tot prius Autumnis curvis pendentia ramis
 Legisti facili grandia poma manu:
 Et tibi larga Ceres fœcundis munera glebis,
 Exhaustoque dedit pingua grana sinu.
 Horrea cum multas cepere capacia messes,
 Da requiem fesso dure colone solo.
 Ni facis, ingratus meritòque voceris avarus,
 Quæque prius data sunt, perdere dignus eras.
 Lancibus hæc librare decet. Quis crimine in uno,
 Si quod erat, culpam dissimulare neget?
 Si numerent alii factorum errata tuorum,
 Moribus invenient plura notanda tuis.
 Munera si numerent, quæ tu concesseris illis,
 Invenient parcâ non data multa manu.
 Christiadûm hæc populis canimus. Si Bessus, & atræ
 Parthus amans cædis negligat ista, feram.
 Fas mihi conjugibus certas quoque ponere leges.
 Postremum hoc vati Musa secundet iter.
 Vos ô! conjuncti vinclo propiore parentes,
 Vivite concordi femina virque toro.

90 REMEDIUM IRÆ LIBER III.

Fœdus in æternum quondam venistis amantes;
 Transeat ad canas pax sine lite comas.
 Et tibi si qua loquax, linguæque volubilis uxor
 Contigit, ignoscas; rara filere potest.
 Non tibi contingit soli, communia sexus
 Crimina non cautæ garrulitatis habet.
 Hoc illis natura dedit, studiumque regendæ
 Prolis, & ornandæ cetera cura domûs.
 Vos decet hæc tolerare viri, neque ducere magni.
 Diluite apposito verba molesta mero.
 Sunt fora, sunt comites, sunt & commercia vobis
 Publica, sunt patrii pingua rura soli.
 Aut vos venandi studium, studiumve colendi
 Ruris habet, longæ gaudia blanda moræ.
 Pars quota vos horum patitur coluisse penates?
 Nempe graves curas otia mista levant.
 Uxor sola lares semperque domestica servans
 Limina, privatis sedula rebus adest.
 Illam sollicitæ circumstant undique curæ,
 Et semper causas undè queratur habet.
 Si tamen illa viro fuerit morosior æquo,
 Nec potuit linguæ frena tenere suæ:
 Non ego propterea furibundum torva minari
 Prælia, nec manibus bella movere velim.
 Quisque suam norit; variis juvat artibus uti.
 Femina non uno quæque regenda modo.
 Sæpè levi pacem poteris componere risu:
 Sæpè supercilio concilianda venit.
 Proderit & simulare iram, simulata juvabit;
 Concidet ad fastus garrula lingua tuos.
 Aut hâc, aut aliâ pax est revocabilis arte.
 Hâc tibi conjugii lege subitur onus.
 Quod si fortè truci mulier malè juncta marito es,
 Accipe non dubiam vera monentis opem.
 Nulla quidem vobis Latæ commercia linguæ,
 Qui tamen hæc cupidis reddat, amicus erit.

Ingenium moresque viri cognoscere nuptæ
 Cura fit, & cautè tempora quæque notet.
 Quid placet, lædatque virum, quæ causa furentem
 Incitet, orta quibus concidat ira modis.
 Venerit ille foro successu tristis inani,
 Tu quoque successu res caruisse, dole.
 At si læta redux narraverit, annue lætis,
 Nec dubita vultu gaudia ferre tuo.
 Huic caput aut subitâ doluerunt pectora tussi?
 Fac tua sollicitus contrahat ora timor.
 Vespere forsan abest solitâ tibi tardior horâ?
 Quis labor est parvæ tædia ferre moræ?
 Penelope lentum, tamen expectavit Ulysssem,
 Dicitur & reditu læta fuisse viri.
 Ille quidem fertur lustris errasse duobus,
 Lapsaque jam totidem tempora Martis erant.
 Te querulam facient dilatæ tempora cœnæ,
 Debeat ut rugas ille videre tuas?
 Quid? quod & invitus, sic re cogente, moratur.
 Quid? quod amicitia lege coactus abest.
 Esse potest justæ, fateor, tibi causa querelæ,
 Si nocturna malus tempora lusor agat.
 Ebria si multo referat vestigia Baccho,
 Neglectæ ut veniat certa ruina domûs.
 Limine si tamen hæc absunt incommoda vestro;
 Cauta leves culpas dissimulare potes.
 Dî facerent nuptis prudentia major adesset!
 Sentirent faciles in sua vota viros.
 Carpere disce tui non omnia facta mariti,
 Pax erit, & totâ prælia nulla domo.
 Quæritis Andromachen cur miles amaverit He-
 Ceperat hæc mira calliditate virum. (Etor?
 Ille ferox Danaos quoties properabat in hostes,
 Cervici galeam quæ daret, uxor erat.
 Illa leves iusto ponebat in ordine cristas,
 Aureaque adstantis frena tenebat equi.

92. REMEDIUM IRÆ LIBER III.

Ominaque adjiciens felicitis prospera pugnae,
Placabat patrios thure meroque Deos.
Sive redux cæso referebat ab hoste triumphum,
Victori conjux exuit arma viro.
Multaque de ratibus magnoque rogabat Achille,
Ut fuerit primo classis adusta salo.
Quid faceret Pyrrhus, quibus & Menelaus in armis
Imbelli dederit mollia terga fugæ.
Bellaque laudabat victoris & arma mariti.
Hectoris hæc potuit pectus ab arte capi.
Andromache est imitanda tibi; placituraque mores
Cauta viri, referas moribus ipsa tuis.
Gaudet amor simili: neque nigris candida corvis
Pectora formosus jungere curat olor.
Vos quoque conjugii communia pignora fratres,
Cognati memores sanguinis esse decet.
Ut pugnent alii, certè vos fœdera jungunt
Arctius, & nodo corda potente ligant.
Vivitis ex una duplices velut arbore rami,
Unaque vos radix, succus & unus alit.
Vos decet, ex utero genuit quos mater eodem,
Fructibus ut rami, moribus esse pares.
Nec violata prius, nec adultera vos tulit arbor
Degeneres, & fraus insitionis abest.
Vivite sic ut ne pigeat genuisse parentes,
Et cupiant uteri pignora nulla sui.
Viderit ara semel discordes currere fumos:
Hæc vetus, & mundi rixa recentis erat.
Nunc tamen ut sæcli fulsit melioris origo,
Numinis & cunas ducere cœpit Amor.
Cum puerum optatæ referentem tempora pacis
Sidera miserunt, læta recepit humus:
Barbarus an quisquam renovati fœdera mundi
Negligat, & gladios durus & arma paret?
Ecquis erit, cunis qui non mansuescat ab illis,
Vincere quem nequeat blandus amore puer?

Cre-

Crediderim huic duris filices pendere medullis,
 Pectora nec ferri mole carere reor.
 Illum aut ignotis nutrix lupa protulit antris,
 Aut natum è scopulis expulit unda suis.
 At vos Christiadæ saltem morientis amorem
 Cernite : pro vobis nobile pendet onus.
 Ille cruor rupti lateris de fonte volutus,
 Pacem, quâ nihil est dulcius orbe, rogat.
 Ille inimicitias, odiique extinguere flammâs
 Admonet, & miti pectus amore trahit.
 Et movet exemplo, meritamque latronibus iram
 Ponit, & errorem crimina tanta vocat.
 Quodque magis causam morienti voce peroret,
 Suspicit, & Patrem voce tremante vocat.
 Care Pater, populo veniam concede furenti;
 Me petat, inque meum detonet ira caput.
 En ego vindictæque lubens pœnisque reservor,
 Aspicias hinc pretium sanguinis ire mei.
 Dixit, & inclinans humeris caput, ultima mundo
 Plenaque divino foedere verba dedit.
 Diffugiunt Furia, lethæaque flumina præter
 It Furor, & victus Tartara nigra subit.
 Quæque diu nostrum Vindicta coercuit orbem,
 Exulat, & stygiis improba latrat aquis.
 Ecce serenatas curru victore per auras
 Candida Pax niveis lora ministrat equis.
 Sancta Fides circum, & volucrum sonat agmen
 Et manibus nexas implicuere manus. (Amorum,
 O ita! bella Deus victor procùl orbe releget,
 Damnaque quæ partu bella nocente ferunt.
 Cocyti fremat atra domus, manesque scelestos
 Dividat, & discors, quod volet, ira ferat.
 Nos tamen astriferi referata palatia cœli,
 Regnaque diversâ candida parte manent.
 Divus ubi pharetræque puer facibusque volentes
 Uret, & æternus spicula mittet Amor.

94 REMEDIUM IRÆ LIBER III.

Discite venturæ jam nunc submittere paci
 Pectora : discordes non capit illa domus.
 At quos bella juvant & amaræ prælia linguæ,
 Accipiet stygiâ Cerberus ultor aquâ.
 Illæ perpetuis agitata furoribus, illæ
 Sæviet ad nigros pallida turba lacus.
 Eligite, aut pacem hîc posito coluisse furore,
 Ut pius æterno fœdere duret Amor :
 Aut furiis rixâque brevem malè ducere vitam,
 Rumpat ut æternus noxia corda Furor.
 Credite , in oppositas Furor & Concordia sedes
 Ducunt. Eventus hos feret una dies.
 Felices ! quibus æthereas continget in oras
 Ire coronatis post sua fata comis.
 Ventus ad optatos duxit mea lintea portus.
 Si merui, remis addite ferta meis.
 Votaque sanati medicæ persolvite Musæ :
 Hoc pretio versus æstimat illa suos.
 Dî faciant, nostris aliquis premat artibus iram !
 Præmia si vates consequar ista, fat est.



LIVINI
MEYERI

E SOCIETATE JESU

ELEGIARUM

LIBER I.

ELEGIA I.

A D

SERENISSIMAM ARCHIDUCEM
 MARIAM ELISABETHAM
 BELGII AUSTRIACI

Pro Carolo Fratre Imperatore Gubernatricem.

ERgò venis, sacrosque licet cognoscere vultus,
 O Lux Austriacæ delictumque domûs!
 Nostrarumque decus rerum, reparandaque Belgis
 Gloria, tam longum carpere suasit iter.
 Nec Soror, aut Carolus Frater remoratur euntem,
 Quasque tibi Neptes Cæsar uterque dedit.
 Augustosque Lares, & Majestate verendos
 Deferis, atque aulæ gemmea tecta tuæ.
 Quis te cogit amor peregrinas visere terras?
 Non tibi gens tanto digna labore sumus.
 Quò properes, atque undè, vide. Petis ultima
 Rura, fatigatos Sol ubi condit equos. (mundi
 Non hîc invenies aquilas, non plena tropæis
 Atria, non vinctos fixa sub arma duces.
 Qualia fraternus tibi dat spectacula Mavors,
 Captivis referens barbarâ signa Getis.
 Non, non imperium vastæ telluris habebis.
 Belgica non amplo limite nostra patet.
 Partem Gallus habet, Batavo pars altera cedit.
 Eheu! quàm spatîo cogitur illa brevi!
 Regna tuus Frater latum diffusa per orbem,
 Finibus immensis vix obeunda tenet.
 Illi pars magna Italiæ, divisaque ponto
 Trinacris, & domino terra Bohemâ subest.

Nec

Nec non & Moravi, nec non Silesia, regnis,
 Quà Boream spectat, juncta Polone tuis:
 Stiriaque, & Venetis vicina Carinthia terris,
 Et quæ Carniolæ pascua, Save, rigas:
 Quæque ferax segetis, cultæque Neapolis uvæ,
 Una ingens regnum sub sua jura tenet.
 Hungara cui tellus, cui Transilvania servit,
 Et volvunt famulas Dravus & Ister aquas.
 Et quæ præterea (neque enim comprehendere fas est
 Singula) regna tuus plurima Frater habet.
 Hæc si cum patria, Princeps, componere nostra,
 Metirique oculis Belgica rura velis,
 Vix erit Austriaci pars hæc millesima sceptri.
 Quàm vereor meritis par sit ut illa tuis!
 Angulus Europæ nostras premit ultimus oras,
 Terraque finitimo clauditur illa mari.
 Non fortunatos populos spectabis, & urbes.
 Assiduus patrias Mars populatur opes.
 Quamque petis, flammis Bruxella hostilibus arsit.
 Pars minor è tanta vix fuit urbe super.
 Indicium veteris cernes nova tecta ruinæ,
 Ruraque cum villis diruta nostra suis.
 Et pro Danubio fluctus imitante marinos,
 Hic Sennæ tenues ire videbis aquas.
 Quò feror? invisas modò supprime Musa querelas:
 Materiam tellus hæc quoque laudis habet.
 Utque nihil referam de cæli auræque benigna
 Temperie, & culti fertilitate soli:
 Quodque laboriferi vertant hæc arva coloni,
 Et segete & lino dives abundet humus:
 Ut taceam portus mutandis mercibus aptos,
 Alteraque urbs spatio quod stet ab urbe brevi:
 Quæ Proavis olim placuit, Celsissima Princeps,
 Ut placeat, satis est, hæc quoque terra tibi.
 Scilicet Austriacis habitata palatia cernes,
 Si per avita tuæ nomina gentis eas.

Carolus his Quintus tener in regionibus infans
 Vagiit : hîc puero lux data prima fuit.

Hac crevit : Belgas hac est moderatus in aula.

Hîc galeâ frontem preffit, & ense latus.

Hîc animos hausit, caderet quibus ultimus orbis,

Hinc ut ad Imperii culmen iturus erat.

Ganda memorgaudet, tantoque superbit alumno,

Quantum nulla tulit regia, nulla feret.

Carolus excipitur qui nunc regit : illius ingens

Cedere honorato gloria nescit avo.

Effigies Quinti, quam tollet nulla vetustas,

Aurea stat Gandæ conspicienda foro.

Temporis illius magna est meminisse voluptas,

Quo cor idem populos junxit & una fides.

Nondum Belgiacas error diviserat urbes,

Seditio stygiis pressa latebat aquis.

Donec amor mentes nexu stringebat amico,

Nullus ab externo milite terror erat.

Omnibus Oceani patuit via : nec fuit ullus

Communes reliquis qui prohiberet aquas.

Æquora tuta dabant merces, ditissima tellus

Belgica, congestas vix capiebat opes.

Deinde sub Alberto, vestroque è sanguine natâ

Conjuge, Belgarum patria tuta fuit.

Hanc illis dederat terram pro dote Philippus.

Lætior hâc nobis non fuit ulla dies.

Nîl votis reliquum fuerat, si Principe nato

Heredem felix hæc habuisset humus.

Dîs aliter visum est. Augustos prole carentes,

Spesque simul nostras, abstulit atra dies.

Post illos patriæ tenuit Leopoldus habenas,

Herôs qui vestri sanguinis alter erat.

Qui fuerit pietate magis spectandus an armis,

In dubio est. Virtus utraque summa fuit.

Illius erexit pressos præsentia Belgas,

Cum miseris jam spes vix foret ulla super.

Gallus, amans belli, nostras invaserat arces.

Advolat Austriades : nec mora; victor erat.

Hostibus ereptæ redeunt cum civibus urbes,

Redditaque est domino Flandria tota suo.

Altera restabant post victos prælia Gallos,

Prælia pro sacris, Roma, gerenda tuis.

Mox gladium Princeps fidei convertit in hostes,

Religioque ipso vindice tuta fuit.

Hæresis in lucem multo tumefacta veneno

Venerat, è tenebris sustuleratque caput.

Ipra tulit, genuitque nocens, sparsitque volumen.

Protinus hoc avidæ corripuere manus.

Utque fit, incautos fallax deceperat error,

Visceraque in patriæ pestis itura fuit.

Roma recens natum dejecit fulmine monstrum :

Sed tamen hanc hydram qui sequerentur, erant.

Obstitit, & solitâ preßit virtute rebelles,

Austriacamque iterum Belgica sensit opem.

Principis æternum memores servamus amorem,

Qui duplici palmam victor ab hoste tulit.

Tu quoque Cæsareo clarissima sanguine, Belgas

Hostibus à fidei quæ tuearis, ades.

Utque locum, sedemque tenes sublimis eandem,

Jam pridem Proavi quam tenuere tui,

Sic per nota tuæ gradiens vestigia gentis,

Illis inferior ne videare, caves.

Scilicet in sobolem virtus solet ire tuorum,

Nec visa hæc unquam est degenerare domus.

Sancta nequando moriatur fama parentum,

Perque suæ seriem posteritatis eat,

Et pater & genitrix spirant in imagine natæ,

Heredemque suæ te pietatis habent.

Festa dies minimo celebranda recurrat honore :

Prima ades; & longas accipit ara preces.

Quamque oculis spiras, reverentia Numinis omnes

Allicit: exemplum quodque sequantur, habent.

100 ELEGIARUM LIBER I.

Ipsaque nobilitas patriæ quæ stipat euntem,

Moribus instruitur, perficiturque tuis.

Et ne fortè putes solum hæc memorare poëtam:

Hæc populi vox est, publicaue ora sequor.

Ad te oculos mentesq; trahis. Tua facta notantur:

Nec res gesta potest Principis ulla tegi.

Tantaque majestas fastu caret. Omnibus æqua

Fers facilem, tantum si mereantur, opem.

At quemcumque tenet fidei contrarius error,

Flectere cervicem qui tibi, Roma, negat,

Qui sacra Pontificum, tot nunc iterata per annos,

Effronti spernit iussa supercilio:

Hunc refugis, nulloque reum dignaris honore,

Quique Deo, pariter perfidus ille tibi est.

Sacrarum custos observantissima legum,

Hæresibus claudis, perfidiæque viam.

Hoc Proavi fecere tui, vestigia quorum

Æmula Romanâ religione premis.

Quid referam, doctæ teneas quod Palladis artes,

Teque Deæ similem virginitate probes?

Quid, varias quod sis linguas edocta, nec ullus

Te possit Latio promptius ore loqui?

Quid, quod rara tuos prudentia dirigat actus,

Quælibet atque oculis lis sit aperta tuis?

Quid, quod turba inopum te sentiat esse parentem,

Accipiatque avidâ munera larga manu?

Denique sic cunctis animum virtutibus ornas,

Pars, quid ut adjicias, ut tibi nulla vacet.

Supplicibus facilis, miseris pia, dura superbis:

More Dei cunctis, ut meruere, refers.

Magna Gubernatrix, spes & tutela tuorum:

O patriæ votis sæpè petita meæ!

Dî tibi dent longos (quid enim tibi gratius optem?)

Et meritis plenos posse videre dies.

Tempora cumque tuæ compleveris omnia vitæ,

Mors cælo positus te pia jungat avis.

ELE.

ELEGIA II.

Ad urbem Gandavum de natali Caroli V. Caesaris.

O Lim Cæsareo nutrix celeberrima partu,
 Et meritò cunis inclyta, Ganda, tuis.
 Nulla potest simili gaudere puerpera voto,
 Nec tibi par tanto pignore mater erit.
 Creta Jovem memoret, cunisque superbiat istis,
 Falsaque nutrices Insula jactet apes;
 Et quoties alto crepuère tonitrua cœlo,
 Imperio nati læta sit illa sui.
 Sit licet & Lunâ felix & Apolline Delos,
 Prole gemelliparæ terra superba Deæ.
 Antè movebatur, mediisque errabat in undis,
 Arbitrio tumidi quolibet acta maris.
 Pro mercede dedit Latona resistere ventis,
 Et stabilem, demptâ mobilitate, locum.
 Scilicet his famam, sine re, tribuère poëtæ.
 Non facit ad laudes fabula vana tuas.
 Tu puero, nasci quo non augustior alter
 Orbe potest, genitrix ubera vera dabas.
 Protinus ad cunas vultu Fortuna sereno
 Adstitit, & stabilem fixit amica pedem.
 Illa secuturæ volvens oracula vitæ,
 Fatidico tales edidit ore sonos.
 Parve puer, postquam imperio potieris avito,
 Parebit sceptro terra fretumque tuo.
 Olim Litoribus te sentiet Africa captis,
 Tuneto pulsos restituesque duces.
 America argenti venas tibi pandet & auri.
 Annua congestas classis habebit opes.
 Regna tuus ferro subdet tibi barbarâ miles,
 Et feritas patiens relligionis erit.
 Nec sat erit ponto divisas vincere gentes,
 Et mundi partes succubuisse duas.

Europæque Asiæque dabit tua dextera leges,
 Victricesque Aquilas utraque terra tremet.
 Quique ferox cinget Solymannus marte Viennam,
 Terga citâ vertet, te veniente, fugâ.
 Barbarus horrebit ferro tentare tyrannus
 Prælia. Tu, nullo sanguine, victor eris.
 Quid facies pugnans, si solo nomine vinces,
 Et tua sors hostes, fama que nuda premet?
 Scilicet arma Padus tua sentiet, & tremet Albis.
 Ille capi regem cernet, & ille ducem.
 Nec non Herculeas ultra gradiere columnas,
 Ultima quæque patent æquora, terror eris.
 Cetera quid memorem? quâ tellus brachia pandit,
 Prostrato referes victor ab hoste pedem.
 Regnaque cum dederis nato pater omnia : victis
 Omnibus, ipse tui denique victor eris.
 Una hæc præteritos superabit palma triumphos.
 Non partem hîc aliquam casus habere potest.
 In reliquis terræque situs, silvæque, lacusque,
 Pugnantumque animi, fluminaque ipsa juvant.
 Parta tibi totam dabit hæc victoria laudem,
 In qua dux, miles, signifer, unus eris.
 Hæc cecinit Fortuna, suum quo tempore Ganda
 Infantem nutrix lactis alebat ope.
 Felix, & reliquas inter sublimior urbes,
 Quas Sol exoriens occiduusque videt!
 Te laudent alii, Themidis quod sacra colendo,
 Omnia Minoâ crimina lance premas :
 Quodq; scelus citâ commissum vindicta sequatur,
 Nec pateris longas carceris esse moras :
 Nec jus scire magis quàm reddere cuique labores,
 Et geminâ populos utilitate leves.
 Mirentur fluvios alii, mirentur & arces,
 Et quas delicias terra salubris habet :
 Tectaque culminibus latè memoranda superbis,
 Quæque solent multo pascua vate coli.

Nîl vulgare cano. Satis est mihi dicere cunas
Cæsaris. Hînc patriæ maxima fama meæ.

ELEGIA III.

*In nuptias Josephi Archiducis Austria, & Amaliae
Principis Hannoverianæ.*

Augustum gemini veniunt ad fœdus amantes.
Ipse mihi sponsor carmina dictet Amor.
Hûc ades, Æneadum volucer cum matre Cupido.
Desere natales, Cypria regna, domos.
Ex humeris pharetram genitrix, ut pendeat aptè,
Collocet, ardentes excutiatque faces.
Limet & Idaliâ fœcundas cote sagittas,
Et nitidas myrto vinciat antè comas.
Curribus auratis nivei jungantur olores.
Ipse dabis tremulâ gemmea lora manu.
Sic comptus propera. Stillent quoque tempora
Collaque puniceis lactea neſte roſis. (nardo,
Neve puer, quæ cauſa novos, exquire, paratus
Suadeat. Hâc numquam dignior ulla fuit.
Josepho nova Sponſa venit. Circumſpice formam
Virginis : hanc matri ſurripuiſſe putes.
Tantum alias ſpecie præcellit Amalia ſponſas,
Quantum ſidereas Cynthia plena faces.
Illa poteſt oculis ſtellas hebetare micantes,
Vincere & intactas candida tota nives.
Mellea vox, linguæque nitor, quid amabile ſpirant
Auribus. Hoc divas ſuſpikor ore loqui.
Dignior hâc thalamis nulla eſt regalibus, ingens
Si morum ſpectes ingenique decus.
Ecce verecundos in humum declinat ocellos,
Ad vultum ſponſi ſubrubitque ſui.
Ipſe pudor decet hanc, augetque modèſtia formam,
Quemlibet & blanda nobilitate rapit.

Sæpe aliis alium tribuit natura decorem,
 Alteraque alterius munere sponsa caret.

Divisas reliquis dotes hæc possidet una.

Nîl ars : nîl illis addere cura potest.

Principibus mistum poteris quoq; noscere sponsû.

Plus oculis altæ nobilitatis inest.

Jupiter utque deos specie supereminet omnes,

Summaque majestas luce notanda suâ est :

Sic honor Austriaco sublimior eminet ore,

Celsaque frons aliquid, quod tremat orbis, habet.

Nec mens inferior formâ est. hanc regia virtus

Ornat, & exemplum Principis una facit.

Cum pater explerit quos sceptro debuit annos,

Altaque desertâ sidera tanget humo,

Josephi ex humeris librato æqualiter axe

Pendebit terræ, ne grave nutet, onus.

Hæc & plura puer mirabere : tu modo segnes

(Nam te pompa vocat) rumpe Cupido moras.

Eia age, quid cessas? jam dudum pronuba Juno

Præbuit adventûs prospera signa tui.

Nonne vides vacuo descendere numina cœlo?

Ipsæ sua Cæsar vix capit arce deos.

Majestas media sedem sibi fixit in aula,

Nec minùs hîc aquilas, quàm Jovis arce, tenet.

Parte sedet dextrâ placido Clementia vultu,

Et Themis, & nexâ Paxque Ceresque manu.

Mars parte adversâ, positus sed mitior armis,

Adstat, & in tabula mœnia capta notat.

Hungariamque suo subjectam denique regi

Exhibet, & Parthos sub pede victor habet.

Seditio supplex, onerataque colla catenis,

Projicit injustâ quæ tulit arma manu.

Danubius pater applaudit, Nymphæque natantes

Formosum ripis exserviêre caput.

Omnes connubium celebrant divique deæque,

Augustoque ferunt omina fausta toro.

Vivite concordēs animæ, quodque æthere numen
 Labitur, optatâ fœdera prole juvet.
 Parvus olorinis aderat Cythereïus alis,
 Terque puer circum tectâ laremque volat.
 Quæque priûs tota selegerat ille pharetra
 Imposuit nervo spicula bina suo,
 Et ferit. Hæserunt volucres in corde sagittæ,
 Perque cor & venas flamma jugalis abit.
 Exiit, motisque deus dedit omina pennis,
 Quæ probet exiguo tempore Cæsar avus.
 Tu modò prægnantis Lucina doloribus adsis,
 Et vivum gremio molliter aufer onus.
 Ut penes Austriacos maneant moderamina mundi,
 Sospes & imperio consulat ista domus.
 Dî, quorum auspiciis hymeneïa fœdera constant,
 Efficite optatis pondus inesse meis.

ELEGIA IV.

*Ad Carolum VI. Imperatorem & Regem, in natali
 Serenissimi Archiducis Leopoldi, cùm ei poëma de
 institutione Principis offerendum parabatur.*

O Ptatus tandem illustri de sanguine Princeps
 Nascitur. Augustum tolle Vienna caput.
 Læta triumphales Germania fuscitet ignes,
 Perque vias latè vina vetusta fluant.
 Bacche pater, nunc Hungarico de palmite pressum
 Funde merum. Res hæc munere digna tuo.
 Danubius festâ prætexat arundine frontem,
 Et cava nectareas urna ministret aquas.
 Thura sacerdotes votivæque munera templis
 Reddite. Nunc purâ victima danda manu.
 Sola nec exultat Germania Principis ortu:
 Consors lætitiæ Belgicus orbis erit.
 Nos quoque natalem pueri celebramus ad aras,
 Cumque pia pompam plebe senatus agit.

Et

Et procul Austriacis quamvis distamus ab oris,
 Non tamen affectu turba remota sumus.
 Dividimur spatio : præsentī mente tuemur
 Omnia : nīl illam, quò lubet, ire vetat.
 Illa per immensum discurrit libera cælum,
 Non mare, non mentis terra moratur iter.
 Illa volat, tacitoque subit tua limina passu
 Cæsar, & ante sacros volvitur ima pedes.
 Hac patri, hac pariter nato gratamur ovantes,
 Et damus in sanctos thura merumque focos.
 Utque regat feris domus ista nepotibus orbem
 Publica privatâ vota juvamus ope.
 Gratia Cælitibus ! quorum tutela cavebit
 Stirps sit ut Austriacæ non abolenda domus.
 Dumque suis firmus stabit compagibus orbis,
 Cæsaribus tellus subdita semper erit.
 Hoc pietas meruit, meruit clementia, quique
 A proavū ductus sanguine candor inest :
 Hoc Romana fides scepro defensa potenti,
 Carior & regno relligionis amor :
 Hoc meruit sine labe pudor, castumque cubile
 Principis, & focii vincula fida tori :
 Quæque carens fastu, populisque intenta beandis
 Augusto vigilans pectore cura sedet.
 Si vacat annales mundi pervolvere, toto
 Invenies nullum mitius orbe genus.
 Non hoc sola canit Germania, quæque priorem
 Ad dominum gaudens Belgica terra redit.
 Ista sagittiferæ tibi dant præconia gentes,
 Et meritam laudem Cæsar ab hoste refers.
 Perfida cū violet dextris data fœdera, numquam
 De vestra quæsta est barbara terra fide.
 Illa necat captos ; tu captis parcere gaudes
 Hostibus ; inque feros nīl feritatis habes.
 Plus quid te deceat spectas, quàm quid tua possit
 Dextera, nec vires consulis ipse tuas.

Ut-

Utque tuo semper comes est victoria marti,
 Surgit ab hostili sic tibi cæde dolor.
 Mitis ut es, malles stabilem sine sanguine pacem,
 Ambit & invitas palma cruenta comas.
 A Superis decus illud habes. Ad fœdera nullus
 Promptior, ad pugnam lentus & arma venis.
 Ut tamen assumpta est bello tibi parma coacto,
 Ante tuos properant Jusque Piumque duces.
 Quæque moves probat arma Deus, fortunaque,
 Imperio, coëptis semper amica tuis. (Divûm
 Victorem causæ bonitas facit, & premit hostes,
 Illa tuis ducibus militibusque favet.
 Perfida quid nostras aquilas aurora laceffis?
 Crede mihi, cælo bella vetante moves.
 Et quoties nostros tentas perrumpere fines,
 Successu toties te caruisse doles.
 Non te millenis defendunt agmina signis,
 Non vires, toto quas Oriente trahis.
 Ut sonuere tubæ, concurrunt milite denso
 Germani : galeæ scutaque pulsa sonant.
 Cæsa cadis : versas glomerat fuga mille cohortes.
 Instat anhelanti fervidus Hunnus equo.
 Obsidio sequitur : pelluntur mœnibus hostes.
 Perfidiae poenas barbara terra dedit.
 Cæsar habes muros positasque paludibus arces,
 Vallaque Taurini succubuisse vides.
 Danubius ripam nobis peregrinus utramque
 Porrigit, & dominum gaudet habere novum.
 Hostibus & si quid superatis tollere differs,
 Hoc capient nati post tua fata tui.
 Interea ut sceptroque formetur idoneus heres,
 Principis ad leges erudiendus erit.
 Forsitan audacter faciam, quia viribus impar
 Nostra gravaturum musa subibit onus.
 Res tamen una levat timidi præcordia vatis,
 Una mihi vires ingeniumque facit:

Non

Non opus est longè documenta artemque regendi
Quærere. Materiam sola Vienna dabit.

Exemplo satis est puer ut formetur avorum.

Cæsareas dotes non nisi Cæsar habet.

Non eget externo domus hæc fulgore, tuetur
Splendorem imperii moribus illa suis.

Septima parve puer tibi cùm numerabitur æstas,

Signaque sol toties per sua flectet equos,

Incipe Cæsareæ virtutem agnoscere stirpis,

Et generis famam fac tueare tui.

Inclyta quæque tibi memorabo facta tuorum

Perlege: quod fugias, quodque sequare, dabunt.

Invenies illic quid triste, quid utile regno,

Quidque gravet populos, quâque leventur ope.

Invenies scopulos ad quos periêre tyranni,

(A proavis quamvis dedecus illud abest.)

Saturnique dies placidos, & plena quietis

Tempora, cùm belli nescia terra fuit.

Hîc canitur prisca virtus pietasque Rodolphi,

Qui fuit augustos maximus inter avos.

Huic Roma imperium superique dedêre faventes,

Subdidit huic fasces Austria prima suos.

Ille dedit stirpi mansurum in secula nomen,

Ingens quo nullum clarius orbis habet.

Carolus hîc legitur dictus cognomine Quintus,

Qui domuit terras, qui domuitque mare.

Hunc olim tremuit gemino plaga subdita soli,

Nîl ultra, victor quo graderetur, erat.

Hîc canitur Leopoldus avus: neque musa recentes

Nostra filet palmas, Carole Sexte, tuas.

Plura quidem natura sagax meliorque magistra

Suggeret, & monitis plus valitura meis.

Quæque ad te virtus ab origine transit avorum,

Firma satis per se semina laudis habet.

Sed tamen ut validi curvent tua lintea venti,

Addere remigii non prohibemur opem.

Spon-

Sponte sua ad palmam cursu qui tendit anhelos,
 Hortantis domini voce juvatur equus.
 Ut fragiles cita concipiant incendia virgæ,
 Mota levi vento crescere flamma solet.
 Præda satis per se stimulat, tamen ærea cogunt
 Cornua velocem fortiùs ire canem.
 Et tibi nitenti transcendere facta tuorum
 Fortè aliquod calcar carmina missa dabunt.
 Denique si nostris fructus conatibus absit,
 Affectu saltem non nocuisse ferar.
 Et quamvis alii de nato Principe vates
 Altiùs, & plectro magna sonante canent:
 At celer officio tardos anteire laboro.
 Diminuunt lentæ maxima dona moræ.
 Sæpe Deo nexæ primo de flore coronæ
 Argento pretium divite majus habent.
 Hoc facit, ante focos quamvis cadat hostia dispar,
 Grata sit ut magno non minùs agna bove.
 Nempe animû superi potiùs quam munera censent
 Et pretium doni mens facit ipsa sui.
 Accipe, care puer, curâ properata recenti
 Carmina, nec Belgæ despice vatis opus.
 Felix! si minimâ possit te parte juvare
 Quæ veniet nostra missa Thalia manu.
 Illa quidem rudis est, neque tanto Principe digna,
 Et vitium seclî deterioris habet.
 At post Austriacos animosior ire triumphos
 Discet, & huic animos Cæsaris arma dabunt.
 Tempore quo Phœbum genuit Latonia Delos,
 Lætâ recens numen Græca recepit humus.
 Mox dedit altrici terræ deus ille poëtas,
 Inque novos docuitnectere verba pedes.
 Magnus honor primis, & erat cælestis origo
 Vatibus. Hos vulgus credidit esse deos.
 Quippe feras cantu, cantu montana movebant
 Robora, currentes musa tenebat aquas.

110 ELEGIARUM LIBER I.

Arma per hanc, palmæq; ducum, regumq; triumphis

 Nullo casurum tempore nomen habent.

Hectora quis nosset? quis belli fulmen Achillem?

 Nobile Mæonidæ si latuisset opus.

At postquam caruit Phœbi cultoribus ara,

 Heres nec Græci carminis ullus erat:

Collibus è patriis Romam migravit Apollo,

 Et comites Pindum deseruere deæ.

Hic illum coluisse ferunt capitolia, donec

 Tota sub Augusto Cæsare terra fuit.

Materiam citharæ crebris dabat ille triumphis,

 Protulit & vates terra Latina novos.

Virgilius prisco famâ certavit Homero,

 Et veterum nulli Naso secundus erat.

Quæris cur Tyberim Phœbus mutaverit Istro,

 Teutonicum Latio prætulitque solum?

Nempe iterum sequitur victricia Cæsaris arma.

 Nil alibi dignum, quod caneretur, erat.

Perge tuis, Cæsar, depellere finibus hostem,

 Creber & Austriaco Marte triumphus eat.

Eugeniusque, minor nec Achille nec Hectore du-

 Auspiciis vincat, vicit ut antè, tuis. (ctor,

Phœbus habet Lauros, quas circum tempora ne-

 Inque tuum veniet multa corona caput. (ctat,

Ut taceam de me, cui vires tarda senectus

 Subtrahit, & modicus carminis usus adest:

Non deerunt, victura canant qui gesta poëtæ,

 Quique tuum citharâ nomen ad astra ferant.

Frigore non adeò torpent præcordia Belgis,

 Quorum cælestis pectora fervor alit.

ELEGIA V.

*Ad Augustam Imperatricem Elisabetham primo partu
Serenissimi Archiducis Leopoldi fœcundam.*

LÆta novo partu, fœcundaque Principe mater,
Unica Cæsareo dignaque, parque toro.
Dum meritos Regina tibi meditamur honores,
Si vacat, atque humilis Musa meretur, ades.
Te sibi Majestas, nutu quæ temperat orbem,
Junxit, & imperii sceptrâ tenenda dedit.
Pronuba Relligio sponsam deduxit ad aras.
Virginitas niveo ponè secuta gradu.
Et super Augustos volitans Hymenæus amantes,
Pectora purpureis sparsit & ora rosis.
Ista tamen vetus est, cantataque vatibus olim
Gloria. Nunc Musas altera pompa vocat.
Ordiam undè priùs non est decernere promptum.
Materies dubium, copiaque ipsa facit.
Si faciem laudo : Veneris tibi cedit imago.
Si mores : Juno non neget esse suos.
Ingenium mirer? dote hac cum Pallade certas.
Invideat : tamen hoc ipsa Minerva probet.
Has inter quondam lis orta fuisse refertur,
Quæ melior formâ de tribus una foret.
Pastor in Idea certamina valle diremit :
Judice quo divam vicit utramque Venus.
Tempore si nostro redeat Paris arbiter alter,
Tres poteris triplici vincere dote deas.
Hùc par nobilitas, seriesque accedit avorum,
Quæque micant titulis scuta paterna suis.
Altera maternâ tibi laus ab origine ducta
Surgit : & est gemino sanguine clara domus.
Si quis prima tuæ quærit cunabula gentis,
Ille cupit fontem noscere, Nile, tuum.

Nam

Nam velut ille suos quærentibus occulit ortus,
 Semper & ulterius, quo grãdiantur, habent:
 Majorum seriem sic percensere tuorum
 Nemo potest. Numero res caret illa suo.
 Ipse vetustatem Cæsar probat. Ipse merentem
 Judicat augusto ponere membra toro.
 Ipse cupit gemino misceri sanguine stirpem.
 Et quid nobilius Cæsare mundus habet?
 Jure igitur tanto sub judice tuta superbis,
 Et tibi pars famæ salva stat ista tuæ.
 Summa tamen laus est, genito quod Principe mater
 Diceris, Austriacum sustineasque genus.
 Cetera deficiunt sensim, fatoque premuntur:
 Solaque fertilitas, undè supersit, habet.
 Adde quod ingenium, quod forma, & gratia morũ,
 Grande quidem, unius sint tamen illa decus.
 At dare Cæsaribus natos, ad publica spectat
 Commoda. Privati cetera juris erunt.
 Maternos igitur meritò celebramus honores.
 Non magis hac ullâ dote placere potes.
 Quid? quod adhuc vegeto florens robore corpus
 Spem duraturæ fertilitatis habet?
 Quid? quod alit Cæsar generosi pectoris ignem,
 Quo genitor canã possit & esse comã?
 Quid decora enumerem laudes superantia sexus,
 Quæ stupeat veniens, præteritusque dies?
 Quodcumque in priscis canitur decus heroinis,
 In te collectum tempora nostra vident.
 Utque suis ornat Cæsar virtutibus orbem,
 Nullaque de fama Principis ora tacent:
 Sic tu virginibus præbes exempla pudoris;
 Censuramque tuam, si quæ soluta, timet.
 Nec matrona minùs proba fit tibi juncta: tuisque
 Moribus instruitur, quodque imitetur habet.
 Felix conjugium! & dignum cui conferat æther
 Munera cælesti multiplicata manu.

Deficit

Deficit in vobis, quī carpit cetera livor,
 Et nihil obliquo lædere dente potest.
 Ofacias (te namque colunt) sanctissima matrum,
 Gaudeat ut multâ regia prole domus.
 Nullaque sit toto genitrix fœcundior orbe,
 Dividat & natis oscula plura suis.
 Sæpe alios onerat natorum copia : sceptrum
 Qui gerat, ex illis scilicet unus erit.
 Tu septem numeras populos, totidemque coronis
 Cingitur Augustæ Cæsareumque caput.
 Solaque quot natos, totidem potes edere Reges.
 O! in quot titulos sufficit una domus!
 Sint patri similes sic ut noscatur in illis,
 Et genitrix tenero possit in ore legi.
 Indole præcipuè referant factisque parentes,
 Gestaque cum niveo grandia lacte bibant.
 Hæc toto, Regina, vovent tibi pectore Belgæ,
 Quæ rata per partus experiare novos.
 Conjuge cumque tuo canos dum expleveris annos,
 Dent tibi, dentque illi, fidera tarda locum.

ELEGIA VI.

Laus Danubii.

DAnubii mihi Pierides date noscere fontem,
 Arvaque quæ cursu præterit ille suo,
 Si quid & Augusto victrici profuit unda
 Dicite. Res vestro carmine digna cani.
 Tuque pater, tua dum properant ad litora Musæ,
 Ne dubita ripis exseruisse caput.
 Fas mihi sit laudum partem celebrare tuarum,
 Nam tellus nullum par tibi flumen habet.
 O decus Europæ! quo non spatiosior alter
 Immensis terram fluctibus amnis obit.
 Non tu communi fluviorum tramite curris,
 Fessa nec occiduo volvitur unda mari.

Pars diversa placet. Solis conversus ad ortum

Laberis, ut cursu Cæsaris arma juves.

Namque ubi bella movet violatâ pace tyrannus,

Et trahit armatas per tua regna rates;

Occurris tumidis hosti violentior undis.

Barbarus adversis ire laborat aquis.

Austriacas contrâ prono vehis amne carinas,

Agmina quæ celeri gurgite nostra ferunt.

Miles & annonâ facis ut numerosus abundet,

Nec timeant inopes castra remota plagas.

Quæque procûl nostrâ refecantur pabula falce,

Puppibus innumeris in loca iussa vehis.

Utilis es nobis igitur, contrarius hosti:

Et facit ad laudes utraque causa tuas.

Nec tantum remo es, velisque minoribus aptus.

Flumine vectantur bellica rostra tuo.

Certior à rapido victoria gurgite pendet,

Parisque tibi cæso laudis ab hoste venit.

Ista tuæ quamvis pars sit celeberrima famæ,

Plura tamen, meritò quæ referantur, habes.

Non, si velocem dicam tibi cedere Rhenum,

Fallar. Neptuno iudice major eris.

Ille licet Drusi sit adhuc à cæde superbus,

Non sua facta tuis esse minora negat.

Humida nec refert quod cornua pampinus ambit,

Et ripâ vites jactet utrâque suas.

Major ab Hungaricis tibi gloria provenit uvis,

Quas auro similes aurea nutrit humus.

Non ego crediderim, superis ad festa vocatis,

Dulcius hoc ipsum nectar habere Jovem.

Ipse tibi pater Eridanus certare recusat,

Alpinis nivibus quamlibet auctus eat.

Devovet hunc merfis tumidum vicinia villis,

Et queritur limo rura nocente tegi.

Sæpe viatores subitæ rapit impetus undæ,

Corporaque Hadriacis pallida volvit aquis.

Tu placidus semper, tu nulli injurius erras,
 Altaque currentes ripa coërcet aquas.
 Non tibi par Nilus : licet uda superbiat illo
 Ægyptus, pluvium nec roget usta Jovem.
 Hunc patriæ puduit. Tu fontis origine notus,
 Agmina Nympharum candida mille regis.
 Hunc timet infidum sitiens haurire viator.
 At te securo quilibet ore bibit.
 Ripa caret monstribus : quæ celat arundine fallax
 Nilus, & humanâ cæde cruentus alit.
 Nec Mosa, nec rapidus dubitat tibi cedere Scaldis,
 Quem Thetis ad fontem vertere cogit iter.
 Vincitur ille mari refluxo. Tu victor in altum
 Tendis, & æquoreas cedere cogis aquas.
 Vique celer tantâ tumefacta per ostia rumpis,
 Gustetur medio dulcis ut unda freto.
 Non tibi par nomen Gallorum regius amnis,
 Lilia quantumvis Sequana jactet, habet.
 Hic breve nescio quod spatium telluris oberrat.
 Quà patet Europæ terminus, omne tuum.
 Rusticus est, alios si quis tibi comparet amnes.
 Nescit opes urnæ divitiasque tuæ.
 Quid referam, vasto divisis gurgite ripis,
 Ut vitreæ multo pisce natentur aquæ?
 Mole graves tantâ gremio quos pascis, ut illis
 Vix majora capax corpora pontus alat.
 Quid quod partitos secet insula plurima fluctus?
 Hæc numerosa feris; arcibus illa minax.
 Hæc domibus villisq; frequens; hæc porrigit amplâ
 Planitiem, & culti jugera multa soli.
 Binaque quæ circum lato se gurgite fundunt
 Brachia, par Rheno singula flumen habent.
 Quis numeret populos, & quas vagus alluis urbes?
 Fas mihi tam longas non fuit ire vias.
 Naiades (vobis usu notissimus amnis)
 Vos mihi (si merui) pandite fontis iter.

Dicite quas findat terras ab origine prima,
 Quoque fatigatas æquore condant aquas.
 Quæsieram. Nitidas subito mihi nare per undas
 Nympharum visus, Naiadumque chorus.
 E quibus una movens rorantes fronte capillos,
 Quos petis, errores accipe fontis, ait.
 Suevia nascenti patria est : ubi frondibus altum
 Stat nemus (id nigrum secula prisca vocant.)
 Illicibus tecti subter cava viscera montis
 Crystallo similis regia nostra nitet.
 Rorat tota domus : muscoque ambita virenti
 Æternos fluctus vena perennis alit.
 Hic jacet umbrosa redimitus arundine frontem,
 Danubiusque suas crescere spectat aquas.
 Urna capax humero substernitur uda sinistro.
 Argento duxit Mulciber illud opus.
 Auratumque pater, regali jure, tridentem
 Continet. Hoc Nymphis imperat ille suis.
 Flectitur hic, lentoque meat per pascua gyro.
 Invitum patriam deseruisse putes.
 Mox Bavari spatiosa celer per rura volutus,
 Eminus alta Ducis tecta laremque videt.
 Heroemque procul bellatoremque salutat,
 Barbara qui trepidâ perculit arma fugâ.
 Scandere quem Nymphæ Taurini vidimus arcem,
 Et mediis Savi fluctibus ire trucem.
 Nec potuere Scythæ vallum fossasque tueri.
 Omnia victrici capta fuere manu.
 Ergo ubi Danubius, peregrinis auctus ab undis,
 Præterit Bavari pingua rura soli.
 Mox terras subit Austriacas : ubi Cæsaris urbem,
 Mœnia terrarum Principe digna, rigat.
 Sæpius hic turres, & turribus addita templa
 Spectamus Nymphæ, Cæsareamque domum.
 Cernimus & muros & propugnacula cælo
 Ducta, nec hostili transfilienda pede.

Barbarus hæc olim petiit ; sed marte sinistro.

Pulsus ad Euxinas ille redivit aquas.

Vix fuga servavit paucos de millibus hostes.

Illa fuit Lothari gloria prisca Ducis.

Hactenus urbs invicta stetit. Quâ sospite Numen

Austriacæ curam gentis habere liquet.

Inde per Hungariam flumen devolvitur : à quo

Terra ferax laudem fertilitatis habet.

Scilicet armentis & munere lactis abundat ,

Prataque sunt nullo tam spatiosa loco.

Navita præteriens densas videt ire per herbas ,

Ventre tenus tectos , agmina tarda , boves.

Quid te Drave canam ? vada quid piscosa Tibisci ?

Et quæ Save tuum saxa morantur iter ?

Atque alios claris ortos de fontibus amnes ,

Hungara qui variis partibus arva secant ?

Omnes Danubius gremio quos accipit : & qui

Majori perdunt nomen in amne suum.

Quoque loco coeunt , cæsis victoria palmam

Hostibus Eugenio sanguinolenta dedit.

Turcia bis cæsa est illo ductore : tulitque

Impia perfidiâ præmia digna suâ.

Post geminam pugnam duo propugnacula cepit,

Litus ad Eoum jam patefacta via est.

Hinc Geticas , Ister mutato nomine terras

Alluit : exilii litora , Naso , tui.

Offaque vatis habet fatalis ripa. Quod unum

Pierides vellem non meminisse deas.

Sæpius Augustum tristes humilesque rogarunt ,

Parceret ut tanto Principis ira viro.

Utque mori saltem terrâ propiore daretur ,

Barbara nec cineres vatis haberet humus.

Reppulit orantes immitis Cæsar. At illæ

Nunc quoque, se spretas cùm meminere, dolent.

Ut tamen æterni superesset fama sepulchri ,

Candida marmoreus contegit ossa lapis.

Quem super hunc Musæ versum posuisse feruntur :

Non tulit huic ætas , nec feret ulla parem.

At tu , qui celebrem fluctu prælaberis urnam ,

Gaude. Pars famæ nascitur inde tuæ.

Ille tuum grato celebravit carmine nomen ,

Nam Getico per te tutus ab ense fuit.

Quod superest , Parthos à læva respicis arcus.

Ultimus Euxinas verberat amnis aquas.

Dividat ut fluctus septena per ostia Nilus ,

Ostia sex Istro , nec minùs ampla , patent.

Et potuit quondam septena per ostia labi.

Septima vicinum nunc facit unda lacum.

Magnaue pars vatam meminit septemplicis Istri.

Haud alio priscis nomine notus erat.

Hæc Nymphæ cecinêre sui præconia fontis :

Ipse salutatas deseruique deas.

Danubiumque videns gelida sub valle jacentem ,

Ausus sum tenui pauca referre sono.

Salve nobilium pater & moderator aquarum ,

Cui similem tellus nostra videre negat.

Labere , ut æternos Caroli testere triumphos.

Candida muscoso sic vacet urna situ.

Sic careat tua sole domus : radiosque repellat

Frigida populeis quæ cadit umbra comis.

Sic tibi contingat lustrare perennibus undis

Quæ numerosa tuis regna rigantur aquis.

Sic , dum vincendos olim properabit ad Euros ,

Prætereant fines Cæsaris arma tuos.



ELEGIA VII.

*Ad Carolum VI. Imperatorem, post domitos rebelles,
triumphatosque Turcas, Pacem Europæ restituentem.*

A Urea pácato redeant modò tempora mundo,
Principium seclì dum melioris adest.
Nullus sanguineo discurrat crine cometes,
Atra nec ex rutilis nubibus arma sonent.
Quæque solent pavidas terrere minacia gentes,
Vertat ab imperio signa sinistra Deus.
Barbara cælesti tremefiat terra tumultu:
Et trepident, Nilum qui Tanaimque bibunt.
Nobis sublato Cæsar dedit otia marte.
Ferreæ cum vestris bella valete tubis.
Hungara jam rediit tellus: quâque arma rebellis
Sumpserat; hâc veniam flagitat illa manu.
Tantaque victrici juncta est clementia dextræ:
Pœna fuit tantum nulla secuta scelus.
Carole parcendo crescit tua gloria: quando
More Dei trepidis supplicibusque faves.
Divitiis etiam natos & honoribus auges,
Quorum in te tulerat perfidus arma pater.
Quamlibet indignis veniam concedere gaudes,
Supplicium factis qui meruêre suis.
Ecce rogat pacem, posito perterrita fastu,
Cæsa prius terrâ Turcia: pulsa mari.
Illa solo, pontoque minax: modo cessit utroque.
Palma tibi ponto: palma relata solo.
Te Venetos, Cæsar, quos vis inimica premebat,
Hostili constat furripuisse jugo.
Barbara Corcyræ pulsabant agmina muros,
Parvaque spes arcis, ne caperetur, erat.
Interea ad Savum miles tuus occupat hostem.
Ille fugâ versis præcipitatur equis.

Fama volat : totamque replet formidine classem,
Cæsaque Turcarum millia multa refert.

Hinc novus est Venetis furor additus. Arce relictâ
Cominûs in trepidos impetus ire fuit,

Mœnibus erumpunt densi, murisque repulso
Ferre citum cogunt ad sua vela gradum.

Vincuntur Turcæ, vinci quia posse putantur :
Spemque prior palmæ palma sequentis alit.

Hæc igitur, Cæsar, tibi debet gloria partem.
Fortiùs exemplo dimicuère tuo.

Libera vicino respirat Roma timore,
Et ferus à Latio jam procul hostis abest.

Victricesque aquilas sospes Germania per te,
Et subiecta tibi Belgica terra canit.

Reddita debetur tibi pax terræque, marisque.
Te dominum tellus; te colit unda suum.

Cæli magne parens, & tu regina faveto :
Cæsareis semper numina culta focis.

Vos facite, ô, domitum Carolus moderetur ut or-
Longaque tranquillæ tempora pacis eant. (bem,

Stringere nec quisquam sceleratos perfidus enses
Audeat; invito ne paret arma Deo.

Horreat Austriacos & primus & ultimus orbis.
Illos si qua parum terra timebit, amet.

Sit pariter superis curæ, quæcunque potentis
Sparsa sub imperio Cæsaris ora jacet.

Damnaque præteriti compenset ut omnia martis,
Et pecore & fructu pinguis abundet humus.

Plena fluat musto calcatis uva racemis,
Dolia nec capiant multiplicata merum.

Flava Ceres, tu farra avidis concede colonis,
Et rota sub messis pondere pressa gemat.

Qualia Saturno memorant regnante fuisse
Tempora; cum nondum Jupiter ortus erat.

Cum Jove Mars genitus; cum Marte feroci bella.
O quantum terris intulit ille nefas!

Ille

Ille malos primus ferrum convertit in usus;
 Ille necis tardum præcipitavit iter.
 Illo Vulcanus galeas mandante cavavit,
 Parmaque de massæ pondere facta fuit.
 Antè nec humano rubuerunt sanguine cultri,
 Nec notum populis, jurgia, nomen erant.
 Corporaque ad tumulum ducebat sola senectus,
 Scindere nec fusos Parca coacta suos.
 Spontè dabat victum tellus inarata : nec ullo
 Vomeris aut rastri vulnere dives erat.
 Mellaque rimoso stillabant roscida trunco,
 Fontibus & primis lactea vena fuit.
 Fraternalis livor nondum turbabat amorem,
 Iraque Tartareis pressa latebat aquis.
 Rectum homines sola ducti ratione colebant.
 Nullus erat fraudi, criminibusque locus.
 Ipsa sibi virtus (pœnæ formidine demptâ)
 Cultori pretium, cur peteretur, erat.
 Omnia quæ quoniam perierunt crimine Martis,
 (Quo scelera & cædes nata fuisse liquet.)
 Pace datâ, pacis renovabit commoda Cæsar,
 Saturnusque sui temporis alter erit.
 Subjectosque reget populos princepsq; , paterque.
 Cæsareæ dos est hæc geminata domûs.

ELEGIA VIII.

*In obitu Serenissimi Archiducis Leopoldi, dum ei poëma
de Institutione Principis paratum erat.*

DUm tibi nascenti veram, Leopolde, politi
 Principis effigiem nostra Thalia parat:
 Jamque opus exactum sacris appendere cunis
 Gestit, & ante tuos ponere læta pedes:
 Dira per Europam, volucrique nigerrima pennâ
 Fama volat : mortis nuntia fama tuæ.

Pro-

Protinus excussi digitis cecidère libelli,
 Pars simul est animæ visa perire meæ.
 Principe sublato, subiit miserabile flammis
 Tradere, vel liquidis spargere carmen aquis.
 Quis præcepta ferat cineri? quis carmine manes
 Instruat? heu! sensu funus & urna caret.
 Nec mora, constructos properabā mœstus ad ignes.
 Urere jam lacerum dextra parabat opus.
 Talia tentantem delapsus ab æthere Phœbus
 Terruit, injectâ continuitque manu.
 Obstupui: sensique metu riguisse capillos.
 Torva Dei facies causa timoris erat.
 Impie quid laceras vates tua viscera? dixit.
 Me quoque, si nescis, per tua damna petis.
 Tu calamum præstas: ego sum tibi carminis auctor.
 In mea nîl proprii munera juris habes.
 Adde quod Austriacos eadem dementia lædat;
 Crimine quo nullum turpius esse potest.
 Perdere quis furor est sacræ præconia stirpis,
 Quæque per augustos gesta canuntur avos?
 Hæc tu cuncta dabis nigræ populanda favillæ?
 Non hoc sublati Principis umbra probet.
 Ille quidem est patri præreptus; at æthere ab alto
 Despicit exiguas, quas habet orbis, opes.
 Nec velit, ut liceat, peritura ad regna reverti,
 Imperii sortem qui melioris habet.
 Confer cum cæli spatiis ingentibus illam
 Quam colitis terram: pulveris instar erit.
 Hic dolor, & tristes agitant præcordia curæ:
 Illic sollicito corda timore vacant.
 Volvitur in præceps, fluvioque fugacior hæc est:
 Illa senectutis pondere vita caret.
 Hic reges dubii turbant discrimina martis:
 Illic securæ tempora pacis eunt.
 Denique vestra mari, tumidisque feritur ab undis:
 Naufragii fors est illa soluta metu.

O quanto melior, vestràque beatior illa
 (Utraque si iustâ lance probetur) erit!
 Et quisquam pueri sortem lugebit adempti;
 Aut reducem terris sistere posse velit?
 Hunc ego convincam tenebris postponere lucem;
 Exilîo patriam, carceribusque domum.
 Nec refert, tua quod Leopoldo scripta sit uni
 Pagina: quâ Princeps erudiendus erat.
 Quod multis prodesse potest, ne supprime carmen.
 Utilitas merces certa laboris erit.
 Tu modò præceptis documentum hoc adjice; Prin-
 Ut ferat ex æquo fortis utramque vicem. (ceps
 Sæpe solet transversa Deus miscere secundis:
 Omniaque arbitrio versat agitque suo.
 Ipsæ aquilæ, imperii quæ sunt certissima signa,
 Aspera constanti pectore ferre docent.
 Pernices sublimè volant: nec iniqua retrorsùm
 Ventorum rabies, nec gravis imber agit.
 Ipsa juvat potiùs tempestas: ipsa volantes
 Promovet: & pennas fortior aura levat.
 Æthere mox puro lætantur, & infima spernunt
 Nubila: sublimes nulla fatigat hiems.
 Hæc est Austriacæ verissima gentis imago.
 Magnanimum frangit nulla procella genus.
 Quæ vitare nequit mala, fert, mollitque ferendo.
 Atque animum fortis spe melioris alit.
 Quàm citò mutavit vultum Fortuna priorem!
 Nubila nunc: modico tempore læta venit.
 Jupiter & pluvias & apertos mittere soles
 Gaudet: & autumnò proxima sævit hiems.
 Frigora nunc pellunt redeuntis tempora veris:
 Nunc fruges æstas pulverulenta coquit.
 Nec semper tumidæ spumant Aquilonibus undæ:
 Sæpe etiam nautis æquora tuta patent.
 Omnia sic vicibus superi mortalia vertunt.
 Nil humilis, firmum quod manet, orbis habet.
 Hæc

Hæc monuit : vatemque simul terrasque reliquit.

Phœbus, & ætheriâ cessit in astra viâ.

At mea diverso rapiuntur pectora motu.

Quò ferar, incertum est : consiliumque fugit.

Ipse recens prohibet flammis violare poemâ

Cynthus; & famæ credere mandat opus.

Invida fata negant, fortunaque Principis obstat.

Quis canat ad surdos carmen inane rogos?

Dî facite Austriaco novus ut de sanguine Princeps

Compenset mœstæ damna priora domûs :

Longa cui triplices evolvant flamina Parcæ,

Abstineantque avidæ scindere fila manus.

Ille leget, fratri vates quodcumque paravi,

Alteriusque heres carminis alter erit.

Hâc spe Musa tibi supplex sua munera defert.

Accipe votivum maxime Cæsar opus.



LIVINI
MEYERI
DE
INSTITUTIONE
PRINCIPIS
LIBRI TRES.

DE
INSTITUTIONE
PRINCIPIS
LIBER PRIMUS.

Difficiles Heroum ortus quæ causa retardet,
Et quas, progenies regum jam nata, per artes
Sit formanda, cano. Vati parete canenti
Vos quibus imperium mundi committit ab alto
Numen, & optatos spondet Lucina nepotes.
Magnæ molis opus, mentem inspirare juventæ
Sublimem, atque ipsis virtutem affundere cunis.
Dein scelerû genus omne, trucemq; avertere pestem:
Nequa lues serpatque animo, fundatque venenum.
Præcipuè hic Musis fudet labor. Omen ab ipso
Proles lacte trahit: spes hinc censenda futuri.
Adsis ô, faveasque pater, qui pectora vatum
Fonte rigas sacro, & cæli super ardua tollis:
Adsis, propositoque pares in carmina vires
Suffice, & ignavum remove de pectore frigus.

Tuque adeo Scythicum terres qui classibus Istrû,
Eoasque fugas acies, celeresque sagittas
Parthorum, domito si jam vacat hoste reverti,
Et capiti meritas Pindo decerpere lauros,
Cæsar ades: tibi surgit opus. Data mascula cælo
Progenies te læta vocat: quam maxima Divûm,
Austriacæ tutela domûs, matrique patrique
Detulit, & morti stirpem subduxit avaræ.
Sic equidem spondebam animo, sic vota ferebant
Europæ, multa ut faceret te prole parentem
Augusti consors thalami. Qua dignior inter
Teutonicas numquam surrexit origine matres,
Seu

Seu formam spectes, seu mores, seu genus alta
Stirpe ducum. Dotes sed enim supereminet omnes
Religionis amor, suspensaque regia templis
Munera, & oblati sacris puer aureus aris.
O quæ vota piis concepta parentibus ! ipsum
Dum teneris mater puerum complexa lacertis
Virginis ante aras posuit, cæloque dicavit.
Sancte pater, tuque ô cæli regina, recentem
Accipite hanc animam, munusq; agnoscite vestrum.
Quæ, precor, intactos spondet si innoxia mores,
Labis & expertes lustris venientibus annos,
Vivat, & imperio crescat matura paterno :
Sin aliquam admittet lethali crimine noxam
Degener, & famam laudis violabit avitæ,
Tollite, præsentique scelus prævertite letho.
Talibus orabant superos, arasque tenebant.
Illustres pietate animæ ! si quid mea possunt
Carmina, & ad feros transibit musa nepotes,
Nulla dies memori victuros eximet ævo,
Austriacas Ister famulo dum gurgite terras
Alluet, imperiumque aquilæ sublime tenebunt.
Altera jam superest venturam cura juventam
Excolere, & justas Leopoldo scribere leges.
Ergo ades, & tenuem, Cæsar, ne despice musam,
Dum præcepta canit, proavis quibus æmula virtus
Surgit, & ad priscos generis formatur honores,
Æquatura patris famam, partosque triumphos.
Diva parens rerum, causas mihi pande latentes,
Pauperibus partus facilis numerosaque proles
Cur veniat, lassæque sinus atque ubera matrum,
Lentior augusti nascatur sanguinis heres ?
Interea pia magnificis altaria donis
Matrona accumulât, numenque in pignora poscit,
Et tardum precibus cælum votisque fatigat
Nequidquam : raro solvuntur viscera partu.
Rustica simplicitas sed enim, sine thure, quotannis
Fœta

128 DE INSTITUTIONE PRINCIPIS

Fœta tumet, geminatque utero natura feraci
 Progeniem : jamque ipsa penum consumit agrestem
 Turba frequens. Tædet miseros genuisse parentes.
 Hæc ego : cum se Diva oculis Natura videndam
 Obtulit. Huic ingens humeris pendebat amictus
 Versicolor, specieque nitens & imagine rerum.
 Namq; hîc terrarumq; orbem, & maria omnia circû
 Argento fluere, & Zephyro vada summa moveri
 Cernere erat, bijugos Neptunum flectere currus,
 Et gemmis lucere rotas, lucere tridentem :
 Nereidumque choros juxta, atque immania cete
 Et forbere lacus, & reddere naribus undas :
 Stare nemus contra, & flavis circumdare pontum
 Aggeribus, viridesque agitari flatibus ornos :
 Tellurem genus omne hominû, genus omne ferarû
 Incolere, & pictas ramis habitare volucres.
 Singula quæ tenui innevit sapientia filo,
 Secula dum, ingentesque polorum condidit axes.
 Omnibus his alimenta parens Natura ministrat
 Desuper, & toto vegetans se corpore miscet.
 Omniferam sequitur, turgentiaque ubera mulget
 Fertilitas, solersque utero Lucina tueri
 Semina, & ignotas matura vocare sub auras.

Talia miranti, pictâque in veste tuenti
 Alma parens sic orsa loqui. Mihi mille ministrant
 Diversorum operum famulæ. Circû aspice formas
 Nympharum ætherias : tua te quæsitâ docebunt,
 Progenies cur rara finu se regia fundat.
 Nam non ante leves implet vagitibus auras
 Materno erumpens utero, quàm mille morantem
 Formavêre manus, vitioque dedêre carentem.
 Tantum effata, fugat nubes cælumque serenat.
 Agmen olorinis veluti dum nubila pennis
 Deserit, ima petens placido per inania gyro :
 Et nunc summa super Cynthi fastigia pendet,
 Mox ripas legit, & gelidi vaga stagna Caystri :

Effu-

Effusæque vadis volucres candentia tingunt
Colla lacu, motisque irrorant tergora pennis:
Haud aliter summo vidi crebrescere cælo
Agmina Nympharum, ac sensim propiora tenere
Culmina, jamque humiles plantis contingere terras.
At me divinus subitò circumstetit horror.
Mox tamen obtutu Divas audacia venit
Quasque notare meo, & veniendi discere causas.
Prima nitens oculis, & latâ fronte decora
Majestas graditur, genus ipso à numine ducens.
Sceptrum dextra tenet, fulgentem læva coronam.
Tantaque sublimes crescens consurgit in auras,
Ut pedibus terras, & olympum vertice pulset.
Ipse venustatem miror, formosæque magnæ
Ora Deæ: quo vertat iter? cui dona parentur?
Tum Natura mihi dedit hæc responsa roganti.
Hæc sedes petit augustas, hæc pignora regum
Format agens, primisque decus vagitibus afflat.
Luminibusque faces & amicos fulguris ignes
Implicat, & blandum terrori miscet amorem.
Puro deinde leves irrorans nectare cunas,
Magnam animam, plenamque sui diffundit, onusq;
Ferre docet mundi, sceptrique laboribus æquat.
Marmor uti Pariis decisum rupibus olim
Cui manus artificis decus addidit, accipit ora
Vera Dei: stat forma Jovis, fulmenque coruscat.
Haud secus effingit regalem ad grandia mentem
Nympharum princeps Majestas. Nec mora cæpto
Ulla operi, requiesque datur: fugat otia Virgo,
Maturans virtutem & dignos principe mores.
Tum procères, cunas circum longo ordine stantes
Obsequium puero, & meritos impendere honores
Diva docet, celsisque iterum se nubibus abdit.
Dein socias, quibus egregium partita laborem,
Selectas toto Natura ex agmine Nymphas
Accelerare jubet. Galeâ Bellona comanti

Tecta caput, nodoque sinus collecta fluentes,
 Ardentesque furore oculos circum omnia volvens,
 Profilit arma ferens, clypeum (Vulcania dona)
 Fatiferosque enses, & acutæ cuspidis hastas,
 Tympanaque & lituos, belli instrumenta cruenti.
 Omnia quæ augustis suspendere postibus ardet.
 Mulciber his irasque, dolosque afflaverat atris
 Follibus, & stygiis candentia tinxerat undis.
 Quodque magis noceat, bellicque inspiret amorem,
 Aspera mox pugnae, Martisque docere furores
 Diva parat: plenis equitatum educere campis,
 Et densare virum latera, & glomerare per ignem,
 Nutantesque animare acies, & vulnera ferri
 Cruda pati, pulcræque metum contemnere mortis.
 Belligeram circum (genus exitiale) fremebant
 Armatae facibus Diræ. Micat horrida torvis
 Flamma oculis, saniemque vomunt cervicibus angues
 Terribiles spiris, humerosque ac pectora lambunt.
 Imperat his Bellona sequi quocumque feretur.
 Limina tum spectat, fulgentesque ære columnas,
 Et fastu ingenti minitantiæ culmina cælo.
 Cæsaris hæc domus. Hic prisco stant marmore signa
 Porticibus longis, antiquæ gentis origo.
 Interiora tenent parvi incunabula regis,
 Blandus ubi molles efflat de pectore somnos,
 Delicium patris, & sceptri dignissimus heres.
 Evolat huc Bellona minax, Furiasque laceffit
 Occultum ut totis inspirent ossibus ignem,
 Atque dolos, atque arma ferant, irasque, facesque,
 Et de vipereis abruptos crinibus angues
 Conjiciant, stygioque aspergant pectora tabo.
 Jamque pedem tectis furibunda inferre parabat.
 Obsistit, lævæque trucem, gladioque retardat
 Justitia, & primos meritò sibi poscit honores.
 Instantemque, & multa oculis animoque minantem
 Arcet, agens retrò; gressumque ad limina perfert.

Ni faciat: cæca arma sonent, ferus omnia mavors
Vertat in exitium, fœdetque cruoribus orbem.
Tum duplices Astræa manus ad sidera tollens,
Adsis ô, si iusta peto, si legibus, inquit,
Astra Deus terrarumque regis: mihi cedat Erinnyes,
Detque locum. Liceat nostris mansuescere primum
Auspiciis, legesque pati quas ponit olympus,
Et belli jura, & primordia discere pacis.
Tempus erit, quo regna sinam sua jure tueri
Magnanimos reges, & pelleri finibus hostem.
Audiit, & summo cæli de vertice numen
Dicta probat, primamque jubet succedere tectis
Justitiam. Subit illa fores, ostroque jacentem
Regalem amplexu puerum petit. Ille ubi sensit
Oscula, divinumque animæ cælestis odorem,
Erigitur, teretesque manus circum ubera volvit:
Nutricemque suam totis haurire medullis
Gaudet, & imperii primas agnoscere leges.
Illa fovet, mollitque animos, & temperat ignes.
Quidque ferant, quid jura vetent, quid fasq; nefasq;
Diva docet: ne regna ferox aliena laceffat
Ambitio, cedatque dolis & viribus æquum.
Turpe fidem violare datam, jurataque dextris
Fœdera, perfidiæque ultores temnere Divos:
Finitimos terrere metu: vexare tributo
Subjectos: tenuique inopum ditescere prædâ.
Omnia quæ teneris pueri Dea sensibus indit.
Dulce rudimentum, & venturæ gloria famæ,
Principiis si fera bonis responderit ætas.
Post hæc armipotens gressum Dea sedibus infert,
Jam melior, patiensque regi. Stridentibus alis
Diffugiunt Furæ: quarum Æacus acer ahenis
Crura premit nodis, serpentumque educat atris
Visceribus pascens, & spumâ Cerberus albâ.
Evocat has, laxatque cavis furialia monstra
Carceribus, vindex terras si quando nocentes

132 DE INSTITUTIONE PRINCIPIS

Peste parat numen vastare, aut perdere ferro.
 At nunc iusta fugat Diras Bellona cruentas,
 Atria ne fœdent turpi regalia tabo.
 Scuta quoque & gladios, & spicula tincta veneno,
 Hastasque, clypeosque, & rubras sanguine parmas,
 Ferre jubet, nigroque recondere cuncta sub orco.
 Scilicet & solis, quibus arma coërceat, armis
 Induitur : si fortè minax in prælia rumpat
 Parthus eques, turbetque inopino fœdera bello.
 Seu patriæ reddenda quies, ferroque domanda
 Seditio, & populos contra juvat ire rebelles.
 Hos motus, hæc arma probat Deus arbiter æqui.
 Dein placidis puerum stringens Bellona lacertis,
 Munera parva sinu fundit, quæ Mulciber igne
 Coxerat innocuo, fulvoque poliverat auro.
 Volvuntur galeæque leves, ensesque, tubæque,
 Parmulaque, & fulgens Indo lorica pyropo,
 Ætneæ labor incudis. Puer omnia lustrat
 Dona oculis, audetque aciem contingere ferri:
 Et belli speciem feros meditatur in annos,
 Par veniat dum vis animo, maturaque marti
 Virtus, nec patriis impar fortuna triumphis.

Hæc inter, geminæ regalia tecta sorores
 Pax & Fertilitas subeunt : quarum altera olivæ
 Prætendit ramum, pleno fert altera cornu
 Veris opes, nitidisque autumnus dona canistris.
 Non ultrò Bellona locum jam cedere Divis
 Abnegat, atque abiens aditum venientibus offert.
 Postquam introgressæ, calathis sua munera primum
 Deponunt, placidoque addunt hæc insuper ore.
 Incipe parve puer manibus contingere ramum
 Quem ferimus, mitique animum submittere paci.
 O quanta Austriacis tollet se gloria rebus
 Auspicio tali! pingui quæ copia terræ!
 Florentes opibus populos, atque aurea cernes
 Secula. Non campis segetes, non collibus uvæ

Defuerint. Facili tellus dabit omnia partu.
Saturnique tuis succedent tempora regnis.
His dictis, pueri fœcundo tempora ramo
Ter Divæ tetigêre, ter oscula pressa dedêre.
Ast illi subitò sanguis mitescere venis
Incipit, & blando succendi pacis amore.
Ipsa ministeriis Divarum assistere gaudet
Cuncta probans, operisque levat Natura laborem.
Tum placido rerum genitrix sic ore profatur.
Aspicias ut Nymphæ, & totus conspiret olympus
Unius in pueri cultum? Fugat illa frementem
Eumenidum turbam, & natam serpentibus iram.
Hæc oculis fulgorem indit, floremque juventæ
Purpureum, & fronti lætos diffundit honores.
Illa cavet ne sanguis iners præcordia circum
Torpeat, utque animo virtus inolescat avorum.
Altera demit onus curis quæ sceptrâ sequuntur,
Quæque diem noctemque gravant. Hæc æthere puro
Temperat ingenio vires, arcetque stuporem.
Cælicolûm pars nulla vacat. Tu desine lentos
Incusare sinus matrum, prolemque morantem.
Haud tenuis labor est animam formare capacem
Imperii, sceptroque parem, populisque regendis.
Et jam rara colunt sceleratas numina terras,
Territa criminibus, fastusque exosa superbos.
Vixdum etiam magnis inflectimus æthera votis.
Cæsaris at pietas cælum movet. Illius ergò
Virtutum chorus omnis adest, terrasque revisit.
Neve putes faciles animis sublimibus ortus,
Cetera nunc operis spectâ molimina tanti.

Vix ea fata : procul sonuit clangoribus æther,
Æreaque incurvo crepuerunt cornua cantu.
Qualis ubi ruit in sylvas effusa juvenus
Venatrix, cingitque cavas indagine valles.
Tum si fortè feram sublati naribus acres
Excivêre canes : ruit hæc procul ardua montis

Terga super : resonat latratu lucus acuto.
 Respicio, celeresque oculos per inania volvo.
 Ecce sagittiferam circum glomerata Dianam
 Agmina Nympharum celsæ de montibus Idæ
 Venatu referunt cæsarum ingentia bis sex
 Terga suum, totidemque madentes vulnere cervos.
 Eminent has inter, sociasque excelsior omnes
 Despicit, & medio graditur Latonia coetu.
 Huic pharetra ex humero pendet demissa sinistro,
 In manibusque Deæ laxatis cornibus arcus
 Cernitur : infusos collo movet aura capillos.
 Hinc latus, atque illinc, maculoso vellere pardus
 Ambit, & aurati fulgent sub cruribus ungues.
 Par Nymphis cultus. Comitum Diana sagacem
 Evocat Harpalycen, qua non solertior ulla
 Vestigare feras, & vincere cursibus Euros.
 Cui Dea : Jam prædæ satis est. Finite laborem.
 Aura monet vitare graves venatibus æstus.
 Et jam frater equis sublimem pulsat olympum.
 Præcipitate moras, & iussa capeffite nostra.
 Est prope Danubii ripas angusta recessu
 Insula, dives opum, & superis gratissima tellus:
 Magnus ubi terras Phœbo sub utroque jacentes
 Temperat imperio Cæsar. Mihi nobile fanum
 Ipse dedit luco in medio : semperque recentes
 Postibus exuviæ pendent ; canentia torvi
 Colla caputque lupi, cervique fugacia nuper
 Cornua, fetigerique minaces fulmine rictus.
 Olli optata diu proles jam mascula patri
 Nascitur, & primas rumpit vagitibus auras.
 Hæc mihi non vanus fert nuntia frater Apollo.
 Huc celerare gradum, & captæ dare munera prædæ
 Fert animus, studiisque infantem accendere nostris.
 Florentem ut dederint postquam tria lustra juventâ,
 Incipiat nemora alta sequi, volucrique sagitta
 Figere, vel densis includere retibus aprum.

Dixe-

Dixerat. Extemplò Nymphæ cecinêre receptus.
Mox agilem, & querno crepitantem robore currum
Prædâ onerant, humilesque super nigrantia volvunt.
Terga rotas. Capreas Lalage, levioraque Damas
Corpora fert humeris, onerataque colla cruentat.
Cornipedes jungunt aliæ, & spumantia frænis
Ora premunt : aliæ pendentia cornua tergo
Expediunt, spirisque auras ingentibus efflant.
Quatuor insignes hinc atque hinc plaustra molossi
Custodes servant, avidosque cupidine prædæ
Terrent dente canes, & hiantia vulnera lambunt.
Ut ventum ad parvi penetralia principis, & jam
Clara percussio sonuêre palatia cornu :
Corpora nigra fues, & obeso tergo cervos
Provolvunt manibus Nymphæ, tectisque reponunt.
Tum Dea quæ silvas & opacos ilice montes
Incolit, hæc blando arridens simul addidit ore.

Parve puer, magni spes & fortuna parentis,
Munere quem raro terris concessit olympus,
Accipe quæ ferimus venatûs præmia nostri.
Magna dabunt alii ; collectas æquore gemmas,
Craterasque auro solidos, rubrique nitorem
Chrysolithi, & missos peregrino ex orbe tapetas.
Tu ne sperne, precor, neque munera despice nostra.
Fastus abest illis ; sed adest secura voluptas,
Curarumque fugax animus, prædæque cupido
Innocuæ, lætusque labor. Neque numina cessant
Nostra fatigato diffundere corde soporem.
Adde quod hæc magnis placuêre heroibus olim.
Dictæas crudum haud puduit vexare lænas
Alciden, nervoque feras agitare sonanti,
Et tolerare sitim, & somnos captare sub antro.
Et nunc ille animam sublimibus addidit astris.
Utque alios taceam, memorat quos prisca vetustas,
Nostra pater, proavique, antiquaque stirpis origo,
Interdum posito coluerunt numina sceptro.

Tu quoque, care puer, studiis assuesce tuorum,
 Desidiæque animos & edacibus eripe curis.
 Dixit, & auratam ex humeris tulit illa pharetram,
 Arcumque, & multâ satiata cæde sagittas;
 Suspenditque toro. Referunt vestigia Nymphæ,
 Assuetosque petunt saltus. Dant ærea signum
 Cornua, queis lucus procul omnis, & omnia latè
 Antra sonant; catulisque feræ tremuère relictis.
 At puero innocuus circum calor ossa cucurrit.
 Inde ubi ter quinis surget natalibus ætas,
 Crescet amor silvæ: terrentia cornua damas,
 Latratumque audire canum, crudosque tueri
 Vulneribus gaudebit apros. Tum sidera postquam
 Hesperus accendet, radiis & roscida plenis
 Cynthia sparget humum, referent imitantia veros
 Somnia venatus, prædamque sequetur inanem.
 Parte aliâ, galeâ insignem cristâque rubenti
 Adventare Deam aspicio, cui ferreus umbo
 Pectus obit, tremulasque nitore reverberat auras.
 Hasta gradum firmat sublimi cuspide fulgens.
 Quid ferat? unde genus? quo gressum Diva? requiro.
 Tum Natura mihi, lateri quæ semper adhæret
 Cuncta docens, summo natam Jove Pallada cernis.
 Hanc cerebro sine matre tulit, fuditque sub auras
 Rex superûm, inque rudes jussit descendere terras.
 Nondum notus erat mansuetæ ramus olivæ,
 Tela nec Assyriam distinxerat aurea lanam,
 Cum Dea missa polo varias mortalibus artes
 Detulit, atque animis tenebras decussit inertes.
 Ante sub ilicibus, vel opacæ tegmine rupis
 Durabat mortale genus. Glans aspera victum
 Lapsa dabat, torrensque nivalibus auctus ab undis
 Arida limosâ relevabat pectora ripâ.
 Curia nulla fuit, non pœna nocentibus ulla.
 Indomitus nullis parebat legibus orbis.
 At postquam feritas animorum victa recessit

Palladis auspicio : mox cingere moenibus urbes
Cura fuit, nuperque habitatos spernere saltus.
Diva cavas primùm docuit fulcare carinas
Æquora, curvatisque Aquilonem includere velis
Jussit : & audaces didicerunt sidera nautæ.
Illo etiam leges Tritonia condere cœpit
Tempore, & augustis partiri regibus orbem.
Pierides simul illa Deas Heliconia tempe
Incolere, illustresque ducum celebrare triumphos
Suasit, & æternis oblivia tollere musis.
Hæc olim, cum prima solo vestigia preffit.
At nunc Diva etiam regum natalia curat
Sidera, ne quid iners & frigidus axe Bootes
Peccet, vel nimio noceat Leo fervidus igne.
Temperies media est, qua parte benignior astris
Aura venit : superis domus optatissima Nymphis.
Colligit hinc veri radios, queis nubila tardi
Dissipat ingenii Pallas, mentisque recessus
Limat, & obtusos accendit lumine sensus :
Præteritique facit memores, motusque futuros
Præmonet, & rebus lucem præsentibus affert.
Nonne vides pueri ut frontem ter lumine lustret
Ætherio, primosque fuget caliginis ortus?
Felix ô, cui nascenti sublime Minerva
Contulit ingenium ! Non cælo illustrior ulla
Dox venit, & votis magis exoptanda parentum.
Regni etenim fortuna ruit, nisi regia virtus
Sustineat, curasque extendat ad omnia princeps,
Imperiique graves per se moderetur habenas.
Hactenus, & subitò vocem Natura repressit,
Avertitque gradum, & retrò tremefacta refugit.
Fronoso veluti cum se movet aggere serpens
Lubricus, & foliis subter sonat arida tellus :
Ille rubos inter reptans, mox emicat altè
Cæruleus squamis, horrendaque sibila mittit:
Quem simul erectum sinuosos vidit in orbes,

Corri-

138 DE INSTITUTIONE PRINCIPIS

Corripuitque gradum, stivamque reliquit arator.
Haud secus incussit subitum Cytherea timorem
Visa procul, pharetraque puer metuendus & arcu.
Illa vehebatur geminis lasciva columbis
Idalium linquens : ubi mollis amaracus aras
Thure vaporatas fertis florentibus ambit.
Jamque propinquabat tectis, virusque parabat,
Et pueri totis incendia ferre medullis.
At Natura graves versans sub pectore curas,
Hæc secum : Mene hanc terris avertere pestem,
Nec posse obscœnas Veneris compescere flammæ?
Cumque ego legitimo dextras conjungere nexu,
Et castis sobolem thalamis educere tentem,
Ipsa vagas Cytherea faces, scœdamque perustis
Visceribus spargatque luem, fundatque venenum?
Quid memorem quæ damna meis conatibus affert
Improbæ? Vix utero proles concepta recenti,
Solvitur antediem informis; neque matris honorem
Accipit, exhausti vitio matrona mariti.
Nos tantum scelus, & furias patiemur inultæ?
Sunt illi sua regna, Paphos, Cyprusque. Quid orbem
Subjicere imperio, mundique affectat honorem?
Dixit, & extemplò Nymphis de millibus unam
Diva Pudicitiam vocat, ac sic ore profatur.
Vade age scandepolum, superasque elapsa sub auras,
Junoni mea dicta refer, cui vincula curæ
Casta tori, Veneremque diu execrata nefandam
Fida Jovis conjux monstris magis omnibus odit.
Quippe memor veteris, socia cum Pallade, culpæ:
Cum geminas victrix irrisset adultera Divas,
Judicio Paridis, partoque superba triumpho.
Scilicet ex illo, cœli regione fugatam
Carcere conclusit Paphio, circumque sonantem
Oceanum fudit, vastisque coërcuit undis.
Et vetuit ne scœda polum, terrasque revisat.
Quid tamen ista juvant? Totum furibunda per orbem
Fertur

Fertur ovans, regumque etiam corrumpere tædas
Audet, & infanis accendere pectora flammis.
Adsit, opemque ferat. Junoni hæc nuntia ferto.

Paruit, & nivei assumens insigne pudoris,
Virgineas posuit circum sua tempora vittas.
Inde, velut nervo fertur stridente sagitta
Alta petens, fallitque aciem, & se nubibus infert:
Haud aliter Zephyros super & convexa serena
Nympha volat, notisque Deæ cita sedibus adstat.
Purpureo gemmisque gravi regina sedebat
Sublimis folio, & sceptrum regale tenebat.
Quæ simul aspexit subeuntem sidera Nympham
(Novit enim, & teneræ præfecerat ipsa juventæ)
Quæ causa impulerit commissas linquere terras
Effari jubet. Illa oculos demissa modestos
Cuncta refert, Venerisque pudenda piacula narrat.
Quam me virginibus voluisti impendere curam,
Maturasque viro & thalamis servare pudicis,
Illecebris Cytherea suis, dulcique veneno
Abripit, & cæco cogit servire furori.
Quid memorare juvat scelerum numerumque, modum-
Nulla veneficii secura furentibus ætas. (que?
Virginitasque, pudorque jacet: connubia servant
Rara fidem: cedunt victimis omnia flammis.
Nec Cypro contenta coli. Scelerata per orbem
Explicat imperia: & populis ditione subactis,
Nunc etiam regum temerare cubilia tentat.
At Natura parens tantum perferre dolorem
Posse negat, supplexque tuis advolvitur aris.
Affer opem, Veneremque doma. Nisi pronuba falso
Diceris, & thalamis vindex dare jura maritis.
Talibus inflammata animum Saturnia dictis,
Irim purpureo descendere jussit olympo,
Hæc Veneri mandata ferat. Procul orbe faceffat
Lena procax, Cypronque petat, turpesque recessus
Idalii: vel Lemniaco clam regnet in antro,

Clan-

140 DE INSTITUTIONE PRINCIPIS

Claudus ubi pulcram accipiat, foveatque maritus.
 Mollia quid totum contagia mittit in orbem?
 Ergo illi mea jura licet violare? pudicos
 Criminibus maculare toros? confundere semen
 Ambiguum? numenque impunè laceffere nostrum?
 Non ita : dum superest jaculandus nubibus ignis.
 Necdum Helenæ raptus, Paridisque infamia furta
 Excessere animo, non belli causa nefandi,
 Poënaque raptoris. Tumidam meminisse decebat
 Excidii Troiæ, & vindex quid dextera possit.
 Rumpe moras, Venerique hæc fer regalia jussa.
 Cedat humo, populosque levet, pontumque revifat
 Natalem, & spargat torvis incendia monstis.
 Dixit, & accendit veteres quoque Palladis iras.
 Iris at interea multa vi sulfuris arcum
 Imbuerat, piceasque onerarat grandine nubes.
 Imbris cærulei radios, Austrosque sonantes
 Addidit, & ruptis casuros nubibus ignes.
 Jamque sub adversum descendit turbida solem.
 Nec mora, præcipitant nimbi, tonat arduus æther :
 Responsant valles, revolutaque murmura reddunt.
 At simul hanc cæli ardentem regione propinqua,
 Fulminibusque polos, terrasque micare coruscas
 Conspicit alma Venus : pavidas fulgore columbas
 Flexit, & Idaliis præceps se condidit umbris.
 Quippe animo, quid Diva ferat, præsenferat. Illam
 Risit, & his profugam verbis Natura secuta est.
 I, pete dotales tenebras Vulcania regna,
 Cyclopumque domos, & nigris tecta caminis
 Horrida. Quid stygio differs incendia regi?
 Furva tibi sterilisque sinu Proserpina dudum
 Supplicat, & prolem magno pro munere poscit.
 Nos, sine te, dulces dabimus cum fœnore natos
 Cæsaribus, castosque effuso nectare mores.
 Postquam pulsa Venus, nondum secura quievit,
 Extimuitque dolos. Reducem Junonis ab arce
Diva

Diva Pudicitiam verbis compellat amicis.
O dilecta mihi ante alias, qua sospite terris
Constat honos, thalamisque fides, & prisca juventa
Simplicitas : tibi florentes committimus annos,
Cæsareæque domûs sobolem. Tu limina custos
Prima tene, fallax ne rumpat in atria pestis,
Dissimulans cultum, & formam mentita priorem.
Blanditias Veneris comites, risusque salaces
Pelle procul. Mihi crede, latens Cytherea sub illis,
Occultum per iter, vixque observabile serpit.
Mille artes illi, species sunt mille nocendi,
Insidiæque, dolique, & fucis illita semper
Forma novis : laqueis perit irretita juvenus.
His monitis edocta, subit penetrاليا virgo
Principis, atque artes puerum præmunit ad omnes.
Illecebræque fugax, & non penetrabile pectus
Fraudibus Idaliis, stimulis accendit honesti.
Illi paulatim calefacta per ora cucurrit
Virgineus pudor, & torpens ad lubrica sensus.
Felices animæ, quas nulla Cupidinis aura
Contigit innocuas ! Species formosior oris
Emicat, ingenuoque nitescit flore juvenus.
Sic ubi vere novo radiis pinguntur eois
Narcissi, violæque, & olentis germen anethi,
Ambrosiæ fulsere comæ : dant prata colores
Mille novos : minio tellus variata superbit.

At Natura gravi gaudens defuncta periclo,
Et cœpti studiosa operis, properare ministras
Læta jubet, meque his compellat vocibus ultrò.
Aspicias ingenti quàm sint formanda labore
Pignora, quæ regnis olim suprema paternis
Jura dabunt. Non sic rapidis exercita flammis
Unda furit, vitiis virtus ut certat, & ingens
Indomitis pugnans surgit quæ gloria monstris.
Nullam animis dat Tisiphone truculenta quietem,
Irritans diras æterna in bella sorores.

Hinc

142 DE INSTITUTIONE PRINCIPIS
Hinc Odiū, hinc Vindicta ferox, hinc Ira laceffit,
Terribiles visu formæ : hinc præcordia cæcis
Motibus Ambitio ferit, exuritque medullas
Invidia, & tortos agitat per colla colubros.
Has Erebi furias contra Clementia cælo
Nata venit, niveoque Fides insignis amictu,
Finibus & contenta suis, nec honoris avara
Simplicitas, & Pax oleâ redimita capillos,
Et Pudor, & regum nectens Concordia dextras.
Hæc olim innocuas habitabant numina terras,
Cum rerum facies & mundi forma recentis,
Astraque spirabant blandos sine crimine mores.
At postquam Impietas stygiis caput extulit undis,
Et vitiorum acies, sceleratique agmina Ditis
Invasêre animos, & summa mentis in arce
Sedit sceptrâ tenens Insania : protinus omnes
Excessêre Deæ, & terras liquêre nocentes.
Ex illo, mortale genus rationis habenas
Deseruit, cæcoque furentia corda tumultu
Error in omne nefas & bruta licentia solvit.
Sic quondam eversis magna vi spumeus amnis
Aggeribus furit, & secum rapit omnia victor.
Præcipuè mihi curâ, animos contagia contra
Regales tegere, & superûm virtute tueri.
Quippe vides Divas tot opem mihi ferre potentes,
Agmina quæ nigri contra luctantur Averni.
At precibus si fortè meis non flectitur æther,
Et renuunt cælo faciles descendere Nymphæ,
Malo equidem regum natales vertere stellas,
Et partus differre uteri, quàm pignora nasci
Stirpis in opprobrium, & sceptris indigna paternis.
Nondum animo torvi species elapsa Neronis,
Quo monstro Latium omne, aspersaque sanguine
Horruit, & cæsæ patuerunt viscera matris. (Roma
Tum mihi quærenti partu cur rustica crebro
Progenies subter nigrantis culmine villæ

Luxu-

Luxuriet? Nympham Natura ostendit agrestem
Matre satam terrâ, & verbis his ora resolvit.
Illa (vides?) viridi intexit quæ tempora ramo,
Non cæli regione venit, non semine Divûm.
Progenit lucus, crassisque vaporibus aër.
Hinc saltus & rura colit: quam plurima circum
Faunorum turba exultat, Dryadesque puellæ,
Semideûm genus, & Satyrorum gnava juvenus.
Hæc viles animas & agrestia corpora curat,
Stramineasque casas numerosis foetibus implet.
Non prece, non votis opus est, non munere sacro:
Spontè venit, facilesque manus prægnantibus affert.
Non ullas operis socias, ignemve moratur
Ætherium. Satis est informi accedere massæ
Vitales motus animæ, promptumque labori
Ingenium, & duro formandum corpus aratro.
Ipsa puerperii mater secura recentis
Aut olus absenti defert, aut liba marito,
Bina sub exerta constringens pignora mamma.
Ille sub ardenti maturam fidere messem
Falce metit, pinguique artus sudore fluentes
Conjugis obsequio relevat. Dein oscula natis
Dividit, & manibus circum blanditur & ore.
Sic pluviae patiens, sic solibus apta ferendis
Rustica duratur soboles, atque ubera prensat
Grandia, dum saturos facilis sopor occupat artus.
Tum si fortè ruunt animosi in prælia reges,
Corpora fortiti plenis robusta manipulis:
Audaces in martem animos, generosæque villæ
Agmina suppeditant. It bello rustica pubes
Docta hiememque sitimque pati, tum sub Jove
Ducere, & ingluviem crudâ satiare suillâ. (somnos
Barba per hirsutas discurrens plurima malas
Prominet in mentum. Stant nigris horrida fetis
Pectora, nervosique humero sub utroque lacerti
Fulmineum torquent inimica per ilia ferrum.

Et

144 DE INSTITUTIONE PRINCIPIS

Et nisi ruricolis multam Natura ministrem
 Progeniem, raro defendere milite vallum,
 Nec campis acies valeant educere reges.
 Quin juvat exemplis etiam levioribus uti.
 Ipse vides ut alat tellus animalia passim
 Vilia, formicasque sinu diffundat, & ingens
 Copia reptilium fulvâ spatietur arenâ.
 Tum culicum genus, & muscarum ignobile vulgus
 Ludit, agens gyros denso per inane volatu.
 Tardior at Libykos eadem generare leones
 Nititur, & tanta sub majestate laborat.
 Nec non & cedros quercusque in secula differt:
 Lentaque nodoso tenduntur brachia trunco.
 At tribulos, lappasque, & acutâ cuspide vepres
 Prodigâ trudit humus. Nec iniquis aspera dumis
 Bruma nocet: non, si rutilo tonet arduus igne
 Jupiter, hirsutæ violentur fulmine frondes.
 Usque adeo facili veniunt vilissima partu,
 Et speciem, ventis agitato semine, servant.
 Quin & melliferæ volucres, sine conjugis usu,
 Pinguibus è foliis, & puro ex rore pudicos
 Exfugunt foetus. Nova mox examina strident,
 Veris opes, lentoque extendunt glutine cellas.
 Visceribus quoque corruptæ (mirabile dictu)
 Emicuere bovis: vitasque è sanguine putri
 Attollunt, reparantq; genus. Tum cortice condunt
 Mella cavo, regemque favis stirpique sonoræ
 Præficiunt, fidumque alacres testantur amorem:
 Sive opus est servare lares, sive agmine denso
 In martem ruere, & fucos arcere rapaces.
 Omnibus idem ardor, mandata capeffere regis.

Quod decus humanæ veniet, quæ gloria stirpi,
 Si fidas imitetur apes, & regia discat
 Frena pati. Sed enim populos furiosa rebelles
 Seditio inflammat, scelerataque corripit arma
 In patriam, immeritosque cruentat cæde penates.

At

At mihi si multum expertæ, si vera monenti
Creditor, & longæva fidem Natura meretur:
Extera non tantam, quantam arma domestica cladē,
Exitiumque ferunt, vertuntque à culmine regna.
Hactenus Eöas victrix concordia sprevit
Vestra minas, spernetque: cadet gens barbara ferro.
Non si mille acies, diversique agmina mundi
Quæ Tanaim Nilumq; bibunt, quæq; Euris anhelis
Afflat equis, terris abrumpant fœdera nostris,
Teutonicas ferro valeant violare phalanges.
Vidimus Odrysios olim prope mœnia magni
Cæsaris irrupisse duces. Centum agmina curvis
Ordinibus cinctæ quatiebant saxa Viennæ:
Centum aditus nemorū, & præruptos undiq; montes
Obsedēre. Vagis stabant tentoria campis
Clara auro intexto, & niveis fulgentia velis.
Dives equis, divesque viris exercitus, & cui
Marte parem numquam submisit barbara tellus.
Ut tamen Austriacæ, numero licet impare, celsis
Montibus effulsere acies, clangorque tubarum
Insonuit, mediisque accendit prælia Mavors:
Mox Lotharus Bavarusq; duces trepidantia rumpūt
Agmina, præcipitesq; premunt, feriuntq;, necantq;:
Castra everfa ruunt. Pars, quæ fuga tuta, per umbras
Evadunt nemorum: pars lora fugacia campis
Effundunt. Densus Ister se erumpere nescit
Corporibus, stragemque Euxino evolvere ponto.
Interea niveis plaudens victoria pennis
Notas circum aquilas, & Cæsaris ora volavit.
Tantum invicta valet concordia: dum celer Istro
Vistula mittit equos, Bavaræque Polonica virtus
Jungitur, Austriacumq; accendunt omnia martem.
Ut verò attonitum clades dispersa per orbem,
Famaque victrices aquilas Orientis ad oras
Pertulit, atque Asiæ mœstas penetravit ad urbes:
Fleverunt procul Eöæ sua funera matres,

Bellaque damnarunt pactæ contraria paci,
Perfidiamque, nefasque, & fœdera fraude soluta.

Hæc me cuncta parens docuit Natura : Camœnis
Materiemque dedit, monitusque adjecit amicos :
At tu, quando favens musis aspirat Apollo,
Et faciles Cæsar præbet tibi maximus aures,
Incipe, ait, mea jussa sequi, parvosque nepotes
Austriadum patriæ virtuti aptare canendo.

Quid matrem imprimis deceat curare : quid ipsam
Nutricem : tum quæ vigili præstanda magistro,
Cujus ab auspiciis artemque modumque regendi
Accipiet Princeps, in lucem efferre memento.
Magna tibi nostræ promittunt munera Divæ,
Auxiliumque ferent. Dixit, tenuesque sub auras
Naturæ ex oculis fugiens evasit imago.

Pandite nunc mihi sacra novem præcepta sorores.
Nunc opus arcanas animorum evolvere leges,
Virtutique viam monstrare, & pellere tardam
Pectore segnitiam, vigilesque accendere curas.
Tuque pater celfo Pindi de vertice vati
Annue, divinumque animis immitte furorem.
Da cunas animare sacras : da magna parentis
Jussa sequi : rerum quando mihi nobilis ordo
Nascitur, & sublimis agit super æthera fervor.



INSTITUTIONE PRINCIPIS LIBER SECUNDUS.

Maturum postquam vitales mater in auras
Fudit onus, partuq; uterum fœcunda levavit:
Ipsa suis puerum accipiat foveatque tenellum
Uberibus, niveumque ministret pectore rorem.
At sobolem ignoto caveat malè credere lacti,
Territa criminibus, quæ plurima serior ætas
Prodit, & attoniti serò luxêre parentes.
Sanguine (si qua fides priscis) atque illita felle
Ubra nutricis perhibent fuxisse Neronem,
Atque illum hinc primâ feritatem hausisse juventâ.
Nec mites animos Romanæ conditor urbis
Accepit nutrice lupâ. Surgentia cædem
Mœnia testantur, madefactaque sanguine tellus
Iliaco, & spumans fraterno vulnere ferrum.
Usque adeo vitiosa nocent alimenta, cruorque
Degenerat. Subeunt mores altricis, & ipsam
Oblitæ matrem rapiunt contagia venæ.

Hoc Natura cavens, vegetos parientibus ultrò
Sufficit humores, & alendæ prolis amorem
Inspirat. Viden', ut proprios animalia fœtus
Cruribus admittant lactentibus? Ursa recentes
Rupe sub exesa catulos, informia lambit
Corpora, & hirsuto sitientes ubere pascit.
Et memor absentis duro sub vomere pulli
Hinnitu fremit impatiens equa fœta : nec umquam
Mater ovis, sero rediens ad ovilia pastu,
Deseruit balantem, & ab ubere reppulit agnum.
Quin etiam (sensum quamvis natura negavit

148 DE INSTITUTIONE PRINCIPIS
Arboribus) laurus sub odoræ tegmine frondis
Germina quot misit, tot alit radice, nec humor
Nativus patitur subjectam arefcere silvam.
Tantus amor matrum, & servandæ gloria stirpis.
Has Natura dedit leges, ea fœdera sanxit.

Si tamen aut acres Lucinæ experta labores
Languet, aut lactens reginam deficit humor:
Illustris, veterique ducum de sanguine nutrix
Accersenda, sinu puerum quæ blanda recentem
Excipiat, foveatque pio genitricis amore.
Ubra cui pleno tendantur candida succo.
Cui neque blanditiæ, neque morum gratia desit,
Ingeniumque sagax, florensque ætate juvenus.
Ne minus, aut lustris niteat plus quinqueperactis.
Namq; animos tener, & generosum à lacte vigorem
Accipiet, multumque trahet pulmonibus ignem.
Præterea quædam altrici vitanda monebo,
Parva quidem, nocitura tamen, nisi cura fidelis
Arceat occulti serpentia semina morbi.
Ergo & fasciolæ, & nivei velamina lini
(Belgica quæ tenui nevit subtegmine tellus)
Obvolvant teneros artus. Ter luce madentem,
Ter tenebris crepitante juvat ficcare favillâ.
Namque humor latera & furas sale mordet edaci.
Quid noceat certis poteris cognoscere signis,
Indiciumque dabit crebris vagitibus infans.
Nam vel acûs tenui vexatur acumine, spiris
Arctiùs aut premitur molles stringentibus artus.
Proxima nutricis sit cura, arcere minutis
Immissam rimis hiemem, nebulasque nocentes,
Et totis Boreæ stridorem avertere tectis.
At postquam vernis aperit se floribus annus
Mitior, & Zephyros infans patietur apricos,
Maxima tum pressis cura est adhibenda lacertis
Ne caput in tergum flexâ cervice dehiscens
Mollia nodosæ labefactet vincula spinæ.

Hinc

Hinc etenim aut læsâ gibbi excrevère medullâ,
 Cardine dum motæ duplicantur tergore costæ:
 Aut lateri brevior crescens mensura recurvo
 Clauda parit sensim vestigia. Provida nutrix
 Arctius adstringens humero nutantia colla
 Excipiet, flexusque arcebit cauta supinos.
 Hæc levis, ætati sed debita cura tenellæ.
 Deinde ubi sol radiis sitientem accenderit annum,
 Dum siccus furit igne canis, multoque viator
 Sidere languentes declinat frondibus æstus;
 Atria ne pateant, rapidoque obversa calori
 Flumineâ spargantur aquâ. Tum plurima solem
 Silva fuget, thalamisque umbram diffundat amicam,
 Proderit & virides circum atria ponere lauros;
 Pomaque odoratis citri rutilantia ramis:
 Quas Latium stirpes & dives mittit Iberus.

At vigilans postquam rationem admittere sensus
 Cœperit, & puero jam septima ducitur æstas:
 Majus opus superest, animum exercere colendo,
 Ne qua per occultas inolefcant crimina rimas.
 Quippe vel extremo quærendus ab orbe magister,
 Ingenioque annisque gravis; cui plurima Pallas
 Dona tulit, totoque affudit pectore numen.
 Et cultu Divûm, & nulli probitate secundus.
 Non aliter quàm cum roseo mercator ab ortu,
 Emensus varios pelagique hiemisque labores,
 Detulit Eöâ fulgentem luce pyropum.
 Summa micet dotes inter prudentia. Ne sit
 Aut præceps animi, aut pœnarum exactor acerbus:
 Præsertim dum prima animos elementa fatigant
 Fructu operæ studiique levi. Patientia mentem
 Blanda rudem pueri ferat, & fastidia vincat.
 Sed tamen & stimulis opus est acuentibus uti,
 Otia ne subeant, aut mollis inertia frangat.
 Nullus desidiæ detur locus. Omnia sentim,
 Dura licet, veniunt nifu superanda tenaci.

150 DE INSTITUTIONE PRINCIPIS

Verùm ubi bis senos ætatem extendit in annos,
 Freno, non stimulis opus est : quando impetus acer
 Intus agit, venisque salit ferventibus ignis,
 Nobilitas juveni qualem generosa ministrat.
 Ecce pruinosos cum sol levat æquore currus,
 Et matutini cœpere rubescere montes,
 Venatum pater autumnì sub frigora prima
 Ire parat Cæsar. Juvenis penetralibus aulæ
 Indulget studiis Princeps. Mox cornua rauca,
 Latratuque canum, volucrumq; hinnitus equorum
 Subjiciunt scintillam animo. Celer ire fugaci
 Ardet equo : ferit impatiens præcordia sanguis.
 Tum verò invitus sacras revocatus ad artes
 Æstuat, & curas mens intractabilis odit.
 Nulla quies : doctæ pariunt fastidia musæ,
 Pulpitaque & calami, & studiorum invisa supellex
 Displicet : ingratum tædet renovare laborem.
 Ecquid agat ? quâ nunc juvenem regat arte magister?
 Impetus hic minuendus erit, variisque premendus
 Illecebris, donec sensim deferveat, ipsâ
 Subsidatque morâ. Si nullis flectitur asper
 Vocibus, & monitus aversâ mente repellat :
 Tunc opus imperio, tunc cedere nescia virtus
 Obstat, frangatque animos, culpæque minetur
 Indicium, & patrias ausis pro talibus iras.
 Nec pater officio desit. Sua jura magistro
 Vindicet, & læso pœnam decernat honori.
 Ni faciat : juvenem excussis feret ardor habenis
 Nec flecti posthac facilem, neque lege teneri.
 Qualis equus si fortè fimo, cum ulove ruinæ
 Territus obliquat saliens latus, oraque retrò
 Torquet, & urgenti domino parère recusans,
 Attollitque jubas & calcibus aëra pulsat
 Arduus. Ille ferum stimulis tortoque fatigat
 Verbere, laxatis donec perrumpat habenis
 Transiens molem objectam. Dein terq; quaterque
 Victor

Victor agit circum, tumulumque agnoscere cogit.
Quod si verberibusque ferox stimuloque repugnat:
Sessoris nunquam arbitrio parere videbis.

Quàm deceat nutus juvenem servare docentis,
Exemplum pater Arcadii venientibus annis
Grande dedit. Scythiæ regionibus auctus aquosæ,
Terrisque, extremis Ister quas alluit undis,
Imperium toto Princeps Oriente tenebat.
Insignem hîc pietate virum de millibus unum
Legerat, & teneris nati præfecerat annis.
Cui Cæsar : patris tibi spes, tibi creditur heres,
Et sceptri decus, & docilis via prima juventæ.
Talis erit, qualem formaveris. Accipe veri
Jus patris, & vitiis vindex insiste domandis,
Virtutisque vias aperi, dignumque paterno
Imperio, & votis populorum redde meorum.
Tu quoque, care puer, mea jussa capeffere fuetus,
Hunc vitæ morumque ducem jam deinde sequeris.
His dictis, vocem Princeps gressumque retorfit.
At senior curas alacer se extendit in omnes,
Augustumque subivit onus. Mox prima salutis
Fundamenta parans, supremi ante omnia cultum
Numinis, & fidum cæli commendat amorem.
Utque parem patri natura agnoscat in una,
Neu similem credat dumtaxat origine natum,
Sacrilegique dolum & pestem excretur Arii.
Nam novus hâc populos seducere fraude magister
Cœperat, atque animis stygium diffundere virus.
Felix, si seros pietas durasset in annos
Principis, & nullo maculasset crimine famam.
Septima jam vernas aurora removerat umbras,
Cum pater incensus studio, curâque videndi
Conatus pueri primos, penetralibus aulæ
Infert se tacitum : subiensque cubilia, nato
Improvvisus adest. Hîc stans præcepta sedenti
Dictabat juveni senior, mentemque polibat.

Obstupuit visu Cæsar. Simul atria circum
 Augustos volvens oculos, paulùmque moratus:
 Profilit extemplò, trepidoque sedilia nato
 Eripit, invitumque senem super ipse reponit.
 Tum placidâ Princeps sic majestate profatur.
 Tunc puer documenta sedens præceptaque stantis
 Excipies, cui curam absens atque omnia patris
 In te jura dedi? Minus est quòd sanguine nostro
 Cretus, & hos fragiles debes mihi corporis artus:
 Hic partu meliore pater, qui semina recti
 Subjicit, & teneris virtutem interferit annis.
 Hunc colere, & tanto venerari impensius æquum est,
 Corpore quanto animus potior, quanto ignea terram
 Excedunt cæli spatia, & domus alta tonantis.
 Cede locum, & mihi quem debere fateris honorem,
 Cultori quoque redde tuo. Nec plura locutus,
 Proripuit sese, & retro vestigia flexit.
 O decus eximium sæcli, & memorabile tanti
 Principis exemplum! quo prisca superbiat ætas,
 Quodque probent reges, regumq; sequantur alumni.
 Quare age, Principibus justas cui ponere leges
 Cura datur, variasque animum exercere per artes:
 Principio augustum tibi devincire clientem
 Sit labor, ut facilis tua discat jussa vereri,
 Arbitrioque volens animum submittat amantem.
 Non hoc sola dabit spectata scientia, vitæ
 Ni probitas, juvenique facem prætendat honestas.
 Hinc etenim præcepta trahunt, hinc pondera leges:
 Altiùs & verbis animum ferit obvia virtus.
 Vera licet moneas (monitis si facta repugnant)
 Eloquio quamvis Ithacus tibi cedat Ulysses,
 Irrita ventosis spargentur verba procellis.
 Nunc præceptoris quo cura potissima sudet,
 Expediam dictis, & veri ad limina ducam.
 Phoebe pater, qui cuncta vides, cui cognitus ordo
 Seclorum, & veterum series longissima rerum,
 Qui-

Quique tot heroas, postquam virtutibus orbem
 Implevêre, poli vectos super ardua cernis:
 Dic mihi quâ sit iter, quo virtus semine tanta
 Germinet, & cælo surgens fastigia ducat.
 Vix ea fatus, & hæc sacro mihi reddidit ore
 Pegaseis Phœbus delapsus ab æthere pennis.
 Omnis spes regum, & trepidis fiducia rebus
 Numinis auxilio semper stetit. Hinc suus aris
 Perpetuò servatus honor, cumulataque donis
 Tempa, & votivo stillantes sanguine cultri.
 Perlege divini carmen sublime Maronis,
 Iliademque, sacer, duce me, quam cantat Homerus,
 Invenies illic cultos ex ordine Divos,
 Extaque jacta sacris, & vina liquëntia flammis,
 Seu pacem læti colerent, seu bella pararent.
 Quin ipsam ante aciem, marti cum classica signum
 Pulsa darent, non ante duces in bella ruebant,
 Quàm pecudes ferro taurosque in vota litassent,
 Prospera scrutati sectis oracula fibris.
 Scilicet hinc rerum eventus & grandia facta
 Exorsi, superas tandem venêre sub oras,
 Attonitasque suo liquerunt nomine terras.
 Dixit, Pegaseasque abiens concussit habenas
 Phœbus, & hinnitu Zephyros tranavit acuto.
 Ergo etiam incultas tenuit per secula gentes
 Religionis amor, superosque orare secundos
 Cura fuit: quamvis fucò decepta vetustas
 Neptunumque, Jovemque, & inania numina finxit.
 At tu, cui radiis fulget melioribus æther,
 Sacrilegosque docet pietas contemnere ritus,
 Imprimis Fidei veræ documenta, Deique
 Cultus, & æterni reverentia numinis, altè
 Inspiranda animo. Regum hoc fortuna, salusque
 Pendet ab auspicio, & series prosperrima rerum.
 Virtus quippe omnis Fidei de semine surgit.
 Ac veluti quo firma solo se planta recondit

Altiùs,

154 DE INSTITUTIONE PRINCIPIS

Altiùs, & pronâ radice tenaciùs hæret.

Lætior hoc funditque comas, & vertice in auras
Luxuriat, spernensque Notos imbresque sonantes
durat amans ævi, servatque nepotibus umbram :

At quæ stringit humum vitio radicis adesæ,
Et leviter summâ sitiens se extendit arenâ,
Impulit ut stridens suprema cacumina turbo,
Sternitur, & fragiles crepitant sub pondere rami :
Sic ubi prima labant Fidei fundamina, cæli
Languet amor, verique jacet rectique cupido.

Præcipitant mores, animoque & corpore pestem
Diffundunt. Scelerum numero vix sufficit ingens
Tartarus : infernæ lassatur portitor undæ.

Primùm igitur firmanda Fides, pietasque clientis.
Neve sit errori quisquam locus : arbiter orbi
Præsidet, implexas nutu componere lites,
Cuique dolos aperire datum est, & tollere fraudem
Verborum ambiguum, verique recludere fontem.

Non aliter quàm cum bivio fallente viator
Substitit, incertumque tenent discrimina, donec
Certus in optatum callem direxerit index.

Nam si quisque suo referare oracula cæli
Nititur augurio, hîc pennis affectat olympum
Icariis, debetque vago ludibria ponto.

Uni, pascæ meas, proles manifesta tonantis
Dixit, oves, scabiemque & noxia tolle venena.
Addidit & verbis vires. Quæ pascua profint,
Quæ noceant (mentem promisso lumine firmans)
Scire dedit, penitusque latentes pellerè morbos.

Quin etiam sacrum in populos Deus obtulit uni
Imperium, clavesque dedit, quibus atria cæli
Claudere, & arbitrio patefacta recludere possit.

Aspice præterea quâ numen cuncta moveri
Lege velit. Densus miles numerosus in armis

Unius imperio paret : seu prælia Nereus
Aspicit, & vastis mugit sub classibus æquor :

Seu

Seu campo strictis acies micat horrida telis.
 Et cum flumineas volucres mutare paludem,
 Hesperidumque lacus, tepidosque revisere soles
 Cogit hiems : illæ sublimia nubila tranant,
 Clamoremque ferunt ad sidera : dux tamen omnes
 Una præit, monstratque viam, cursumq; gubernat :
 Agmina quam bifido tractu pennata sequuntur.
 Non hoc casus agit : sensû hunc Deus indidit auctor
 Cuncta movens, populosque docens parere fideles
 Unius imperio, nec amicos scindere nexus,
 Queis membris caput, & capiti sua membra cohærent.
 Quin etiam antiquæ repetas si tempora legis,
 An non ductorem quondam mille agmina vatem,
 Ardentemque super nocturna in lumina nubem,
 Desertum per iter, per inhospita saxa, per æquor,
 Niliacamque fugam, cælo monstrante secuta,
 Ad patriæ tandem remearunt pascua terræ?

O ubi simplicitas animorum prima, fidesque
 Temporis illius quo grex pastore sub uno
 Unus erat : nullus turbavit ovilia prædo :
 Nulla venenato nocuerunt pabula morfu.
 Principio mens una fuit, fuit una voluntas,
 Unus amor cunctis, atque una fidelibus ara :
 Mensaque divinis dapibus communis alebat.
 O utinam secti redeant ad fœdera ritus,
 Nullaque fraternas rumpat discordia mentes!

At postquam fata nocte caput Discordia terris
 Extulit, & natus cæcis ambagibus Error
 Disperfitque gregem, rabiemque effudit, & atrî
 Invasere lupi : tum cœpta à culmine verti
 Relligio. Subiære doli, fraudesque, minæque,
 Armaque pacatos etiam terrentia reges.
 Gallia civili quoties fœdata cruore,
 Sacrilegasque experta manus? Quid Belgica dicam
 Prælia, divisas acies, divisæque sacra,
 Et conjuratas in bella domestica dextras?

Ut semel Impietas populandis agmina campis
Fundit, & Eumenidum stimulis agitata, cruentas
Ferro armat truculenta manus: Furor aurea templis
Vasa rapit, minuitque. Perit pretiosa supellex
Numinis in cultum multos sacrata per annos.
Tela sacerdotum jugulis conduntur, & ipsos
Ante focos animas, mediisque altaribus efflant.
Tum fractæ Divûm effigies, avulsaque claustris
Virginitas cessit violento præda latroni.

Nîl adeo sanctum, quod non violaverit audax
Impietas, stygio missum de carcere monstrum.
Hæc Princeps teneris jam tum meditetur ab annis,
Noxia ne regnis sensim contagia serpent,
Turbatura Fidem antiquam, stragemque datura
Imperio ingentem. Petræ inviolabilis arcem,
Romanæque datos Sedi tueatur honores,
Juraque, quæ nullis Erebi quassata procellis
Deficient. Ea lex regnis, ea fœdera sunt.

Proderit & veterum historias evolvere regum,
Hebrææque domûs stirpem, seriemque nepotum:
Tharæum ante alios: quo non servantior alter
Numinis, aut sacras coluit reverentior aras.
Filius huic, dono Divûm, prolesque virilis
Una fuit, tardæ fructus columenque senectæ,
Flore nitens primo, & caro dilecta parenti.
Hunc pater ante focos ferro mactare jubetur
Innocuum. Ergo alacer senior, stirpisque futuræ
Immemor, imposuitque pyræ, transversaque natum
Ligna super, juguloque elatum admoverat ensem.
Cum subitò iummi fulsere cacumina montis.
Vox audita simul, Puerum ne percutere, dixit:
Nam voluisse sat est: placuit pro cæde voluntas.
Ille manus tollens tremulas ætate, metuque,
Lætus agit grates, & sanctum numen adorat.
Dein puerum amplexu genitor petit. At Deus illi
Spectatum ob factis animum cædemque paratam,
Pro-

Progeniem stellis numeroque æquavit arenæ.
 Hîc pietatis honos, virtuti hæc præmia cælum
 Ponit, & ad feros extendit dona nepotes.
 O utinam memori reges hæc mente reponant!
 Non te etiam Isaiðe tacitum indictumq; relinquam.
 Tu puer inter oves certare leonibus audes
 Numinis auxilio fretus. Tibi cæsa superbi
 Colla Philistæi : quamquam ille armatus inermem
 Risit, & extincto volucres promisit edaces,
 Et pinguem canibus projecto corpore prædam.
 Nempe jacer stillans defecto vertice truncus
 Immanis, cerebroque flix defigitur udo.
 O quæ bella dehinc juvenis, sceptroque potitus,
 Gessit ovans! dextro quæ prælia marte diremit!
 Sacrilegas quando ille acies, inimicaque cælo
 Agmina prostravit victor, seniumque triumphis
 Protulit, & lauro cani nituere capilli.
 Quippe Deo primâ fertur placuisse juventâ,
 Parvus adhuc armenta puer cum pavit, & agnos.
 Nam seu manè caput roseis sol extulit undis,
 Hesperio fessos seu lavit in æquore currus,
 Laudibus, & cantu resonabant pascua sacro.
 Quo rapitis vigiles (cæli custodia) stellæ
 Sublimem pueri mentem? Terram ille perosus,
 Astra super solemque volat. Quibus ignibus arsit,
 Carmina dum plectro senior percussit eburno,
 Munera prisca Dei recolens, cælique favorem!
 Nonne vides rubro fluitare Ægyptia ponto
 Agmina, Neptunum proavos, cedentibus undis,
 Securum per iter promissæ reddere terræ?
 Illic & siccis manarunt rupibus amnes,
 Ambrosiasque aurora dapes, variumque saporem
 Misit, & absumptis duplicavit dona canistris.
 Quin & viperei sanavit vulnera morsûs
 Æneus excelsâ spectabilis arbore serpens.
 Omnia divino memorat quæ carmine vates

158 DE INSTITUTIONE PRINCIPIS
Regius, attonitosque jubet meminisse nepotes.
Ergo illi Judæ Imperium, Solymæaque regna
Firmavit, prolique Deus promisit habenda,
Dummodo virtutem, laudesque imitata paternas
Fœdera servaret, sanctæque oracula legis.
Continuò his animos acuat, juvenemque magister
Excitet augustum. Crescet crescentibus annis
Inspirata animo pietas, exemplaue calcar
Virtuti generosa dabunt, & ad ardua tollent.

Sed nunc tempus avos juveni monstrare, genusq;
Austriadum, & priscâ revocare ab origine gentem
Illustrem tot Cæsaribus, quos ardua virtus
Imperio peperit, meritoque sacravit olympo.
Huc oculos, huc verte puer. Disce inclyta facta,
Disce aras, cultumque Dei, famamque tuorum:
Atque animum Austriacæ pietatis imagine pasce.
Quis procul ille oculis spirans cælestibus ignem
Helvetiis, inVectus equo, se montibus offert
Conspicuum? Nosco vultus, nosco ora Rodolphi,
Armaque, & augusto volitantem in vertice cristam.
Hic vir, hic est, primos cui subdidit Austria fasces.
Unde novum stirpi ventura in secula nomen
Indidit. Armatum gentes tremuere subactæ,
Et superata ferox submisit colla Bohemus.
Huic Roma imperium, Latiiue insignia sceptri
Detulit: & summi conscendens culmen honoris,
In famam natos sortemque vocavit eandem.
Nec marti virtus cessit, pietasque, fidesque,
Atque innata duci clementia. Parcere victis,
Templa manu struere, & meritas cælestibus aras,
Orbis & exigui nivea sub nube latentem
Cernere mente Deum, cælumque laceffere votis,
Omnia venturæ stirpi pro dote reliquit.
Nulla animis laudem egregiam & memorabile factû
Principis illius, poterit delere vetustas,
Ob quod sceptrum illi superi firmasse feruntur.

Finis

Finibus Helvetiæ cereris sub imagine Christum,
Sensibus occultum, moribundi ad testâ Sacerdos
Pauperis agricolæ, cælestia dona, ferebat.

Longum iter, atq; hiemis tardabant lubrica gressû.

Fortè illi patriâ veniens regione Rodolphus

Occurrit. Quem ut sacra manu divina ferentem

Vidit : dimissis ab equo defluxit habenis

Pronus humi, madidaque super se sternit arena :

Atque Deum supplex, genibusque volutus adorans

Uritur, & multo suspirat saucius igne.

O qui res hominum tenues, regumque gubernas

Imperia, & vigili circumspicis omnia mente,

Accipe me, prolemque meam, seriemque meorum.

Da superis servare fidem, da sancta tueri

Fœdera, Romanisque rebelles ritibus hostes

Vincere, & imperio domitas submittere gentes.

Supplicis hoc unum numen, precor, accipe votum.

Non me sollicitat regnandi insana cupido,

Non sceptri sublimis honor, rerumque potestas

Fluxarum. Malim privato vivere censu,

Dummodo divinos alius tueatur honores,

Sacrilegasque acies ferro domet. Hoc decus unum

Non Asiæ Europæque opibus præferre recusam.

Talia suspirans imo de pectore fudit.

Deinde Sacerdotem sublimis scandere tergum

Cogitequi, sequiturq; pedes, famuloq; comantem

Ferre dedit galeam : nec iniquos vertice nimbos

Horruit, & piceis spirantes nubibus Austros.

Donec stramineæ subiêre mapalia villæ,

Æger ubi divina senex alimenta, Deumque

Pectore suscipiens, pompæ finivit honores.

Hæc fidei præclara dedit documenta, genusque

Primus ad exemplum rapuit pietatis avitæ.

Proximus huic, longo sed proximus intervallo,

Austriacus sequitur pietate insignis & armis

Carolus, augustum, & terris memorabile nomen.

Hic

160 DE INSTITUTIONE PRINCIPIS
Hic domitum Austriacis orbem servire triumphis
Compulit, attonitoque iniecit vincula ponto.
Hujus ad adventum Libyæ tremuere tyranni,
Africaque exustos vidit sine remige portus.
Quid victo memorem lauros Oriente ? quid Indos
Imperio adjectos, aurum qui divite venâ
Effodiunt, mittuntque ? quid illis Gallica jungam
Et spolia, & missos captivo vertice reges ?
Hæc decora, has pietas palmas meruitque, tulitque,
Principis & tantis conjuncta modestia rebus.
Namque ubi Franciscum coram, dejectaque ferro
Lilia, victricesque aquilas conspexit Ibera
Nobilitas : magnos animo meditata triumphos,
Eductos in cælum arcus, pompamque parabat
Ingentem, & seris arsfuros nubibus ignes.
Noluit hoc victor. Non est victoria tanti
Cæsar ait : nec enim fraterno sanguine fuso,
Lætitiæ dare signa decet. Servabimus ista
Hostibus Europæ domitis, Asiæque cadenti,
Quam fera Turcarum rabies nostro abscidit orbi.
Nunc sat erit, superis grates retulisse secundis.
Post victum bello regem in sua regna remisit.
Caverat interea ne circumfusa tot armis
Gallia vastatos lugeret cursibus agros :
Atque Italos, Belgasque, avidosque repressit Iberos,
Ne signis premerent trepidas victricibus urbes.
Sic raro exemplo pariter fortique, faventis
Fortunæ volucres ultrò compressit habenas.
Deinde ubi tot claris decoravit sceptrâ triumphis,
Tandem bellorum & famæ pertæsus inanis,
Accensusque animum regni melioris amore,
In natum sua regna pater, sua jura Philippum
Transtulit, & vastos, quos Nereus dividit, Indos.
Ipse Deo superisque vacans secessit, & aulam
Ipse novam statuit sublimi mentis in arce
Rex animi, domitorque sui. Stant ordine pulcro
Virtu-

Virtutes (regni proceres) sanctique ministræ
 Imperii, abreptosque ferunt ad sidera sensus.
 Illic, ô, fulvo quanto pretiosior auro
 Regia, divinos fuspiria rumpit in ignes!
 Quò matura virum virtus, quò sacra senectus
 Detulit, & meritis accessit Carolus astris.

Nunc ad avum, generose puer, vicinaque nostris
 Tempora verte aciem, & Pario de marmore molem
 Aspice, quam sacri posuit Leopoldus amoris
 Argumentum ingens. Stat Divæ sculpta parentis
 Effigies, bis sex frontem circumdata stellis,
 Maternoque puer gremio subnixus, & infrà
 Grandibus hæc inscripta notis monumenta leguntur.
 Cælicolum regina decus, tuque inclyte tantæ
 Matris honor fructusque puer, rerumque mearum
 Unica spes: tibi me supplex, stirpemq; nepotesque,
 Et fragilis spatium vitæ, sortemque futuræ
 Committo. Faveas, precor ô, mentemque precantis
 Devotumque tibi ne despice, Diva, clientem.
 Quod bello, quod pace geram, tibi cedit, & omnis,
 Quæcumque est fortuna, tuos celebrabit honores.
 Sic voveo, cupioque hujus meminisse minores.
 Audiit, & votum cæli regina probavit.
 Ergo nullæ acies Leopoldum, inimicaque Thracum
 Agmina fregerunt, non pocula foeta veneno,
 Et conjuratis Serinia fœdera dextris.
 Rebus in obliquis tutata est Diva potenti
 Auxilio, inque hostes pœnam convertit, & iras.
 Quin etiam cecinêre sacri præfagia vates,
 Tempore quo capient victores omnia Galli,
 Affore de cælo numen, palmamque daturum
 Austriaco. Nec vana fides delusit. Ovantem
 Vidimus, ardentique per avia marte prementem
 Reliquias pugnæ exiguas, lacerataque castra.
 Vidimus Alfatias cecidisse tonitribus arces
 Mœnibus everfis, humilemque & arundine tectum

162 DE INSTITUTIONE PRINCIPIS
Captivos Rhenum Leopoldo sternere fluctus.
Adde Alpes ferro domitas, Latioque ruentes
Attonitas Gallorum acies, inimicaque signa.
Omnia quæ cælum precibus dedit. Et sua reges
Imperia auspiciis dubitant committere Divûm?
Nec solidâ lauros malunt pietate mereri,
Fidere quàm dubiæ forti, quam turbine versat
Fortuna assiduo, rerumque volubilis ordo.
At tu, care puer, cum primûm adoleverit ætas,
Post generis laudesque tui, & decora alta tuorum,
Incipe magnanimi virtutem agnoscere patris,
Illius & quæ te genuit. Quod vivis, & auras
Aspicias ætherias, pietas dedit una parentum.
Munera testantur votiva, atque aurea sacris
Dona manu suspensa tholis. Spes aspice Princeps
Parve tuas : tibi nascenti dat prospera cælum
Omina, & in cunas pronus se fundit olympus,
Lætitiâ palmamque ferens. Victoria tecum
Nascitur, & domito jam nunc Oriente triumphas.
Quid facies ævo gravior? Tibi gloria captæ
Servatur Solymæ : violati fœderis ultor
Ultima Danubii postquam pater ostia rumpens,
Imperium Euxinas extendet victor ad undas.
Hæc illum fortuna manet. Vestigia tantûm
Sit tibi cura sequi, patrioque insistere marti:
Virtutis quo ducit iter, quo te vocat ardor
Nativus, cælique favor. Si vita per omne
Inculcata ævum pietatem exæquet avorum,
Tum tua præteritas superabit gloria lauros,
Teque pater juvenem senior mirabitur, & se,
Et sua jam vinci, non invidus, arma videbit.
Maeste animo, Austriacis dignus virtutibus heres
Succede, & populos, tibi quos Natura, Deusque
Subjecit, miti Princeps ditione governa.
Te patriæ verum præstet clementia patrem,
Atque animos mentesq; rape, & tibi junge tuorum.
For-

Fortunas (si bella premant) animasque periclis
 Objicient, & in arma ruent inimica volentes,
 Præclaram vitæ læti præponere mortem.
 Altera justitiæ sit cura, ut poena nocentes
 Æqua premat, meritæque ferant sua præmia laudes.
 Si quis in adversos ruit imperterritus hostes
 Miles, & arma refert, gladiumque à cæde tepentem,
 Acer & ingenio, & dextrâ dare vulnera promptus :
 Illum (nulla licet stirpis commendet origo)
 Muneribus decoret Cæsar, meritoque cohortem
 Concedat, pugnae pretium, fusique cruoris.
 Invalidamque manum (cura est ea Cæsare digna),
 Sive acie in media mavortia vulnera passi,
 Sive luem traxêre, rotis plauastroque gementes
 Mollibus exponi stratis, tectoque foveri
 Conveniet : donec reparatis viribus enssem
 Sepositum accingant lateri, martemque reposcant.
 Corpora quin etiam campis inhumata relinqui
 Alitibusque, ferisque vetet. Meruêre sepulcrum,
 Sanguine qui certum patriæ peperêre triumphum.
 Funereasque preces, & mystica sacra piandis
 Indicat cæforum animis, cæloque resignet.
 Marte tamen quàm pace minùs lætetur, & ictum
 Ne violet fœdus. Satis est ea crimina Thraces
 Exitio luxisse suo. Decus emicet illud
 Austriacæ dotale domûs, servare perenni
 Pacta fide, & nullis invadere fraudibus arces
 Ante tubæ sonitum, & belli data signa patentis.
 Ambitio quò sæpe truces rapit improba reges,
 Oblitos fideique datæ, pacisque sequestræ :
 Quamvis ista Deus perjuria vindicet ultor.
 Pace nihil melius, totoque beatius orbe
 Aspicit è summo sol indefessus olympo.
 Pax homines, pax nutrit agros : opulentia regnis
 Crescit, & extremis rediens mercator ab Indis
 Mercibus optatis patriam fœcundat egentem.

Tum, si bella premunt, vires æraria fundunt
 Plena suas : longo superant stipendia marti.
 Quid referam, densis ut frugibus horrea rumpant,
 Deficiatque lacus Baccho, gregibusque supini
 Colles, & foetis spument mulctralia villis?
 Omnia quæ Mavors truculentus gaudia turbat.

Nec Princeps mediâ captat tamen otia pace.
 Tunc juvat & validis circumdare moenibus urbes,
 Et quas vel Bellona dedit, vel longa vetustas
 Subruit, ingentes murorum implere ruinas :
 Exercere rudes acies, & ludicra martis
 Prælia, venturoque animos assuescere bello.
 Et juvat, ingressus quâ parte facillimus hosti
 Panditur, extremos regni cognoscere fines.
 Hîc arces molire novas, numerosaque confer
 Præsidia, hîc vigil observet custodia vallum.
 Sulfuris hîc plumbique graves liventis acervos
 Congere. Non & tela loco, non missile ferrum
 Defuerit, multosque ceres quæ duret in annos.
 Æreaque è celsis minitetur machina muris.
 Est quoque pacis opus, vulgi componere mores
 Legibus, & regni in curas adhibere Catones,
 Quos & canities, & nullo flexilis auro
 Commendat virtus, & longa peritia rerum.
 Quin & luxuriam, & peregrino è murice vestes,
 Fulgentes auri radiis, minioque superbas
 Imperii censura vetet, ludosque nocentes
 Talorum, & jactus, unâ qui absumere census
 Nocte solent, dextrasque truci conferre duello.
 Scilicet his (bello meliùs servanda futuro)
 Nobilitas perit ante diem, mœstique parentes
 Immatura gemunt natorum funera. Felix
 Gallia, quæ potuit tantos avertere luctus,
 Atque usum gladii, & pugnas inhibere cruentas.
 Mortua quin etiam cæsorū corpora, versis
 Ad solem plantis, infami appendere trunco

Imperat, & sanie perfusa madescere ligna.
Impiaque exemplis certamina talibus aufert.
Supplicia hæc utinam toto statuantur in orbe,
Præclarumque decus Lodoici imitata sequantur
Secula ! Nam quæ pugnandi tam dira libido
Impulit humanas in mutua vulnera mentes ?
Non feritas movet illa lupos, movet illa leones.
Armentis, gregibusque nocent : fremit ira, famesque
In dispar genus, & socialia fœdera servant.
At nos, quos numen, ratio, natura, fidesque,
Et patria, & germanus amor, teneræque ligavit
Nexus amicitiae, verbo si lædimur uno,
Protinus arma manu rapimus, vitamque animamque
Projicimus ferro, & stygias properamus ad undas.
Antè tamen quàm Rex populi scelera impia tollat,
Virtutum exemplo præeat. Male vindicat ultor
Quæ facit, & similis meritò quem poena reposcat.
Postquam incorruptæ præluxit imagine vitæ,
Tum procerum luxumq; premat, venerisq; pudendæ
Crimina : lascivi spectacula fœda theatri,
Furta Jovis, fidique vagos pastoris amores,
Et quæcumque animum spectata libidinis æstu
Corripiunt. Sit scena decens, sit digna pudicis
Auribus. Herculeos resonent aulæ labores,
Factaque clara ducum, pennis super æthera virtus
Quos tulit, & memori commendat gloria famæ.
Longa nec in seram ducant convivia noctem.
Sit cyathis certare nefas, Bacchoque litare
Hautstibus in lucem paribus. Temulentia nutrit
Criminis. Hinc lites inimicaque jurgia, nec non
Et ratio, & nimio sensus humore stupentes,
Et sensim tremuli labefacto corpore nervi.
O quanto melius circo exercere juventam
Pulvereo, indomitosque, & adhuc in frena rebelles
Flectere equos gyro, & fluvios innare patentes.
Tum peditem conferre manus, & principe coram,

Fossarum superare moras, transcendere vallum
Saltibus, & ficti certamina discere martis.

Dein tolerare sitimque, famemque, & solibus uri.

Nec non & rigidæ glaciem contemnere brumæ,

Et densas Aquilone nives, dum cursibus apros

Exagitat, volucris transfigit & ilia plumbo.

Talibus armorum auspiciis, crudâque palæstra,

Pectora nobilium sensim indurescere marti

Gaudeat, & meritis Cæsar sua præmia ponat.

Sic olim Aufoniæ primo sub rege juvenus,

Romulæque acies micuere : & subditus orbis

Agnovit dominam postrema ad litora Romam.

Deinde oratores, mediâ qui visere pace

Regna aliena solent, juris linguæque peritos

Præcipua de stirpe legat ; queis fidere sensus

Arcanos Princeps, rerumque negotia possit.

Illis cura, dolos, regumque latentia furtim

Noscere consilia, & tacitos prædiscere motus,

Seu pacem, martemve parent : ne perfidus hostis

Irrumpat subito secura in mœnia bello,

Improvisa ferens latis incendia campis.

Ergo ubi contigerint peregrinæ litora terræ,

Primum animos procerum largis sibi jungere donis

Instituunt. Aurum tenui se immittere rimâ

In regum secreta solet. Non ænea turris

Centum clausa feris, triplicique impervia vallo

Inclusam Danaën potuit defendere, ne quâ

Juppiter aurato perumperet ostia nimbo.

Ista tamen monitis absint commercia nostris.

Nec minùs interea mores, geniumque suorum

Providus exploret Cæsar : queis credere fines

Imperii, clavesque & propugnacula regni

Audeat, impositasque jugis sublimibus arces.

Muneribus captus portas ne fortè recludat

Proditor, & patulis admittat mœnibus hostem.

Quin & præsidii crebrò transferre cohortes

Mutata statione juvat. Nunc miles in ortum

Tendat ab occasu ; dumque anni vertitur axis ,
 Aspiciat gelidis positas Aquilonibus urbes.
 Sic fraudi spatium deerit , semperque recentes
 Excubiæ spes hostiles & munera fallent.

Præbeat & faciles rigidis cenforibus aures
 Qui meliora monent , quos nec timor edere verum
 Regalis vetat , & mores culpæ finistros.
 Turpis adulator procul exulet. Ille silendo ,
 Palpandoque nocet : regni neque commoda curat ,
 Sed sua , & ingenium formas inflectit in omnes ,
 Vertumno versatilior , Janoque bifronti.

Præcipuè augustus doctas exerceat artes
 Mæcenas , studiisque animos accendat inertes.
 Sit novus antiquo pictor qui certet Apelli ,
 Et speciem mutis vitamque coloribus addat.
 Phidiacas alius statuas imitetur , & artem
 Æmulus , & Latii præcos instauret honores.
 Namque his Ausoniæ populi vixisse feruntur
 Artibus : & veteres ostentat Roma figuras.
 Laöcoon saxo moritur , natosque , patremque
 Marmoreus spiris serpens ingentibus ambit ,
 Involvitque truci nexu , & latera ardua mordet.
 Ille manu strictos pugnans divellere nodos
 Dat sine voce sonum , moriensque in marmore vivit.
 Nec Latiae pereat decor & facundia linguæ.
 Græcia nec nostris contendere victa poetis
 Audeat , & profugas Pindi de vertice Musas
 Austriacas vertisse gradum miretur ad oras.
 Astrorum occasus alius demonstraret & ortus ,
 Obliquasque vias solis , lunæque labores.
 Quæ lenta hibernam minuunt obstacula lucem ,
 Quæ pluviæ , ventisque domus ; quo fomite fulgur
 Emicet , attonitusque fragore remugiat orbis.
 Deniq ; quidquid habent veterum monumenta virorum ,
 Regno collectum Princeps miretur in uno.
 Imperii sic crescet honor , cunctasque per oras
 Fama volans , doctæ sparget præconia gentis.

INSTITUTIONE PRINCIPIS

LIBER TERTIUS.

Postquam animo firmis pietas radicibus hæsit,
 Et toto Princeps concepit pectore numen:
 Utque procul regno vitia, & genus omne fugavit
 Desidiæ, & stimulis studiorum accendit honestis,
 Pectora nobilium formans, floremque juventæ:
 Ipse quoque ingenium varias convertat ad artes,
 Palladiæque aciem & palmam meditetur arenæ.
 Principio leges patriæ, sancitaque discat
 Jura fori, sitque ipse sui pars prima senatûs.
 Ut, quando in geminas scindit se curia partes,
 Legibus hinc atque hinc certans; discernere veri
 Argumenta sciat, tortosque evolvere nodos:
 Sive opus est pacis, seu belli exquirere causas.
 Maturisque puer talem se præbeat annis,
 Qualem mirata est Leopoldum implexa secantem
 Austria nuper avum: qualisque per ardua fulget
 Consilii gravitate pater. Quo Principe legum
 Constat honos; dant terga fugæ fraudesque, dolique,
 Atque aliena nigri rapientes pabula corvi.
 Deinde animum stimulet Salomonis gloria, quo non
 Hebræas alter rexit sapientior urbes,
 Lux populi, judexque sui. Prudentia regum
 Propriados, fulvamque super micat una coronam.
 Talibus accensus juvenilia pectora curis,
 Æquis subjectum moderetur lancibus orbem.
 Proxima terrarum immensos cognoscere tractus
 Cura sit, & quo quæque ferant sub fidere gentes:
 Tum varium terræque situm, faciemque locorum
 Disce-

Discere, & ingentem tabulâ concludere parvâ
 Oceanum, atque humero stellas Atlanta ferentem.
 Apparent alio terræ sub sole jacentes,
 Æthiopumque domus, canæque Aquilonibus oræ.
 Hîc juvat obtutu discernere protinus uno
 Flumina, piscosofque lacus, vallesque profundas,
 Et nemora, & cælum ferientes vertice montes,
 Litoraue, & portus nautis trepidantibus aptos,
 Et numerosa vago quæ tunditur insula ponto:
 Dein quæ quæq; locū teneat maris. Anglia Flandris
 Proxima litoribus, triplicique superba coronâ
 Tollitur, & Boreæ glaciale respicit ursam.
 Certat & æquoreis Batavis, quis maxima ponto
 Vela paret, geminoque ferat commercia mundo:
 Certius aut quis acu claros notet arte triones
 Nocturnum per iter, gelidosque Lycaonis ignes.
 At quâ vicinos Hispania respicit Afros,
 Oppositumque secat litus mare, quâque remoto
 Volvitur Euxino, & Nili septem ostia pulsat,
 Multa mari medio jacet insula: fertile regnum
 Trinacriæ, Cererique manens gratissima tellus,
 Rapta licet matrem Proserpina fleverit: at nunc
 Elysium tenet, & fuscâ negat arce reverti.
 Illic flammarumq; globos vomit Ætna; retorquet
 Enceladus fessum quoties latus. Ultima ponti
 Cyprus habet, prisco quondam regnata Sabauda:
 Idaliæ nunc sacra Deæ molissima tellus.
 Inter utramque jacet, Libycis pulsata procellis,
 Creta Jovis nutrix, olim Minoia regna.
 Nunc Venetis pars nulla manet: ferus abstulit hostis
 Omnia, servitioque premit. Vetus oppida centum,
 Centum arces numerare solet. Sed scilicet olim
 Pasiphaës scelere infamis, tauroque biformi,
 Funeribusque virûm, quos tecti Dædalus error
 Perdidit, & varios ludit via secta per orbes.
 Ægides monstrum donec fatale peremit,

Cæca,

Cæca, Ariadna, tuo relegens vestigia filo,
 Et socios turpi exolvit, patriamque tributo.
 Cetera turba per Ægæum dispergitur æquor
 Angustis divisa fretis : ubi candida monstrat
 Saxa Paros, niveoque micantes marmore rupes.
 Et Lunâ celebris Delos, nec Apollinis aris
 Clara minùs ; multos (si famæ creditur) annos
 Mobilis : at partu postquam est enixa Dianam,
 Firma stetit, patiens ventorum atræque procellæ.
 Quid memorem Iöniis numerosas Cycladas undis,
 Icariam, lapsas servantem ex æthere pennas,
 Remigium pueri infelix, Naxonque superbam
 Baccho ; & Vulcani celebratam nomine Lemnon ?
 Quid tenui ponti discrimine Seston Abydo
 Avulsam, & turrin, clarasque natatibus undas ?
 Quæ loca divinis olim cantata poëtis,
 Omnia barbarico jam nomine Turcia signat.
 Hoc iter emensis, longasque Propontidis oras,
 Hellepontiacæ fauces panduntur, ubi arcto
 Europam atque Asiam Neptunus limite scindit.
 Augustæ hîc sedes, & mœnia Constantini,
 Christiadûm fabricata manu. Nunc rapta tyrannus
 Exterus (ô patriæ pudor atque infamia nostræ !)
 Imperio tenet, & furto lætatur inulto.

At nunc ista pater repetet tuus. Aspice Princeps,
 Huc & spes, Leopolde, tuas, huc lumina verte,
 Nec pigeat pictâ cognoscere cuncta tabellâ
 Quæ genitor tibi regna parat ; postquam ultor Eöas
 Franget opes ferro, & victis dominabitur Argis.
 Quò nunc tendit iter celeri victoria pennâ,
 Indomitæque ardent aquilæ perrumpere. Nec fors
 Impediet cœpti justissima præmia belli.

Nunc Helicon Deæ mihi pandite, nunc juga sacri
 Scandere Parnassi timido concedite vati.
 Tuque animos, tuque ora mihi, palmasq; recentes
 Qui præbes, jamque attonitam mavorte secundo

Lætitiâ Europam incendis, da maxime Cæsar
 Te facilem, dexterque novis conatibus adsis,
 Dum tibi subiectum tua gloria vindicat Istrum.
 Arma virosque juvat, pugnamque referre cruentâ,
 Vulneribus dum terra madet, campiq; redundant
 Sanguine barbarico, spoliisque altaria victor
 Accumulas, palmæque Deo transcribis honorem:
 Dumq; metum Venetis Neptunus ovariantibus aufert,
 Hostilesque fugat nocturna per æquora puppes,
 Et Melitæ, Hispanæque rates fugientibus instant:
 Romaque jam duplici gaudet cumulata triumpho.
 Prima juvat tanti revocare exordia belli.

Barbarus icta ferox inopino fœdera marte
 Ruperat. Hic auri cupidus, quod fœnore Princeps
 Vallachus exiguo Venetæ transmiserat urbi,
 Thesauros sibi deposcit, martemque minatur
 Threïcium, jussis mora si nectatur. At illi
 Obstant iustitiæ memores, tabulasque, fidemque
 Prodere posse negant. Ergo omnem milite multo
 Commovet, educitque Asiam; terræque marique
 Invadit Pelopis dictum de nomine regnum.
 Inde iter Italiam versûs sibi pandit, & omnem
 Fœderis oblatam legem intractabilis odit.
 Ergo perfidiæ impatiens movet agmina Cæsar,
 Flumineamque Istro classem movet. Ocyus ingens
 Hungariæ extremas exercitus occupat oras,
 Eugenio duce tutus, & insuperabilis hosti.
 Noluit at prudens hostilem ut primus in agrum
 Rumpat, vel sanctæ violet commercia pacis:
 Tutetur marte imperium, vim vique repellat.
 Interea dux Ismarius bis millia centum
 Pectora, & armati vires Orientis agebat,
 Sorte ferox prima, & Veneta jam clade superbus.
 Quis mihi nunc variâ missas regione cohortes
 Explicet, atque habitus armorum & nomina gentis?
 Eoæ fulgent acies, Arabesque remoti

Thu-

Thurilegas liquere domos, quique ostia ponti
 Rubra colunt, quique arva vagi pinguissima Nili.
 Et Dacique, Scythæque, sagittiferique Geloni:
 Et Boreæ de parte truces, arcuque sonantes
 Parthi: nulla quibus cursu velocior acres
 Gens inflectit equos, aut tergo spicula mittit.
 Marte tamen pubes infirma, nec ordine pugnans.
 Quippe fugâ montes, rapidosque natatibus amnes
 Trajiciunt, prædamque sequi, non pectus in hostem
 Ferre solent, retrahuntque gradum quâ densior igne
 Mars tonat, & misera socios in cæde relinquunt.
 It melior pedes in flammæ, & acinacis usu
 Promptior, à Jano, miles, cui barbaræ nomen
 Terra dedit, sumptis Janitsarus horridus armis.
 Mittit & innumeras Istro Romania turmas,
 Mœotisque palus, Tanaisque, & dives equorum
 Thracia, finitimæque urbes, vicinaque Græcis
 Epirus. Nec non Tyriæ, Libycæque triremes
 Millia multa vehunt, & nigris pontus arenis
 Decolor, Euxinas fluctu qui verberat undas.
 Qualis ubi autumnæ Boreas, vel nubifer Eurus
 Incumbens nemori violentior, excutit altè
 Luxuriem foliorum, atque omnem fronde caducâ
 Spargit humum, vallesq; comis flaventibus implet:
 Haud secus Eoi variæ de partibus orbis
 Confluxere acies, & inundant undique terram,
 Tam variæ linguis, habitu quàm corporis, & quæis
 Aspectum terrent armis, solemque laceffunt.
 Jamque ardens ripas hostis properabat ad Istri,
 Quâ celer, obliquusque alienis influit undis
 Savus, & hostiles fluctu discriminat agros.

Eugenius contrà fines, armisque tuetur
 Hungariam, nec castra movet, propiorque Tibisco
 Hæret, & è specula motusque, animumque, dolosq;
 Threïcii ducis observat. Quem ut rura petentem
 Nostra videt, Savoque instratos scandere pontes,

Rum-

Rumpere iter ferro, & tectis immittere flammæ:
Tum demum, ut telis venantum excitus, ab antro
Prosiluit, fremuitque leo, fulvaque comantes
Excutiens cervice jubas, interritus hostes
Fertur in adversos, atque ignea lumina volvens
Vulnus amat, rictuque inimica hastilia mordet:
Haud secus ardescitq; animo, & spe præcipit hostem;
Festinusque aquilas Istri trans fluminis oras
Urget, iter celerans: animansque ad prælia ductor
Austriacas acies marti parat, atque ita fatur.
Quam votis optastis, adest jam copia pugnae.
Non opus est cæcæ tectos caligine silvæ
Pellere, difficilesque aditus, faucesque malignas,
Et cæsis molem arboribus perrumpere ferro,
Fossarumve moram, aut fluvios superare rapaces.
Hoc quondam rupistis iter. (Taurinia testor
Mœnia, & Hannoniæ saltus) Nunc æquore campi
Consistunt, nec adhuc trepidi tellure teguntur.

Eia! animos revocate: patet latus omne ruinæ.
Dixit, & extemplò vaginâ diripit ensē
Fulmineum. Hoc comitesq; duces, avidusq; cruoris
Miles agit, strictoque seges micat horrida ferro.

Interea præmissi equites qui certa reportent,
Explorentque aditus, hostiliaque agmina lustrent.
Ibant loricâ tecti capita alta ferentes,
Armatique comas galeâ: cristasque rubentes
Aura movet: quos ductor agit Brunerus in hostem,
Palsius &, qui magnanimæ regit agmina pubis.
Exultat campo sonipes, generosaque tollit
Pectora: pulveream glomerat densa ungula nubem.
Quos simul adverso venientes agmine vidit,
Agnovitque procul numerum rarasque cohortes,
Hostis ovans campis equites effundit apertis,
Millia multa virū fortissima pectora, & omne
Martis barbarici robur. Quos Palsius heros
Excipit impavidus, certus non cedere, & illo

Meti-

174 DE INSTITUTIONE PRINCIPIS
Metitur fortunam animo, quo sustinet ignem,
Spiculaque, incurfusque acres, & acinacis ictus,
Ter numero licet inferior. Sed scilicet ardor
Nescit Teutonicus fugientia vertere terga :
Aspiratque animos justæ fiducia causæ.
Jamque diu imparibus certatum cominus armis,
Cum medio infelix capitur Brunerus ab hoste,
Ut dextrâ, lævâque ardens ferit, & rotat enssem,
Sternaci revolutus equo. Quem barbara vinctum
Bistonidûm abducit legio, castrisque reportat.
At Thracum non ille manu morietur inultus,
Impia perpeffus captivo vulnera collo.
Ultor adest, qui triste nefas, cædemque cruentam
Militis egregii, quem fors inimica fefellit,
Excidio Turcarum, & regni clade piabit.
Interea (plures quamvis dedit ardua letho
Dextra viros) fessi numero ne fortè fatiscant
Oppressi Austriadæ, paulatim excedere pugnam
Visum. Sed nec terga fugæ properata dederunt:
Ordinibus pugnant lentè cedentibus, & se
Incolumes tandem sociorum in castra rulerunt.
Tertia Phœbeos aurora eduxerat ignes.
Cum pugnæ signum, mediâ stans acer arenâ,
Eugenius dedit : ac subito perterruit hostem
Armorum aspectu plenis exercitus alis :
Divisum quem Danubio, ripâque remotum
Crediderat. Castris non jam circumdare vallum
Tempus & arma sinunt : prædæque exposita supellex
Belli tota manet : Tyriâ tentoria mille
Texta manu, tum mille greges, armenta, & auri
Pondera barbarici : dives quæ cuncta tyrannus
Collecta in nostram dederat stipendia cladem.
Nulla sed invitis speranda est gloria Divis.
Quippe ubi personuere tubæ, & vis sulfuris atra
Abstulit albentem piceâ caligine lucem,
Irruit adversum densâ vi primus in hostem

Eugenius, famâ dudum multoque triumpho
 Nobilis. Igne tonant ripæ, teretique metallo
 Mille volant per inane globi. Simul excita tellus
 Barbarico clamore tremit. Ter reppulit hostis
 Militis Austriaci incursum : ter versa retrorsum
 Agmina, turbatisque acies rediêre manipulis.
 Et nisi cura vigil, præsensque ad singula sensus
 Principis, inceptæ reparasset damna ruinæ :
 Obruerat numero Austriacos, palmâque superbus
 Barbarus, Hungaricas victor penetrasset ad arces.
 Sed medium extremas robur quod dividit alas
 Collectum adversos tantâ vi fudit in hostes,
 Agmina ut obnixus perruperit. Inde solutum,
 Turbatumque urgens equitem volvitque, fugatque,
 Præcipitemque premit. Nec respirare potestas
 Ulla datur, fractisque aciem instaurare ruentem
 Ordinibus. Simul hoc tumulto prospexit ab alto
 Isinarii ductor martis, clademque suorum
 Agnovit ; medios sese moriturus in enses
 Intulit, & letho laqueum prævertit honesto.
 Quis stragem peditum horrendâ, quis cædis acervos
 Explicet, aut possit numerum censere cadentum ?
 Ter decies millena premunt morientia terram
 Corpora. Diffugiunt alii, & cita vulnera tergo
 Accipiunt. Spoliis in noctem oneratur opimis
 Miles ovans, avidæque patent tentoria prædæ.

Dein imposta Temi, & multâ defensâ palude
 (Jupiter assiduis quamvis nigresceret Austris,
 Tentarentque hostes variis assultibus urbi
 Mittere suppetias, & iter perrumpere ferro)
 Urbs capitur, totamque tibi jam maxime Cæsar
 Hungariam, & tractum Borealis subjicit Istri,
 Usque sub Euxinas quâ litora porrigit oras.
 Natalem, Leopoldæ, tibi sic Carolus annum
 Inchoat, & palmâ cunas prætexere gaudet,
 Exemplis animans ad fortia facta paternis.

Qua-

176 DE INSTITUTIONE PRINCIPIS.

Quare age, & Eugenio (veniet dum fortior ætas)
 Sub duce, militiæ primas cognoscere leges
 Incipe, & in varias aciem disponere formas.
 Nullo etenim grave martis opus meliore magistro
 Scire potes: non si ipse adsit cristatus Achilles,
 Ignea, vel volucres agitans Bellona quadrigas.
 Pauca, mihi quæ scire dedit Gryneus Apollo,
 Accipe, nec memori dubita committere menti.

Antè loci facies, quàm figere castra parabit,
 Est lustranda duci. Pars hæc aptissima terræ,
 Flumineas ubi rivus aquas, potumque ministrat.
 Quo bellator equus, fessos quando æthere præceps
 Phœbus agit currus, artus sudore fluentes
 Abluat, & madidâ referat vestigia ripâ.
 Et juvat objectu nemoris latus undique claudi
 Oppositum: insidiis fallax ne irrumpere possit
 Parthus equo celer, & raptas avertere prædas.
 Planities mediis semper gratissima castris,
 Pinguis ubi flavis lato æquore campus aristis
 Fluctuat, ablatamque gemet miser incola messem.
 Prataque vicinas ornent viridantia ripas,
 Pabula cornipedi quæ nocte recentia præstent.
 Stet procul in celsis speculator montibus, omnemq;
 Eminus aspectum captet, quando agmina tutis
 Fessa jacent campis, aut ludo tempora ducunt.
 Tum noctemque diemque vigil custodia circum
 Excubet, atque aditus castrorum & limina servet.
 Est & opus fidis exploratoribus uti,
 Turmarum numerum & motus qui cominùs omnes
 Hostilemque situm, & taciti prætoria lustrent.
 Sæpe hostes struxêre dolos, noctisque per umbram
 Improvisi adsunt, objectaque flumina vincunt.
 Ipse etiam summo imperio qui cuncta gubernat,
 Omnia lustret equo circum, vigilesque suorum
 Excubias coram exploret. Tum sæpe coacto
 Concilio Heroum, belli de rebus agendis

Consulat:

Consulat : an dubiæ tentare pericula pugnae,
Cingere vel flammis & muros rumpere ferro
Conveniat, celsasque aperire tonitribus arces :
Aut tegere, & tutâ patriam statione tueri.
Omnia quæ ducibus sunt expendenda, prius quàm
Irrita mavori committant vota sinistro,
Promeritâque luant temeraria prælia clade.
Si fueris numero inferior, munire memento
Castra, nec obliquis dubita proscindere terram
Aggeribus, validumque hosti prætere vallum.
Sin superat virtus, & adest tibi copia martis,
Pluraque condensæ numerant vexilla cohortes,
Rumpe moras, celer hostili dominabere campo,
Horreaque invenies profugis populanda colonis.
Tunc tibi promittet facilis victoria palmam,
Sive acie certare voles, seu scandere muros.

Est quoque principibus non cura indigna, nitentes
Pascere equos : seu quos Calabris in montibus, albis
Asperfit nigros maculis, atque ubera mater
Plena dedit; seu quos saltus & Ibera vagantes
Per iuga maturis soles fervoribus urunt.
Hi melius, dum victor adit capitolia Cæsar,
Captivamque trahit urbem, se curribus aptant
Nigrantes, & frena auro rutilantia mandunt.
At quos Eleis aluerunt pascua campis,
Cursibus antevolant Zephyros capreasque fugaces.
Dat validos Rhodopeque greges, dat Tartara tellus
Impexâ cervice feros, habilesque natatu.
Nostra quoque insignes Germania martis in usum
Nutrit equos, fuetos operi, duroque labori.
Armatumque ferunt equitem, cui lamina ferri
Pectus obit, vastoque tremit sub pondere tellus.
Agmine de tanto Princeps, qui corpore præstant,
Seligat, & stabuli domino committat alendos.
Noscere nec labor est generosæ semina matris.
Indicium virtutis erit, quibus ardua cervix

178 DE INSTITUTIONE PRINCIPIS
Tollitur, & crebris auras qui hinnitibus implent.
Tum formã observes, gressumq; , & corporis artus.
Igne micent oculi, motæque ad sibila virgæ
Exiliant, hucque instabiles vertantur, & illuc.
Sit teres ad costas alvus, diductaque tergum
Spina cavet; caudâ gressus feriantur ab imâ.
Cruribus & tenues incedant, pectore lati:
Luxurientque jubæ faciles per colla, per armos.
Ex his quem Bellona furens sibi vindicat, & qui
Magnanimum tergo accipiet, rapietque per hostes
Heroëm, binos jam tum cum expleverit annos,
Assuescat lituo: circum crepet auribus ignis
Explosus: pulsa arma sonent: spectetque micantes
Impavidus gladios, atque æra vomentia flammæ.
Tum motum freni ac stimulos patiat, & acres
Inter equos primus torrentes innatet undas:
Sive opus est celsos alacrem conscendere montes,
Sive latus versare, atque agmina ducere gyro.
At quem clamoris servas venatibus, alto
Exercere juvat ludo, atque assuescere silvis.
Incurvos subter discat se vertere ramos,
Arduus & mediis latratibus arrigat aures,
Cornua cum crepuere, ruuntque à montibus urfi:
Ardeat & densas cursu percurrere aristas,
Per segetes si quæ sonuit fera: seu lupo imâ
Valle fugit, campoque volans cita cerva patenti.
Cum redit, actutum fumantes integre costas,
Ferventemque fove stabulo & præsepibus altis.
Antè tamen quàm regales tradatur in usus,
Assiduo cultu, & longâ ferus arte domandus.
Fortè modum quæras, quo discant regia collo
Frena pati, & faciles præbere sedentibus armos?
Mane novo cum rector adest, sonuitque flagello,
Deducunt famuli alipedes, atque ora capistris
Impediunt, naresque tenaci forcipe prensant.
It saliens animosa cohors, ubi circus arenæ

Panditur, & viridi circumdatur area limbo.
Hic sonipes curvis exercet flexibus artus,
Inque latus pendens alternos crura per orbes
Volvit, anhelanti similis: mox tramite recto
Funditur, & summas fugiens vix signat arenas.
Haud aliter puro sublimis in aëre Nifus
Pendet, & immotis tacito natat æthere pennis,
Lentus agens gyros, vicinaque sidera lustrans.
Tum volucrem si fortè videt sub nube columbam,
Igneus in prædam pernicibus emicat alis:
Illa volat, celeresque fugâ prævertitur Euros,
Nec minùs hic pennâ timidam stridente fatigat.
Hoc Princeps juvenis stadio exercetur, equosque
Et freno discit regere, & calcaribus uti.
Primum utero procul averfas extendere calces
Sit memor: assiduo ne saucius ilia pulsu
Sæviat, & mediâ fessorem effundat arenâ.
At latera atq; armos genibus premat. Omnis ab armi
Motibus ars pendet, nec solas audit habenas
Acer equus: celsum arrectas seu tollere in auras,
Flectere seu lubet obliquo vestigia gressu,
Transversumq; movere latus (velut æquora cancri
Ima legunt) saltuque humilem transmittere sepem.
Sunt quoque qui stantes, vacuâ cervice prehensâ,
Currentem saliant in equum, tergoque feruntur.
Cursu alii in medio jaculatas sulfure glandes
Intenduntque scopo, & palmæ sectantur honorem.
Tollitur in cælum vario certamine clamor.
Sunt etiam juveni spectacula Principe digna,
Egressum cavêâ villis nigrantibus ursum,
Quem tenuit carcer ferratis undique pinnis,
Commissum spectare lupo, canibusve Britannis,
Attollentem humeros erectum, atque ore frementē,
Amplexuque feras angentem ad pectora pressas.
Aut tygres contra maculosas ire leonem
Unguibus horrendū: ast illas hinc saltibus, atq; hinc

180 DE INSTITUTIONE PRINCIPIS

Vertere sese agiles, astuque evadere rictus.
 Hos motus, irasque sonanti fistula nitro
 Circùm explosa premit, fumoque ac sulfure terret:
 Proripiunt sese, caveisque & carcere condunt.
 Et juvat in lucos latrantibus ire molossis,
 Silvestremque agitare suam: morfuque prehenfis
 Auribus, hinc illinc collo pendere tenaci
 Dente canes: fixo donec trans ilia ferro
 Volvitur, & nigrum moriens vomit ore cruorem.
 Nunc leporem hirsutis latitantem expellere dumis,
 Agmina sectari perdicum, ipsasque volantes
 Dejicere, & nimbo crepitantis sternere plumbi.
 Scilicet his studiis curæ minuuntur edaces,
 Et regni relevatur onus. Nunc cantibus aures
 Intentas adhibere juvat, citharæque canoræ.
 Quippe decent magnos hæc oblectamina reges:
 Testis avus, Leopoldæ, tuus: quo doctior alter
 Non fuit Austriadum discrimina scribere cantus
 Transversis signata notis: ubi dirigit artem
 Linea, sublimisque docet nunc tollere in auras,
 Nunc in humum labi, tremulamq; revolvere vocem.
 Infamem interea Venerem declinet, & ignem
 Idalium, nigro quâ nulla nocentior Orco
 Profilit, atque animos pestis consumit inertes.
 Quid? quod & exemplo proceres trahit? Hinc scelus
 Funditur, & totâ illuvies dominatur in aula. (omne
 Grande nefas, odisse probos, quorum agnita virtus
 Terret, & innocuis sceleratos moribus urit.
 Adde quod est sceleri terror comes, & Deus ultor
 Imminet. Imperium Babylonis rege perempto
 Delicias luxumque inter nox abstulit una,
 Divisumque dedit Medo. Quis crimina nescit
 Impia, & innocuos telo stridente petitos,
 Præcipitisque fugæ cædem, dispersaque castra
 Cissiadæ? patrios qui sparsit sanguine montes
 Ense super stricto incumbens. Quid cetera dicam

Supplicia, inque bovem verso transisse tyrannum
Corpore, mugitu lambentem pascua torvo?

Quid pulsum regnis, Brutoque ultore fugatum
Tarquinius, thalamos ausum incestare pudicos?

Non eget exemplis feralibus indole natus
Austriacâ. Nec enim ingeniti domus illa pudoris
Immemor, aut tædæ socialis adulterat ignem.

Mirabar cur prisca Aquilas insignia gestent.

Causa patet: castum illagenus, mentisque rigorem
Significant, duræque animum virtutis amantem.

Quippe Aquilas semper molles fugere columbæ,
Devotæ Veneri volucres, tectoque latentes.

Solem Aquilæ radiosq; ferunt, & in æthera gaudent
Tendere iter pennis, humilesque relinquereterras.

Tum volucrem celsis deprensam in nubibus hostem
Armatum, & rostro pariter nervisque valentem,

Unguibus invadunt, generosæque prælia miscunt.
Hæc est Austriacæ verissima gentis imago,

Hoc decus, hæc propria est antiquæ gloria stirpis,
Virtutis per iter conscendere culmina famæ,

Sternere ferro acies, hostes superare superbos,
Illecebras Veneris contemnere, cingere lauro

Tempora, perpetuis bellum finire triumphis.

Hanc in spem te fama, puer, te splendor avorum,
Teque patris virtus præsens vocat. Indue mentem

Dignam Aquilis, tantisque parem natalibus, & te,
Et tua venturi mirentur facta nepotes.

Interea dum prima nitens tibi flore juvenus

Surgit, & ad sceptri paulatim adolescit honorem,
Perge animum excolere, & studiis vigilare severis,

Atque onus imperii meditari, artemque regendi.
Prima elementa tibi nostræ cecinere Camænæ,

Virtutisque viam monstrarunt. Nunc juvat alto
Saxa notare mari, scopulosque aperire latentes,

Naufragio regum infames, populique ruinâ.

Imprimis regni caveat moderamina Princeps

182 DE INSTITUTIONE PRINCIPIS
Linquere concilio procerum, dominisque ministris.
Et re, non solo præstet se nomine regem.
Desidia imperii pestis. Nihil Principe molli
Turpius, & comites sceptri fugiente labores.
Privatum interea videas pinguescere censum,
Jura patere dolis regalia : dum sua quisque
Commoda (communi neglecto fœnore) quærit
Per fas, perque nefas, & vectigalia fraudat.
Tum furtim ablato minuunt æraria fisco
Auri avidæ prædæque manus. Sic maxima quippe
Regna cadunt. Succedit iners & turpis egestas
Principis : imperii spoliis onerantur avari.
Regibus à nostris Dii talem avertite pestem.
Thesaurus & opes majestas sola requirit.
Adde onus, & curam regni populique tuendi
Hostis ab incurfu, pretiosaque tempora belli.
At sudore tamen miserorum & sanguine Princeps
Abstineat, caveatque inopes cum civibus urbes
Immiti vexare jugo, victumque diurnum
Tollere, callosique penum exhaustire coloni.
Sæpe etenim hibernâ villæ statione gravantur,
Assiduoque veru, & lautæ nidore culinæ
Absumptos luxere greges. Tria vespere sero
Fercula septenis onerantur lancibus, ollæque
Ingentes fumant. Neque villicus hiscere contra
Sustinet, aut tergo gladios sentire sonantes
Cogitur, & siccâ detergere vulnera mappâ.
Hinc mistæ gemitu voces, hinc murmura plebis,
Iræque & rabies : hoc denique semine nata
Seditio : armatæque manus, populique rebelles
Excussere jugum : raptisque penatibus, ultrò
Hostiles acies, inimicaque castra sequuntur.
Omnibus his accensa malis vigilantia crescat
Principis, & pœnas scelerato à milite poscat.
Pœna manus cohibet rapidas, laqueusque paratus
Terret. In exigui deprensus crimine furti

Pen-

Pendentem celsâ vidi trabe. Lege severâ
 Compescenda venit violenti audacia martis.
 Adde quod ante aciem trepidus stet ventris obesi
 Miles, & assuetus patinis, pinguique rapinæ.
 Strenuus ille manu, qui duros mille labores,
 Pauperiemque pati, & galeâ potare paludem
 Promptus erit, durâque famem sedare farinâ,
 Et rigidum tolerare gelu, solemque potentem.
 Ergo militiæ injustas compescere prædas
 Cura sit. Hîc princeps Rhadamanthi immobile pectus
 Induat, immiti lacerantis terga flagello,
 Fluminibusque, rotisque, & vasti pondere saxi
 Torquentis Stygio sceleratos carcere manes.
 Munificus contrâ sit fortibus. Utque triumphans,
 Victor & à pugna miles redit : agmina coram
 Inspiciat, crebrâque ducum stipante coronâ,
 Et merita, & laudes redeuntûm, & nomina discat.

Impia præcipuè documenta, librosque nocentes,
 Et Machiavellum, stygiique volumina monstri
 Horreat à teneris Princeps. Perfusa veneno
 Pagina, contemptrixque Dei rerumque sacrarum,
 Quid licitû, vetitumve, probet vel damnet Olympus
 Nîl curare docet. Nec honesti gloria mordet,
 Sed thalamo vitium & virtus sociantur eodem.
 Unius hic curam (quasi nullus in æthere vindex
 Sit super, atque animæ fato solvantur in auras)
 Utilitatis habet, præsentisque omnia vitæ
 Metitur spatio, venturaque secula ridet.
 Principio tali quæ dein præcepta sequantur
 Digna vide, rivosque impuri respice fontis.
 Nempelicit, quodcumq; juvat. Non vincula regem
 Ulla ligare valent, nec habent perjuriam crimen :
 Causaque se facilis violandi fœderis offert,
 Ficta licet : vario quam obvolvere juris amictu
 Conveniet. Si nulla subit : si deficit omnis
 Justitiæ, jurisque color, neque tædia pacis

184 DE INSTITUTIONE PRINCIPIS

Ferre vales : vicina dolis vexare memento
 Regna, nec opprobriis dubita proscindere, donec
 Arma laceffiti cogantur sumere reges.
 Te propriæ timeant gentes, nomenque tyranni
 Lætus ama, nec amore animos vincere labores.
 Nexus amicitiae scissâ procul exulet aulâ.
 Divide concordēs animos : sere semina rixæ
 Perpetuæ, alteriusque alius conatibus obstet.
 Quæris relligio quæ præstet ? Nulla tenenda
 Regibus. Est sua cuique Deus fortuna : nec auro
 Nobilius toto dominatur in æthere numen.
 Scilicet hæc illa est species & forma politi
 Principis. An poscant alium sibi Tartara regem ?
 Cetera quid referam fœdi portenta magistri ?
 Romanam ut laceret Sedem, Mosemque cruenti
 Arguat imperii, cæli nec amore subactos,
 Sed ferro narret populos ? ut prisca, recensque
 Relligio dilapsa leves vanescat in auras,
 Cæcaque fortuito credantur ut omnia motu
 Incertas mutare vices, fatove revolvi.
 Heu quantus miseros mortales decipit error ?
 Exitium non antè vident quàm sæva flagellum
 Tisiphone quatit insultans, sequiturque nocentes.
 Nam quicumque sacra rupêrunt fœdera legis,
 Ausoniæque fidem, positamque in rupibus arcem
 Deseruêre, citâ regnum involvêre ruinâ,
 Si priscis sit habenda fides Annalibus. Amplam
 Constantini urbem, sceptrumque Orientis habebant
 Christiadæ, donec servabant integra summi
 Jura Sacerdotis, Romanaque sacra colebant.
 Tunc cecidit, manibusque extorsit Turcia nostris
 Imperium, cum nata cavis in faucibus Orci
 Hæresis Eöis vomuit contagia terris,
 Perfida cumque aris divortia fecit avitis.
 Has læsi pœnas Deus exigit ultor honoris.
 Thracia quin etiam (quantumvis barbara, & aris
 Sacri-

Sacrilegis vani nomen Mahumetis honoret)
Myſtarum tamen arbitrio ſpem credere martis
Dicitur : & quoties ſacri conſulta ſenatus
Spreta jacent, certâ toties temeraria clade
Bella luunt : laqueo reduces periêre tyranni.
At tantum ſi vana furit, pœnaſque repoſcit
Læſa ſuperſtitio : quæ nos vindicta ſequetur,
Impia deſerto Latio ſi caſtra ſecuti,
Scindamus fidei nativa exordia noſtræ?
Ergo omnes ſuperet curas Romana potenti
Auxilio tutanda fides. Hoc cardine regum
Vertitur omne decus, fors & proſperrima regni.

Invidiæ quoque peſtis edax vitanda. Tot hydriſ
Pullulat, alterius titulis quot gloria ſurgit.
Ambitio monſtrum peperit, Diſcordia pavit.
Quæris cur noſtris Oriens non ceſſerit armis?
Obſtitit Europæ livor. Dum Cæſar ad Iſtrum
Fulminat, atque aquilis auroræ limina terret;
Irruit à tergo, palmæque retardat honorem
Invidus, arma movens. Verſas Victoria pennas
Flectere, & in geminum ſe ſcindere cogitur hoſtem.
Sic inclinatæ per crimina noſtra reſurgunt
Reſ Aſiæ, & fractæ reparantur cornua Lunæ.
O pudor ! ô patriæ ſcelus indelebile noſtræ!
Cur non unanimes coëunt in ſœdera reges,
Communemque premunt armis ſocialibus hoſtem
Litus ad extremum Libyæ, Scythiæque paludes?
Jam nunc terga fugæ dat Turcia : nec tamen omnes
Explicuit fortuna ſinus : movet agmina ſolus
Carolus, Auſtriacoque reportat milite palmam.
Jungite Chriſtiadæ vires : ferte agmina campis,
Vela mari, geminumque alacres accendite martem.
Non vos pugna vocat, ſed præda : ſecate tyranni
Imperium, & certi in partem properate triumphi.
Cernite captivas Solymam trans æquora palmas
Tendentem. Tædet miſeram tot ferre labores

Vin.

186 DE INSTIT. PRINCIPIS LIB. TERTIUS.
Vincloꝝ, & fervæ stridorem audire catenæ.
Jam nunc, nulla mora est, vobis septem ostia Nilus
Pandit, & æternis Tanais juga cana pruinis.
At si nulla movet tantarum gloria rerum,
Austriaci saltem fortunam avertere martis
Parcite, fraternisque moram ne ferte tropæis.
Invidia obscœnas stimulis exerceat umbras,
Tartareosque agitet manes. Vos ætheris alti
Expectat post fata domus, sedesque piorum
Elysæ, & manibus felix concordia nexis.

Nec decet horrentem reges attollere frontem,
Lumina perpetuo versare ferocia fastu,
Accessumque arcere metu. Sit amabilis oris
Majestas, animumque serena modestia mitem
Arguat. Inviso facies sit torva tyranno,
Quem proceres odere trucem, dirisque merentem
Devovet, & tacitis lacerat plebs territa votis.
Ergo nec faciles præbere petentibus aures,
Nec pigeat justas miserorum audire querelas,
Annonâque levare inopes, miserescere fortis
Afflictæ, tenuisque laris. Juvet exera messis
Proventum patriæ sterilem, sulcosque vacantes.
Plenaque felices fœcudent horrea gentes.

Plura quidem vati superant memoranda : sed cœstro
Hæc alii graviore canent. Me tarda senectus
Admonet, & juvenum prohibet tentare labores.
Viribus hoc impar nostris onus. Accipe Cæsar
Quæ dedimus, placido, quo respicis omnia, vultu.
Sæpe placet superis magno minor hostia tauro,
Cui pretium pietas, & dives amore voluntas
Ferre solet, donoque animus pretiosior omni.
Audacem me fecit amor, stimulosque potentes
Subdidit, Austriacâ quæ surgit origine proles,
Et patris virtus, & avorum gloria, quæ nunc
Principe te toto formosior orbe coruscas
Emittit lucis radios, famamque priorum
Vincit, & æternis addit tua nomina fastis.

L I V I N I
M E Y E R I

E' SOCIETATE JESU

E L E G I A R U M
L I B E R I I.

ELEGIA I.

AD VIRGINEM MATREM,

*Quæ Lovanii colitur in Æde Sacra Societatis Jeshu, cùm
ejus ope implorata à gravi morbo convalessem.*

DEbitor augustas supplex provolvor ad aras.
Munera, corque tui, Diva, clientis habe.
Parva quidem tibi dona fero : nisi parva negare
Illa licet, magnus quæ tibi vovit amor.
Munus erit carmen deductum paupere venâ.
Has fortuna mihi tollere nescit opes.
Gemmea dent alii, totas quibus India merces
Mittit, & aurifero prodiga terra sinu.
Me mea paupertas vitæ traduxit honestæ,
Et bona fluxuris nobiliora dedit.
Parcite censores, non vobis nostra laborat
Pagina, nec longâ quæritur arte decus.
Non mihi sit tanti, ut vulgi præconia captem,
Atque aliquod vatis nomen inane feram.
Fama alios Phœbusque juvet, Phœbique sorores.
Quæ canitur, vatis gloria Mater erit.
Tu modò materno mea munera respice vultu :
Optima sunt, animus quæ pretiosa facit.
Vovimus hæc nuper, modò solvimus. Haud mora
Libera : segnities crimine nulla vacat. (nobis
Jam quoque plus æquo tenuisse silentia culpor,
Meque reum voti turba severa vocat.
Da veniam, factò si quid peccavimus isto.
Præcipitem justæ detinuere moræ,
Hactenus invalidæ prohibebant carmina vires,
Otia nec Musis apta fuere meis.
Nam modò me curæ studia ad graviora trahebant,
Pulpitaque invisæ litigiosa scholæ.

Et

Et modò vexabant veteris fastidia morbi,
 Qui solet ignavo lentus abire pede.
 Cumque suo pariter languebat vate Thalia,
 Pallidaque, & domino concolor illa fuit.
 Ut valui, musisque pares rediêre calores;
 Diva tuas laudes, & mea vota sequor.
 Scilicet occideram, nec spes erat ulla salutis,
 Persephone nostras stabat ut ante fores.
 In me fatalem Dea fusca tetenderat arcum,
 Filaque erant vitæ semiresecta meæ.
 Lucibus in tantis lenimen sola tulisti,
 Cum prope lethæis umbra vagarer aquis.
 Ipse (recordor enim) cùm me gravis ureret æstus,
 Auxilii sensi pignora certa tui.
 Nam neque tunc vernæ succis vitalibus herbæ,
 Tritaque cum salibus grana tulistis opem.
 Non poterant ulli vires reparare sapores.
 (Hei mihi quàm morbi lethifer ardor erat!)
 Omnia tentavit medicæ solertia dextræ,
 Miscuit & quotquot germina nutrit humus:
 Omnia pervicit crescens medicamina febris
 Ignea, bis quinos continuata dies.
 Quænam ego tunc Superis concepi seria vota!
 Vota tamen misero non valitura mihi.
 Turba sodalitii quondam fidissima nostri,
 Morbi, quâ potuit parte, levavit onus.
 Vos mihi cum lacrymis solantia verba dedistis.
 (O nimium nostris pectora mota malis!)
 Pro quibus officiis plenos virtutibus annos
 Dent Superi vobis, dissimilesque meis.
 Fataque dum venient (quæ vobis sera precamur)
 Vita per articulos tota sit alba suos.
 Dî faciant, canis memoretis ut illa capillis,
 Votaque spectetis nostra valere senes.
 Plura loqui volui; sed vocibus obstitit ortus
 Languor, & officium lingua negabat iners.

Protinus è sociis aliquis, seu percitus œstro,

Seu fuerit vitæ tactus amore meæ :

Pone metum dixit, non te violentia morbi

Auferet, ut medicæ nîl juvet artis opus.

Certior è cælo superest medicina; nec umquam

Ferre laboranti Diva negavit opem.

Tu modò spem certam, cælesti matre vocatâ,

Concipe : votivas audiet illa preces.

Audiet, exemplo populi testata precantis,

Ire salutiferas ad pia vota manus.

Nec Virgo est nobis peregrina; domestica certe est.

Principium cultûs hæc dedit ara novi.

Addit ornatus cælesti Principe dignos,

In quibus ars pretium vincere rara potest.

Aspice, maternis ridet puer aureus ulnis,

Et faciem populi vota probantis habet.

Vidimus hinc salvos subito rediisse favore,

Corporaque antiquis sæpe levata malis.

Sæpe tulit votum pro conjuge nupta marito,

Ut rexit, incolumem repperit illa virum.

Sæpe puer partu nequit relevare parentem,

Nec mora: promisso munere, natus erat.

Sunt quoque quos medico febris mirante reliquit.

Sunt quoque queis læso cessit ab ore tumor.

Sive caput doluit; somni populêre dolorem :

Sive latus: lateris Diva levamen erat.

Denique nulla mali species non victa recessit.

Pars o! sis turbæ parva precantis idem.

Eia age (quid cessas?) votivum concipe carmen.

Ne dubita, magni muneris instar erit.

Hoffchius exemplo docuit, quid carmina possint:

Vovit, & à voto convaluissè liquet.

Ille quidem pallens sensuque & voce carebat,

Morsque avidam lecto moverat atra manum.

Virginis imperio fugiens Libitina recessit.

Sospes io! vates carmina vota canit.

Quis

Quis vetet exemplis sperare levamen ab istis?

Spes tua, tot salvis, quos imitetur habet.

Finierat : Divæ pictos in imagine vultus

Obtulit : aspectu visa favere suo est.

Accipio, manibusque premens, atque oscula figens,

Adduxi labris dulcia labra meis.

At mihi nescio quis subitò calor ossa peredit,

Non qualem tabes antè movere solet.

Spes simul affulsit, desideriumque salutis,

Et vigor in gracili corpore mentis erat.

Atque ita, Mater opem præsta mitissima dixi;

Nam potes, & titulum Diva medentis habes.

Nec tantum vitam, quantum tibi vivere posco,

Cultoresque inter nomen habere tuos.

Non ingratus ero : si quid facundia possit,

Materies nostri prima laboris eris.

Et tua dona canam, nec erit qui nesciat illa,

Omnibus occurrens verba disertata feram.

Audiet hæc Oriens, & Vesper, & incola si quis

Extremi latitat fortè sub axe poli.

Non mihi tunc Graios quisquam conferre Poëtas

Audeat, aut vates aurea Roma tuos.

Quid canitur toto nisi pellex improba libro,

Cynthia seu vati, five Corinna suo?

Quàmlibet obscœni vobis recitentur amores:

Scribam ego, quæ casto quilibet ore legat.

Et neque materiâ fuero nec amoribus impar,

Rivalesque meus cedere coget amor.

Quæ moveat nostros ecqua est formosior ignes?

Ullane cui socio tanta in amore fides?

Certè ego si nigri spectem deformia regni

Atria, latratu quàm tria colla sonant:

Virginis inclamans fidos declivis amores,

Eripiar, superis restituarque locis.

O amor! ô in me vires dulcissime confer.

Accipiant blandas pectora tota faces.

Urite

Urite me sacræ, nîl deprecor, urite flammæ.

Ah utinam hæc lethi sit nova causa mei!

Cur ego pro vita demens annisque rogavi?

Mors placet; hæc vitæ fons melioris erit.

Dummodò te spectè moriens, voxq; ultima nomen

Diva tuum tacitis spiret anhelitibus.

Talia volventis furtim sopor occupat artus.

Ultima sed nostri nox fuit illa mali.

Evigilo : solito corpus languore carebat.

Perdiderat vires febris anhela suas.

Si qua fuit, membris non observabilis hæsit.

Sic nova, Diva tuo munere, vita data est.

Et dubitem meritas Matri persolvere grates

Et dare promissis tempora prima meis?

Tum neque pectoribus crescentis semina ferri

Desint, & medio stet mihi corde lapis.

Tunc ego convincar formas minuisse Deorum,

Et patrio tinctas ferre cruore manus.

Aut si quod scelus est antiqua quod horruit ætas,

Omnis erit facto culpa recente minor.

Ante sed (ô!) moriar, quàm muneris immemor hujus

Arguar, & præsens sit mihi summa dies!

Non, non me meriti capient oblivia tanti,

Semper & officii debitor hujus ero.

Te formosa canam, te fecundissima matrum,

Quæ reparas partu secula nostra tuo.

Turba vetus cedat scriptorum, turba recentum.

Materiâ vincam carmen utrumque novâ.

Vos veteres, fratrum discordia mœnia, Thebas

Dicite, & Iliacæ funera lenta domûs.

Illis fastus inest. At casti Mater amoris,

Ut canitur, pretium carminis ipsa venit.

Magna datur merces : priscorum vana valete

Somnia : quem Vatûm fabula sicca juvat?

Ad nova Virgineos vultus adhibere sodales

Carmina, maternus quæ mihi dictat amor.

Tuque

ELEGIARUM LIBER II. 193
Tuque parens, cùm me supremus adufferit ignis,
Principium vitæ tunc melioris ades.

ELEGIA II.

IN BEATI JOSEPHI ET MARIÆ

Sacras nuptias.

HUc ades intacti custos Josephe pudoris.
Te decet ad castas sponte venire faces.
Te properare decet, quando jam lapsus Olympo
Ipse parat tædas, & tibi portat Amor.
Læta dies fulsit, sacra quâ connubia jungas.
En parat ornatus Regia sponsa suos.
Non illam gemmæ, Tyriæ non purpura lanæ
Ornat, non auri dote superba venit.
Dos est Virginitas, dos est pretiosior auro
Virtus, dos nullâ labe notanda fides.
Terra ferat flores, diffundant sidera nectar,
Lilia præcipuè verna ministret humus.
Igne foci rutilent, Panchæaque thura vaporent,
Nutriat ornatas candida cera faces.
Sponse veni (quid enim communia vota moraris?)
Expectant tædas secula longa tuas.
Ipse Amor accinctus peraget nova sacra sacerdos,
Jussus inassuetâ lilia ferre manu.
Ipse dabit digitis aurum, zonamque ligabit
Arctius, ut nullâ vincula parte cadant.
Et fecundus erit, nec erit tamen ignis in illo.
Gratia naturæ vincet inertis opus.
Fallor, an Eöâ ter parte recanduit æther,
Flammaque de cælo prospera signa dedit?
Non fallor: resonat superis Hymenæus ab oris,
Carmina virginibus sed tamen apta canit.
Turbaque spectatrix summo descendit Olympo,
Et rata quod firmet fœdera Numen adest.

N

Castæ

Castâ super niveis volitat Concordia pennis,
Vittaque cælestes impedit alba comas.

Thura focis dà sacra puer : procul imber & Eurus.

Hæc sine stet ventis, stet sine nube dies.

Quisquis ades sacris, felicia concipe vota.

Quisquis ades, tacitas pectore funde preces.

En properat, ferturque sacras Josephus ad aras,

Et sequitur flavis sponsa decora comis.

Hanc Decor, ut graditur, furtim componit euntem.

Hanc Pudor accensas ventilat ante faces.

Hanc super exultans roseas Amor explicat alas,

Cui phœtra ex humeris & nova tela sonant :

Non quibus ignaros Paphiis ab oloribus urit,

Pectora maternas dum ferit inter aves :

Pura sed innocuis stringit præcordia flammis,

Qualia non nervo miserat ante puer.

Tempus adest, & pompa vocat : date fœdera dextris,

Digne vir hâc sponsâ, sponsaque digna viro.

Ne dubita Josephæ, sacri securus amoris

Adde maritales in nova vincla manus.

Tu quoque quæ toto graderis pulcerrima templo,

Nè timeas socii nomen inane viri.

Sanctus Hymen puros accendet amantibus ignes.

Non tibi vir positi causa pudoris erit.

Virginitas fœcunda dabit sine conjuge prolem.

Hoc tibi divinus præcinit omen Amor.

Annulus articulos subiens connubia firmet,

Clarus & in niveo Sardonychus digito.

Annule divini monumentum & pignus amoris,

Artifices nullæ te tetigere manus.

Nec tibi materiem Ganges dedit : ille rubentes

Aurifero quamvis gurgite ditet aquas.

Te Pater è summo sponsor demisit Olympo,

Ut referas casto vincula pura toro.

Per te conjugii (quod non prior audiit ætas)

Nulla pudicitæ damna subibit amor.

Sponsa viro gaude ; custos erit ille pudoris,
 Exemploque trahet pectora nostra suo.
 Ufibus à vestris surgent nova fœdera nuptis,
 Et feret in vacuo sponsa jacere toro.
 Virque, velut cælebs, uxorem more sororis
 Diliget, & solo jure maritus erit.
 Aut si quos faciet proles concepta parentes,
 Mutua legitimo stabit amore fides.
 Non externa ferent lecto vestigia crimen,
 Ignotumque orbi nomen, adulter, erit.
 Atque oculis atque ore puer matremque patremque
 Exprimet, ut nosci possit uterque parens.
 At Pietas parvos cunis affusa nepotes
 Nutriet, & mores sancta docebit anus.
 Nec tædebit avum fidei primordia nostræ,
 Sacraque cum puero dicere verba senem.
 Tota domus, sine lite, dabit virtutis odorem.
 Diva fac ut thalamis hic sibi constet honos.

ELEGIA III.

GABRIELIS ARCHANGELI

Pro nuntiando Incarnationis Mystério ad Virginem legatio.

FAs mihi sit veterum scrutari oracula Vatum.
 Uranie coeptis annue Diva meis.
 Tu cæli solisque vias, tu publica mundi
 Sidera, tu rerum tempora cuncta notas.
 Ecquid, ut in magno volvuntur secula mundo,
 Tempus, quo stabili pace fruamur, erit?
 Hactenus invidiâ serpentis & arte malignâ
 Est Stygiæ nobis semita trita viæ.
 Longaque posteritas, vetiti post crimina rami,
 Exitium à primo læsa parente trahit.
 Siccine perpetuâ miseros damnare ruinâ
 Numen, & exilium sine carere cupit?

Diva doce, neque poscenti præfagia vati

Subtrahe : sollicitum publica causa facit.

Finieram ; talesque mihi de parte serena

Aut dedit, aut visa est aura dedisse sonos :

Quod petis, æthereis referet delapsus ab oris

Arcanum peragens nuntius ales opus.

Respice pendentem niveis super æthera pennis,

Quà brevis ad pontum Sidonis ora jacet.

Jam propior terris montana cacumina stringit,

Cycnus uti gyro devolat aërio.

Neve reformides fatorum discere causas,

Accipe quæ memori singula mente notes.

Rure Palæstino locus est, ubi cara Tonanti

Incolit exiguos Regia sponsa lares.

Quam licet exornet naturæ dote juvenus,

Grata tamen magis est moribus illa suis.

Nec tantum, flavis quod tota sit alba capillis,

Nec tantum, facies quod sit honesta, placet :

Quantum quod primis probitas permanfit ab annis,

Et coluit sanctos virginitate focos.

Ergo ubi proposuit veteris contagia culpæ

Tollere, & affictis Numen adesse reis :

Quæque tribus media est, proles æquæva parenti,

Visere subiectam non dubitavit humum :

Mittitur aligerum lectus de millibus unus,

Qui peragat demptâ jussa paterna morâ.

Ille Palæstinam volucris petit ocior Euro,

Nec mora : virgineas constitit ante fores.

Nocte preces Virgo cælestia pensa trahebat,

Inque manu sacræ pagina legis erat.

Limen ut intravit, parvi fulsere penates.

Sicut erat, posito respicit illa genu.

Obstupuit specieque viri lucisque nitore,

Albaque purpureus tinxerat ora rubor.

Haud aliter seris abitura caloribus ætas

Candida puniceo poma colore notat.

Ille salutatæ postquam remove timorem
 Suaferat, est orsus sic prior ore loqui.
 O Superis dilecta ! sibi quam jungere sponfam
 Ardet inexploto castus amore puer.
 Te reliquas inter solam suspirat amantem,
 Lucida qui nutu temperat astra suo.
 Te cupit, èque tuo nasci dignabitur infans
 Sanguine, quem totus non capit orbis, amor.
 Verba fidem vincunt, tamen eloquar : accipe Virgo
 Quæ me Majestas pandere summa jubet.
 Mater eris, Materque Dei. Silet illa, simulque
 Anxia miratur verba quid ista velint.
 Et trepidat, titulumque horret castissima matris.
 Tanta verecundi cura pudoris erat.
 At juvenis mirâ rerum novitate paventem
 Erudit, & vanos cogit abesse metus.
 Atque ita, quid dubitas ? fies sine conjugis usu,
 Dixit, & intactâ virginitate parens.
 Ille tibi nullis nascetur amoribus infans,
 Nec trahet humanâ conditione genus.
 Naturam superabit opus. Tu lenta morari
 Desine : prægnantem gloria quanta manet !
 In mala præcipitem partus tuus eriget orbem,
 Proferet & meritis regna paterna suis.
 Hunc puerum, hunc olim vates cecinere futurum,
 Qui miseris tutam monstret ad astra viam.
 Obies & ultor adest ; manes gaudete priorum,
 Quos retinent Stygiæ limina prima domûs.
 En erit illa dies luxque optatissima votis,
 Vincula quâ fractâ solvet athena ferâ.
 Urna triumphatas spectabit victa cupressos,
 Ibit & à bustis umbra soluta suis.
 Felices animæ ! quarum pius agmina ducens
 Carmina Jæssides nunc meliora canet.
 Lætâ triumphali præcingite tempora lauro,
 Debitaque ultori solvite vota Deo.

198 ELEGIARUM LIBER II.

Talia narrabat, venturaque fata docebat.
 Singula divinæ pondera vocis habent.
 At Virgo interea divini conscia partûs,
 Nomen honoratæ nobile matris amat.
 Totaque cælesti sic faucia languet amore,
 Liquitur ad positos ut nova cera focos.
 O quæ virgineæ conjuncta modestia formæ est!
 Quantum oculis blandæ simplicitatis inest!
 Ardet amans, nec tota tamen formidinis expers
 Fluctuat : incertam spesque timorque facit.
 Et cupit, & metuit monitis parêre tonantis :
 Pondus inest geminæ, causaque justa moræ.
 Nam modò majestas terret ; neque digna videtur
 Quam cumulet tanto matris honore puer.
 Et modò nescio quo rapitur sublimis amore.
 (Non cadit in mûsas impetus ille meas)
 Utque loqui potuit (cæli reverentia mutam
 Fecerat) in famulæ voce disertâ fuit.
 Nec mora, divinæ rata sint oracula vocis
 Optat, & assensu comprobât illa suo.
 At juvenis procul in tenues evanuit auras.
 Ille volat : casto concipit illa sinu.
 Non aliter radiis prægnans ubi matutinis
 Vernat humus, tepido lilia rore tument :
 Idaliæque rosæ Zephyris florentibus auctæ
 Latiùs humentes explicuêre sinus.
 Viscera (sensit enim) virtus occulta pererrat,
 Membraque divinus parvula fingit Amor.
 Mortales sperate : auctor vindexque salutis
 Vivit, & occultum crescere pergit onus.
 Parva mora est, novies repararit cornua Luna,
 Ubra virgineo candida lacte trahet.
 Bellaque concedent nivæ fugientia paci,
 Et facies seclis aurea rursus erit.

ELEGIA IV.

AD NOCTEM DOMINI

Natalem, ut properet.

Candida nox, rutilis frontem circumdata stellis,
 Flecte precor cursus ad mea vota tuos.
 Nec tenebris absconde caput; sine nubibus atris
 Tota veni, purum Luna ministret iter.
 Hesperus & nullas meditetur ferre pruinas.
 Aura gelu, madidis abstineatque Notis.
 Regnet, & in niveis Zephyrus mitissimus alis
 Temperet afflatu frigida signa suo.
 Nox puerum formosa ferat : nunc omnia lucem
 Astra suam geminent, omnia rore fluant :
 Omnia festivis rutilent pulcerrima flammis,
 Oceanum gyro non subeantque suo.
 Aurea nox, nox sacra, dieque beatior omni!
 Define veloces lenta movere rotas.
 Dum tu segnis abes, mundi fortuna laborat,
 Humanumque premunt vincula dura genus.
 Pelle moras : uni victus tibi supplicat Orbis.
 Ni properes, populos longa ruina manet.
 Nec fumus ingrati; modò dextra precantibus adsis,
 Te pia neglecto turba sopore colet.
 Ferreus est, qui non vigiles tunc cantibus horas
 Ducet, ab ignavo profilietque toro.
 Non mihi tunc totis Lethæa papavera succis,
 Thessala non somnos conciliabit anus.
 Ergo affusa genu pia plebs præsepia circum
 Alternâ feriet pectora nuda manu.
 Et modò spem capiet, lacrymis modò prisca piabit
 Crimina : facundus cetera dicet amor.
 Scilicet hîc Venerem, commissâque flebit adulter,
 Deque sinu raptas ponet avarus opes.

Atque aliquis trepidans venturi iudicis iras,
A puero veniam qui reus optet, erit.

Spernere non poterunt molles suspiria cunæ.

Durus in ætatem non cadit ille rigor.

Candida nox natalis ades, tu prospera mundo

Lumen inocciduum perpetuumque feres.

Tu quem venturum tot secula suspirarunt,

Digna eris infantem prima videre Deum.

Luminaque in puerum figes simul omnia natum,

Et reprimes cursus sæpè morata tuos.

Hei mihi! quid stricto ferus ense minatur Orion?

Astraque terribili Virginis igne micant?

Ah puer in quantos mater te præscia luctus

Parturit! ut capiti nox micat atra tuo!

Horrida tempestas cæli regione sinistra

Surgit, & armatâ prælia nube tonant.

Flagraque ceu totidem sonuère tonitrua cælo,

Cruxque procellosis nubibus alta patet.

Vertite iter retrò natalia sidera, tuque

Oceano trepidas nox, precor, abde rotas.

Nîl juvat in pueri pœnas properare minacem.

Lætius, aut numquam nascere, blande puer.

Quid precor imprudens? Quò merapit error amante?

Verbaque nescio quò, vota que stulta fero?

Hoc Deus, hoc infans, hoc & mea crimina poscunt,

Lectaque curvatis poma sub arboribus:

Cùm cecidit nostræ stirpis communis origo,

Cumque viro pariter femina facta nocens:

Nostra subest tantis reparanda injuria pœnis.

Sic medicas ægris afferet ille manus.

Ite dies, horæque citis temonibus actæ,

Auferat & celeres pronior axis equos.

Sancta veni, nostrosque leva fœcunda dolores.

Sollicitant partus crimina nostra tuos.

Terra parens gaude, Saturni regna redibunt

Aurea, & innocuo flumina melle fluent.

Bellaque cessabunt, totumque effusa per orbem
 Mitia tranquillæ tempora pacis erunt.
 Diffugiet furor, & scissis discordia regnis,
 Rixaque turbatis sanguinolenta comis.
 Omnia Naturæ renovatis legibus ibunt,
 Parsque suum sceleris nulla tenebit iter.
 Succedet cum pace fides, rectique cupido,
 Et comes intactæ candor amicitiae.
 Regna pudor capiet, vetitosque fugabit amores,
 Simplicitas tectos vincet aperta dolos.
 Relligioque sacris altaribus addet honores.
 Tot bona roranti nox feret una sinu.
 Cedite lucis equi, tenebris formosior ignis
 Surget, & immenso sparget in orbe jubar.
 At vos nascenti vigiles applaudite stellæ,
 Temporaque alterno ducite festa choro.
 Nec vos manè fuget, solemve reducat Eoum
 Lucifer : in vobis nîl modò juris habet.
 Ut tamen Hesperio condatis lumina ponto,
 Accipiet blando Tethyos unda sinu.
 Nereidesque legent gemmas, teretesque lapillos
 Apponent vestris, per cava ligna, rotis.
 Hæc vobis, & plura precor natalia mundo
 Sidera : si merear, vos ego sæpè colam.

ELEGIA V.

BEATI JOSEPHI

De Sponsa gravida anceps suspicio.

ANxia res amor est; curis agitantur amantes.
 It comes, & lateri Terror amoris adest.
 Suspicioque subit causâ vexata latenti.
 Hanc quoque rumoris quælibet aura movet.
 Hinc sublata quies, hinc sunt insomnia nata,
 Hinc macies artus, oraque pallor habet.

Non

Non totidem veniunt, ubi ver aperitur, aristæ,

Nec tot populeas percutit aura comas :

Litora nec varios tot habent formosa lapillos,

Vulnera quot fidus, telaque sentit amor.

Sponsus in exemplo est, quo non fervantior alter

Fœderis, aut thalamis dignior orbe fuit.

Viderat hic graciles augescere Virginis artus.

Nec mora : sollicitus corda momordit amor.

Non poterat visi causas penetrare tumoris.

(Hactenus arcanum sponsa premebat opus.)

Ecce jacet, nullamque capit mens ægra quietem,

Et timor in curas pectus amantis agit.

Nunc metuit de lege tori, nunc vana repellit

Crimina, & incertâ pendet utrimque morâ.

Saucia trabs veluti, vel cæsa bipennibus ilex

Nutat, & ex omni parte minatur onus :

Haud aliter nunc hæc animus, nunc territus illâc

Vertitur, ambiguo corde micante metu.

Quid faceret? non hanc sceleris damnare nefandi

Sustinet, & læsi credere jura tori.

Securum mores faciunt, probitasque, fidesque,

Quique sedet tenero Virginis ore pudor.

Anxius ô quoties, Curæ discedite, dixit!

Crede verecundis moribus, illa proba est.

Illam memor voti, non auro vendere formam,

Non velit & gemmis India tota tuis.

Sic mihi nota fuit pridem crescentibus annis.

Sic manet : in ventos improbe cede timor.

Mox tamen indicium zonæ, prolisque futuræ

Lædit, & invito pectore cura sedet.

Scilicet & castos thalami fax urit amantes,

Nec pia sollicito flamma timore caret.

Causa levis satis est, curis rivalibus ardens

Alter in alterius lumina fixus habet.

Sive aliquis visurus adest, sermone sub illo

Plus aliquid, quàm quod cernitur, esse putas.

Si

Sive domum repetit solitâ vir serior horâ,
 Fingitur innocuæ causâ sinistra moræ.
 Ut simulare velis, tacitæque recondere menti :
 Ipsa solet domino cura tacente loqui.
 Cura vel invito suspiria pectore ducit,
 Cura supercilio pingit, & ore notas.
 Cura regit vultum similemque affectibus offert.
 Proderis : indicio mens patefacta suo est.
 Parce tamen : stimulis animum quid inanibus uris?
 Quid juvat arrosis unguibus ire trucem?
 Crede mihi, vero pro crimine, criminis umbra est.
 Hei mihi ! gens nimium suspiciosa sumus.
 Motibus assuescas animum subducere primis,
 Nec tibi sit causas quærere velle labor.
 Utque mali redeat species : avertere, & omnes
 Pelle moras : minimo tempore sospes eris.
 Quæ tibi non præsens tulerit solatia tempus,
 Fœnore cum magno, quæ venit hora, feret.
 Utque solet madidæ post tristia signa Capellæ
 Lætior Eois surgere Phœbus aquis :
 Gaudia sic venient fugientibus obvia curis,
 Paxque tibi lætas tundet amica fores.
 Pertulerat primos Josephus turbinis æstus.
 Mox posuit vires fracta procella suas.
 Missus ab æthereis regionibus advolat ales,
 Forma que nescio quid læta ferentis habet.
 Certa fides cælo : numquam solatia dignis
 Subtrahit, & duro tempore Numen adest.
 Venerat in mœsti secreta cubilia sponsi,
 (Terror ab insolito lumine parvus erat.)
 Pone metum dixit, neque te divortia tangant ;
 Sponsa vacat culpâ : tu modò pone metum.
 Edocet & nullo parituram crimine matrem,
 Utque sit à Superis quod pia gestat onus.
 Finierat : Sponsi pertentant gaudia pectus,
 Et redit exacto grata timore quies.

Tu quoque qui minimâ conjux percelleris umbrâ,
Disce supervacuo corda levare metu.

Utque proba est, sic esse puta; ne creditus error
Torqueat, & misero sit tibi vita gravis.

ELEGIA VI. IN PUERIJESU

Nativitate.

O Amor! ô vili recubans puer aureus antro!
Fas mihi neglectæ tecta subire casæ:
Divinosque videre oculis mortalibus artus,
Atque animam tantis perdere deliciis.
Fallor, an aspicio geminos imitata pyropos
Lumina, quæ molli dulcia fronte micant?
Prô Superi! quantum radiis cælestibus ardens
Maternis rubuit vultus in uberibus!
Ubera candorem superant lactisque nivisque,
Et tu Chrysolitho plus minioque rubes.
Non aliter primis nivibus Sidonia certat
Purpura Nympharum tincta recens manibus.
Ubera perge puer lactantia ducere matris,
Dum subeat blando nata sopore quies.
Somniferum interea modulabor arundine carmen:
Si licet, & pedibus basia mille feram.
Hei mihi! cur tremulo suspiria pectore mittit?
Cur cadit in teretes lucida gutta genas?
Non lacrymæ formam minuunt: decus additur illis,
Quas tener admotis stillat Amor facibus.
Ut ferrugineis vivax micat in violis ros,
Dum fœcunda sinum vere recludit humus:
Aut matura velut, si forsan acuminis ictu
Læseris, in lacrymas punica mala tument:
Gemmeaque Eois rutilant conchylia guttis,
Quæ legit in rubris navita litoribus:

Aut

Aut sic, aut etiam multò formosiùs illis,
 In guttas rosæ subriguere genæ.
 Felices lacrymæ! vestro diffunditur imbre
 Quidquid ab aurora nectaris ire solet :
 Quidquid habent animæ vernarum dulce rosarum,
 Quidquid & Hyblæi mellis Hymettus habet.
 O Amor! ô vili recubans puer aureus antro!
 Ut tener æterno vultus amore rubet!
 Ut radiant oculi cælestes! quos rutilans nox
 Nesciat auratis vincere sideribus.
 Cernite pastores verumque agnoscite Numen.
 Non vos forma Dei fallere certa potest.
 Non vigor humanus, non gratia lucet in ore;
 Omnia cælesti plena decore micant.
 Cernite, nec superos pigeat cognoscere vultus.
 Ingens nîl illis blandius orbis habet.
 Dum finit hoc infans, oculos satiate tuendo,
 Et date sacratis oscula fasciis.
 Mox venient prono venerari vertice Reges,
 Effusoque ferent aurea dona sinu.
 Simplicitas puero tamen est pretiosior auro.
 Vos date cum puris mitia poma favis.
 Addite sublatum plenis ab ovilibus agnum,
 Ovaque, & in calathis lactea dona suis.
 Audistis? gelidæ ut resonent vagitibus auræ!
 Non hos tristes hiems, sed mala nostra movent.
 Illis restituit lapsum vagitibus orbem,
 Et referat superas, regna paterna, fores.
 Illis vanescunt veteris contagia culpæ,
 Tartaraque æterno clausa adamante rigent.
 Discite mortales venerari Numen in illo.
 Contemptûs pœnas impia turba dabit.
 Nec quia jam puer est, pariter credamus inermem.
 Ille puer vires, quas tremat orbis, habet.
 Cùm voluit, totò crepuere tonitrua mundo,
 Claraque de picea fulmina nube cadunt.

Cùm

206 ELEGIARUM LIBER II.

Cùm voluit, rapidi tenuêre silentia venti,
 Continuitque truces atra procella minas.
 Illius imperio tellus vastissima servit,
 Et domita objectis æquora litoribus :
 Arsurusque olim flammis fatalibus orbis,
 Cùm veniet seclis ultimus ille dies.
 Sic vates cecinêre sacri : qui credere durus
 Abnuit, heu serò pœnituisse volet !
 At vos ruricolæ puero bona verba faventes
 Dicite, festivos & celebrate choros.
 Cesset opus, latèque vacet vicinia simplex.
 Aspectu totos auferat ille dies.
 At cum muneribus mentem quoque jungite vestris.
 Hæc illi, demptis omnibus, una placet.
 Atque hoc, aut simili præsepia cingite versu :
 Et puer hic, Deus est : & Deus ille, puer.

ELEGIA VII.

AD MATREM

A partu Virginem.

Mater ades, partûsque mihi miracula tanti
 Pande, nec arcani supprime signa Dei.
 Hactenus occultum tua rara modestia Numen
 Sustinuit tacito dissimulare sinu.
 Hactenus ancillam licuit famulamque vocari :
 Nunc posito famulæ nomine, mater ades.
 Nec matrem dici pudeat, sine crimine quando
 Virginitas thalamos excubat ante tuos.
 Ecce Pudor, teneram cui cinxit purpura frontem
 Ante fores custos, tectaque parva sedet.
 Limen & observat ne quis temerarius hospes
 Intret, & aspectu polluat antra suo.
 Fasciolasque parat puero, somnosque volantes
 Allicit, & rigidos cogit abesse Notos.

Liliaque, & pleno collectos ubere flores,
 Spargit odoratis undique liminibus.
 Sub pedibus pharetram, victique Cupidinis arcum,
 Extinctasque faces, fractaque tela premit.
 Ille Paphum profugus, maternaque regna revisit
 Tristis, & incomptis hirta per ora comis.
 Blanditiæ comites fugiunt, Ritusque loquaces,
 Et Jocus, & castris quidquid Amoris adest.
 At pia Simplicitas, placidoque Modestia vultu,
 Callosaque satus sedulitate Labor :
 Et Decor, & tenui Paupertas aspera victu
 Incolit, & castris quidquid Amoris obest.
 Valles Bethlemiæ, & rigidæ præsepia cunæ,
 Et quæcumque super turba beata volas,
 Dicite quis tanto ditavit pignore matrem,
 Quem vocet hic patrem, quem vocet illa virū.
 Dicite (scitis enim) & cupido narrare potestis.
 Nulla (reor) facta causa filenda subest.
 Finieram : subitis sonuit concentibus æther :
 Atque aliquis, Partus accipe matris, ait.
 Humanis non ille venit complexibus infans.
 Semina principii nobilioris habet.
 Quem pater æterna foecundus imagine natum
 Protulit, intacto corpore Virgo parit.
 Et simul æternus, simul est in tempore natus.
 Aspice, naturas res habet una duas.
 Nec confusa tamen : proprios habet utraque motus.
 Utraque sed nexu juncta potente coit.
 Non nutrix accita tulit solamina matri,
 Non Lucina suas officiosa manus.
 Nec solitos partu sensit veniente dolores.
 Hæc alias cælo vindice pœna manet.
 Ut sol egreditur de purpurea aurora;
 Illa tamen rediens, quo prius, ore rubet :
 Aut ut vere novo subitum rosa spirat odorem;
 Nec tamen ulla sui damna decoris habet :

Divi-

Divino partu sic formosissimus infans

Editus, è casto venit in antra sinu.

Utque puer solem, auroram sic integra mater

Vincit, & intactas, purior ipsa, rosas.

Miratur Natura novos sine semine partus.

Victor at in niveis it Pudor altus equis.

Dixerat: applausit superùm chorus omnis, & omnes

Aligeri nexas implicuere manus.

Musa tace, citharamque cavo suspende sub antro.

Carmina non tantâ digna parente canes.

ELEGIA VIII.

AD SACRA STRAMINA

Præsepis Domini.

STramina cycneas pretio vincentia plumas,
Nascentis thalamo nobilitata Dei!

Vos super incumbit, quem terræ non capit orbis,

Aulaque quæ geminos separat alta polos.

Qui spatium major, naturæ limite claudi

Nescit, in exiguo stramine totus adest.

Vos precor ô ! puero molles insternite cunas

Stramina, nec tenerum lædite acuta latus.

Antè tamen madidæ Zephyris agitentur aristæ,

Noxius & Phœbi devolet igne vapor.

Et careant vacuæ granorum pondere spicæ,

Excutiat plenas messor & antè comas.

Vos quoque prostantes penitùs subsidite nodi.

Asperitas puero vestra nocere potest.

Abfit & imbelles radix læsura lacertos,

Abfit & hirsutis aspera lappa comis.

Sint immixta leves factura papavera somnos,

Adsit odoriferi copia parva thymi.

Nec violæ molles desint, nec amabile, flores,

Veris opus, cytissus puniceusque crocus.

Postu.

Postulat hæc infans paucis tener editus horis,
 Dignus inoffenso molle cubare toro.
 Ille licet Tyrio decumbere possit in ostro,
 Et mediis somnum ducere chrysolithis:
 Stramen amat, gaudetque humili requiescere fœno
 Pauper, & agresti delituissè casâ.
 Nec timet infans motas Aquilonibus auras,
 Pervigil hibernis heî mihi sideribus!
 At vos deposito faciles concedite somnos
 Stramina, quâque licet parte, levate gelu.
 Gratus erit certè, veniat modò grandior ætas,
 Et nova cœlesti cœna paranda cibo.
 Vaticinor: vestris surget sublimis aristis
 Gloria, nec mundo par erit ullus honor.
 Stramina quæ Domini tetigistis membra tenelli,
 Crescite triticeis luxuriôsâ comis.
 Tempus erit, Cereris quando sub imagine Numen,
 Divino supplex orbis honore colet.
 Mollibus in granis, niveæ pro flore farinæ,
 Qui jacet hîc, infans inveniendus erit.
 Spargite semen humo, sulcosque aperite coloni:
 Aurea, quæ veniet postmodo, messis erit.
 Crescite io! Zephyris & rore madentia puro
 Stramina, cœlestes inter habenda dapes.
 Nec venti noceant, nec acutâ grandine nimbi,
 Germina nec tellus uberiora ferat.
 Vos dabitis sacris alimenta perennia mensis,
 Solamen nostris mite futura malis.
 Deliciæ Regum valeant, epulæque potentûm.
 Una ceres totas orbis habebit opes.
 Parva mora est, flavæ stillabunt nectare spicæ,
 Uvaque mutatis sanguine palmitibus.
 Hæc amor, & majora volet. Vos stramina somnos
 Interea Domino conciliate meo.

ELEGIA IX.
IN PUERI JESU*Circumcissione.*

LUxit amara dies pueri signanda cruore.
 Hei mihi quàm duræ victima legis erit!
 Delius auroram caligine tectus opacâ
 Deferat, & pullis æthera scandat equis.
 Et circum nigris volitent in vestibus horæ,
 Lapsaque terribili fulmina nube tonent.
 Lumen & in templis flammâ moriente vacillet,
 Nec foveat rutilas splendor, ut antè, faces.
 Luceat imbriferis variata coloribus Iris,
 Largus ab effusis nubibus imber eat.
 Terraque concussos moveat perterrita montes,
 Æquoraque horrendo murmure vasta sonent.
 Omnia nunc prodant manifesti signa doloris,
 Auctorique suo triste parentet opus.
 Hostia maternis insons portatur in ulnis.
 Aspice, vulneribus vix habet illa locum.
 Ut properat, mœstis lugent altaria flammis,
 Thuraque contracto parciùs orbe volant.
 Ecce parat cultrum legis de more sacerdos,
 Ponitur & sacris pagina prisca notis.
 Utque tremens nudum contingit acumine corpus,
 Pauca precaturo præcinit ore senex.
 Dempta, precor, veterem tollant præputia culpam,
 Deque meis manibus crimine purus eas.
 Accipe Mosaïco sacrata piacula ritu,
 Hæc tibi deletæ tessera labis erunt.
 Hoc pater Ifacidûm discevit fœdere stirpem,
 Vênit ab antiquis hoc tibi vulnus avis.
 Dixerat : exiguanque cutem de parte pudoris
 Abstulit : innocuo terra cruore madet.

Quan-

Quantum animis erroris inest ! vocat ecce nocentem
 Quo nihil immensus purius orbis habet.
 Corrige vota senex, & inania verba retracta.
 Quid facis ? hic nullâ labe piandus adest.
 Parce, quid innocuum lædis ? me tela cruentent,
 En ego sum cultris hostia digna tuis.
 Ille ego sum primæ damnatus origine culpæ.
 Hæserunt capiti probra paterna meo.
 Ille nihil meruit, nisi si meruisse putetur,
 Crimina quod proprio nostra cruore luit.
 Sancte pater specta; dulcis tibi victima natus
 Supplicat, & cælo brachia parva movet.
 Perque salutiferum, per amabile nomen Iesus,
 (Quod puer à fuso sanguine nomen habet.)
 Perque recens vulnus, per vulnera mille futura,
 Ut tua, quàm fuerit, sit minor ira, rogat.
 Non potes, ut cupias, non indulgere roganti,
 Grande patrocinium sanguis amantis habet.
 Ergo age quisquis eris, scelerum quem turpis imago
 Terret, & immensâ crimina mole gravant.
 Huc spes verte tuas, veniam placabile Numen
 Spondet, & offensæ jam meminisse nequit.
 Impie quid dubitas ? pro te quoque dulcia patri,
 Irrita non umquam vota futura, facit.
 Omnibus una salus manat de vulnere, & omnes
 Postulat heredes sanguinis esse sui.
 At quicumque perit, contemptor muneris hujus
 Arguitur vitio velle perire suo.
 Cur aliquis laqueum tigno suspendit ab alto ?
 Aut sua lethiferis corpora merfit aquis ?
 Noxia vel summâ collisit membra fenestrâ ?
 Aut tenuit trepidâ toxica nigra manu ?
 Certa salus superest. Tu nomen amabile tantum
 Ore refer, Stygias despiciasque minas.
 Maxima sit miseris fiducia nominis hujus,
 Poplite submisso quod tria regna colunt.

Semper adest, facilisque reis sperantibus aufert

Crimina : ne pereas, nolle perire sat est.

Ah utinam medio blandum mihi pectore nomen

Numquam delendo vulnere scribat amor!

ELEGIA X.

AD STELLAM,

Quæ Magis apparuit.

O Quæ cælestes inter pulcerrima flammæ
Exoreris, nullis cognita sideribus!

Astrifero qualem numquam consurgere cælo

Vidit ab Eois Hesperus altus aquis.

Ipsa tuos ortus miratur candida Luna,

Nec sua jam vinci cornua posse negat.

Quique suo Princeps hebetat Sol lumine mundi

Sidera, vix notis pallidus ivit equis.

Tu rutilos inter formosior ætheris ignes

Conspicuum roseo spargis ab ore jubar.

Nec sequeris, servant quos cetera sidera cursus.

Non tibi plebeïæ semita trita viæ.

Horrida nec caudâ prælagis bella minaci,

Non miseram cælo virus habente luem.

Quales terribili fulserunt crine Cometæ,

Quos pavidî Reges, mœstaque regna vident.

Pacem vultus habet, radiisque innoxia puris

Nescio quæ populis prospera signa refers.

I bona venturæ prænuntia Stella salutis:

Regibus Eois gaudia quanta feres!

Olim te sacro cecinerunt carmine vates

Venturam nati parva sub antra Dei.

Cum Deus humanos genitus puer induet artus,

Lapsaque speratæ tempora pacis erunt,

Stella sub occasum properabit Solis ab ortu,

Purpureoque novum proferet axe diem.

Ec-

Ecce tuos patriis spectant de montibus ortus,
 Et cantata piis vatibus astra notant.
 Nec vidisse fat est : Reges rata signa sequentes
 Cælo animos, cælo lumina fixa tenent.
 Ite pii, quò vos felix rapit ardor amantes,
 Nec subitum regni cura moretur iter.
 Ite per & montes, per & aspera rupibus antra :
 Tam longæ merces magna futura viæ.
 Nec vos aut Helicen, aut quâ Tyrus aspicit Arcton,
 Parrhasiasve decet Pleiadasve sequi.
 Est aliud lumen vobis & certius istis.
 Concedent astro sidera prisca novo.
 At (moneo) vitate feri scelerata Tyranni
 Atria, qui tenero sanguine tinget humum.
 Insidias vobis, puero fera fata parabit.
 Hei mihi quam multis flebilis ultor erit !
 Jam nunc purpureos video decurrere rivos,
 Parvaque de cunis corpora rapta suis.
 Non feret aspectus monstri pia stella nefandi,
 Territaque oppositâ lumina nube teget.
 At postquam Solymâ properabitis ire relictâ,
 Priscaque Jessæi rura legetis agri,
 Proferet occultos mediis de nubibus ignes,
 Et nitor in tacita nocte diurnus erit.
 Inque humiles toto descendet lumine valles,
 Quà casa lucenti stramine parva micat.
 Hic Numen confessa, citos immota jugales
 Comprimet : hæc pueri signa latentis erunt.
 Nobile de patriis collectum montibus aurum,
 Et date submisso thura Sabæa genu.
 Numen adest : puer agresti jacet ecce sub antro.
 O ! quantum fati canna palustris habet !
 Aspiciunt, matremque simul natumque salutant.
 Plus tamen in nato, quod tueantur, habent.
 Majestas oculis plus quàm mortalis oberrat,
 Raraque divinum forma fatetur opus.

Nec mora : certatim præsepibus oscula figunt,
 Oscula regali digna labore peti.
 Dein senior stabuli miratus pauperis antrum,
 Edidit attonitos ore tremente sonos :
 Felices cannæ ! felicia stramina ! felix
 Neglectum Domini pauperis hospitium !
 Non tibi si Pario stent marmore mille columnæ,
 Postibus & gemmæ cardinibusque sonent :
 Non tibi si varient Indi tabulata lapilli,
 Fulguret & Tyrio lana superba toro :
 Eveniant magnæ meliùs præconia famæ.
 Plus tua paupertas, quod colat orbis, habet.
 Creta tace ; quid prisca Deos mendacia fingunt ?
 Falleris : infantem non tulit Ida Jovem.
 Hic jacet æterni proles non ficta Tonantis,
 Quem mare, quem tellus, astraque Styxq; tremunt.
 Quæque tribus tria regna dedit decepta vetustas
 Fratribus, hic unus possidet illa puer.
 Dixit, & inclinans regalem vertice toto
 Canitiem, sacrâ sceptrâ reponit humo.
 Muneribusque datis Numen veneratus adorât.
 Hoc focii Reges, hoc pia turba facit.
 Felices quibus ista licent ! non purpura vobis
 Ulla potest tantum conciliare decus.
 Tu quoque quæ tuto duxisti tramite Reges,
 Æthereas inter stella beata faces !
 Quà patet, immenso fies notissima cælo,
 Teque, tuosque ortus secula særa canent.

ELEGIA XI.

IN HERODEM

Infanticidam.

IMpie Rex ! nemoris latebroso nate sub antro ,
Cui lupa villosis lac tulit uberibus :
Vagitusque feros crudi pulmone juvenci
Sedavit , laceræ visceribusque canis ;
Pavit & humanâ puerilia guttura prædâ ,
Unde tibi nostri sanguinis orta sitis.
Tene, Lycaoniæ superantem opprobria stirpis ,
Impia Romani sceptrâ tenere ferunt ?
Tene ferunt ullæ post tot tua crimina terræ ?
Nec negat unda tibi , nec negat aura viam ?
Debueras ruptæ dudum telluris hiatu
Nare super Stygios victima fœda lacus ,
Et Danaï relevare genus , vel crimine victi
Ultrices Tityi pascere vivus aves.
Ossa superpositâ si quis tua condât arenâ ,
Ejiciet vindex turpe cadaver humus.
Nec te projectum Tethys feret omnibus undis ,
Ne mala Nereïdum corpora præda gravet.
Corpus ad infernas animâ comitante paludes
Ibit , & antiquis manibus horror eris.
Illic æternos reus ut toleraveris ignes ,
Pars minor è pœnâ non erit ulla tuâ.
Non humeri tibi Sisyphiâ si môle laborent ,
Et cava lapsuros hauriat urna lacus :
Horrendoque fragore sonans revolubilis orbis
Torqueat assiduâ corpora victa rotâ :
Flumina vel captes semper fugientia ripas ,
Pomaque prensuras fallere docta manus.
Quæcumque atra tuos incendet pœna dolores ,
Nil satis inventum , quo crucieris , erit.

Semper inexhaustæ superabunt debita culpæ,
Noxaque tortores vincet inulta suos.

Æace quid cessas ? pœnas maturus ad omnes
(Parce fatigatis manibus) unus adest.

Quid memorem antiquas nullo sub vindice cædes,
Raptaque vi, cunis non data sceptrâ tuis?

Ista prior passa est aliis dominantibus ætas,
Exemplumque, scelus quo tuearis, habes.

Crimen inauditum est, pueros laniare tenellos,
Fataque natali jungere mœsta suo.

Inque sinu matrum (ne non mala tanta viderent)
Figere per tenerum grandia tela latus.

Et dubium est, sanguis vel lac de vulnere molli
Fluxerit, hostiles imbueritque manus.

Non Scythia, non Parthus, nec inhospita barbarus
Antra colens, tantum sustinuere nefas. (horrens

Impie, credibile est, quæ te natura sub auras
Fudit, ad aspectus erubuisse tuos.

Natales certè rorarunt sanguine stellæ,
Viperaque ad cunas sibila dira dedit.

Tecta super sonuit ferali carmine bubo,
Nocturnosque ferunt exululasse lupos.

Linaque, quæ pueri velavit nuda recentis
Pectora, de busto mater olente tulit.

Et sanie & spumâ lacrymantem Cerberus albâ
Contigit, & Stygio gurgite merfit anus.

Eumenidesque faces admôrunt : deque colubro
Hæserunt labris toxica pressa tuis.

Et Furiaë torto circum sonuere flagello,
Sulphuraque obscœnis imposuere focis.

Et vitæ seriem filo contexuit atro,
Criminaque innexit de tribus una soror.

Sera rudimentis feritas adolevit ab istis,
Perque gradus crevit vita scelestâ suos.

Nam simul infanti sensim maturuit ætas,
Lapsus & à sexto proximus annus erat :

Non

Non ratio, non ars, radiisque scientia puris
 Adfuit, & menti lumina prima dedit.
 Nec vitæ probitas, nec amor successit honesti,
 Quidquid & æternæ mens bona legis habet.
 Invasit mentem contemptrix ira Deorum,
 Et Venus ante annos prodigiosa suos.
 Fortunæque comes livor, studiumque nocendi,
 Atræque mens fictis ingeniosa dolis.
 Acrior ad cædes violentaque furta Juventus
 Explevit partes viribus aucta suas.
 Lumina volvuntur populos terrentia fastu,
 Quæque potest solas forma decere feras.
 Hinc scelerum torrens longos effusus in annos
 Materiem turpi præbuit historiæ.
 Hæc alios moveant. Pueros ulturus inermes
 Adsit, & ingenio justa det arma dolor.
 Agmina vos læsæ mecum conjungite matres,
 En cadit in casses præda cupita meos.
 Omnibus hoc monstrum calami configere telis
 Convenit : indigno parcere, crimen erit.
 Impie Bethlemias foedasti sanguine cunas,
 Antra nec à telis tuta fuere tuis.
 Quodque nefas fugit nutritum felle Procrustem,
 Quodque Thyestæ vix potuere manus :
 Ausus es, ô ! (vocem sceleris mihi præpedit horror,
 Insolitumque timet lingua referre nefas)
 Ausus es uberibus pueros avellere matrum,
 Et tenerum alliso spargere poste caput :
 Lacteaque obnixis divellere membra lacertis,
 Et prensare cavâ viscera viva manu :
 Imbellesque vagis jactare volucris escas,
 Et dare montanis membra voranda lupis.
 Quæ te non subiit, subiit clementia tigres.
 Credibile est avidas abstinuisse feras.
 Ista tuas tantùm decuerunt fercula lances,
 Poculaque ista tuam sanguinolenta sitim.

218 ELEGIARUM LIBER II.

Et ne causa malis desit sceleratior ausis,
 Sæviit in puerum tota procella Deum.
 Nec te majestas, nec te reverentia cæli
 Movit, & æthereis publica stella minis.
 Quid facis? Unius perdes tot millia fato?
 Eheu! nox quantum sanguinis una bibit!
 Non scissis potuere comis te flectere matres,
 Implicitæ pavidò pignora cara sinu?
 Non ferus ætatem, non molles respicis annos,
 Non movet aspectu candida turba suo?
 Non tua vagitus præcordia barbare rumpunt,
 Quasque parens supplex tendit ad astra manus?
 Quid queror? ex scopulis, ex duro pectora ferro,
 Nîl prece, nîl lacrymis, quo moveantur, habent.
 Instat, & exiles puerorum calcat acervos,
 Et queritur fustum sanguinis esse parum.
 Cogitur invitus crebrò dare vulnera miles,
 Et pudor horrendum sæpè remittit opus.
 Funera, purpureique fluunt per compita rivi,
 Inque domo cædes angulus omnis habet.
 Exanimes passim luctu cecidere parentes,
 Dique Lares vultus occuluere suos.
 Ut niveâ verni ceciderunt arbore flores,
 Aspera quos subitâ grandine læsit hiems:
 Utque recens canâ periit rosa tacta pruinâ,
 Aut violæ, madidi quas quatit aura Noti:
 Sic cecidit primis moriens vagitibus infans.
 Eheu! quas lacrymas mater inulta dedit!
 Infelix Solyma, & mœstæ sine vindice matres,
 Paulisper madidas imbre levate genas.
 Neu gemite æternùm generis dispendia vestri:
 Credite, sublatos vita perennis habet.
 Vallibus Elysiis ludunt, interque vireta
 Ducit inoffensos lactea turba choros.
 Mox etiam cæli tractu meliore recepta
 Fulgebit rutilis æmula sideribus.

Tartara crudelis descendet in ima Tyrannus.

Fœtaque inextincto sulphure stagna colet.

Quique reis tormenta parat justissima Minos,

Illius in pœnas ingeniosus erit.

Hæc quondam : vivus furiis agitabitur idem ,

Perpetuasque feret nox vigilanda minas.

Ante oculos umbræque truces , manesque cruenti

Tendent jactatas ora sub ipsa faces.

Donec fatali rumpens præcordia telo

In loca mors fontem deteriora ferat.

Sistite jam lacrymas. At tu truculente caveto.

Non levis est factis pœna parata tuis.



LIVINI
MEYERI

E' SOCIETATE JESU

ELEGIARUM

LIBER III.

EMINENTISSIMO

AC

REVERENDISSIMO PRINCIPI

S. R. E. CARDINALI

DE ALSATIA DE BOUSSU

ARCHIEPISCOPO

MECHLINIENSI

BELGII PRIMATI, &c. &c.

NEC NON

ILLUSTRISSIMIS AC REVERENDISSIMIS DD.

PROVINCIAE MECHLINIENSIS

EPISCOPIS

LIVINUS MEYERUS S. J.

Multos annos, æternam felicitatem.



Rtem Poëticam, Eminentissime
Princeps, Præsulesque Illustrissi-
mi, non humanâ industriâ inven-
tam, sed divino munere datam, Judæo-
rum pariter ac Gentilium, sacrorum ac
profanorum vatum communis est vox. Et
sacros

sacros illos quidem antiqui Testamenti
 vates constat supremi Numinis laudes
 apud populum Hebræorum, per hymno-
 rum mensuram & numeros, cælesti quâ-
 dam luce perfusos, non humano ingenio
 celebrasse. Hinc succisa illa, planèque
 mirabilis sententiarum sublimitas, verbo-
 rumque majestas; quæ humano spiritu
 altior, Deum clamat auctorem. Profani
 verò Gentilesque Poëtæ, tam Græci quàm
 Latini, cum verum Deum, vel utcum-
 que cognitum non colerent, vel vitio suo
 excæcati ignorarent; tamen Parnassum
 finxerunt super nubium procellas ere-
 ctum, in cujus vertice Musarum mode-
 ratorem ac præsidem Apollinem, hoc est,
 Solem collocarunt; ut ex illo, qui est fons
 luminis & caloris, hausisse se testarentur,
 quidquid in metro consonum, in cogita-
 tionibus vivum, in elocutione sublime &
 splendidum appareret. Adeo Poëtica om-
 nibus semper visa est habere aliquid di-
 vinitatis. Quid, quod hâc arte gesta he-
 roica, ipsæque Regum fortunæ, prælia,
 victoriæ, triumphî, oblivionis eripiantur
 injuriæ, & quâdam immortalitatis luce
 donentur?

Cum

Cum autem Poëtarum ardor splendore rerum accendi maximè & effervesce-
 re soleat ; nescio an umquam materia tam
 copiosa , tamque sublimis oblata vatibus
 fuerit, atque est illa, quæ in Te præsertim,
 Eminentissime Princeps , & in Suffraga-
 neis tuis Episcopis omni ex parte relucet.
 Non enim major à purpura in Vos, quàm
 à Vobis in purpuram splendor redundat.
 Vos estis sub uno in terris Capite Ro-
 mano Pontifice, Hierarchiæ Ecclesiasticæ
 supremi Ordinis Sacerdotes , Pastores
 gregis Dominici, luporum debellatores,
 custodes fidei, morum doctores, tutores
 pauperum , Successores Apostolorum.
 Vos estis Conciliorum generalium (quo-
 rum auctoritas non solum loci , verùm
 etiam sententiarum inter diffitos unitate
 pensanda est) Spiritûs Sancti organa ,
 Petri convocantis & confirmantis aucto-
 ritate animata. Vos estis columnæ Ec-
 clesiæ , fundatæ super Petram illam im-
 mobilem, ad quam omnis hætenus Schis-
 matis & Hæreseos procella allisa detu-
 muit.

Præclarissimi hi honoris , dignitatis,
 ac

ac potestatis tituli , quamvis omnibus Romano Capiti conjunctis Episcopis in commune conveniant : in Vobis tamen , his periculosis temporibus , peculiari de Ecclesia militante meritorum gloriâ , sublimiori fastigio emicant. Habet quidem Ecclesia Gallicana Eminentissimos Cardinales , Archiepiscopos , omnesque ferè regni istius Episcopos , strenuissimos hodie fidei defensores ; sed & habet Gallia poëtas , qui suorum gesta Præsulum fertiliori venâ consecrent æternitati. Proposito meo satis est , si meorum , qui Belga sum , Episcoporum celebrem utcumque memoriam. Nam si exterorum mihi quoque relatæ de refractariis palmæ forent commemorandæ , Clementis præsertim Colonienfis & Leodiensis , nec non Trevirensis Ecclesiæ , Antistitum gesta præclarissima facerent , ut hoc tenue opusculum in volumen excresceret. Cum ergo , præter hos , ceteri ferè per orbem Episcopi altâ & securâ fidei & obedientiæ inter suos pace gaudentes , extra luctæ arenam sint positi : Vos , Ecclesiæ Belgicæ Antistites , gloriosa ad-

versus

versus rebelles Pontifici & Ecclesiæ (filios dicam, an hostes?) exercent certamina. Illi portus tranquillitate fruuntur : Vos tempestate jactamini. Illi ad sarcinas sedent : Vos dimicatis. Illi victoribus gratulantur : Vos reportatis victoriam. Vestra etenim per pericula magnanimitas ; per labores fortitudo ; per contagia, quæ à commisso Vobis grege depellitis, vigilantia ; per schismata, quorum progressum impeditis, charitas ; per hæreses, quas extinguitis, fides ; per morum denique corruptelam, quam verbo & exemplo tollitis, ardor pectoris vestri Apostolicus, semperque indefessus apparet. Habuit quidem quovis tempore Belgium hoc nostrum Antistites præstantissimos, Creusios, Malderos, Torrentios, Cunêros, Strienos, Lindanos, Rithovios, Humbertos, aliosque eruditionis & virtutis famâ conspicuos : sed (absit veritati invidia) numquam habuit, qui majori inter se charitate conjuncti, ferventiori doctrinæ catholicæ defendendæ ardore succensi, arctiori cum Apostolica Sede religionis vinculo fuerint colligati.

Te præsertim , Eminentissime Princeps , qui inter ceteros Cardinalitiâ & Archiepiscopali emines dignitate , non tantum Belgium hoc nostrum , sed Roma , sed Vienna , Pontifex & Imperator , velut avitæ fidei & religionis columen & suspicit , & paterno affectu complectitur. Indoli tuæ innata cum gravitate comitas , morum vitæque per omnes virtutis gradus integritas , profunditas doctrinæ theologicæ , qua Doctorem pridem lauream meruisti atque adeptus es , Apostolicam pariter & Imperatoriam aulam in admirationem , laudem & approbationem rapuit. Hujus luce & soliditate doctrinæ omnes refractoriorum cavillos confutasti , fallacias detexisti , schismaticæ & hæreticæ doctrinæ , jam mundi manu damnatæ , venenum voce & stylo dissipasti , mendaces criminationes refellisti. Quis Te in concipiendis rebus acutior , prudentior in dirigendis , in exequendis constantior ? Curæ tuæ , etiam cum detrimento valetudinis indefessæ , fructus , quem boni omnes ardentè expectarunt , optatissimus respondet , perfecta Sacerdotium

dotium inter & Imperium harmonia atque concordia : sine qua nec dyscoli corrigi, nec errantes reduci, nec rebelles comprimi, nec morum & fidei integritas illibata servari potest. Quid vicinæ nobis Galliæ, tanto tempore, tantâ quorundam pertinaciâ turbatæ atque vexatæ, spem tandem duraturæ pacis & publicæ tranquillitatis restituit ? Nihil profectò aliud, nisi Romani Pontificis, ipsique adhærentium Episcoporum, regali brachio & decreto defensa & sustentata auctoritas. Quod toti Galliæ Rex Christianissimus, hoc Belgio totique Imperio, suadente Te atque movente, præstat religiosissimus Imperator noster Carolus.

Hæc tua præclarissima, Eminentissime Princeps, nec non Suffraganeorum tuorum, quorum tam gloriosè causam egisti, merita attentè considerans, exarso, fateor, ut ea poëtico quodam opusculo exponerem, & posterorum utcumque memoriæ commendarem. Et quamvis non ignorem, pondus hoc ingens, quod Maronem requireret, vires meas per se tenues, & ætatis incommodis fractas, im-

mensa gravitate excedere, censui tamen
 fatius esse tentare aliquid, quàm tacere;
 cum minùs noceat impolita narratio,
 quàm mutum de summis rebus silentium.
 Atque illud præterea in Musas meas com-
 modum redundabit, ut, quæ per se lan-
 guidæ sunt & obscuræ, ab ipsa, quam
 tractant, materia vigorem splendorem-
 que accipiant. Denique benignitas vestra
 atque humanitas, quâ affectum magis
 quàm oblatae rei pretium ponderatis, fa-
 ciet, ut hoc dedicatum Nomini vestro
 opusculum, in debitæ erga Vos meæ
 observantiæ & venerationis testimonium
 benevolè suscipiatis; gratum utique pro-
 batumque futurum lectoribus ceteris, si
 id Vobis non displicuisse constiterit.
 Meum postremò & Belgii totius votum
 commune adjicio, ut ad defensionem
 Ecclesiæ suæ, ad ovium Vobis commis-
 sarum salutem, ad schismatis & hæreseos
 extirpationem, & ad meritorum & glo-
 riæ vestræ incrementum, Deus Vos diu
 fospitet, atque conservet.

ELEGIA PROOEMIALIS

Ad Sanctissimum Dominum Nostrum

INNOCENTIUM XIII.

COMMUNIBUS OMNIUM SUFFRAGIIS
ELECTUM

SUMMUM PONTIFICEM.

MUſa triumphales Pindi de vertice lauros
 Collige, & ornatas indue flore comas.
 Quæque humili lätitare ſoles Heliconis in umbra,
 Ardua nunc montis, Diva, cacumen adi:
 Et cane quod primus, quodque ultimus audiat orbis,
 Nullaque ſit vocis neſcia terra tuæ.
 Et quæcumque ſuis illuſtrat curribus oras
 Cynthius, huc volucres fama ſequatur equos.
 Nuntia venerunt Latio gratiſſima : qualem
 Anxia Pontificem terra petivit, habet.
 Muſa Virum, quo non meritis ſublimior alter,
 Et cithara & cantu tollere in aſtra decet.
 Omnia ſi revoces heroum tempora ; numquam
 Carmine materies dignior ulla fuit.
 Fortè rogas ſeriem geſtarum & pondera rerum ?
 Accipe quæ memori ſingula mente notes.
 Pauca quidem referam (quis enim quot ſidera cælum
 Dicat, vel quot aves frondibus Ida tegat ?)
 Ille Patrum votis (neque calculus abſuit unus)
 Par humeris, quamvis grande, ſubivit onus.
 An potuit cæli manifeſtius eſſe probantis
 Indicium ? Superùm vertitur urna manu.
 Corda movet Numen : nihil huc caſuſve favorve
 Contulit : hoc dextræ eſt cuncta regentis opus.
 Ille (nec hoc mirum) Gallis & gratus Iberis
 Obtigit, & votis Carole Sexte tuis.

230 ELEGIARUM LIBER III.

Nota viri facit hoc prudentia, quemque paterno
 Omnibus æqualem pectore spondet, amor.

Hoc facit & virtus, & nostro rarus in ævo
 Candor, ab antiquis quem trahit ortus avis;

Ingeniique vigor, rebusque scientia gestis

Inclita, cui norunt secula rara parem.

Quique animi dotes longè super eminent omnes,
 Tutandæ facit hoc religionis amor.

Hoc decus (Italiæ proprium) quàm Tartarus ipse
 Auferat, ante polo fidera lapsa cadent.

Nequidquam sibi Pontificis nova Secta favorem
 Spondet : ab hoc vulnus sentiet illa novum.

Pontificum memor ille tuebitur acta priorum.

Roma suis hostis legibus esse nequit.

Damnatos toties victoria proteret hostes,

Ibit & ad Batavos perfida turba lacus.

Illic omne suum, quo turget, rupta venenum

Fundet, & errantis pars erit una gregis.

Ecce novum sensit jam vulnus Epistola : septem

Horruit audaces * Romaque, Rexque manus.

Schismatis hanc nigro damnavit felle madentem

Aufoniâ qui nunc culmen in arce tenet.

Neve (tenax moris) Romam contemnat ; in illam

Regalis stricto sæviit ense manus.

Galliaque effrenos paucorum exosa tumultus,

Pontifici, juncto fulmine, spondet opem.

Fulmen habent aquilæ, Jovis Imperiique ministræ,

Illæ etiam rostro, pectore, & ungue valent.

Carolus his Cæsar Romanam proteget arcem.

Vindice sic gemino est tuta futura fides.

Hactenus

* Non sine gravi animi horrore delata sunt in manus nostras Gallicano-
 rum quorundam Episcoporum Schismatica prorsus litteræ, in felle amaritudi-
 nis, subscriptis etiam Auctorum nominibus, exarata ; in quibus Antecessoris
 Nostri Fama & Memoria semper æternis laudibus digna, proscinditur ; Apostolica
 Constitutio calumniosè traducitur, utraque Potestas impudenter contemnitur,
 atque hæretico Spiritu Divina omnia & humana miscentur. Innocentius XIII.
 Brevi ad Ludovicum XV. dato 1722. die 24. Martii.

Hactenus Imperii defensa potentibus armis
 Religio quovis fortior hoste stetit.
 Sancte Pater, stabili junges tibi foedere Reges.
 Ille sacri fructus primus honoris erit.
 Jure igitur tanto tellus Pastore superbit,
 Signaque lætitiæ dat manifesta suæ.
 Jure suis columen Reges accedere regnis
 Gaudent : nec falsæ spe capiuntur opis.
 Præcipuè tu, Roma, tuo grataris alumno,
 Unde trahit priscâ nobilitate genus.
 Namque decem septemq; domus per secula, clarum
 Orta Ducum pridem sanguine nomen habet.
 Purpureosque Patres centum dedit : ima nepotum
 A summis series si numeretur avis.
 Sanguine quin etiam Christi pro nomine fuso,
 Sæviit in sacrum Barbara sica genus.
 Eustachiumque pius decorat cruor : illius aras
 Martyribus digno mundus honore colit.
 Adde quod (antiquæ quæ summa est gloria gentis)
 Tres numeret stirps hæc Pontificesque decem.
 In quibus est, cui rara dedit sapientia Magni
 Nomen : & hunc titulum Græcia tota probat.
 Illa viri famam solita est celebrare quotannis,
 Et sequitur ritum, terra Latina, tuum.
 Gregoriumque colit gemino plaga subdita Soli,
 Qui rutilâ nostras audit ab arce preces.
 Quantus honor generi ! cujus notissima tantum
 Arguitur pietas promeruisse decus.
 Nil igitur mirum, si sanguine cretus ab illo
 Per sanctæ titulos hic quoque gentis eat.
 Scilicet à proavûm quæ surgit origine virtus,
 Radicem similis posteritatis habet.
 Aspice, feminibus quam vim natura Deusque
 Indidit, in plantis arboribusque manet.
 Perpetuam generis conservant omnia formam,
 Nec variant, longâ degenerantque die.

Non fragilis corylus ædri de semine surgit,
 Non viret æsculeâ laurus odora comâ.
 Nec sibi dissimiles pariunt animalia foetus.
 Virtutem propriæ singula stirpis habent.
 Hac generant aquilas aquilæ, lea foeta leones,
 Hac patriæ simili pisce natantur aquæ.
 Nascitur hac ab equo generosus præpete pullus,
 Jamque tener palmæ tentat amore rapi.
 Vix stat, & impatiens summas pede turbat arenas,
 Areaque hinnitu pulverulenta sonat.
 Vis eadem est animis : animorum semina mores.
 Rarò dissimiles ; natus hic, ille pater.
 Sive quod in sobolem probitas cum sanguine transit,
 Et mens temperiem corporis ipsa trahit:
 Sive quod exemplum, præclaraque facta parentum
 Ad similes nifus non leve calcar habent.
 Sancte Pater, mundique caput, tibi splendor avitus
 Jam pridem summi stravit honoris iter.
 Trita patrum firmo sequeris vestigia passu,
 Parsque sit ut generis nulla caduca, caves.
 Utque in te virtus, pietasque redundat avorum,
 Sic ad avos à te mutua fama redit.
 Inclyta portendunt dudum hoc insignia ; quorum
 Sæpiùs augurio scire futura licet.
 Namque locum scuti medium regina volûcrum
 Quæ tenet, hæc vera est mentis imago tuæ.
 Nubila transcendunt aquilæ suprema, tenentque
 Solis in oppositum lumina fixa jubar.
 Parva mora est ; veniat nidis implumibus ætas,
 Et vigor in teneros ille paternus eat:
 Mox etiam pullos, imâ regione relictâ,
 Æmula per liquidum penna levabit iter.
 Fixa nec ardescens hebetabit lumina Phœbus,
 Ille licet pulsâ nube serenus eat.
 Mens aquilæ similis : mentis præconia scutum
 Exprimit, ardores assimilatque tuos.

Quippe

Quippe pari sequeris nifu quo fama tuorum
 Se levat, & spreta sidera tangis humo.
 Neve tuam vincat majorum gloria, Sedem
 Terrarum primam, quam tenuère, tenes.
 Unde vagum spectans septem de montibus orbem,
 Cuncta vides humeris inferiora tuis.
 Nam neque par cuiquam cælo concessa potestas,
 Alter & huic quivis cedere debet honor.
 Gloria magna quidem est, ingensq; potentia Regum,
 At tua plus scepro mitra decoris habet.
 Terrenum Rex imperium, perituraque regna
 Possidet: æternum est quod tua dextra regit.
 Ille habet à proavis; tu Christo à Principe regnum.
 Nec fors, ambiguum est, hæc sit, an illa prior.
 Hunc populi procereſque colunt: tibi subditur ipse,
 Oscula nec pedibus regia ferre negat.
 Illius est certo finitum limite regnum:
 At tibi subjectum est solis utrumque latus.
 Terrendo premit hic hostes: tu vincis amando.
 Palma illi dubia est, quæ tibi certa venit.
 Cumque hic præſentis spectet bona publica vitæ,
 Exitus est curæ vita futura tuæ.
 Denique (quo titulo non est tibi carior alter)
 Hunc populus Regem; te vocat ille Patrem.
 Nomine quo nec habet tellus, nec regia cæli
 Dulcius: hoc homines, hoc superosque trahit.
 Summe parens rerum, tuque ô qui morte redemptas
 Nunc etiam proprio sanguine pascis oves,
 Quique gubernator præſenti Numine navem,
 Fortunam mundi quæ vehit una, regis;
 Fac precor, in vasto sub te qui gurgite clavum
 Dirigit, ad portum te duce tutus eat.
 Promissisque tuis, scopulis licet undique septum;
 Nulla procelloſo turbine vincat hiems.
 Utque mare & venti, ne Petri cymba periret,
 Imperio fluctus composuère tuo;

234 ELEGIARUM LIBER III.

Sic ratis hæc ingens, cymbâque capacior illâ,
Aspera securum per freta currat iter.

Felices quos sacra vehit per turbida pinus
Æquora ! naufragii pars caret illa metu.

At quoscumque sinu non accipit illa, peribunt,
Lassaque merfuris colla prementur aquis.

O utinam qui nunc ventis jactantur & undis,
Complexi fragilis naufraga membra ratis,

Fortia Romanæ redeant ad texta carinæ,
Victores pelagi, cum pelagoque sui.

O cæcas hominum mentes ! quo gurgite remos
Ducitis, hoc periit quæque carina vado.

Credite, quo nunc vela datis, mare portubus orbū est,
Anchoraque instabilem non tenet ulla ratem.

Et tamen est aliquis, Christi qui corpore sectus
Damnati membrum verticis esse cupit ?

Si revocare libet seclorum exacta priorum

Tempora ; quot Sectæ, si numerentur, erant ?

Errorum periêre duces : quorum impia restant

Nomina, nunc odio pectora nostra movent.

Quis non Nestorium ? quis non horrescit Arium ?

Maxima quos olim turba secuta fuit.

Tempore detegitur latitans sub imagine veri

Error : nulla diu fallere larva potest.

Quæ male fundata est, valido domus icta recumbit

Turbine : fors eadem schismatis esse solet.

Exemplo veterum, simili nova Secta ruinâ

Concidet, atque horror posteritatis erit.

Durabit tua, Roma, fides, dum secula finem

Accipient : premere hanc nulla ruina potest.

Hanc non Tartaræ poterunt subvertere portæ :

Vox Domini est : Domini vox rata semper erit.

ELEGIA II.

Ad Eminentissimum ac Reverendissimum Domi-
num, D. THOMAM PHILIPPUM DE ALSATIA,
de Bouffu S. R. E. Cardinalem, Archiepiscopum
Mechliniensem, Belgii Primatem, Augustissimo
Cæsari à Consiliis intimum, &c. &c.

*Cum Romam è Belgio ad eligendum Pontificem,
proficisceretur.*

ERgo iterum Romam properas? nec terret euntē
Asperitas tantæ bis tibi trita viæ?
Hei mihi, securâ patriæ statione relictâ,
Impendent capiti quanta pericla tuo!
Nam si vel tellure paras, vel currere ponto:
Multa tibi terræ, multa minantur aquæ.
Durum iter, aërias angustis faucibus alpes
Scandere, quo pavidis vix licet ire feris.
Unde per abruptum tendunt in Tartara valles,
Imaque torrentis vortice saxa sonant.
Illic ex strepitu credas Ixiona plecti,
Nexaque stridentem volvere membra rotam.
Quid, cum vere nives liquefactis montibus Auster
Solvit, & extemplo rura propinqua natant?
Sæpe viatorem vis turbida gurgitis aufert,
Per fata cum subitis volvitur amnis aquis.
Vicino fluit ille mari nova piscibus esca,
Et miserum tumuli funus honore caret.
Aut si terra placet minùs, & juvat ire per altum,
Atque Italos portus per freta longa sequi;
Non leviora feret tellure pericula pontus.
Semper habent dubiam ventus & unda fidem.
Non mare Tyrrhenum tutâ rate finditur, in quo
Barbara plus scopulis vela timoris habent.

Ut-

Utque nihil noceant ferientes vela procellæ,
 Adjuvet & cursus utilis aura tuos,
 Tuniacæ celeres remo ventoque carinæ
 Ad prædas avidæ nocte dieque volant.
 Si qua procul terrâ deserto litore puppis
 Fertur, in hostiles incidit illa rates.
 Ac velut accipiter timidam per inane columbam
 Urget, & ungue ferox, qua fugit illa, premit:
 Haud aliter tensis velorum fervidus alis
 Imminet, & captos per freta raptor agit.
 Africaque immiti venientes carcere claudit,
 Dum nova sub domini jura ferocis eant.
 Nam velut hic tauros pretio mercatur arator,
 Corpora sic illic vendere nostra solent.
 Quocumque aspicias, timor est terræque, marique:
 Nec mare, nec tutam dat tibi terra viam.
 Quid tibi cum pelago? quid hiantes rupibus alpes
 Scandere, & infidum carpere cogit iter?
 Si te nulla tui, moveat te cura tuorum,
 Mœrentem Pastor respiciasque gregem.
 Te properante timent orbi, quos deseris, agni
 Infestent avidi ne tua septa lupi.
 Non tua balatus teneri præcordia tangunt?
 Quo vetus oblito corde recessit amor?
 Te coram timor omnis abest: præsepia tuti
 Linquunt, & latè pascua læta tenent.
 Quid queror ah demens? nec enim tutela, fidesque,
 Deque tuo patrius pectore cessit amor.
 At pia causa jubet discedere, teque relictas
 Tutorum curæ credere cogit oves.
 Et bene provisum est: valido præsepia vallo,
 Grexque tuus triplici vindice tutus erit.
 Illis pectus inest, geminique peritia juris,
 Curaque quam fures, quam timeantque lupi.
 Pabula lethali si quis miscere cicutâ
 Audeat, à stabulis ille repulsus erit.

Absens hos illis animos dabis, atque superstes
 Ille tuus vindex in tribus ardor erit.

I Pater, i sospes : saluum te conscius æther
 Ardua cælesti per juga ducet ope.

Vaticinor : nîl saxa tibi prærupta nocebunt.

Causa viæ felix scilicet omen habet.

Oppida te studium nec enim peregrina videndi

Impulit : hæc sacro pectore cura minor.

Et quidquid Latium, quidquid Germania dignum

Galliaque, aspectus quo teneatur, habet ;

Olim visa tibi, lustrataque cuncta fuerunt,

Cum rerum nulla mole gravatus eras.

Non adeo levis ex humeris modo sarcina pendet,

Ut tibi spectandi nota recurrat amor.

Ire cupit Cæsar : satis est tibi sacra voluntas

Principis, ut promptus quolibet ire pares.

Iusta tamen Carolum ratio permovit, & inter

Imperii curas non levis una fuit,

Dignus ut Ausoniæ Sedi succederet heres,

Qui sacer Albani morte vacabat honor.

Nam velut ipse tenet terræ moderator habenas,

Cæsare nec quidquam grandius orbis habet ;

Sic gaudet, triplicem capiet qui fronte tiaram,

In sacris summum rebus habere locum.

Et sanctas animis cupit hunc præscribere leges,

Quas pius exemplo pondus habere facit.

Quasque cupit Belgas pariter servare : rebellis

Ut tibi, sic Romæ, nullus inultus erit.

Quippe fides sceptrique decor servatur, amicam

Cum sibi dant Reges Pontificesque manum.

Fœdere quo rupto nutat pars utraque ; cujus

A stabili pendet mutua pace salus.

Jure igitur tantis sit par ut honoribus optat,

Æqualique gregem Pastor amore regat ;

Utque Dei cultum vindex moderetur & aras,

Pascuaque errantes ad sua ducat oves.

Nam

238 ELEGIARUM LIBER III.

Nam Deus huic morum arbitrium fideiq; supremū
 Contulit. Imperii Rex tueatur opes.
 Hunc penes est regni & legum tutela suarum,
 Quā sibi subiectos pace, vel ense tegit.
 Hujus opus, stricto compescere Schismata ferro.
 Non alio referet majus ab hoste decus.
 Hæc igitur causa est, tua cur suffragia Cæsar
 Postulet, & Latium carpere cogat iter.
 Di tibi sint comites ! & erunt, si numina nostras
 Mitia respiciant, accipiantque preces.
 Ergo ubi purpureos inter numerabere Patres,
 Atque electuri pars eris una chori,
 Cæsaris ut faveat tua fac sententia votis,
 Dignus ut accipiat quod vacat orbis onus.
 Affectusque nihil, privataque gratia prosit :
 Sic fuerit jussæ causa peracta viæ.
 Sic totus Pastore novo lætabitur orbis,
 Electo nec quem præferat, alter erit.
 Grata erit Austriacæ tua sic prudentia menti,
 Quæ tua jam pridem facta probare solet.
 Denique (sollicitis quæ spes est maxima Belgis)
 Sic citò te reducem nostra videbit humus.

ELEGIA III.

Ad eundem Eminentissimum,

Postquam Romam incolumis, secus quam falsus quorundam in Belgio rumor vulgaverat, pervenisset.

CÆlitibus meritos Belgæ referamus honores,
 Solemnes hæc est inter habenda dies.
 Flava Sacerdotes plenis date thura canistris,
 Sparsaque dissimili flore nitescat humus.
 Nube vacet cælum : sparsurus candida Titan
 Lumina, rorantes æquore tollat equos.

Vos

Vos quoque discordes mala tollite jurgia : clausas
Litibus opponat curia furda fores.

Luce sacra solis fas sit cantare poëtis.

Nunc nitidas lauro cinge, Thalia, comas.

Alsatius Latias sospes penetravit ad oras,

Asperitas longæ nil nocuitque viæ.

Nuntiat hoc Româ quæ vênit epistola : quâ non

Indicium nobis certius esse potest.

Audivêre preces mitissima numina nostras,

Votaque successu non caruêre suo.

Credibile est ipsos stravisse cacumina montes,

Et faciles, clivo non remorante, vias.

Nullaque nix lapsa est, nec iniquo vortice torrens

Obfuit : arentem præbuit ille sinum.

Italides Nymphæ tibi ripas flore coronent,

Nectare pro liquidis rivus abundet aquis.

Hæc & plura precor tibi mansuetissime torrens.

Trux aliis : domino semper amicus eas.

Alsatius per te Tyberina palatia tutus

Attigit : incolumem terra petita tenet.

Roma videt, gaudetque olim quem fovit alumnum

Purpureos inter nomen habere Patres,

Et sua cum sancto suffragia jungere cœtu :

Quæ pia suscepti causa laboris erat.

At mala multa, precor, veniant tibi pessime rumor,

Turbasti vano qui mea corda metu.

Crediderim missum nigris Acherontis ab undis

Fallere mendaci nos voluisse dolo.

Invidiamque suo linguam tetigisse veneno

Suspitor : optatis pascitur illa malis.

Illa solet spectare oculis bona nostra malignis,

Illa tibi fraudis prompta ministra fuit.

Improbe finxisti, versi sub pondere currûs

Alsatium longâ procubuisse morâ ;

Exanimique diu similem jacuisse, nec ulla

Pallentem vitæ signa dedisse suæ ;

Saxaque nutanti reptasse per aspera gressu,
Sanguine turbatas & riguisse comas.

Anxia res amor est : subito trepidamus amantes,
Vanaque , quæ miseros terreat , umbra sat est.

Certè ego cum fueram famâ percussus inani,
Frigore persens membra tremante quati.

Utque idem tetigit Belgarum pectora rumor,
Omnibus in vultu signa doloris erant.

Protinus ante sacras Divorum volvimur aras,
Votaque , te salvo , nostra fuere mori.

Quisque tibi propriæ transcribere tempora vitæ,
Quisque sua voluit te superesse nece.

Quid sumus (ô miseri !) nisi pondus inutile terræ ?
Morte nihil nostrâ , cur fleat ullus , erit.

Indecores nos urna teget : tibi grande merenti
Nomen ab exequiis postera fama dabit.

Dî modò dent annos , spaciumque laboribus am-
Et veniat tardo cana senecta gradu. (plum,

Funere si Belgis mors te rapuisset amara,
Omnis spes tecum nostra sepulta foret.

Hoc est cur subitus trepidos turbaverit index :
Ex magno vires fumit amore timor.

At vanus postquam nobis est cognitus error,
Gaudia sublato sunt geminata metu.

Nec mora , lætitiæ testis super æthera clamor
Tollitur , atque hilari compita voce sonant.

Publica in auctores falsi convertitur ira,
Devovet hos meritis femina virque malis.

Ergo aliquis famâ felix fuit error in illa ;
Hæc facit ut pateat , qui latuisset , amor.

Scilicet affectus taciti produntur acerbis
Casibus , atque animos ipsa pericla probant.

Quod tua , Nise , fides longo memoretur in ævo,
Euryalus Rutulo captus ab hoste facit.

Victima Dianæ si non traheretur Orestes,
Testatus Pyladis non satis esset amor.

Nec

ELEGIARUM LIBER III. 241

Nec vivum nosset Rhadamanthus Thesea, si non
 Pirithous Stygias primus adisset aquas.
 Effice ne reducem vexet Neptunus Ulysses,
 Penelopeque nihil, cur referatur, erit.
 Nunc postquam patuit per dura pericula virtus,
 Æternum memori nomen ab orbe ferunt.
 O decus Alsacidum! quo sospite Belgica tellus
 Alterius nullam tuta requirit opem:
 Vindice quo sine labe fides Romanâ vigeat,
 Castaque sacrilegas respuet ara manus:
 Non minùs est pietas in te laudanda tuorum,
 Quam fuit antiqui temporis illa fides.
 Aspera fors, certò sed cognita, terruit illos:
 Nos levis, & dubii perculit umbra mali.
 Pro sociis voluere mori: nos perdere vitam,
 Si liceat, pro te, ducimus esse nihil.
 Junxerat hos tantum fraterni foedus amoris:
 Tu veri titulum jure parentis habes.
 Fama vetus cedat, taceant præconia vatum:
 Par aliquid prisca tempora nostra ferunt.
 Pectora natorum natura potentiùs urit,
 Alter & est illo quilibet igne minor.
 O tantum incolumem nobis te Roma reservet,
 Urbisq; reversuro tacta sit illa pede.
 Et tibi ne noceat Latii vis sicca caloris,
 Frigidaque ardentem temperet aura diem.
 Donec & Italiae regione moraberis, omni
 Corporis atque animi parte dolore vaces.
 Addimus & votis solenne prioribus unum,
 Pars sit ut incepti nulla caduca tui.
 Dumque suum capient Romana negotia finem,
 Dent reduci tutam sidera prona viam.

ELEGIA IV.

Ad eundem Eminentissimum,

*Cui à Romano & Viennensi itinere felicem & gloriosum
in Belgium reditum Musa gratulatur.*

BElgiacas tandem remeasti sospes ad oras,
Grataque finiti meta laboris adest.
Quis curas, curisque datos numerabit honores,
Et quæ Cæsarei signa favoris habes?
Non si centenis resonet vox ferrea linguis,
Oraque sint totidem multiplicata mihi,
Omnia complectar tua quæ præconia virtus
Postulat : infirmum fulgor onusque gravant.
Dignus es ut redeant priscorum tempora vatum,
Qui tua victuro carmine gesta canant.
Nunc paucis doctæ pandunt Heliconæ sorores,
Pegasus & parcas fundit avarus aquas.
Ille vigor veterum nostro moriturus in ævo,
Indicium mundi deficientis habet.
Et mihi jam raris albescunt tempora canis,
Meta procul vitæ nec fugientis abest.
Quid volui senio demens imponere tantum
Ponderis? hoc juvenum pectora poscit onus.
Sæpe rudi cithara magni tenuantur honores,
Musaque materiâ debilitante jacet.
Sed tamen ut cæso placantur numina tauro,
Victima, sic gaudent, si minor agna cadat.
Hoc facit, ut (quamvis meritorum fama tuorum
Terreat, Icarîæ me moneatque viæ)
Ferre tamen timidos tentem super ardua gressus
Culmina : terrorem qui facis, ipse levas.
More Dei minimo caperis sublimis honore,
Donaque, si desint grandia, parva placent.

Phœbe dabis vati vires in carmina; quamvis
 Parva per immensas vela ferentur aquas.
 Non ego prima tuæ revocabo exordia gentis,
 Nota satis titulis est domus ista suis.
 Notior est meritis, quæ nulla nepotibus ætas
 Occulet, Alsatia dum fata stirpis erunt.
 Quod mare Bouffuvios, quæ terra novissima nescit?
 Victrices tellus sensit, & unda manus.
 Hostibus ereptæ commendant bella tuorum
 Exuviae (heroum nomina fama tenet)
 Flandria testis adhuc; spolio decorata 1. Leonis,
 Transtulit in scutum munera vestra suum.
 Bruga tenet, vestrique colit monumenta laboris,
 Sacraque divini dona 2. cruoris habet.
 Ipse tuus genitor pressæ succurrat ut urbi,
 Perrupto mediis hoste 3. natavit aquis.
 Ipse algens madidos tulit intra mœnia gressus,
 (Turbidus hiberno tempore Scaldis erat,
 Scaldis aquâ celer, & cinctæ conterminus urbi)
 Non aliud rupto ponte patebat iter.
 Quid patriæ non audet amor? lethalis aduffit
 Ossa vapor, medicâ non superandus ope.
 Magna quidem data sunt virtuti præmia tantæ,
 Fortiaque auratum pectora vellus obit.
 Non tamen est animus proavorum illustria facta
 Dicere: materies tu mihi solus eris.
 Bella illi, partosque inimicâ clade triumphos,
 Vallaque prensâ manu, signaque fixa canant.
 Justiùs hoc reduci tibi nos gratamur ovantes,
 Quo cedunt armis arma profana sacris.

Q 2

Fal-

1. Philippus Alsatius, victo occisoque Albania rege, Leonis insignia, reportata victoriæ spoliū in Flandria scutum retulit.

2. Theodoricus Alsatius, Flandria Comes, quater ad Syria bellum profectus; relatum inde sacrum Christi Domini cruorem Brugensibus dono dedit.

3. Pater Eminentissimi, obsessa à Gallis Aldenardâ, perruptis castris hostilibus, Scaldim fluvium rapidissimum hiemali tempore natando trajiciens penetravit in urbem, contractisque frigore nervis, lentâ dein & gloriosâ morte pro patria defensione occubuit.

Fallor? an antevolat victrices Fama quadrigas,
Gestaque cælesti prælia marte canit?

Sic est : Roma tibi defert cum Cæsare palmam,
Et cladem fidei publicus hostis habet.

Ille palam solitus Latias contemnere leges
Impia mandato Cæsaris ora premet.

Spargere sacrilegos jam desinet ille libellos,
Pœnarum calamos excutiente metu.

Quippe ligant vulgata, foroque in utroque recepta
Dogmata : vis illis major inesse nequit.

Ergo etiam occultum legis Deus arguet hostem.
Quid refert, perdas clamne, palamne fidem?

Non minùs æternum stabis reus ante tribunal,
Arcanique Deus criminis ultor erit.

Cetera prætereo palmæ monumenta relatæ,
Quorum pars potior, vate silente, patet.

Roma quidem doluit, teque urbe invita remisit,
Difficilique tuam tempore sensit opem.

Et cuperet, si non absens magis utilis esses,
Purpureos inter te retinere Patres.

Sic tua ipectata est dubiis prudentia rebus,
Et vigil ad quodvis mens tibi semper opus.

I tamen, i, dixit : nostro Carolique favore
Victor eris : cladem Styx gemet ima suam.

Eventu patuère suo præfagia : cælum
Non potuit causæ nolle favere tuæ.

Penè tamen lentum tellus te nostra vocavit,
Utraque cum longas texeret aula moras.

Da veniam, verbo si quid peccavimus isto.

Suasit amor : non est, qui patienter amet.
Ignaros latuit moles immensa laborum,

Curaque quæ noctes, quæ rapuitque dies.
Nempe laceffitus vaftris tot ab hostibus, & qui

Tela retorqueres omnia, solus eras.

Omnia sic Danaum Troianis agmina quondam
Moenibus Hectoreâ pulsa fuère manu.

At bene lenivit fastidia temporis æther;
 Dextro perfectis Numine rebus ades.
 Orba diu Patrem quæ suspiravit ademptum,
 Belgica te posito læta dolore videt.
 Quàque licet, pressis animi complectitur ulnis,
 Et lacrymæ taciti pignus amoris eunt.
 O quoties venerata piis altaria votis,
 Cælestem pro te sollicitavit opem!
 Et timuit, præceps ne dum rota volvitur altis
 Montibus, abreptos vinceret axis equos:
 Fervidus aut torrens, nive dum pluviâque redundat,
 Spumantem lato clauderet amne viam:
 Neve alius turbaret iter lævo omine casus,
 Qualia sollicitus plurima fingit amor.
 Nec vanus timor ille fuit: præcordia febris
 Intima septenos uffit anhela dies.
 Sectaque nîl morbi lenivit vena furorem;
 Heu nihil in medicâ, quod juvet, arte fuit.
 Prima salutiferi Mechlinia causa vigoris
 Creditur, & pressi causa fuisse mali.
 Namque urbs tota (tui quamvis erat inscia morbi)
 Ante sacros visa est procubuisse focos.
 Et populus supplex onerabat sidera votis
 Illo, quo pulsa est febris amara, die.
 Plenaque vix densam capiebant atria turbam.
 Tantus in accensis civibus ardor erat.
 At prior hac potiorque fuit tibi causa salutis
 Divus ab ætheria visus adesse domo.
 Ille sibi 4. factum ferventi pectore votum
 Respexit, medicas applicuitque manus.
 Visque mali subitò, rapidusque relanguit ardor,
 Tertiaque à voto lux sine febre fuit.
 Qui rumor nostras postquam penetravit ad oras,
 Motaque prodigio corda fuere novo,

Q 3

Pro-

4. Quo die Eminentissimum Arimini febris deseruit, illo ipso, preces publicæ pro ejus in oluminate Mechlinia fuerunt indictæ, voto prius ab ægrotante S. F. Xaverio facto.

246 ELEGIARUM LIBER III.

Protinus ꝑ. ante tuas, Xaveri, sternimur aras,
 Et damus in sanctos debita thura focos.
 Totaque agit meritas Divo Mechlinia grates,
 Et pia pro salvo vota parente facit.
 Utque brevi reducem liceat spectare, precatur,
 Constantique Deus te tueatur ope.
 Gratia cœlitibus ! tua nunc præsentia Belgis
 Compensat longæ damna priora moræ.
 Et quantum trepidos movêre pericula, tantum
 Lætitiæ, cum jam præteriêre, ferunt.
 Anxia sic sponso lætatur sponsa recepto,
 Dum procul Eoo sospes ab orbe redit.
 Nautaque detecto sic gaudet fidere, postquam
 Jactavit dubiam cæca procella ratem.
 Nec nati minùs ex acie sine vulnere salvum
 Finito gaudent marte redire patrem.
 His patet exemplis quantum tibi Belgica tellus
 Debeat, & titulos hinc tot amoris habet.
 Namque idem es Sidusque tuis, Sponsusq; , Paterq;
 Quæ tria sunt curâ nomina digna tuâ.
 Sideris in morem, falsi caligine pulsâ,
 Securum fidei lux tua monstrat iter.
 Sponsus es : à sponsa per te removetur adulter,
 Ne malus hanc fallat, ne rapiatque, caves.
 Es Pater : inque inopes reditus dum vertere gaudes,
 Non tibi natorum copia grandis abest.
 Sed quid opus verbis ? meliùs tua facta loquuntur;
 Nullaque par : meritis laus minor omnis erit.
 Exorientsque suo veluti se lumine Phœbus
 Prodit, nec nitor hic voce probantis eget;
 Haud aliter virtus per se præcone remoto
 Emicat, atque oculos splendor uterque trahit.
 Nec pudor est, si Musa tuis virtutibus impar
 Cedat, & in vasto gurgite litus amet.

Ec-

ꝑ. Quo Beneficio cognito, ad aram ipsius Sacrum solemne in gratiarum
 actionem, præsentè Illust. D. Internuntio, decantatum fuit,

Ecquis enim tanta rerum sub mole tuarum
 Sentiat ingenium non cecidisse suum?
 Nam prius Hesperiiis Titan orietur ab undis,
 Pronus & Eois incidet axis aquis,
 Jupiter Oceanumque reget, Neptunus Olympum,
 Lunaque fraternis altior ibit equis;
 Quàm tua tutandis desit vigilantia Belgis,
 Curaque cum vitâ desinet ista tuâ.
 Non tamen ex toto : cæli quoque parte receptus,
 Pectora cælesti nostra levabis ope :
 Dimidioque tui superâ regione frueris,
 Dimidio curam religionis ages.
 Ardor inexpletus superabit tempora vitæ,
 Mors neque fervorem finiet atra tuum.
 Jam nunc mortiferæ tollis contagia pestis,
 Ne noceantque animis tecta venena caves.
 Scriptaque divinis elidis inania scriptis,
 Fucatos calamo persequerisque dolos.
 Et digito monstras, lateat quâ vipera parte
 Abdita, per flexus fallere docta novos.
 Quæcumque ingenio textit fraus subdola vafro,
 Cælesti per te luce relecta patent.
 Cedite Bouffuvii proceres : mihi credite, vestrâ
 Clarior hâc acie fama nepotis erit.
 Numinis hæc causa est : Mavortis vestra profani.
 Vos patriam : patriæ protegit ille fidem.
 Exsuperat vestras tantum hæc victoria palmas,
 Quantum animæ pretiū corpore majus habent.
 Astra favent; tu signa movē : cadet impius Error
 Marte sacro : monstro jam fuga nulla patet.
 Sæpe quidem fallax veloci stantia saltu
 Retia, dispositas transfiliitque plagas.
 Nunc validæ vinctumque premunt, ducuntq; catenæ,
 Collaque victori percutienda dabit.
 Ecce furens trahitur nigro tumefacta veneno
 Bellua, quinque ferâ cornua fronte gerens.

248 ELEGIARUM LIBER III.

Arripe tela manu vindex : dabit hostia cultro
Guttura : sacrificam postulat ara manum.

Jam Petri gladio gladius se Principis addit.

Tartarus hos contra non ferat arma duos.

Spernere quæ solita est Tarpæi fulmina montis,
Lethiferum duplici vulnus ab ense feret.

Roma, tibi Regum sociata potentia, cladem

Hæreticis semper Schismaticisque dedit.

Aut damnata suæ posuerunt crimina Sectæ,

Aut patriam celeri deseruere fugâ.

Jam pariter nova Secta cadet; percussa recumbens

Bellua fœdatam sanguine tingit humum.

Carolus ut sceptri, fidei sic jura tuetur,

Et gemino palmam victor ab hoste petit.

Illa vetus pietas, stirpique domestica sacrae,

Ivit in heredes, semper itura, suos.

Hæc generis dos est, & avitæ gloria famæ,

Austriacis summum contulit illa decus.

Illa dedit stirpi, stirpi dabit illa nepotes.

(Dent Superi voto pondus inesse meo!)

Utque olim imperii Rudolpho Roma coronam

Detulit, & natis sceptrâ paterna dedit;

Sic fidei sacram domus hæc tutabitur arcem,

Pontificique feret, res ubi poscit, opem.

Iamque tulit : Decreta vigent Romana jubente

Cæsare : perfidiæ non tulit ille nefas.

Turba rebellatrix veteres submittere fastus

Cogitur, & capiti flectere colla suo.

Si quis adhuc pugnæque avidus, frenumq; repellens

Prodeat, ultrices sentiet ille manus.

Non tamen hæc, Præsul, sine te victoria parta est.

Proditâ sunt curâ fraudque dolusque tuâ.

Hactenus insidiis potuit captare favorem;

Verbaque fallendis auribus apta loqui.

Tu, quibus impietas patuit, documenta dedisti:

Sectæ nota ducum pectora Cæsar habet.

An-

Ante petet fontem revocatis fluctibus Ister,
 Solque sui radiis luminis orbus erit,
 Et nive trux Boreas, tepido Notus imbre carebit,
 Et pelagi vetitas Ursa subibit aquas;
 Quàm ponat Latiae gens hæc fastidia Mitrae,
 Duraque Præsulibus pareat illa suis.
 Quis credat? septem sensit sua scripta notantes
 Pontifices, totidem sprexit & illa notas.
 Herculeæ similis, de vulnere pullulat, Hydræ,
 Cervicem scissæ substituitque novam.
 Roma (caput fidei) furiis clamantibus istis
 Massilia est: quid non error & ira vomunt?
 Vidimus intrepidis morientia lumina condi,
 Ultima Pontifici voxque rebellis erat.
 Omne jugum, legemque ferox detrectat & odit
 Hæresis, & rixæ fertile pectus habet.
 Dumque valet numero, Regum se opponere sceptris
 Audet. 6. & ardentes aptat ad arma manus.
 Rupta fides cælo regnis funesta, gradusque
 Rumpendæ fidei Regibus esse solet.
 Fonte solent illo patriæ manare tumultus,
 Magnaque pars regnis sæpe revulsa fuit.
 Tolle fidem populis, pacis quoque fœdera tolles.
 Præteriti satis hoc temporis acta docent.
 Musa tace: quid enim præscos renovare dolores
 Attinet, & patriæ damna referre meæ?
 Ah satis est sensitse semel quid Schismata possint.
 Ne redeat tantum, Dî prohibete, nefas.
 Omniaque hæc vidit, qui pervidet omnia Cæsar:
 Diffidii causas sustulit ille novi.
 Quosque regit Belgas, pariter Romæque sibi
 Subjectos, geminâ vivere pace cupit.

Hæc

6. Intelligebat profecto clarissimæ memoriæ Ludovicus XIV. Proavus tuus,
 quam insensè essent publicæ pacis hostes, qui Apostolica auctoritatis jugum ex-
 cassissent. Innocentius XIII. Brevi ad Ludovicum XV. dato 1722. die
 24. Martii

250 ELEGIARUM LIBER III.

Hæc nobis rescripta refers dignissime Præsul,
 Hoc pretium magni grande laboris habes.
 Per te pax patriæ : per te Romana triumphat
 Relligio : per te publica tuta salus.
 Perge rebellantes fidei compescere motus ;
 Si quis erit , procul hinc hostis apertus eat.
 Certantem te Roma juvat , Cæsarque , Deusque ,
 Indociles nec qui protegat , ullus erit.
 Omnia tentasti , nec adhuc tentare pigebit ,
 Ut fera , suspenso fulmine , corda trahas.
 Denique blanditiis impervia corda merentur
 Judicis ut partes , criminis ultor , agas.
 Jam satis est contempta tuæ patientia dextræ ;
 Impietas longâ crescit inulta morâ.
 At quisquis posito supplex errore redibit ,
 Ibit in amplexus protinus ille tuos.
 Præteritæque tibi venient obliviam culpæ ,
 Et nova subiectæ præmia mentis erunt.
 Dummodo qui linguâ nocuit , malè dicta retractet ,
 Et reparet factis facta priora novis.
 Omnibus hoc spondet , tua quo præcordia flagrant ,
 Quique tuo numquam corde tepescit , amor.
 Ferreus est , animo si quis non tangitur isto ,
 Tutæque servati pars negat esse gregis.
 Ferreus est , à te post tot data signa favoris ,
 Si quis adhuc vacuum pectus amoris habet.
 Ille & duritiâ scopulos , adamantæque vincit
 Barbarus , Armeniæ lac bibit ille feræ.
 Ille nec humanæ suxit puer ubera matris ,
 Perfida nec nostro sanguine vena tumet.
 Ergo quem prohibet revocare superbia gressum ,
 Errorisque vetat pœnituisse pudor ;
 Invisus Romæ pariter , Caroloque , tibi que ,
 Ad pœnam lentos incitat ille suam.
 Sed neque nostra rigent ferro præcordia , nec nos
 Ubera montanæ traximus ore lupæ ;

ELEGIARUM LIBER III. 251

Ut cadat in mores feritas tam barbara nostros,
 Deleat aut veniens tot benefacta dies.
 Donec oves agnique thymi rapiuntur odore,
 Frigida languentem dum teget umbra gregem,
 Dum capreae montes, dum foetæ dulcia vaccæ
 Pascua, dum vitreas cyncus amabit aquas,
 Et pia dum stabunt cum Cæsare foedera Romæ,
 Firmaque pax mundi junget utrumque caput;
 Belgica Pastoremq; suum, Sponsumque, Patremque
 Te colet, auxilio tuta futura tuo.
 Et nihil à Latiis poterit divellere Belgas
 Legibus : illa tui palma laboris erit.
 Jure igitur Belgæ reduci gratamur ovantes,
 O pater ! ô patriæ fama decusque tuæ !
 Carminibus modò finis erat, cursuque peracto
 Contigerat portum fessa Thalia suum.
 Vesta levi pennâ vatem nova fama coëgit
 Sepositæ rursus tangere fila lyræ.
 Illa mihi retulit quam raro Præsul honore
 Intrarit sponsæ moenia cara suæ.
 Utque expectato populos hilaraverit ore,
 Urbi nec fuerit lætior ulla dies.
 Ille avidas rumor postquam mihi vênit ad aures,
 Non potui Musæ frena tenere meæ.
 Utque oleum vires languenti sufficit igni,
 Ut ruit auditâ miles ad arma tubâ,
 Sic mea sunt animata novi splendore triumphî
 Pectora, sic rediit vivus in ossa calor.
 Nec mora, cantandi spectacula publica vênit
 Impetus (abscedas invida turba procul)
 Ipse nec hæc vidi ; nec erit mirabile, si quid
 Erratum est numeris præteritumve meis.
 Fama procul posito non omnia dicere vati,
 Ordine nec quo sunt gesta, referre potest.
 Acrius incendunt animum præsentia : rerum
 Et nitor & species, quo rapiamur, habet ;
 Nunc audita sequor ; nunc omnia credere famæ

252 ELEGIARUM LIBER III.

Cogimur : illa mihi testis, & obses erit.
 Hæc mihi narravit quantos Mechlinia plausus
 Ediderit, cultu conspicienda novo.
 Cumque prius madidis cælum nigresceret Austris,
 Iret & inductâ lurida nube dies;
 Præfulis adventu clara sol luce refulsit,
 Formosum tenebris exseruitque jubar.
 Velle putes ipsum testari gaudia cælum,
 Plaudentumque animos, lætitiâque sequi.
 Urbe procul vulgus venienti occurrere gestit,
 Quisque suos avidus deseruitque lares.
 It longum campis agmen, murosque relinquit,
 Pressaque densatum turba retardat iter.
 Ordo sacer vexilla sequens, cantuque laceffens
 Æthera, diversæ Religionis adest.
 Dein sequitur Clerus, niveo qui tectus amictu
 Substitit, & portæ limina prima tenet.
 Ponè Magistratus Cleri vestigia pressit,
 Ingens quem populi turba secuta fuit.
 Hæc pompâ summas Rumoldi Præsul ad aras
 Ducitur, & templi limina sacra petit.
 Jamque foro vicinus erat : nova scena repente
 Panditur, atque oculos altera pompa vocat.
 Armati vario procedunt agmine cives,
 Martis & in speciem ludicra bella movent.
 Remque geri credas vero certamine, tantas
 Cum tonitru flammæ æra corusca vomunt.
 Vesper adest : piceis ardescit ab ignibus æther,
 Omnia lætitiâ tecta, viæque fremunt.
 Dumque tenent cyathos & vina liquentia fundunt,
 Annos Alfatio, canitiemque vovent.
 Pars etiam magni cum Præsidente missa Senatûs
 Adfuit, & reduci prospera vota tulit.
 Postmodo te simili excepit Bruxella paratu.
 Omnibus hinc quanto sis in amore patet.
 Denique dum cæli Belgæ tibi regna precantur,
 Publica privato carmine vota sequor.

ELEGIA V.

Ad Illustrissimum ac Reverendissimum Dominum

D. PHILIPPUM ERARDUM VANDER NOOT,
Gandensem Episcopum,

Annum ætatis agentem 86. Episcopatus 29.

*Senectus venerabilis est, non diuturna, neque annorum
numero computata. Cani autem sunt sensus hominis,
& ætas Senectutis vita immaculata. Sap. 4.*

D Ici si qua potest venerabilis esse senectus,
Convenit hæc canis fama, Philippe, tuis.
Grande tibi tribuit transacta laboribus ætas
Inter honoratos nomen habere senes.
Mollia longam aliis deducunt otia vitam,
Una quibus vacuos fallere cura dies.
Deinde ubi nox sparfit rutilantibus æthera stellis,
Lunaque roriferos candida junxit equos,
Non curæ abrumpunt, non dura negotia somnum,
Alta quies pingui membra sopore foveat.
Sera nec exortum novêre cubilia Solem,
Sopitisque novæ pars bona lucis abit.
Hanc aliquis famâ dignam vel honore senectam
Esse putet? Pylios æquet ut illa dies.
Nempe etiam quercus annis plus crescere centum,
Seclaue cornices vivere plura ferunt.
Tempora non faciunt senium venerabile; si non
Quæque dies operis laude notanda sui est.
Qui solos numerat digitis quos perdidit annos,
Hic vitam in cunis ponere dignus erat.
Scilicet ætatis corrumpit inertia laudem:
Vita vacans lentæ mortis habenda loco.

Hic

Hic solus, mihi crede, diu vixisse putandus,
Nullum cui vitæ tempus abivit iners.

Pensanda est meritis, pensanda laboribus ætas.

Hæc facit una brevi tempore causa senem.

Acta novem septemque tibi, post lustra, Philippe,
Alterius lustrum jam quoque finis adest.

Longa quidem series annorum, longa dierum,
Quo paucis tremulo contigit ire gradu.

At tua si justos quis digerat acta per annos;
Implebis factis secula bina tuis.

Usque adeo cumulata suis sunt tempora rebus,
Et tibi pars vitæ nulla labore vacat.

Utque superfuso tellus Ægyptia Nilo,
Fertile de fluvii munere nomen habet;

Sic tibi si primæ geminentur tempora vitæ,
Alterius meritis altera dives erit.

Quid juvat ulterius sacro dare colla labori,
Quæque gravent juvenes pondera, ferre senem?

Cernis ut emeritus vitet certamina miles,
Nec vetus à portu per mare puppis eat?

Ut senior vacuâ cedat gladiator arenâ,
Rusticus & vetulo demat aratra bovi?

Tu tamen ignavam gaudes nescire quietem,
Præmiaque ætati debita ferre negas.

Munia nullus adhuc operosa Vicarius explet,
Officii partes quaslibet unus agis.

Sive opus est oleo puerorum tingere frontes:
Uncta redit manibus turba tenella tuis.

Seu rudis eloquio plebs est formanda disertis:
Illa perorantis pendet ab ore senis.

Seu nova Romano sacrandæ altaria ritu:
Per te sacrificâ digna fit ara manu.

Prava refringenda est doctrina potentibus armis?
Nempe tuo calamo fulmen, & ore venit.

Denique quicumq; est longus quem parturit annus,
Incumbitque tibi, perficiturque labor.

Prompta

Prompta ministerio tua vox, tua dextera sacro.

Cura potest vegetum frangere nulla senem.

Quid, quod & his natus videare laboribus infans;

Gandaque sit puero Sponsa dicata tibi?

Omen inest cunis, & habent natalia pondus

Sidera : lux vitæ prima notanda tuæ.

Augurium mitræ tibi lux dedit illa futuræ,

Auguriumque fides, resque secuta probat.

Quâ pia te mater 1. genuit, Gandensibus illa

Præcipuo culta est semper honore dies.

Illa dies hæc est, celebrem quam reddit Amandi

Gloria. Lux fidei civibus ille fuit.

Ille rudi populo legis primordia nostræ

Tradidit, & sacræ fonte piavit aquæ.

Ante superstitio, simulacraque vana deorum

Culta diu templis, Ganda, fuere tuis.

Fanaque Mercurius vicino colle tenebat,

Fumabant patriis impia thura focis.

Nondum Christiadûm fuerant tibi cognita sacra,

Ligneus adstabat qualibet æde deus.

Donec cælesti tibi munere missus Amandus

Abstulit erroris signa vetusta tui.

Sic Helenæ sunt rapta manu ludibria sacri

Montis (in hoc Veneri junctus Adonis erat,

His comes è Pario sublimis marmore stabat

Jupiter : in dextra fulmen inane fuit)

Ut regina nefas monitis cælestibus ulta est,

Redditus est monti, qui fuit antè, decor.

Illa Jovis, Venerisque, & Adonidis impia signa

Sustulit, inventam substituitque Crucem.

Quantum animos exempla movent ! venerabile factû

Divus apud Belgas qui renovaret, erat.

Ille animos ubi Flandrorum mansuescere primûm

Edocuit, ritus instituitque sacros,

Cri

1. Natus est Illustrissimus die S. Amando sacrâ, qui primus fuit Flan-
dorum, ac præcipue Gandavensium Apostolus.

256 ELEGIARUM LIBER III.

Criminaque arcanâ natalia diluit undâ,
 Victaque barbaries religione fuit;
 Exuitur feritas; nova lex, nova fœdera florent,
 Et juvat immunes cædis habere manus.
 Sæpe aliquis visa ferrum trux condidit ara,
 Iraque complexus, pro nece, victa dedit.
 Hæc populus sanctæ postquam nova commoda legis
 Sensit, in antiquos vertitur ira focos.
 Tempa profana cadunt, formæque, aræque deorû,
 Truncaque vicinus numina Scaldis habet.
 Crux micat ex illo, qui nunc quoque collis Amandi
 Dicitur: hæc fidei tessera prima fuit.
 Extat adhuc parvum declivi in monte sacellum,
 Araque, sed cultu jam vetus orba suo.
 Sanctus in hac olim peragebat sacra Sacerdos,
 Victima, mactato pro bove, Numen erat.
 Postmodo neglectus (quid non spatiosa vetustas
 Destruit?) & nullo mons in honore fuit.
 Solaque restabant deserto nomina colli,
 Horrebant densis faxa peresa rubis.
 Indoluit Divus, populorum obliviam culpans,
 Templaque restituat qui mea, dixit, erit.
 Illa dies veniet, quam non procul auguror esse,
 Accedet veteri quâ nova fama loco.
 Dum licet, ex illo nunc carpere monte capellæ
 Gramina: post illo pascere, crimen erit.
 Jamque aderat lux sacra viro: tu nasceris illâ
 Luce puer: cunas respicit ille tuas.
 Respicit & mores maturâ ætate futuros,
 Plurima quæque Deus dona daturus erat.
 Nescio quid magnum portendunt sidera, dixit,
 Natali crescet gloria nostra tuo.
 Protinus infanti præsagia dixit Amandus:
 Cresce, meâ cives Præsul in urbe reges.
 Quamque fidem primus docui, tutaberis illam
 Grandior, & curam pro grege pastor ages.
 Evenient:

Evenient : falsus non hæc tibi nuntiat augur.

Tu seriem vitæ, parvule, disce tuæ.

Celsa per undantem conscendes pulpita plebem,
Moribus & veniet per tua dicta nitor.

Bella geres calamo, fideique fugabitur hostis,
Scriptaque Pontificum 2. voce probanda dabis.

Scripta, quibus Romana fides errore repulso
Afferitur, doctum religionis opus.

Verba Patrum referes, ducibusque tueberis illis
Quem tibi committet Roma Deusque gregem.

Austriacamque senex ibis legatus in urbem,
Voce tuâ patriæ rem peragente tuæ.

Denique magnifico sumptu 3. mihi templa dicabis,
Et meus ex illo tempore crescet honor.

Gratus ero, præsensque tuos mea cura labores
Provehet, & vitæ tempora longa dabit.

Hæc olim de te præconia dixit Amandus,
Vera per eventus singula facta suos.

Non opus est proavos post hæc memorare potentes,
Clara vel antiquæ gesta referre domûs.

Nota satis fastis ea sunt quæ marte, togâque,
Inclyta per priscos facta leguntur avos.

Et tua nobilitas, quamvis per longa coruscans
Secula, pars minima est laudis habenda tuæ.

Sola tibi pietas, & fastûs nescia virtus
Præcipuum visa est semper habere decus.

Omnibus hæc titulis tanto est sublimior, alto
A cæli quantum vertice distat humus.

Hæc puero tibi culta fuit, juvenique, senique,
Hæc, ut deficient cetera, morte caret.

Sola tibi fuit hæc fabricandi causa sacelli,
Quod speciem templi mole capacis habet.

R

Hoc

2. Decretum edidit Illustrissimus solitissimum pro observanda Constitutione
Unigenitus, Brevis Apostolico laudatum.

3. In colle urbi Gandavensi vicino Sacellum ingens edificavit S. Amando
sacrum, qui olim eo in colle crucem Domini crexerat primus, eversâ Mer-
curii statuâ.

258 ELEGIARUM LIBER III.

Hoc tua constructum pietas sacravit Amando,
 Hostiaque hîc manibus prima litata tuis.
 Dicere longa mora est formam templique, locique.
 Æquatam trames sternit utrimque viam.
 Nunc patet ascensu facilis, mons arduus olim,
 Et circum viridem lucus opacat humum.
 Crux ingens mediis argentea fulget in aris,
 Auro quæ pretium divite majus habet.
 Quippe Crucis Domini partem, quâ Roma resectam
 Miserat, augusto continet illa sinu.
 Munera præterea, cultumque altaribus aptum
 Adjicis : in magno est priscus honore locus.
 Huc pia plebs veterem properat cultura patronum,
 Et nova solemnes accipit ara preces.
 Jamque moras tandem, primique obliviam cultûs
 Damnat; & hoc curæ prædicat esse tuæ.
 Per te mons celebrer : per te renovatur Amandi
 Gloria : tu vindex illius ; ille tui.
 Illo credibile est salvum ductore Viennam
 Per medias tectis montibus isse nives,
 Nec Boream nocuisse feni, currentia quamvis
 Sisteret arctoo flumina vincta gelu.
 Verus amor patriæ præcordia fortius ussit,
 Brumaque debilior pectoris igne fuit.
 Felix ! cui senium venerabile contulit æther :
 Nîl homini majus quod dare possit, habet.
 Perge novis canam meritis decorare senectam,
 Horaque sit vitæ tarda suprema tuæ.
 Ad superos donec migranti occurrat Amandus,
 Binaque sideribus nomina juncta micent.
 Nam velut amborum est cumulata laboribus ætas,
 Gloria sic functis una duobus erit.
 Gandaque dum collem renovatum læta reviset,
 Spectabitque tuâ condita templa manu,
 Fama viri, dicet, per nostros sera nepotes
 Ibit, & augustum grata loquetur opus.

Ossaque

Offaque dum sacro condentur inania busto,
In cinerem lacrymas, ultima dona, feret.
Et memor in tumuli carmen breve marmore scribet:
Hic jacet æterno dignus honore senex.

ELEGIA VI.

Ad Illustrissimum ac Reverendissimum Dominum,

D. ANGELUM D'OGNYES,

Ex Sacro FF. Capucinatorum Ordine assumptum
Episcopum Ruræmundensem.

Postquam te læti puerum genuère parentes,
Et relevata uteri pondere mater erat,
Missa polo nutrix tibi clam dedit ubera Virtus,
Et Pietas cunas ducere iussa tuas.
Illa tibi totis hæsit victura medullis,
Victorem vitiis impositura pedem.
Nobilitasque suos quamvis simul indidit ignes,
Debilior sacrâ flamma profana fuit.
Hoc pater ignorans, pictas numerabat avorum
Effigies, priscæ nomina clara domûs.
Ille pio supplex fertur sic ore precatus,
(Fronte super pueri dextra precantis erat.)
Dî tibi dent factis non degenerare priorum,
Perque tuæ titulos, parvule, gentis eas.
Sive tibi Mavors & classica pulsa placebunt;
Palnam prostrato victor ab hoste feras.
Invenies illo proavos in pulvere claros,
Qui tibi bellanti nobile calcar erunt.
Seu tu consilio mavis prodesse, togâque;
Ingenium patriæ serviat omne tuæ.
Hic quoque clara tuæ censentur nomina gentis,
Hic quoq; quos spectes, quosq; sequaris, erunt.

Quidquid ages ; puer exemplis moveare tuorum,
Nec cedat magnis fama nepotis avis.

Quæque tuis olim donarunt munera Reges,
Hæc eadem gestis fac mereare tuis.

Fulva recognosces pendentia pectus ad imum
Vellera, 1. quæ Comites, quæ retulere Duces.

Talia cum placidum traheres à lacte soporem,
Solliciti pro te vota parentis erant.

Irrita parte aliquâ, quâdam rata parte fuerunt,
Votaque non omni fine paterna carent.

Concessit precibus partem Deus : ille, tuorum
Exsuperent fastos ut tua facta, dabit.

Major eris proavis ; sed eris sine Marte : tibi
Utilius voti parte carere fuit.

Profuit & patri : vani quæsit honoris
Culmina ; quæsit nobiliora feret.

Sæpe Deus meliora preces ad munera vertit.
Exemplo Præsul res manifesta tuo est.

Aucta tribus juveni lustris adoleverat ætas,
Addiderasque annos ad tria lustra duos.

Bellonæ rapuit juvenilia pectora fervor,
Et tibi mens patrii plena vigoris erat.

Armaque nîl præter manibus versare juvabat,
Gaudiaque auditâ summa fuere tubâ.

Subdebatque animo stimulos hinnitus equorum,
Metaque veloci pulverulenta fugâ.

Nobilis in venis, nondum virtute subactus,
Horrida qui peteret prælia, sanguis erat.

Ipse tibi Mavors turmæ moderamen equestris,
Ductoresque inter nomen habere dedit.

Grande rudimentum, majorisque omen honoris,
Sanguineum superis si placuisset opus.

Divus Amor bellis animum melioribus aptum
Viderat : & , Meus est ille futurus, ait.

1. *Anreo Vellere à Rege decoratus fuit Comes de Conspigny, & Ordini
S. Spiritus adscriptus Dux de Chaune.*

ELEGIARUM LIBER III. 261

Induit ille humeris pharetram, flammamq; sagittis
 Addidit : in læva flexilis arcus erat.
 Nox medium peragebat iter ; te somnus habebat :
 Aliger ad thalami limina vênit Amor.
 Constitit ante torum, clarâque in luce refulgens
 Cælesti tales edidit ore sonos.
 Parce cruentatos animo spondere triumphos,
 Deque tuis manibus scuta profana cadant.
 Pro galea mitram cælum dabit : abjice ferrum,
 Dextra pedum melius pontificale geret.
 Neu tu desidiam metuas & inertia vitæ
 Tempora : non omnis martis abibit amor.
 Miles eris, victisque dabis sine sanguine cladem
 Sensibus : hæc armis palma petenda novis.
 Paupertas juvenem sua sub vexilla vocabit,
 Parsque Deo sacræ parva cohortis eris.
 Omnia sub pedibus vitiorum monstra jacebunt,
 Flebit & extinctas ipse Cupido faces.
 Atque in te tibi tela dabit cælestia Virtus,
 Tuque tibi miles, victor, & hostis eris.
 Pòst graviora tibi restant certamina, restant,
 Externoque feres majus ab hoste decus.
 Turba rebellatrix Romæ parere magistræ
 Quæ negat, ultrici concidet icta manu.
 Junges Præfulibus Præful socia agmina Belgis,
 Multiplicique error vindice pulsus erit.
 Dixit Amor, telumque aurato misit ab arcu.
 Cælesti factum cuspide vulnus habes.
 Vulnere ab hoc nova lux animo, nova flamma reful-
 Militiæque tibi jam nova signa placent. (sit,
 Arma humeris, laterique revinctus ponitur ensis,
 Nec mora : Francisco sub duce castra petis.
 Serviat Austriacis tellus ; tibi Cæsar Olympo
 Quæritur, imperio qui regit astra suo.
 Terra vale, valeatque domus, valeantque propinqui,
 Vilia plus patriis tecta decoris habent.

Jam tibi, pro molli, fetis placet asper amictus;
 Pro somno, cantu nox vigilanda sacro.
 Terga sonant flagris, mentum tonsore remoto
 Squalet; habent nudi tegmina nulla pedes.
 Erigitur raso pannosus vertice conus,
 Labitur interdum, tergaque summa ferit.
 Corruptumque brevem durissima strata soporem,
 Molle super tabulas porrigiturque latus.
 Mille reluctantes vexant incommoda sensus,
 Non tibi nocte quies, non tibi luce venit.
 Sæpe scyphum coram positum libare vetaris,
 Appositâque nefas tangere lance dapes.
 Nec tua Tantaleis distant jejunia; si non
 Discrimen virtus suppliciumque ferat.
 Ille luit Stygiam violato numine pœnam,
 Promeruere tuam crimina nulla famem.
 Hæc tua militia est: hac exerceris arena.
 O quantum hæc duri lucta laboris habet!
 Ipsa licet freni impatiens natura repugnet,
 Interdum patrios respiciatque lares,
 Perge tamen dubios animi superare tumultus,
 Deque triumphato corpore victor eas.
 Hæc de te tibi parta dabit victoria mitram,
 Præmia divinus quæ tibi spondet Amor.
 Abditus ut lateas, virtutis fama latentem
 Prodet, ut in tenebris clariùs astra nitent.
 Te cupient Reges divini semina verbi
 Spargere, & eloquio corda movere tuo.
 Principibus 2. coram tua vox facunda tonabit.
 Ille gradus sacri primus honoris erit.
 Mox Latiam radios virtus tua mittet in arcem.
 Longinquo videt hæc quidquid ab orbe micat.
 Nec vidisse sat est; meritos quoque reddit honores:
 Non habet illa pigras ad benefacta manus.

Illa

2. A Carolo II. Hispaniarum & Indiarum Rege in Burgundia & Castella
 sacellis concionator regius fuit electus.

Illa tibi fidens caulam pastoris egentem,
 Præsule te sospes grex tuus, inquit, erit.
 Parva quidem pauper venies ad ovilia pastor,
 Vixque tibi victum lanaque, lacque dabunt.
 Pabulaque in vacuis quærent præsepibus agni,
 Ubra nec matres vespere plena ferent.
 At tua sedulitas, vigilesque ad prospera curæ
 Adjicient septis jugera multa tuis.
 Roma tibi solamen erit, tibi Cæsar egenti;
 Hic tibi munificas spondet, & illa manus.
 Grexque suo felix olim pastore feretur,
 Assurgent fragiles in nova tecta casæ.
 Includetque pecus validi custodia muri,
 Ne rumpant avidi vimina texta lupi.
 Providus hæc olim Clemens ventura sponpondit,
 Cum tibi, Commissas protege, dixit, oves.
 Nec sua spes illum de te concepta fefellit:
 Plura capax solito gramina reddit humus.
 Quippe novis tenues redditus proventibus auge,
 Et facis ex sterili pingua rura solo.
 Quæque pater dederat, 3. sceptri modo filius heres
 Prussica regali dat tibi dona manu.
 Relligio à nostris licet hos nova separet aris,
 Præmia virtuti quæ tribuere tuæ.
 Jam tua vicinis pastoribus horrea certant,
 Vixque novas messes area lata capit.
 Farra nec armentis, nec sacris farra colonis
 Desunt, nec niveo pabula læta gregi.
 At redditus pars parva tuos servatur in usus,
 Et memor antiqui fercula moris amas.
 Utilis est tua cura aliis, partisque fruetur
 Vulgus inops : hoc, te paupere, dives erit.
 Quas tibi divitias puero natura parabat,
 Abjicis : abjectas quis sibi poscat opes?

R 4

Cee

3. Ab utroque Borussia Rege, patre & filio, annuâ pensione liberaliter donatus fuit.

264 ELEGIARUM LIBER III.

Cetera quid referam virtutum exempla tuarum,
 Corda quibus fidei non satis æqua trahis?
 Jura sacerdotum (populis invisa propinquis)
 Non minuunt avidæ, te vigilante, manus.
 Hostis odoriferos (tanta est vicinia) fumos
 Spectat, & auspicio tutâ stat ara tuo.
 Guelphorumque Ducis Princeps tibi filia curas
 Sublevat: illa tui mater habenda gregis,
 Tu populum monitis; exemplis excitat illa.
 Tu sermone fidem; moribus illa probat.
 Et quamquam illius genitam de sanguine fratris
 Duxerit, imperii qui modo sceptrâ tenet:
 Plus tamen illa suis stirpem virtutibus ornat,
 Exsuperatque animi nobilitate genus.
 Sæpe illi porrecta tuâ fuit hostia dextrâ,
 Et pia cælestis venit in ora cibus.
 Firmaruntque fidem per te data balsama 4. fronti,
 Tartareâ ne quâ fraude petita labet.
 Tu quoque magnifici, quæ struxerat illa, Sacelli
 Atria, ne maneant tecta profana, facis.
 Per te jam locus est cælestibus utilis aris,
 Et sacrata tuâ 5. saxa fuere manu.
 Denique ne noceant ovibus furesque, lupique,
 Fata senem rapiant si properata, caves,
 Pastor adest, viduum post te qui curet ovile,
 Jamque sui supplet Præfulis ille vices.
 Ille pari passu vestigia nota sequetur,
 Qui similis titulum religionis habet.
 Namque eadem miles Francisci castra secutus,
 Uno militiæ sub duce signa tulit.
 Hunc similis doctrina tuæ virtusque polivit,
 Et morum gravitas, eloquiiq; nitor.

Et

4. Henrietta Christina Serenissimi Guelphorum Ducis filia, nata dux Brun-
 vicensis & Luneburgensis; cujus fratris filiam duxit Augustissimus Imperator
 Carolus VI. solenni Confirmationis in suscepta Romano-Catholica fide Sacra-
 mento ab Illustrissimo munita fuit.

5. Sacellum ab eadem Ruramunda magnificè extractum, solenni ritu,
 ingentique civium concursu, consecravit.

ELEGIARUM LIBER III. 265

Et spectata palam gestis prudentia rebus,
 Vitaque per cunctos Ordinis acta gradus.
 Nutibus illius Provincia paruit olim,
 Nullum quo subiit mitius illa jugum.
 Ille pedo, mitræque pares; ovibusque regendis,
 Judicio dotes visus habere tuo.
 Judiciumque tuum cum Cæsare Roma probavit.
 Nunc veniet fati mollior hora tui.
 Dum loquor; extinctum subito te funere nobis
 Fama refert: cantus comprime, Musa, tuos.
 Quid juvat ad surdum præconia dicere bustum?
 Altior humanis laudibus ille volat.
 Nos agimur pelago; portum tenet ille quietum,
 Cælestes inter Pontificesque sedet.
 Ossâ tegit tumulus: tumulo non conditur illo
 Gloria: post cineres illa superstes erit.
 Utque suæ vivus, sic sponsæ mortuus idem
 Profuit: hæc heres illius una fuit.
 At ne fera viri veniant oblivia tanti,
 Fama sed in seriem posteritatis eat,
 Qui modo defuncti successit honoribus, illum
 Restituet vivum moribus ipse suis.

ELEGIA VII.

Ad Illustrissimum ac Reverendissimum Dominum;

D. PETRUM JOSEPHUM DE FRANCKEN
 SIERSTORFF

Episcopum Antverpiensem

Cum in Ecclesiam suam solemniter introduceretur.

PRæsule læta novo viduos Antverpia questus
 Comprime: præteriti causa doloris abest.
 Tandem Roma tuos lenivit prospera luctus,
 Teutonicæque decus gentis habere dedit.

Quæ-

266 ELEGIARUM LIBER III.

Quæque gravis nostris solet esse Batavia sacris,
Visa mihi solito lenior illa fuit.

Et tamen hæc urbem sociali marte tenebat,
Et poterat longas necere dura moras.

Nota viri probitas animos rapuisse videtur,
Quæque valet, linguæ gratia blanda suæ.

Illius experta est olim gens provida mores,
Tunc cum legati i. munere functus erat.

Et quamquam ingenii præstabat acumine, sola
Non tamen hæc fructum causa favoris habet.

Fortius abruptit victrix obstacula virtus.

Quoslibet hæc animos flectere sola potest.

Illa retardatos tibi maturavit honores:

Ambit honoratum denique vitta caput.

Magna quidē merces, meritis neq; grandibus impar:

At dubium est, mitræ gratuler, anne viro.

Scilicet hanc ornat, pariterque ornatur ab illa,
Inque vicem magnum dat, recipitque decus.

Lux genialis adest: festos Antverpia cultus

Indue: sit luctus jam meminisse nefas.

Pompa vocat: novus ingreditur tua mœnia Præsul,
Jactato nitidas flore tegente vias.

Æra diem celebrant summâ modulantia turri,

Omnia gratanti compita voce sonant.

Majestas & Honor Sponsum præcedit euntem,

Ponè subit niveâ candida veste Fides.

Ipse pater Scaldis redimitus arundine frontem;

Vix summas ripis continet altus aquas.

Causa novi fastus præsentis gloria pompæ:

Hâc tumet, & Rheno cedere velle negat.

Præfulis ille licet se clarus origine jactet,

Gestaque pro patria munia multa canat,

Factorumque vocet te docta Colonia testem:

Præcipui titulum Scaldis honoris habet.

Fontibus

i. Pridem ante Episcopatum delegatus fuit Illustrissimus ad Status à Prin-
cipe Colonienſi.

ELEGIARUM LIBER III. 267

Fontibus hoc aliis audet certare, suumque
 Non putat esse minus quolibet amne decus.
 Danubio tantum, qui Cæsaris alluit urbem,
 Et Tyberi famulas sternere gaudet aquas.
 Acceptique memor decoris, se pronus & urnam
 Subjicit, & dominum noscit utrumque suum.
 Et prius in vacua residebit ficcus arena,
 Quam Carolo discors, & tibi, Roma fluat.
 Nec non post geminos amnes tibi, Dilia, cedit;
 Nam mitræ titulum tu potioris habes.
 Candida lætitiæ geminant quoque sidera causam,
 Purior Eois Lucifer exit aquis.
 Nulla serenatum contristant nubila cælum.
 Cui faveant, Solis nosse videntur equi.
 Urbs populum vix ampla capit: vicina colonis
 Rura vacant: minor est plebe premente locus.
 Obvius it, sponsumque Chori venerabilis ordo
 Suscipit, & geminum cingit utrimque latus.
 Turba affusa sacros ardet cognoscere vultus,
 Et stupet, inque unum lumina fixa tenet.
 Pars majestatem frontis miratur, & ingens
 Corporis hic, animi suspicit ille decus.
 Germanos alii, fūcoque carentia laudant
 Pectora, gens tectos damnet ut illa dolos.
 Utque animo Belgis similes & origine linguæ,
 Utque regat populos una corona duos;
 Denique ut Austriacæ faveat gens utraque stirpi,
 Proque novâ supplex sidera prole roget,
 Europæ quondam quæ finibus arceat hostes,
 Armaque trans Tanain & freta nigra ferat.
 Ore rudis resonant præconia talia vulgi:
 Alterius dictis quisque quod addat, habet.
 Præcipue pietas, & amor celebratur honesti,
 Quisque ardor fidei Præsulis ore micat.
 Ast alii, vulgo quibus est prudentia major,
 Omina fatidicâ prospera mente canunt.

Quem

268 ELEGIARUM LIBER III.

Quem Cæsar, quem Roma gregi præfecit alendo,
 Pascua cælesti nectare plena dabit.
 Noxia non serpent ovibus contagia nostris,
 A stabulis scabiem qui removebit, adest.
 Hydra venenatos si toliat turgida rictus,
 Victa dabit nostro colla premenda pede.
 Respice, quæ scuti sub imagine tessera splendet,
 Intrepidi 2. certum pectoris omen habet.
 Pro grege tutando rabiem non ille luporum,
 Nec sua vastantes rura timebit apros.
 Armatus ferro pastor, canibusque, pedomque,
 Despicit imbelles fortior hoste minas.
 Ibit cauta tamen firmo sapientia passu,
 Nec feret erranti vulnus inane manu.
 Non minus hoc scutum, subscriptaque tessera spon-
 Pectoris indicium quæ sapientis habet. (det,
 Omnibus aspirat lucem sapientia rebus,
 Hac sine propositi fructus inanis erit.
 Cernis ut in bello noceat temeraria virtus?
 Qui sapit, hic vires dirigit arte suas.
 Sæpius ex apto victoria tempore pendet:
 Non juvat audentes quælibet hora manus.
 Ipse suos Fabius cunctando perdidit hostes,
 Certaue victrices palma secuta moras.
 Bello fortis erat, sed erat temerarius Ajax,
 Promptaque vulneribus dextera, mente carens.
 Vincere non potuit Neptunia Pergama ferro.
 Hector pro muro civibus unus erat.
 Moenia consilio Troiana evertit Ulysses,
 Armata Danaum non capienda manu.
 Scilicet ut Mavors, sic Pallas præsidet armis:
 Hæc dea consilio; viribus ille valet.
 Præcipites fortuna animos inimica repellit,
 Eventuque caret vis rationis inops.
 Qui bene direxit, certâ ferit ille sagittâ
 Currentem gyro liberiore feram. Nec,

2. Tessera Illustrissimi scuto inscribitur: Intrepidè & Sapienter.

Nec, nisi quæ visco prius est obducta tenaci,
 Lenta reluctantem virga tenebit avem.
 Vindice grex tanto felix! præsepia prædo
 Ne turbet, sapiens intrepidusque cavet.
 Colligit ex scuto prudentior ista Senatus.
 Pascitur augurio quisque, favetque suo.
 Non opus augurio vati tua facta tuenti.
 Fas mihi sit Musis pauca referre meis.
 Intrepidum cautumque probant insignia; sed res
 Antè probat: certa est rebus habenda fides.
 Principibus carum sapiens audacia fecit,
 Participemque oneris te voluêre sui.
 Sæpius Europæ varias legatus ad aulas,
 Creditaque est curæ publica causa tuæ.
 Prussia te vidit regalia tecta 3. petentem,
 Gestaque successu non caruisse liquet.
 Te quoque, quantumvis alio sub fidere natum,
 Legatum 4. statuit terra Brabanta suum.
 Illa viros, Carolo nova qui documenta referrent,
 Destinât (haud parvæ res ea molis erat.)
 Pacis, & exacti referenda negotia belli,
 Quid faveat patriæ, quid noceatque suæ:
 Quidque salus populi, quid relligionis avitæ
 Gloria, foederibus non minuenda, roget.
 Eligitur quicumque operi fuit aptior illi,
 Inter & electos ordine primus eras.
 Ipse peroranti Cæsar tibi præbuit aures,
 Visus & est nutu dicta probare suo.
 Nempe tibi summis par est prudentia rebus;
 Hâc hominum quævis pectora dote trahis.
 Nec studium tantis naturæ dotibus acre
 Defuit, ingenium nec caret arte tuum.

Ars

3. Ab Archidiecepsi Coloniensi delegatus fuit ad Regem Borussia, & ad varios Europæ Principes.

4. A Statibus Brabantia primo loco electus, ut patria negotia Cæsari coram exponeret.

270 ELEGIARUM LIBER III.

Ars juvat, & curis cultum vigilantibus addit:
 Splendidior rebus quæritur inde decor.
 Terra ferax quamvis per se, tamen illa colendo
 Proventum messis fertilioris habet.
 Vitibus & gravidos spondet cultura racemos,
 Et tumet attonsis plenior uva comis.
 Utque nitet scabræ ferrum rubiginis expers,
 Cote quod assiduâ purgat, & igne faber;
 Sic acies mentis limâ tenuante nitorem
 Accipit, ignavo non hebetanda situ.
 Te juvenem schola discipulum Romana polivit,
 Difficiles flexus edocuitque 5. Rotæ.
 Illic implexos didicisti solvere nodos,
 Quidquid & ambiguum, quâ patet, orbis habet.
 Non leve tot variis onus est incumbere rerum
 Litibus : arbitrio res eget ista gravi.
 Inde redux patriæ cumularis honoribus, & te
 Magnus socium gaudet habere 6. chorus.
 Laurentique domus 7. rectorem læta recepit,
 Vênit & à priscis hoc tibi munus avis.
 Deinde ubi deseruit Rheni Paulutius oras,
 Ivit & ad sedes, terra Polona, tuas,
 Grande vacavit onus : (Latîa legatus ab aulâ
 Missus erat) meritis 8. res data tanta tuis.
 Jure igitur (nec enim scuto tua facta repugnant)
 Intrepidi titulum, res ubi poscit, habes.
 Jure etiam famam sapientis gesta merentur,
 Et simul hac scuto stat sua parte fides.
 At tua cur lauro medii viret area scuti?
 Nempe dari doctis laurea ferta solent.

Ac

5. Romæ annis aliquot studuit in Rota, ad cujus tribunal difficillime ex quavis orbis parte quæstiones solvenda deferuntur.

6. Româ redux Capituli Coloniensis creatur Canonicus.

7. Præses fuit Collegii Laurentiani : quod munus proavi ipsius à seculo Colonia obiverunt.

8. Missus in Poloniam, qui Nuntius Colonia Apostolicus fuerat, Eminentiſſimo nunc Paulutio, Nuntii partes Colonia Pontificis nomine implevit.

Ac velut intrepidus non ulla pericula frangunt,
 Et pudet iniustis cedere velle minis;
 Sic Jovis irati feriant cum fulmina frondes
 Quaslibet, intactis permanet illa comis.
 Virtuti geminæ lauri respondet imago,
 Detur ut hac capiti fronde corona tuo.
 Utque caret rugâ, tumidisque in cortice nodis,
 Verticis & grato semper odore viret;
 Sic tibi dent vegetam superi sine labe senectam,
 Dum tribuat vitam mors tibi tarda novam.

ELEGIA VIII.

Ad Illustrissimum ac Reverendissimum Dominum,
 D. HENRICUM JOSEPHUM VAN SUSTEREN,
 Brugensem Episcopum.

O Quàm difficile est conscendere culmen hono-
 Quò via clivoso vix patet arcta iugo! (ris,
 Ferre per abruptos opus est vestigia calles,
 Asperaque hirsutis prendere saxa rubis.
 Ipse labor multos & acuta cacumina terrent,
 Ignavi primâ deficiuntque viâ.
 Sola iter hoc superat quæ tendit in ardua virtus.
 Optimus huc tardo cogitur ire gradu.
 Nascuntur vates, Reges nascuntur: ad ipsos
 Sponte sua Phœbus, sponte corona venit.
 Demite natales, nihil his sublime manebit:
 Fortunam cunis debet uterque fuis.
 Non sic ferre solent natalia fidera mitram;
 Nîl hæc fortuitæ munera sortis habent.
 Crede mihi, multo decus hoc sudore parandum.
 Non venit ad segnes sponte tiara manus.
 Viribus & toto nitendum est corpore, rupis
 Ex humili si quis valle cacumen adit.

Et

Et nihil hîc natura juvat; quæ pondere semper
 Ipsa suo præceps fertur, & ima petit.
 Non prodesse parû est; tardat quoq; : gurgite remos
 Luctantes rapidis curvat ut annis aquis.
 Pronus ut adverso nitens Aquilone viator
 Sæpe gradum sistit, sæpe retentat iter:
 Sic meritis quæ vitta comis, Henrice, coruscat,
 Hæc tibi non parvo parta labore venit.
 Ut taceam claris de tot virtutibus, ad quas
 Per varios pietas est tua ducta gradus:
 Alta priùs dicam quot sidera nutriat æther,
 Ver frondes, æstas gramina, bruma nives,
 Quotque vagum densis agitetur fluctibus æquor,
 Turbantur valido cum freta summa Noto;
 Quàm tua quot variæ versarint pectora curæ,
 Aula tuam quando sacra poposcit opem.
 Ipse tibi 1. Humbertus, Mea suscipe munia, dixit,
 Longa dies humeris invidet illa meis.
 Jam mea consumpta est annis fugientibus ætas,
 Vixque movet tardos curva senecta pedes.
 Quem senium tolerare negat, succede labori,
 Dum tua vernanti tempora flore virent.
 Suscipe materiam mitræ meritumque futuræ.
 Nunc re : post etiam nomine Præsul eris.
 Dixerat Humbertus. Præsagia vera probavit
 Quod missum capiti vênit ab urbe decus.
 Non hoc augurium percussi viscera tauri,
 Non avium linguæ, pennave dextra dedit.
 Omina priscorum valeant fallacia vatum.
 Quis credat volucres regna negasse Remo?
 Credibile est ipsos hîc insansse poëtas.
 Certius ætheriis moribus omen inest.
 Certius ingenio, variis quod reddere cultum
 Artibus, una tibi cura laboris erat.

Cer-

2. Illustrissimi Humberti à Precipiano Archiepiscopi Mechliniensis factum
 est Vicarius Generalis.

Certius omen habet par rebus pectus agendis,
 Miraque quæ blandâ gratia fronte sedet :
 Et semper vigiles ad densâ negotia sensus,
 Et mens nativæ simplicitatis amans.
 Longum opus est vati rerum percurrere summam,
 Ordine si referam cuncta; volumen erit.
 Sat mihi de multis paucos decerpere flores,
 Ut detur capiti digna corona tuo.
 Ergo ubi colla oneri data sunt, sacrique senatûs
 Imposita est humeris sarcina tota tuis;
 Protinus implexas tua cura Vicaria lites
 Evolvit, demptâ composuitque morâ.
 Ardua spe citius cepere negotia finem,
 Sedulitasque operis grande levamen erat.
 Pars fidei quoque victa tuæ præconia fecit,
 Nec iudex, sibi quem posceret, alter erat.
 Nec mirum : gemini tibi nota volumina juris,
 Quidque vetet legum pagina, quidque probet.
 Te schola perfectum Grudiis eduxit Athenis,
 Imposuitque tuis laurea 2. ferta comis.
 Ante tamen dubii subeunda pericula martis,
 Ante boni pugilis more probandus eras.
 Vidimus intrepidum mediâ te stare palæstrâ,
 Juraque nodosi solvere plexa fori.
 Cumque tot armatis petereris vocibus unus,
 Inque tuum rueret docta procella caput;
 Visa loquor : stupuere graves responsa Magistri,
 Quæ celer, & dempto prompta timore dabas.
 Tantaque responsis aderat facundia, libro
 Crederet ut quivis cuncta patente legi.
 At postquam luctæ posuit victoria finem,
 Oscula dat dextræ læta corona tuæ.
 Nec tantum ex ista rediisti victor arenâ,
 Nec tantum palmam juris utramque tenes.

S

Altiùs

2. Ferri utriusque laureâ Lovaniæ donatus.

Altius erexit divina scientia mentem,
 Et trita est manibus pagina sacra tuis.
 Et geminæ patuere tibi discrimina legis,
 Ut nova lex animet, litera prisca necet.
 Ut pueris nunc plaga, pudendaque vulnera cessent,
 Et vetus affusâ noxa lavetur aquâ:
 Unaque sacrificos abolerit ut hostia cultros,
 Quæ pretium tauri sanguine majus habet:
 Et tandem ut veteri nova lux successerit umbræ,
 Abstuleritque jugum triste timoris amor.
 Denique quæ prisca cecinere oracula vates,
 Et quidquid Fidei Roma magistra docet,
 Omnia sunt adaperita tuæ penetrataque menti:
 Abdita res aciem non fugit ulla tuam.
 Quatuor & studio vigilatis messibus isto,
 Altera victrices vidit arena manus.
 Hic quoque certatum est, & aperti prælia martis
 Imposuere tuis 3. altera festa comis.
 Quid memorem reliquas exculti pectoris artes?
 Quas gravis est cunctas enumerare labor.
 Nam siue orator vitiorum germina tollis,
 Eloquio pectus, voxque, manusque favet.
 Seu patriæ Latine tonat facundia Linguae,
 Non minus hic illo sermo nitoris habet.
 Pro Superi! quanto tua vox excepta favore,
 Ingens cum species orbis in urbe fuit.
 Prisca recurrebat divini pompa cruoris,
 Aetas Bruxellis quam videt una semel.
 Hostia cum rubuit judæâ faucibus sicâ,
 (Mira, sed horrendi criminis acta loquor)
 Vulnere de cultri guttæ cecidere cruentæ:
 Corporis hæc Domini signa latentis erant.
 Eloquio quæ dum celebras portenta Latino,
 Haud alio potuit Tullius ore loqui.

Et

3. Theologia ibidem operam dedit annis quatuor, eamque publicis Theſibus defendit summa cum eruditionis laude universam.

Et tua de Caroli facundia Præfulis actis
 Erexit tanto digna tropæa viro.
 Qui celebras sanctos, facient imiteris ut illos,
 Quosque colis, simili te pietate colent.
 Et poteras Phœbumque sequi, doctasque sorores,
 Et poteras numerisnectere verba suis.
 Obstetit ingenium curis gravioribus aptum,
 In quibus utilitas carmine major inest.
 In pretio fuerant olim, nunc carmina nullus
 Æstimat, & prisco Phœbus honore caret.
 Vatibus & dare materiam, quam scribere, mavis.
 Tu facis : hi venâ facta favente canant.
 Te prodesse magis quam delectare volentem
 In sua divinus castra retraxit Amor.
 Ille tibi, vacuum spectans sub imagine scutum,
 Aurea scripturo verba notanda dedit.
 Ille tibi (ut 4. prosim) clypei sit tessera, dixit :
 Moribus & vitæ convenit illa tuæ.
 Utilius nihil est, nihil est præstantius illâ ;
 Par tibi cælitibus conferet illa decus.
 Hæc tetigit quoq; cura Deum : neq; condere mundū
 Majus opus, lapsum quam relevare, fuit.
 Numine (crede mihi) res digna est, velle juvare.
 Ut profit, nomen mite parentis habet.
 Hoc est cur cælo miseri sua brachia tollant,
 Hostiaque ardentes cur cadat ante focos.
 Finge, precaturis superos succurrere nolle,
 Nec pia qui templis thura det, ullus erit.
 Numinis exemplo lapsis impensa potestas
 Pandit iter cælo, ne pereantque, facit.
 Mole graves scelerum Deus allicit, & vocat ultro,
 Et facilem, dempto pondere, spondet opem.
 Crudeles medici ! quorum inclementia vexat,
 Non levat immiti vulnera parva manu.

S 2

Quid

4. Sento suo Illustrissimum dignam se tesseram inscripsit : Ut prosim.

276 ELEGIARUM LIBER III.

Quid juvat in longum pœnam protendere tempus?

Ah fatis est culpæ par sit ut illa suæ.

Sed tamen interdum partem rescindere ferro

Est opus; intactas ne putris una trahat.

Ars aliis alios herbis juvat: omnibus una

Infirmis detur si medicina, nocet.

Lenis, & asperior, diversis utraque morbis

Convenit: hæc studio res agitanda gravi.

Non ullis opus est stimulis tibi: respice scutum.

More Dei mites suadet habere manus.

Exigit ut prosis: nec enim tibi purpura sumpta est,

Splendidus ut populo conspiciendus eas.

Tolle graves mitræ curas & mille labores,

Quid, nisi Pontificis nomen inane, geres?

Quo tibi tot dotes? quo parta scientia? si non

Fontis inexhausti pectora more riget?

Sed citius ramos nudabit frondibus æstas,

Et minor æstivâ nox hiemalis erit,

Pomaque ver matura feret, feret æquor aristas,

Alpibus & summis navita vela dabit;

Quam miseris surdas pietas tua præbeat aures,

Et sibi, quam poscunt, deesse querantur opem.

Pastor ut intrasti dilectæ mœnia Brugæ,

Qui nova sentiret commoda, clerus erat.

Arferat infelix discordia litibus orta,

Arbitrio partes mox coiêre tuo.

Pax animis rediit, rediit concordia læsis,

Et victor pulsâ lite revixit amor.

Otia dein tollis, dignusque altaribus ardor

Fervet, conventu tecta profana carent.

Sacra nitet gravitas, casti sine crimine mores,

Exemplo similes quos facis esse tuis.

Nec minus indociles vindex censura coërcet,

Ipse tamen vultum terror amantis habet.

Judicis officium patris conjungis amorì,

Plusque metus pœnæ, quam data pœna, juvat.

Aspice

Aspice cælestes : ira est moderata deorum,
 Nec celeri fontes plectere morte solent.
 Jupiter interdum sceleratos fulmine terret,
 Et grave vicino comprimit igne scelus.
 Turbida cum multæ decurrant æquora naves,
 Non tamen has omnes cæca procella premit.
 Ut vitent scopulos aliæ, Neptunus in unam
 Sævitur, & exemplo cautius ire monet.
 Et tua, quantumvis justas, clementia vires
 Temperat, in longas protrahiturque moras.
 Tunc quoque, cum commissa gregis tibi cura tuendi
 Exigit, invito fulminat igne manus.
 Ad pœnas lentus properas, ad præmia velox:
 Mortales superis res facit ista pares.
 Palladias etiam, nova tecta, studentibus ædes
 Construis : unde frequens vivat alumnus habet.
 Doctus ut es, doctos pariter tua cura ministros
 Efficit : ignavos respuit illa domus.
 Nec te mæcenas artes studiosius alter
 Excolit, & studiis, ingeniisque favet.
 Vidi ego, ob inscriptos parvâ tibi mole libellos,
 Præmia munificæ qui retulêre manûs.
 Usque adeo minimos generosâ mente labores
 Provehis, & stimulis pectora tarda moves.
 Utque fidem vindex, Romanaque jura tueris,
 Sic, ne quem fallat perfida turba, caves.
 Duxque repugnantum, quem mors funesta rebellem
 Abstulit, ante tuo vulnus ab ense tulit.
 Ille quidem elapsus perfracto carcere fûgit;
 Scripta tamen per te seditiosa patent.
 Criminaque absentis sententia digna secuta est,
 Teque probante reum conscius orbis habet,
 Ossa gravat tellus aris inimica Latinis.
 Dignior hoc tumulus funere nullus erat.
 Gratia sit superis : quot Belgica terra tiaras,
 Tutores totidem relligionis habet.

Nec tantum cleri, populi quoque commoda curas,
 Nec tibi discrimen dives, inopsque facit.
 Omnibus æquali Præsul succurris amore,
 Grexque tui partem pectoris omnis habet.
 Vidimus addictos 5. ob publica crimina morti
 Hortatu scelerum poenituisse tuo.
 Solus eras, animos poteras qui flectere : solus
 Spes desperatis una salutis eras.
 Crimina præbebas numerosa fatentibus aures,
 Culpaque Pontificis voce soluta fuit.
 Nec tua fœdata est tetri de sordibus antri
 Purpura : splendorem carcer & umbra dedit.
 Quisquis in ingenti miserabilis urbe recumbens
 Te cupit, alloquio pascitur ille tuo.
 Deliciæ tibi sunt, inopem per compita plebem
 Visere, & in tenues munera ferre casas.
 Nempe memor scuti cunctis prodesse laboras,
 Atque animis pariter, corporibusque faves.
 Perge gregem sanctis animare laboribus, & te
 Officii numquam grande fatiget onus.
 Perge boni partes explere Antistitis omnes,
 Curaque supremum finiat ista diem.
 Quo plures tua dextra animas transcribet olympo,
 Hoc tua post cineres gloria major erit.

5. Publica morti addiçto, & nemini præterquam Episcopo conscientia ar-
 cana aperire volenti, aures in carcere Illustrissimus præbuit, & ad felicem
 ut spes est, eternitatem Sacramenti virtute preparavit.



ELEGIA IX.

Ad Illustrissimum ac Reverendissimum Dominum,
D. JOANNEM BAPTISTAM DE SMET,
Iprensensem Episcopum.

Qualis casta novo procedit sponsa marito,
Candida purpureo conspicienda sinu,
Lucida cui flavos distinguit gemma capillos,
Artificis doctæ quam poliêre manus;
Talis in occursum propera castissima sponsi,
Lætus ad amplexus qui venit, Ipra, tuos.
Hei mihi mœsta diu, longisque exhausta querelis,
Turturis, amisso compare, more gemis.
Qui te deseruit, qui 1. Gallica regna petivit,
Ille tibi iusti causa doloris erat.
Ferre moras poteras, tantum rediturus abisset.
Dilatus modico tempore crescit amor.
Quot desiderii stimulis agitantur amantes,
Crede mihi, totidem sunt in amore faces.
Nunc tibi desertæ solatia nulla supersunt:
Discedens reditûs spem tulit ille sui;
Æternumque vale miseræ tibi dixit amanti,
Nec quidquam, de te quod quereretur, erat.
Est aliud, thalami quod vincla tenacia rupit;
Vera tibi subitæ cognita causa fugæ.
Sed tamen invitus carâ procul urbe recessit,
Sunt quoque qui lacrymas continuïsse negant.
O quoties superos, novus ut succederet illi
Sponsus, thuricremis es venerata focus!
Vota Deum tetigêre: novus tibi gaudia Præsul
Attulit: & felix, si superesset, eras.

S 4

Heu

1. Ereptâ Gallis Iprâ, Illustrissimus Rattabon, abdicato Iprensi Episcopatu, in Gallias, patriam suam, discessit.

Heu rapitur 2. fato! rursus lugubria sumis,
 Et veteres luctus mors inopina gravat.
 Pulsa fatigato suspiria denique cedant
 Pectore : qui maneat jam tibi fidus, adest.
 Illum nec cita mors, fuga nec subducet amanti,
 Servabit stabilem cana senecta fidem.
 Hic patriæ conforſque tuæ, linguæque peritus,
 Notaque Flandrorum pectora Flander habet.
 Candida gens, fastuque carens, inimicaque fraudi,
 Nec sua quæ refugit prodere senſa palam.
 Quod patriæ natura dedit, quoque contulit illi,
 Pars diſpar populo non erit ille ſuo.
 Eſt aliquid ſtellis natos ſpirare ſub iſdem:
 Illecebras patrium fidus amoris habet.
 Hoc facit ut Belgæ Belgas, Hiſpanus Iberos
 Diligat, utque Afros concolor Afer amet.
 Scilicet in mores cæli concordia tranſit,
 Diſſimilesque animos lux peregrina facit.
 Sed tamen hæc minima eſt pellendi cauſa doloris.
 Ad dotes ſponſi reſpice ſponſa tui.
 Major ab his famæ ſurget tibi ſplendor, & ingens
 Hinc tibi laus ſeræ poſteritatis erit.
 Ille vetet quamvis, digitoque ſilentia vati
 Suadeat : hac una parte rebellis ero.
 Eſt ſua libertas Muſis, ægrèque tenentur.
 Qui rapit has, cælo ſpiritus ille venit.
 Humanis cælum imperiis parere recuſat,
 Pegasus & toto liber in orbe volat.
 Impatiens nullis cervix retinetur habenis,
 Seſſores tergo vix capit ille deos.
 Impetus Aëniis audax hauritur in undis,
 Qui bibit ex illis fontibus, ille furit.
 Quo magis ignoſcas, mea ſi tibi Muſa repugnet,
 Me rapit, & juris non finit eſſe mei.
 Ardet ut in curſus, & lora morantia tendit,
 Apri vicino tactus odore canis;

Ac

2. Succellor Rattabonii Episcopum immaturo Iprenſitus ſato creptus fuit.

Ac velut accipiter visâ sub nube columbâ
 Emicat, & celerem præda fameſque facit;
 Sic data materies vatem facit eſſe diſertum.
 Abſit factorum gloria : mutus ero.
 Adde quod hoc ipſum ſua quod præclara referri
 Facta vetet, meriti pars ſit habenda novi.
 Quo magis invitum decorat laus, dignior illâ
 Redditur, & tanto plus mihi vocis erit.
 Qui refugit, magis irritat præconia famæ:
 Laudari nimium qui cupit, ille vetat.
 Nondum bis decimum juvenis compleverat annū,
 Ingenii ſpecimen cum dedit ille ſui.
 Principium felix! à quo ventura notari,
 Perque gradus ſenſim creſcere facta ſolent:
 Sic quæ vere novo pubeſcit floribus arbor,
 Fructibus autumnno ſtabit operta ſuis.
 Clara ſecuturæ ſic ſpondet tempora lucis,
 Dum roſeo mater Memnonis ore nitet.
 Lovanium (priſcis ſtudio quod certat Athenis)
 Undique collecto flore juvenia venit.
 Ne referam Batavos, & quos vicina Gallis
 Jungit, ab Hiberno litore multus adeſt.
 Ipſa ſuos etiam Germania mittit alumnos,
 Quoſque ſuo nutrit Belgica terra ſinu.
 Præmia victorem, ſtudio qui præterit omnes,
 Ampla manent: magnū præmia calcar habent.
 Intento mentis certatur acumine: cura
 Illa ſibi noctes vindicat, illa dies.
 Laurea non operâ facili, neque vallibus imis
 Carpitur: è ſummo eſt illa petenda jugo.
 Mille opus eſt ſeptos caligine ſolvere nodos;
 Non vetus ambages tot labyrinthus habet.
 Area fervescit: palmæ rapiuntur amore:
 Qui poterit curſu vincere: Primus erit.
 Non aliter totis velox ad præmia nervis
 Tendit olympiaco carcere miſſus equus.

Vincere seffores avidi calcaribus urgent,
 Verbereque affiduo torta flagella sonant.
 Inter tot celeres metam prior occupat unus,
 Claraque pernici gloria cedit equo.
 Ipra vides ? tuus ille volans supereminet omnes,
 Ambit 3. viâtrices palma relata comas.
 Magnus honor primi titulum famamque referre,
 Ingenioque sibi non reperire parem.
 Rumor, ut est velox, vicina per oppida fertur;
 Victor adest : comitum pompa superba præit.
 Quælibet urbs magno venienti occurrit honore,
 Aurea natali munera dantur humo.
 Flandria victori gaudens gratatur alumno,
 Et partu nutrix illa superba suo est.
 Hæc olim ingenii Præsul tuus, Ipra, capaxis
 Signa dedit : reliquum respice sponsa decus.
 Curia venturos illi spondebat honores,
 Si vellet patrio jus aperire foro.
 Munia despexit mundi splendentia fastu,
 Quæ laqueos vitæ liberioris habent.
 Ergo ubi discipulis naturæ arcana magister
 Exposuit, mentes instituitque rudes,
 Altior humanis animus cælestia cœpit
 Volvere : plus illic, quo traheretur, erat.
 Non rapit hic ardor vitiorum mole gravatos,
 Quos humili vinctos compede terra tenet.
 Criminis expertem divina scientia mentem
 Postulat : impietas, ne capiat, obest.
 Alcides domuitque feras terrenaque monstra,
 Pòst humeris cælum grande pependit onus.
 Non hæc de nihilo veteres finxere poëtæ :
 Accipe quid doctâ fabula nube tegat.
 Non nisi calcatis in cælum sensibus itur,
 Quolibet hi monstro plus feritatis habent.

Abri-

Abripiunt, falluntque animos, & crimine durant,
Cæcaque cælesti pectora luce carent.

Hinc satus est Error, cervix hinc nescia flecti,
Mensque ferox nullis legibus apta regi,
Scissaque religio, capitique rebellia membra.

Hæc sunt Herculeâ monstra domanda manu.
Viribus hic opus est, opus est ferrique, facisque
Vulnere, ne damno germinet Hydra suo.
Cerberus hic cervice triplex, hic cornua tauri,
Arcadiusque furens dente timendus aper.

Hic est Antæus, sævi hic Busiridis aræ,
Hic pasti humano sanguine Thraces equi,
Centaurique truces, & cæsus ab Hercule Nessus,
Et quascumque manu perdidit ille, feræ.

Non hos humanis Alcides viribus hostes
Perculit : è cælo Jupiter arma dedit.
Cum fera Cælitibus moverunt bella Gigantes,
Quis nescit telo succubuisse Jovis?

Illi terribiles, & adhuc à clade minaces,
Nequidquam Ætnæo fulgur ab ore vomunt.
Ipra tuus pridem penetravit in æthera sponfus,
Sidera terrenæ nîl ubi cladis habent.

Illic arma sibi 4. cudit cælestia : scuti
Margine quæ legitur tessera sculpta sui.
Arma rogas quæ sint? sunt digni Præfule mores,
Nudaque simplicitas, candor & arte carens,
Tantaque dicendi facundia, nullus ut illi
Cedere (sit saxo durior ille) neget.

Sæpe perorantem stupuit Bruxella, prementis
Concursum populi non capiente loco.
Quisque avidus proprii 5. pastoris ab ore pependit
Pabula suspenso cum dabat ille gregi.

Nec

4. Scuto suo Illustrissimus hanc inscripsit tesseram : Cælestia cudit arma.

5. Plebanum S. Gudula agens Bruxellis omnium animos rapuit miræ morum suavitato, & soliditate doctrinæ.

Nec placuit tantum ; movit quoque : fulgor & ignis
 Gratiaque in vultu tanta loquentis erat.

Adde parem verbis fructum : correctæ vetustas
 Criminis , & vitæ femina jacta novæ.

Quilibet audito melior sermone redivit,
 Ex dictis mores composuitque suos.

Quanto major inest , graviorque potentia linguæ,
 Infula dicentis cum premit alta caput ?

Verba magis penetrant , doctrinaque Præsulis urit,
 Et majestatis singula pondus habent.

Hanc pridem Humbertus virtutē ut novit ; Alumnis
 Ille meis , dixit , præficiendus erit.

Urbe ingens mediâ domus est ; ubi sacra juvenus
 Hospita communi vivere lege solet.

Illa ministerio templi formanda futuro ,
 Præsidis arbitrio cuncta regentis eget.

Quo simul intravit 6. juvenum rectorque , paterque,
 Omnia sunt faciem visa novare suam.

Illius adventu Pietas cum Pallade juncta
 Cælestem tectis imposuere pedem.

Composuit mores habitumque Modestia ; & urbi
 Exemplum placuit quod dedit una domus.

Non illic somni damnosa licentia regnat :
 Mensuram justæ quisque quietis habet.

Primaque cum radiis aurora retexerit orbem,
 Non confusa novæ tempora lucis eunt.

Ordine quæque suo , præscriptaque lege geruntur,
 Per varias artes dividiturque dies.

Temporibus certis festas cantatur ad aras ,
 Linguaque concordēs temperat arte sonos.

Temporibus certis superos & Numen adorant,
 Et precibus , solo corde loquente , vacant.

Nunc discenda suas facundia postulat horas :
 Unius ad vocem cetera turba fileat.

Ille

6. Seminarii Archiepiscopalis Mechlinia ab Illustrissimo Humberto à Præ-
 cipiano constitutus est Præses.

Ille movet dictis animos, moresque profanos
 Increpat erudiens, eloquioque tonat.
 Quod superat tempus studiis datur : otia nullam
 Quam perdant partem segnia lucis habent.
 Hæc sunt arma viri cælestia : vincitur illis
 Tartarus, obscœnum quidquid & Orcus habet.
 His sibi commissos armis instruxit alumnos,
 His docuit, vitium quâ queat arte premi.
 His rapuit mentes, & iter patefecit Olympo.
 Sublimes nullâ compede terra tenet.
 Hunc meriti cumulum Româ Caroloque probante,
 Virtuti pretium mitra pedumque datur.
 Cumque ex præteritis fas sit præscire futura,
 (Augurium quo non certius esse potest)
 Non ego, sed rerum spondet tibi fama priorum
 Commoda, quæ sponsi dotibus, Ipra, ferēs.
 Non opus ad nostras rumor quæ pertulit aures
 Dicere, quæque palam certior ipsa vides:
 Instruat ut festis populum sermone diebus,
 Ardentes animis subjiciatque faces:
 Ut pueros oleo vicina per oppida tingat,
 Firmet & in Latîâ millia multa fide.
 Sæpe opus hoc illum, primo cum lumine cœptum,
 Solis ad occasum continuasse ferunt.
 Sæpe labore dies brevior fuit : astra micabant,
 Frontibus hic fessas imposuitque manus.
 Nempe amor immemorem rapuit somniq; cibique.
 Tanta illi tenero pro grege cura fuit.
 Hoc ardore sibi summos devinxit & imos,
 Hoc sponsam merito nomen amantis habet.
 Ductoresque virum Batavi venerantur, amantque,
 Milite qui servant mœnia nostra suo.
 Venerat occidui visurus litora ponti,
 Urbs ubi nuda suis mœnibus orba patet.
 Olim dura capi murorum mole situque,
 Belligerasque sinu mittere prompta rates.

286 ELEGIARUM LIBER III.

Ipsæ Nereides, pater & Neptunus, in alto
Arcem vix poterant credere stare mari.

Diruta nunc tota est : portus vallatus arenâ
Stagnat, & egressum puppibus unda negat.

Litoris oppositi lugendæ causâ ruinæ
Invidia est : dominam noluit esse maris.

Præfulis adventûs it nuntia fama per urbem:
Lætior hâc populo non fuit ulla dies.

O quanto Dunkerka virum complexa favore!
Omnibus è cælo visus adesse fuit.

Obvia pastori longo plebs ordine vênit,
Consortem patriæ læta videre suæ.

Gallica sternuntur vexilla in limine primo,
Stabat & armatâ miles utrimque manu.

Strata super graditur, nec humum vestigia tangunt,
Æraque de summa concava turre sonant.

Rarus honor, majorque dari vix Regibus ipsis,
Mœnia victores cum subiêre, solet.

Ipra dato superis referas pro Præfule grates;
Grandius à cælo munus habere nequis.

Ac veluti fidum toto tibi spirat amorem
Pectore; sic illum, sicut amaris, ama.

Et procul à thalamo fallax abigatur adulter.
Mille habet insidias, mille latenter habet.

Illius occultum diffundunt verba venenum.
Cognita vox sponsi sit tibi sola tui.

Sectaque quæ dominæ cervicem flectere Romæ
Abnegat, illa tibi pestis habenda loco.

Sic te Præful erit dignus, tu Præfule digna,
Stabit & optatâ mutua pace fides.

ELEGIA X.

A.D

UNIVERSOS BELGII EPISCOPOS.

O Decora! ô nostri clarissima lumina seclî!
 Belgarum per quos stat sine labe fides.
 Nobile depositum vobis quod credidit æther,
 Tollet sacrilegâ nulla rapina manu.
 Non si Tartareis in vos ruat impia monstribus
 Styx, & vipereis ipsa Megæra comis.
 Mitra viros fortes generosaque pectora nutrit,
 Proque grege intrepidos, non timidosque mori.
 Hoc Deus, hoc fidei vertenda pericula nostræ,
 Hoc petit Ausoniæ religionis amor.
 Hoc decor officii, quo non sublimius ullum,
 Exigit. Ite, piâ bella movete manu.
 Dum junctis ad castra armis animisque venitis,
 Hostiles acies, Tartaraque ipsa tremunt.
 Non eversa levem promittunt impia fructum
 Agmina : victores præmia magna manent.
 Nomina Pontificum rutilabunt æmula stellis,
 Qui sibi commissis causa salutis erunt.
 Imposita est humeris animarum sarcina vestris,
 Ingens quo gravius non habet orbis onus.
 Magnum animæ pretium : non hanc sibi sanguine
 Credidit indignum conciliasse suo. (Christus
 Exemplumque dedit pastoribus : ipse redemit,
 Ipse, Meas vobis pascite, dixit, oves.
 Pectora quot stimulis ea vox cælestibus urget!
 Pascere quam gravis est, perpetuusque labor!
 Mille onus est operum : nescit bonus otia pastor,
 Præteritæque dies quæque quod addat, habet.
 Poma quot autumnus, segetes quot parturit æstas,
 Et quot florilegæ vere vagantur apes;
Vestra

Vestra tot exercent operosæ pectora curæ.

Nulla quiescendi tempora Præsul habet.

Ungere nunc opus est scabiem, subjectaque lana
Tubera, ne serpens viscera virus edat.

Nunc poscit nitido languens pecus amne lavari,
(Sæpe laboranti profuit unda gregi)

Nunc opus est clamore lupos canibusque fugare,
Nunc stabulis plenâ pabula ferre manu:

Et modò balantem per opacas quærere silvas,
Si procul incertam duxerit error ovem.

Nec pigeat pastorem humeris ad ovile referre,
Si qua sub ardenti languida sole jacet.

Sæpe etiam geminant aliena pericula curam,
Ne mala vicinam deferat aura luem.

Haud labor exiguus contagia pellere morbi:
Occultâ pecori transitione nocent.

Gallica quis nescit geminæ mala semina pestis?

E quibus hæc animam, corpus at illa necat.

Utraq; grande malû: nocet hæc, nocet illa: timenda

Utraque: plus tamen hâc illa furoris habet.

Quippe animæ gravior mors est quam corporis: illud
Interit; hanc pejor funere vita manet.

Mille subit mortes, totidem vitasque resumit,
Et cuperet verâ posse perire nece.

Nulla quies, finisque mali: mens semper acerbum
Vulnus, quo numquam conficiatur, alit.

Hoc est quod Tityi vultur, morstuque renascens
Indicat, ut pereat, ne pereatque jecur.

Hoc notat Ixion, dum se sequiturque, fugitque,
Suppliciumque rotæ sine carentis habet.

Gallia jam gaudet cessare pericula pestis

Unius: alterius jam prope finis adest.

Illam corporibus medicorum cura fugavit,

Hæc gladio Regis, Pontificisque cadet.

Ipsæ Deus cœpit convertere corda reorum,

Perficietque suum dextra potentis opus.

Nanne-

Nannetum 1. rediit ; positâ cervice rebeli
 Nectuntur capiti membra revulsa suo.
 O utinam exemplo reliquos ad ovile reducant,
 Perfidia primos quos habuere duces !
 Si redeant, læsamque fidem reparare laborent,
 Gloria præterito crimine major erit.
 At si quem retinent damnatæ vincula Sectæ,
 Major erit veteri crimine culpa recens.
 Nam cadere humanum est ; sed detestabile, nolle
 Surgere : nîl illo pejus Avernus habet.
 Ne peregrina lues patriæ contagia spiret,
 Præsulibus debet Belgica terra suis.
 At te, qui mitræ reliquos præcellis honore,
 Præcipuæ titulum laudis habere liquet.
 Ut vincant alii, vires pugnantibus addis,
 Certaue Præsulibus te duce palma venit.
 Ut nihil his obstet, nec inania fulmina mittant,
 Provisum est curæ sedulitate tuæ.
 Pars sua quemque tamen laudis, partique triumphî
 Respicit, ut partem quisque laboris habet.
 Hinc vati data materies. Ignoscite, vestris
 Inferiùs meritis si rude carmen eat.
 Non ego sum, qui vestra pari præconia versu
 Assequar : infirmum grande fatigat onus.
 Aut operæ præstare minus : vel, si nova semper
 Additis, æquari gloria vestra nequit.
 Vincitis : en superata filet, citharamque reponit
 Calliope : vinci nec sibi turpe putat.
 At si fortè meæ vitent oblivia Musæ,
 Nomina posteritas, factaque vestra leget.
 Quidquid erit, vatis tamen officiosa voluntas
 Ausa est exiguo magna referre sono.
 His alii meliora canant : me cana senectus
 Tardat, & ætatis pigra coërcet hiems.

T

EMI-

1. S. Facultas Theologica Nannetensis instrumentum appellationis revocavit,
 & Constitutioni Unigenitus univ. usque Ecclesiæ gloriose se exemplo subiecit.

EMINENTISSIMO
AC
REVERENDISSIMO DOMINO
D. THOMÆ PHILIPPO
S. R. E.
PRESBYTERO CARDINALI
DE ALSATIA DE BOUSSU
ARCHIEPISCOPO
MECHLINIENSI
BELGII PRIMATI, &c. &c.

Cùm præcipuum ex Cardinalitiæ Dignitatis insigni-
bus, Biretum scilicet Purpureum à S. D. N.
D. CLEMENTE XI. missum Mechliniæ reci-
peret, Cardinalitiam Dignitatem gratulatur no-
mine Provinciæ Flandro-Belgicæ Societatis
Jesu LIVINUS MEYERUS.



*Minentem Ecclesiæ Purpuram, &
parem meritis Dignitatem summis
Tibi infimisque communi gaudio
gratulantibus, Eminentissime Princeps,
submissâ veneratione accedimus clientes
omnium minimi. Ecquis enim, nisi aut ex-*
cors

cors omnino, aut invidus, taceat, dum vox mundi sonat? Omnes jure oportet participes esse lætitiæ, quando ad omnium commoda, communemque animarum & Patriæ salutem Tua se inclinat Sublimitas. Ne verò ab hoc communi obsequio, & à nobis præsertim multis titulis debito, retardemur novæ percussi fulgore Dignitatis, facit innata comitas Tua, & singularis humanitas, quæ splendore Purpuræ non minuitur, sed augetur: quæque est tanta, ac tam benigna, ut nos, tenuitatis meritò conscientiam territos, ultrò ad accessum alliciat, atque invitet. Quâ re nullâ aliâ ad Divinitatis similitudinem quamdam magis acceditur. Hæremus tamen ipso in limine, incerti, quid in tanta rerum, quæ in Te lucent, sublimium copia, primum ac potissimum admiremur. Tibi soli gratulentur alii; liceat nobis, & Tibi pariter gratulari & Purpuræ: utpote quæ non magis Te ornat, quàm à Te ornatur.

Fam si ad domestica, quæ Te circumstant, Generis & Prosapiæ decora respiciamus, hærendum nobis est denuo. Etenim Natales Tuos Illustrissimos, tacenti-

bus nobis, Historia loquitur, Orbis novit. Neque ignorat præclara non minus, quam antiqua Familiæ ornamenta, & heroica facinora Proavorum. Ac ne omnia (quamquam ita optante Te) taciti prætereamus; omnes meritò suspiciunt longâ retrò serie Comites de Boussu augusti Aurei Velleris Ordini quâdam hereditariâ bene de Patria merenda successione adscriptos. Quo virtutis nobilissimæ præmio, post defunctum ejusdem Ordinis Parentem Tuum, à Carolo II. æternæ memoriæ Rege nostro Clementissimo decoratus jam pridem fuit Carolus Ludovicus Frater Tuus superstes Princeps Chymiacensis: qui, uti in ceteris omnibus, ita hâc etiam parte præclare tuetur ac sustinet nominis & Generis sui dignitatem.

Laudes Tibi proprias, multas ac præcellentes, Eminentissime Princeps, operosè hic recenseri modestia Tua non patitur. Mavis enim (quod rarum est) solâ atque occultâ conscientia lætari bene factorum. Quâ quidem animi moderatione hoc ipsum consecutus es, ut nulla jam Te materia laudis prætereat. Omni quippe, inter mortales, præconio majus, omni virtute sublimius

mius est, laudem mereri ab omnibus, & laudari nolle. Hoc verè Christiani pectoris decus, & gentilis olim ignoravit Philosophia, & præsens seculi fastus haud satis assequitur. Sed hoc interim parta meritis gloria, cum radiis Solis habet commune, ut (quantumvis invita) suâ se semper luce manifestet. Ea certè, quæ Summus Ecclesiæ Pastor & Augustissimus Cæsar singularia planè de Te pridem tulerunt iudicia, nec taceri debent ob Testium Majestatem, nec possunt ob veritatis lucem abscondi, nec ob sui celsitudinem morsibus arrodi invidiorum. Orbis quippe Capita nec adulari solent, dum laudant; nec decipi, dum cognoscunt: quorum perspicaciam nihil latet, candorem nihil obfuscet, nihil extenuat præconii veritatem. Patere igitur, Princeps Eminentissime; ut ea, quæ utriusque Supremæ Potestatis oraculo scripta de Te sunt testimonia, agnoscat Orbis, præsentes legant, posteri mirentur.

Clemens XI. Pontifex Maximus, qui Petri naviculam inter sævientes hoc tempore errorum procellas felicissimè gubernat, de Te, cum adhuc in minoribus constitu-

tus eras, ad Philippum Erardum Episcopum Gandavensem scribebat in hæc verba. „ Libenter agnovimus comprobari opinionem sanè favorabilem, quam de præstantibus dotibus Dilecti Filii Comitis de Boussu Cathedralis istius Ecclesiæ Præpositi animo præconcepimus. „ Tum iterum paucis post mensibus : „ Dilectum „ Filium Comitem de Boussu Cubicularium „ nostrum honorarium ob præstantia, quibus insignitus est, non minùs Generis quàm „ virtutum decora, eo paternæ charitatis „ ac æstimationis loco habemus, ut ipse „ de Pontificia voluntate & autoritate omnia possit sibi meritò polliceri; quemadmodum illi, tibi que simul, citò, ut confidimus, ac luculenter constabit. „ Cum verò idem Pontifex (cujus memoriam fidelis Deo & Ecclesiæ posteritas venerabitur) sermonem ad Te, in Archi-Episcopali jam Sede constitutum, convertit : „ Magno, inquit, in pretio Te semper habuimus, ac simul optimos pietatis zeli-que sensus Paternâ prorsus charitate „ complexi sumus. „ Ipsius denique in testimonio, quod post collatam in Te Cardinalitiam

nalitiam Dignitatem accepimus, hæc leguntur : „ Præclaris dotibus Tuis atque „ virtutibus, imprimis autem eximio zelo, & invictæ constantiæ, quâ Ecclesiasticam libertatem, orthodoxam Doctrinam, ac S. Sedis auctoritatem hætenus propugnasti, jure quidem merito præmium debebatur, quo Te nuperrimè decoravimus. „

Paria sunt, quæ à Sacra Cæsarea Catholica Regia Majestate de Te pridem, atque ad Te perlata sunt, cum Te Consiliarius suis actualibus intimis annumeraret. Significavit Imperator & Rex noster Clementissimus, „ Animo se revolvisse ingentia gesta, & bene merita, quibus „ Nobilissima & antiqua Prosapia undè „ descenderes, Patriæ & communi bono „ per varia virtutum genera vel maximè „ commendatam se reddidisset. „ Tum propius ad Te, Tuæque merita respiciens, subdit : „ Quemadmodum præcipuè ipsemet Dominus Archi-Episcopus celeberrimis hisce Majorum suorum vestigiis insistendo per diversa non tantum Sanctæ Romanæ Ecclesiæ, verum etiam publicæ

„ rei & Patriæ amore suscepta negotia,
 „ æquè olim cum adhuc Sanctitatis Suae
 „ Prælati Domesticus audiret, ac nunc,
 „ utpote Archi-Episcopali Dignitate sua
 „ conspicuus, indefessus semper, & præ-
 „ sertim in jam diu ardua rerum vicissi-
 „ tudine, valde laudabilibus bene merendi
 „ studiis, singularem ubique sui existima-
 „ tionem sibi conciliasset. „ Adjunxit: „ In
 „ te præterea considerasse Majestatem suam
 „ Sacratissimam, eximiam in rebus dis-
 „ cutiendis prudentiam, excellentem Do-
 „ ctrinam, intemeratæque fidei & specia-
 „ lis probitatis perseverantiam, ac præcla-
 „ ras alias, quibus natura Te liberaliter
 „ exornasset, insigniores animi dotes &
 „ specimina. „

Atque hæc quidem tam multa, tamque
 eximia Doctrinæ, Virtutis, Prudentiæ,
 & indefessæ in rebus Fidei atque Imperii
 tractandis Constantiæ testimonia tum fue-
 runt data, cum te Romæ & Viennæ peni-
 tius inspexissent Pontifex & Imperator:
 tum, inquam, cum, qualis esses, non tunc
 famæ credebatur, sed usus coram & con-
 suetudo demonstrabat. Quid hisce præconiis
 illu-

illustrius, certiusque potest adferri, quæ ab incorrupta Majestatis fide manarunt?

Post hæc supervacaneum videri meritò posset, ea commemorare omnia, quæ de Tuis præcellentibus meritis atque virtutibus Primores Belgii Proceres dudum testati sunt. Unum, quod proprium Tibi & singulare est, quodque inter cetera apparet illustrius, præterire sit nefas. Illustrissimus Magni Mechliniensis Concilii Præses, cum Tibi, totius Illustrissimi Corporis nomine, Cardinalitiam gratularetur Dignitatem, inter cetera præclara, hoc potissimum extulit, quod perfectissimam Sacerdotium inter & Imperium concordiam Belgium Tibi Austriacum debeat. Adjiciebat Vir perspicacissimus, hæc concordia firmatâ, Fidem simul firmari & Sceptrum: has esse geminas columnas, quibus pax mundi nititur & decor: alterutrâ nutante, horrendum impendêre Chaos, & inevitabilem rerum confusionem. Hanc Vir ille sapientissimus tam necessariam communi Ecclesiæ & Imperii bono concordiam paternæ Tuæ charitati & singulari prudentiæ meritò est gratulatus. Etenim sciunt omnes,

omnes, & Acta Ecclesiæ Mechliniensis luci publicæ data disertissimè testantur, res quasque arduas, quæ ad hanc pacem & concordiam conservandam faciunt, Tuo te ingenio concipere, quod à natura nactus es acre, perspicax, eruditione & usu doctum: tum quæ comprehendisti, disponere prudenter, constanter exequi, ac regere denique per Te, causæ Dei & Patriæ semper intentum. Quibus momentis qui se inclinari non sinit, nescio an humano regimine duci possit.

Quis non miretur Tuam in rebus singulis, minimis juxta ac maximis, attentam semper & indefessam vigilantiam? Gregem Tibi Divinitus commissum lustras frequentissimè, omnibus verè Pastor, verè Pater. Ad Palatium, quod Successoribus exstruxisti, facilis omnibus accessus patet. Introëuntibus ad Te statim se prodit oris comitas, frontis serenitas, cordis benevolentia & amabilis quædam sine fastu majestas. Domesticos Paternâ curâ completis, Tui propemodum oblitus. Religionis & Pietatis officiis famulatus Tuus vacat constanter urgente Te, ac rationem

exposcente. Divinis intersunt quotidie Sacrificante Te : Vacant communibus precibus Te recitante. Palatium denique totum odorem spirat modestiæ & probitatis. Tantum valet, ad Dei cultum excitandum in subditis, Principis exemplum. Mensam omnibus habes hospitalem, frugalem tamen; ut sacris Tuis redditibus vivant verecundæ Familiæ, obærata Claustra, Religiosæ Domus, publici pauperes : qui omnes majorem ex ære Tuo summam in elemosynis numerant, quàm Tu ipse consumas.

Talem Te futurum aliquando, ex ipsa juventute Tua licuit ominari. Erant jam tum in Te matura omnia præter ætatem, pietas maximè. Humaniorum Literarum Gymnasium frequentabant unà Tecum Bruxellis Natali loco lectissimi adolescentes, præter alios Nobilitatis Titulo distinctos, Equitibus geniti Aurei Velleris facile decem : quibus omnibus palmam constanter præripiebas, Commilitonibus Tuis exemplo & invidiæ. Romam profectus, florentissimum Collegium Germanicum, inter Italiæ, Germaniæ, Hungariæ florem
No-

*Nobilitatis , exornasti Convictor. Quæ
 Domus , pietatis non minùs quàm rerum
 Theologicarum Magistra, maximarum sem-
 per fuit Seminarium Dignitatum. Etenim
 ex illa olim prodierunt Andreas, Tuus in
 Archi-Episcopali Sede Prædecessor , &
 Ferdinandus hodie Namurcensis. Ex illa
 prodierunt , Tui illic contubernales & con-
 discipuli , Illustrissimi & Reverendissimi
 Viri Ladislaus Adamus Comes Erdeodi,
 Nitriensis , & Comes Sigismundus Collo-
 nitz , primùm Vacciensis, nunc Viennen-
 sis , Episcopi : qui duo , cum in ipsa Urbe
 Cæsarea (primo inter Belgas exemplo) à
 Nuntio tum Apostolico, nunc Eminentissi-
 mo S. R. E. Cardinali Spinola Archi-
 Episcopus consecrareris , Sacratissimos Te-
 cum ritus peregerunt. Primus denique es
 Ordinis Hierarchici, quem in Belgio Au-
 gustissimus Cæsar Consiliariis suis actuali-
 bus intimis annumeravit : Primus, è Bel-
 gii Archi-Episcopis , qui in Eminentissi-
 morum Collegium umquam fuerit adlectus.
 Hoc in honoris fastigio positus , tamquam
 fulgentissimum Belgii Sidus , Tibi ardes,
 alius luces.*

Talem

Talem ac tantum Te Tibi, Eminentissime Princeps, clientes Tui minimi gratulamur. Omnium & singulorum votum est, ut Te talem Deus Ecclesiae, Imperio, bonis omnibus, communi Austriaci Belgii atque Orbis utilitati multos annos conferret. Sanctissimo huic fini ab Omnipotenti impetrando Sacerdotum Sacrificia, omnium preces, atque nos ipsos totos profundissima veneratione offerimus, atque dicamus.

302 C A R D I N A L I A L S A T I O

EMINENTISSIMO PRINCIPI
S. R. E. C A R D I N A L I
DE ALSATIA DE BOUSSU
A R C H I - E P I S C O P O
M E C H L I N I E N S I
P R I M A T I B E L G I I , & c. & c.

O Flos Alfacidum! famam & decora alta tuorum
Qui superas, pariter virtute & origine Princeps.
Quod natura dedit Proavis, hoc cellior ornat
Purpura, quam meritis transmisit Roma, probante
Cæsare. Nempe ille imperii rerumque suarum
Concilio pridem ascitum, nunc denique gaudet
Purpureos inter Patres Sacrumque Senatum
Evectum aspicere, & geminum fulcire tribunal.
Quàm celeri pennâ sese super ardua virtus,
Nobilitasque levat! quando vis illa, vigorque
Nativus, cæli meliori accenditur igne.

Fas mihi sit (frendente licèt , morsusque minante
Invidiâ) plausus Belgarum & publica mundi
Vota sequi. Mihi Mæonii quis pectoris œstrum
Excitet? Ô me per tenues si Pegasus auras
Tollat humo , pennisque ferat , fontemque recludat
Aonium! merito ut valeam comprehendere versu
Ingenium, moresque pios, vultumque, animumque
Omnibus accessu facilem, fastuque carentem:
Quotque tibi natura tulit , quotque addidit æther
Munera, quæ meritò veniens mirabitur ætas.
Non mihi si centum resonet vox ferrea linguis,
Omnia commemorem. Vatem data copia vincit.

At

At veluti paucas si quis de litore arenas
 Colligat, aut raras digito decerpit aristas,
 Sic partem exiguam meritorum Musa tuorum
 Nostra leget. Tenuis placido, quo cetera, vultu
 Respice conatus : nec amorem ex carmine cense.

Te genuit Bruxella, suoque superbit alumno :
 Nobilium Bruxella parens, altrixque virorum.
 Hos inter titulis clara, & longo ordine Avorum
 Emicat, Heroesque armis palmâque decoros
 Et Chimæa domus, domus & Bouffuvia monstrat :
 Nunc geminâ radice potens. Sic Savus in Istrum
 Cum fluit extenditque sinum, capit alveus ingens
 Unus aquas, miscetque duas. Spatiøsior amnis
 Fonte celer gemino ruit, & tumida æquora pulsat.
 Hæc tu, consilio Divûm, de stirpe creatus,
 Illustres Majorum animos cum lacte bibisti.
 Quippe tenax natura, patrum transfundit in ipsos
 Virtutem pueros : aquilâ nec matre columba
 Nascitur, acceptosque ostendit originis ignes
 Acer equus : sive ille lacus innare patentes ;
 Seu celeres crura in gyros glomerare laborat
 Sessorem tergo accipiens ; sive impete fertur
 Igneus, & metâ victor tenet. Omnia partûs
 Dant documenta sui : crescensque agnoscitur infans
 Quo sit patre fatus. Paucis vix editus horis
 Jam Superis certamen eras. Sibi quisque Deorum
 Cunarum optabat curam, sobolisque regendæ.

Mars qui tot Proavis belli inspiravit amorem,
 Argento ductam galeam, gladiumque coruscans
 Fulmineum, cælo citus advolat, atque ita fatur :
 Parve puer, juvenem cum te formaverit ætas,
 Facta tibi ante oculos veterum volvantur Avorum,
 Gentis & Alsatiæ stimulet decus. Aspice fulvum
 Flandria quem præfert scuto, ostentatque Leonem.
 Hunc victor bello domuit, retulitque Philippus
 Alsatius, spoliū ardentis memorabile pugnæ

Alba-

304 C A R D I N A L I A L S A T I O
 Albano regi ereptum. Tulit alter * ab undis
 Eois, quem Bruga colit servatque cruorem
 Divini lateris. Proh quanta pericula terrâ,
 Quanta mari passus! quando dura omnia rumpens,
 Turcarum Imperium & Syriæ quater attigit ora.
 At nunc fama oculis sese vicinior offert,
 Exemplumque Patris: quo non præstantius ullum
 Posteritas stupefacta canet. Jam Gallia muros
 Cinxerat Alnardæ, gyroque incluserat arcto,
 Marte premens subito, & circumfulgentibus armis.
 Hispani vallum intrepidâ statione tenebant:
 Exigui numero, sed bello exercita virtus.
 Nec non & curæ legio commissa paternæ
 Stabat in excubiis, & propugnacula Gallo
 Proxima servabat: sed ab agmine ductor & urbe
 Alsatius procul unus erat. Quem ut fama periculi
 Perculit ignarum, stimulis agitatus honoris,
 Hæc secum: Mene absentem, amplexuque meorum
 Avulsum, hostiles non posse repellere turmas
 Mœnibus, & pulchra laudem pro morte pacisci?
 Nempe hi pro Patria vitam cum sanguine fundent:
 Me segnem, & pugna securum hæc terra tenebit?
 Non adeo indecorem genuit Pater. Aut ego victor
 Cum sociis ferar, aut vitâ defungar honestâ.
 Nulla dies me degenerem, nulla arguet ætas.
 Dixit, & ad muros properans, ferrum inter & ignem,
 Hostilemque aciem statuit perrumpere, & intra
 Obfessos, si fata sinant, se immittere muros,
 Auxilium sociis armis laturus & urbi.
 Pœnorum qualis vastator montibus errans
 Substitit, infremuitque Leo, si fortè rudentes
 Secreto longè catulos audivit ab antro,
 Et strepitum circa venantûm, & cornua rauca:
 Ille jubam excutiens ferus advolat: obvia cedunt
 Cum sonitu virgulta: oculis micat acribus ignis.

Sic

* Theodoricus Alsatius.

Sic animo fremit Alsatius, muroque propinquans
 Rimatur quâ parte viam sibi rumpat ad urbem.
 Quid faciat? quæ dextra ausum fortuna secundet?
 Castra inimica tenent aditus. Hinc moenia Scaldis
 Præterit, & multam admittit cava fossa paludem.
 Pontibus abruptis nulla est via. Litore ab alto
 Defilit, oppositamque natans comprehendere ripam,
 Et recipi portis, sociasque attingere dextras
 Nititur impavidus : nec vincere pectoris ignes
 Unda, nec algentis potuit violentia brumæ.
 Crista viri ut summâ rutilans apparuit undâ,
 Conclamant hostes : simul intonuit cava circum
 Tempora tempestas plumbi : sed vulnera nanti
 Nulla tulit. Socii incolumem læto ore salutant :
 Militibusque animi fervent ductore recepto.
 Tantum martis amor, generosaque pectora pulsans
 Fama valet, mediâque in morte interrita virtus,
 Atque animus patriæque studens, Regique fidelis.
 At quamquam ille necem, ferro inviolatus & igne,
 Evasis superans : tamen acri frigore nervi
 Contracti stupuere; gelu penetrante medullas,
 Ossaque. Nec Solis radii, nec balnea veris,
 Balsamaque, & quidquid medicorum ars irrita finxit,
 Reddere præteritum membris potuere vigorem.
 Septem hiemes, totidemque infirmo corpore messes
 Duravit lentè moriens : thalamoque fòcoque
 Membra caduca fovens. Mors pallida donec honesto
 Funere magnam animam rutilantibus intulit astris.
 Quid memorem aurato decoratam Vellere longam
 Sanguinis Alsatii seriem? quæ munera Regum
 Magnificâ collata manu, meritisque repensa
 Non interrupto per secula servat honore
 Clara domus,* Carolusq; feret mox proximus heres,
Regia

V

* Numerat Familia Eminentissimi Domini Cardinalis, octo, aut plures
 Equites Aurei Velleris : iis adscriptus est à Carolo II. Rege Catholico anno
 1694. Carolus Ludovicus de Alsatia Comes de Bouffu Princeps de Chimay
 Eminentissimi Domini Germanus Frater.

Regia qui ad feros transmittet dona nepotes.
 Hæc Mavors ubi dicta dedit, puerumque paternis
 Laudibus ad famæ Proavos æquantis amorem
 Incendit, cunis galeam suspendit, & ensen
 Sanguine adhuc, quondamq; hostili cæde cruentum.

Continuò Pietas, tacitoque Modestia passu
 Tecta subit, Pallasque humerum nudata sinistrum.
 Non tamen ære caput protecta, nec ægide pectus:
 At ramo præcincta comas florentis olivæ,
 Atque manu gestans venturæ insignia pacis.
 Et Pietas complexa crucem de more tenebat.
 Quæ simul infantis tetigere cubilia, & ora
 Attonitæ formosa vident, oculosque nitorem
 Sidereum spirare : inimicum protinus ensen
 Cum galea procul abjiciunt. Satis ille, superque
 Tritus Avis : Puer hic decora ad majora creatus
 Noster erit, dixere Deæ. Dein Marte fugato,
 Pectore diffundunt cælestia dona, novumque
 Quod stupeant serâ venturi à stirpe nepotes,
 Aggrediuntur opus. Mentis limare recessus
 Incipit, ingeniumque capax & ad omnia vivum
 Nata Jovis fingit. Fugiunt Torporque, Stuporque,
 Segnitiefque, &, Nox partu quos edidit uno
 Error, & Erroris comes Ignorantia veri.
 Nec mora, cælesti pueri mens luce refulsit.
 Non aliter, tenebris sub Tartara nigra fugatis,
 Solis equi summo tollentes pectora ponto
 Spiravêre diem, rebusque dedêre colorem.
 Nec non & Pietas, simplexque Modestia ad omnem
 Numinis erudiunt cultum. Spernuntur inanes
 Jam nunc divitiæ, tumidâque Superbia fronte,
 Et Venus, & pueri stillantes felle sagittæ,
 Vanaque Lætitia, & quidquid sub imagine falsa
 Sensibus illudit miserorum, & fallit hiantes.
 Sola placent, nullo quæ tempore finiet ætas,
 Æternumque micant : solis juvat ignibus uri

Astrorum, atque humilis speciẽ contemnere terræ.

Postquam operis posuere Deæ primordia sacri,
Factorum seriem, & qui deinde sequentur honores
Ore canunt sacro, & fatorum oracula pandunt.

Maeste alacri virtute puer! florente juventâ
Sublimis cum te Studiorum incenderit ardor,
Æquævos longè tua post vestigia linquens
Victor eris, * primasque feres certamine palmas.

Seu te Grammaticâ egressum divina Poësis
Culmine Parnassi statuet; seu voce solutâ
Eloquioque tones; seu rerum exordia prima,
Stellarumque ortum observes, pelagique recursum
Instabilem, aut legis divinæ oracula volvas:

Nusquam aberit quæ te secreta per omnia ducens,
Exacuat mentem Pallas, tenuetque laborem.

Artibus excultam tantis quæ gloria mentem
Excipiet! tibi Pontificum, tibi curia Regum
Pandetur, Fideique & Sceptri arcana patefcent.

Hæc ubi fatidico cecinerunt ore, Galerum
Purpureum appendunt cunis, mitramq; , Pedumq; ,
Pastorale decus, venturique omen honoris.

Blandaue figentes cælestibus oscula labris,
Infanti dixere vale. Sensisse putares:

Usque adeo roseisque genis, atque ore renidet
Parvulus, & divas nutu, pro voce, salutat.

Nunc age, qui fuerint præfagia tanta secuti
Eventus, moresque & facta illustria cantu
Aggrediar: rerum quando mihi nobilis ordo
Materiam præbet Musis & Apolline dignam.

Vix decimum crescens ætas expleverat annum,
Discentem cum te Latiae primordia linguæ
Instituere Patres, elementaque prima dedere.

Quantum animis discrimen inest! perniciosior omnes
Deferis, & sociis longè post terga relictis,

V 2 Ad

* Bruxellis in Gymnasio Societatis JESU in singulis ferè scholis primam
palnam retulit.

Ad metam enitens properas. Superata juvenus
 Ingenium stupet, & palmæ gratatur honorem.
 Certantem circi sic pulvere currus Achillem
 Ex oculis volitantem aufert: quem ponè secuti
 Quadrijugos stimulant alii, increpitantque flagello
 Nequidquam: ille fugâ volucres prævertitur Euros.
 Palladio haud aliter certamine mens tua victos
 Antevolat, turbamque procul respectat anhelam.
 Nec pietas animum excelsum, nec gratia mores
 Compta fugit. Blandum cunctis aspirat amorem
 Majestas, pulcroque nitens in corpore virtus.
 Nîl incompositum, nîl durum, aut acre relinquens,
 Ipsa regit gressus, gestumque Modestia fingit.

Famaque mox Belgarum animis allapsa canebat
 Hunc olim bello juvenem & cælestibus armis
 Venturum auxilio Fidei, excidioque daturum
 Tartareas errorum acies, quæ fronte rebelli
 Excussère jugum Italiæ, populumque sequacem
 In partem traxère doli, Sectæque nefandæ.
 Ipsi etiam Hesperix Regi, qui temperat Indos
 Imperio, Belgasque regit, Romanaque jura
 Vindicat ense sacro, pernici per freta pennâ
 Fama eadem retulit, primâ sudare palæstrâ
 Stirpe satum Alsatiâ, quondam qui Numinis aris
 Adscriptus, populum exemplo vitæque probatâ
 Excitet, inspiretque sacros languentibus ignes.
 Qui rumor postquam ad Regem penetravit Iberum,
 Virtuti exemplo dare præmia digna parabat
 Egregius meriti censor; queis panderet amplam
 Ad majora viam, limenque aperiret honori.

Stat vetus, & reliquis sese altiùs urbibus effert
 Ganda, caput Flandrorum, & Cæsaris inclyta cunis,
 Carolus Austriacus quibus olim vagiit infans.
 Urbe ingens mediâ duplici cum fornice templum,
 Atque aris terram supraque infraque superbum
 Conspicitur, Comitum donis, priscâque verendum
 Relli-

Relligione patrum, Myſtarumque ordine ſacro.
 Tempore fortè illo ſedes ſuprema vacabat
 Præpoſiti, (patrio ſic illum nomine dicunt :
 Vox quamquam priſcos latuit, reſq; ipſa, Poëtas.)
 Hæc meritis Regi ſtatio digniſſima viſa :
 Præpoſuitque * viris juvenem, cui cedere pronus
 Debeat, atque omnis venienti aſſurgere cœtus.
 Ergo inter ſacroſque patres, & vertice cano
 Conſpicuos, ætate minor, ſed acumine mentis
 Et virtute ſenes æquans, ſedet altior unus
 Aſſatus, primumque chori ſortitur honorem.
 Hoc titulo inſignē, & ſtudia ad graviora proſectū
 Doctæ ſinu accepit fovitque Colonia, † Rheni
 Margine quam poſitam rapidis pater alluit undis.
 Hic tu difficiles quot habet Dialectica nodos,
 Certandique modos varios, variasque figuras
 Diſcis : amans veri radicem aperire latentis,
 Atque aciem, fallax ne quâ ſe ſubtrahat hoſtis,
 Inſtruere, & preſſo fugienti inſiſtere paſſu.
 Tum rixas vitare, & inania tollere curas
 Prælia verborum, & fucos rationis egentes.
 Sæpe etenim ſenſu ambiguo latet abditus error,
 Et veri incautos ſpecies capit. Artibus illis
 Gens aſſueta dolis, nec aperto fidere bello
 Auſa, ſolet ſenſus tenebris velare malignos,
 Et verſare pedem inſtabilem, nec figere greſſum.
 Marte vago, ſemperque novos captare reſſus.
 Non aliter quam ſi leporis veſtigia naſtus
 Certa canis, ſtringat fugientem, & curſibus acer
 Jam jam dente premat : ſaltu hic fruſtratur hiantem
 Obliquanſque fugam, nunc hac, nunc proſilit illac,
 Vimque dolo eludit : tum ſicubi frondea vallem
 Obtexunt latera, & virgulta ſonantia dumis,

V 3

Huc

* Cum eſſet in Poëſi à Rege creatus eſt Præpoſitus Cathedralis Eccleſiæ,
 S. Bavoniæ Gandavi.

† Colonia apud PP. Societatis in Collegio Trium Coronatorum Philoſophiæ
 dedit operam,

Huc pavitans fugit, & silvâ se condit opacâ.
 Hunc morem servant, atque hac se fraude tuentur
 Quos deserta fides scopulosa per invia cæcos
 Præcipitat : (neque enim exitium , aut vim fulminis
 Indocilis cervix , & flecti nescius error.) (horret
 Mille dolis martem instaurant , mille abdita tentant
 Effugia , & trito hæreticis umbone teguntur.
 Dicere quippe eadem , & mox dicta negare parati ,
 Si res læva cadat , laqueique ambage tenentur.
 Hos contra dedit arma tibi , purisque Minerva
 Lustravit mentem radiis caligine pulsâ :

Ne quâ fraude gregem , tibi quem modo credidit
 Invadant , lacerentq; lupi , fallantq; veneno. (æther,

Dein motus naturæ omnes , atque omnia rerum
 Semina scrutaris : quâ vi modo litora pontus
 Summa tumens feriat ; versis modo litora vitet
 Fluctibus , & vacuæ longè nudentur arenæ.

Unde lacus , fluviique gelu durentur , & atris
 Nubibus erumpens crepitanti grandine turbo
 Vitibus , & curvis stragem meditetur aristis.

Nec non & fixâ stellas regione micantes ,
 Astraque mota notans , quo singula limite distent
 Metiris radio : num Sol , num Terra feratur
 Aëra per vacuum : quæ causa in cornua Lunam
 Contrahat , & demptis modo cornibus impleat orbē.
 Omnia scrutanti patet ingens machina mundi ,
 Et natura sinus aperit , secretaque pandit.

Nec satis est didicisse : palam sed cuncta tueri ,
 Et conferre pedem , vibrataque tela retrorsum
 Vertere , nec trepido titubantem hædere palato ,
 Hoc opus , hic labor est. Paucis ea gloria cessit.
 At te solventem nexus , nodosque secantem
 Implicitos , mediâ victorem exire palæstrâ
 Obstupuere omnes : lætæque sonantia plausu
 Atria gratantur. Scires à Pallade doctum.

Dein te Roma , caput mundi , morumq; Magistra ,
 Christia-

Christiadumque parens, sacro quæ vertice rebus
 Altior humanis Cathedræ præfulget honore,
 Discipulum læta accepit, strinxitque lacertis.
 Urbe domus mediâ est studiis agitata Minervæ.
 Hic se continuè exercet Germana juvenus *
 Artibus incumbens variis. Pars juris alumna
 Pontificum volvit leges: pars mentem animumque
 Limans marte sacro, fidei quibus impetat hostes
 Arma parat: pars Divinæ penetrare recessus
 Mentis, & ad fidei normam componere mores
 Nititur, indomitosque animi compescere motus.
 Fervet opus, pulcrisque omnes conatibus instant
 Parti quisque suæ. Quem tu, celsissime Princeps,
 Ingressus cœtum, stadiique ardentis arenam,
 Partito reliquis operi, triplicique labori
 Sufficis, atque uno triplicem fers vertice palmam.
 Nam postquam rediens sol per duodena cucurrit
 Signa quater, totidemque exegit cursibus annos,
 Te pariter studia emensum metâque potitum
 Laureâ Doctoris titulo decoravit, † & inter
 Conspicuum Eximios numeravit fama Magistros.
 Ante tamen vario tentatum examinis æstu
 Pectus erat, quotiesque acri es vexatus arenâ,
 Victorem toties retulisti ex agmine gressum.
 Publica quin etiam ingenii documenta dedisti.
 Quippe theses geminas gemino tutatus honore.
 Harum aliæ hæreticis clademque fugamque minatæ,
 Pugnacem eduxere aciem. Pars altera pugna
 Mitior, oppositos elisit marte modesto
 Conatus: luctæque fuit victoria finis.

Interea toti Clemens qui præsidet Orbi,
 Palladis ora Deæ noctis sub imagine vidit,

V 4

Cum

* In Collegio Germanico, & Hungarico habitavit Convictor annis tribus, in Seminario Romano anno uno, quibus studuit Theologia.

† Absolutis Disputationibus omnibus, defensisque publicè Thesis, Laureâ Doctoris est coronatus in Academia Gregoriana Collegii Romani Societatis JESU.

Cum tacitis curas hominum nox tolleret alis.
 Diva manu Comitem Alsatium complexa tenebat.
 Tum sic orsa loqui. Princeps qui sedibus hospes
 Successit Latiis, quas, aspice, pectore flammæ
 Spires, Avis Atavisq; potens. Martem ille profanum
 Exosus, sacram Ausoniæ Sedemque, fidemque
 Proteget ingenio. Jam nunc & Gallia turpi
 Diffidio laceranda tremit. Jam & Belgica tellus,
 Clara viris studiisque, at mox turbanda tumultu
 Paucorum, fremit arma parans : quos ille potenti
 Marte premet, flectens animos, pacemque reducens.
 Hæc Pallas postquam est effata, manuq; prehensum
 Admovit thalamo juvenem, secessit in auras.
 Excussus somno Clemens, modo visa retractat
 Multa putans, speciesque animo juvenisque Deæq;
 Occurrens redit, atque oculis vigilantis oberrat.
 Miratur quem tanto operi designet olympus,
 Quis priscæ vindex fidei revocare rebelles
 Possit ad obsequium, positoque reducere fastu,
 Et totum fidei submittere legibus orbem.

Jamque pruinosas aurora removerat umbras.
 Alsatius Princeps cœtu de more coacto
 Errantes contra furias certamen inibat.
 Conveniunt Doctorum acies, urbisque Senatus,
 Purpureique Patres, avidi cognoscere pugnae
 Eventum. Solio ante alios sublimior omnes
 Affidet, aeterni claves cui credit Olympi
 Numen, quique hominum noxas solvitque, ligatq;
 Confessu juvenis medio stetit ore sereno
 Impavidus : Patrumque fidem, divinaque jura
 Pontificum, & Christo sponse oracula falli
 Nescia tutatur : vivo tum pectoris æstu
 Attollens vocem * orator, sermone Latino
 Intonuit. Stetit attonitis sacer auribus ordo.
 Et quantum Latiae valeat facundia linguæ

Tunc

* Orationem Latinam coram Pontifice habuit.

Tunc patuit. Speciem miratus & ora loquentis,
 Lumina in Alfatium Clemens defixa tenebat.
 Visorumque memor, Pallas quæ nocte silenti
 Pontifici spectanda dedit : Proh pectore robur
 Quantum ostentat ! ait : doctæ quæ gratia linguæ !
 Credo equidem (neque enim noctis me fallit imago,
 Atque animo nimium species mihi nota recurſat.)
 Hunc eſſe, Auſonias olim qui proteget arces,
 Aufaque paucorum temeraria, vimque furentem,
 Quâ terramque, polumq; & fulmina lenta laceſſent,
 Comprimet, Auſtriacâ virtute & Cæſare fultus.
 Ex illo Alfatium miro complexus amore
 Signa dedit Clemens animi manifeſta paterni,
 Miratus celſam juvenili in corpore mentem,
 Moresque, & tantis dignos natalibus ignes.

Postquam te docuit Pallas, promiſſaque ſolvit
 Artibus erudiens : clarâ ſe in luce videndam
 Obtulit, & blando Pietas ſic ore locuta eſt.
 Illa ego naſcenti ſacræ quæ ſemina flammæ
 Prima dedi : nunc imperio tibi miſſa Tonantis
 Juſſa fero. Tu cede Deo, tu cede vocanti
 Quo te cumque trahit, quo ſpiritus æthere ab alto
 Sollicitat, ſtimulis agitans. Ne te mora ſegnem
 Ulla brevis teneat. Scelus eſt contemnere Divûm
 Imperia, atque obicem monitis opponere noſtris.
 Neve animum dubio trahat in contraria motu
 Conſilia, incertoque anceps ſententia nutet:
 Hunc ſequere : oſtentatq; crucem quam dextrâ tene-
 Hoc dicto, ex oculis ſuperas remeavit ad oras, (bat.
 Thuriferumque abiens longè ſpiravit odorem.
 At cita per venas, per cor tibi flamma cucurrit
 Fulminis in morem, liquefactaq; Numine mens eſt.
 Saucius exclamas : Sequimur te Diva vocantem
 Quo ducis, monitiſque alacres paremus, & olim
 Quam ſenſi, igneſcunt veteri præcordia flammâ.
 Adſis ô, faveaſque, & gandibus annue cœptis.

Terra

Terra vale : sequor astra volens , sequor omina cæli
 Quo me sancta vocant. Dixit, Dominique volutus
 Ante pedes, noctem lacrymis votisque fatigat.
 Eoas Titan oriens vix liquerat undas,
 Propositique tenax rutilis cum vestibus ense
 Deposito, indutusque sacris, & vertice raso
 Mystra novus stetit ante aras. Volat æthera in altum
 Victima, quæ Solymæ moriens in colle pependit.
 Et quamquam reditum, studiis sacrisque peractis,
 Proxima suadebant properantis frigora brumæ:
 Non prius Ausonia dulci, Romaque relicta
 Carpere iter patriæ, carosque revivere Belgas
 Cura subit, quàm Pontificis dedit oscula plantis
 Supplex, amplexuque Pater bene dixit eunti
 Multa vovens, memoriq; absentē mente reponens.

Ergo ubi te reducem complexa est Belgica tellus
 Ornatus venerata sacros, venerata coronam
 Verticis : excepit gratanti protinus ore
 Ordo Sacerdotum assurgens, primâque locavit
 Parte chori. Resonant templi pulsa atria cantu
 Magnifico, gratesque Deo persolvere certant
 Præsidis adventu læti : quos deinde benigno
 Accipis alloquio, dextrasque amplexus inhæres.

Nunc mihi Parnassi colles Heliconaque Musæ
 Pandite, quæque virum dein sit fortuna secuta,
 Et quibus ad culmen gradibus penetrarit honoris
 Dicite : scitis enim Divæ, & memorare potestis.
 Principio tibi cura gregis commissa tuendi, *
 Impositæque vices Antistitis, atque onus urbis,
 Gandavo Erardus quoties migrare relicto
 Cogitur, & viduam Pastore relinquere caulam.
 Tanta animo mox emicuit probitasque, fidesque,
 Gratiaque, & dubiis prudentia cognita rebus,
 Curarumque capax, & natum ad grandia pectus.
 Scilicet assensu populi Mitrâque Pedoque

Jam

* Româ redux statutus est Gandavi Vicarius in absentia Episcopi.

Jam tum dignus eras. Votis tantum obstitit ætas
Immatura nimis, tantis & honoribus impar.

Interea petere Italiam, Romamque reverti
Non spes ulla quidem, (neq; enim præcordia pulsat
Ambitio) rerum sed densa negotia cogunt.
His finis postquam positus, curæque quierunt:
Protinus admissio Sacræ penetralibus aulæ
Alloquio patuere fores, atque ora subire
Pontificis summi licuit. Memor ille paterni
Pridem animi, priscosque ardens cumulare favores,
Prælatis, * queis cura domûs, quibus atria semper
Sancta patent, socium te junxit, & insuper auro
Porrexit radiante crucem: pars intima cujus
Ligni particulam Solymæ de colle cruento
Continet effossam. Quo non pretiosius ullum
Donû mundus habet. Sed enim quoq; dextera dantis
Adjuvat, & pretii majestas auget honorem.

Vix iterum Latio redeuntem Flandria vidit,
Iprensi cum te populo dare Roma parabat †
Pastorem, Cathedramque novi fulgoris egentem
In priscum revocare decus. Sed gloria major
Rupit opus coeptum: Clemensque à Cæsare * vinci
Gavissus, decora Alsatum ad majora vocanti
Annuit, & primâ decoravit Sede merentem,
Vertice Belgiacis Cathedris quæ celsior una
Eminet, & Sacro Primatûs fulget honore.

Jamque tribus tibi bis lustris accesserat annus
Septimus, Austriaca quando novus hospes in aulâ
Oscula Cæsareæ meruisti figere dextræ.
Virtutem Cæsar miratus & indolis altæ
Ingenium, Mitræ voluit fulgore decorum
Aspicere, & solitos peragi sacro ordine ritus.

Festa

* Prælati cubiculi Pontificii honorariis adscriptus.

† Redux in Belgium à Pontifice destinatur Cathedra Iprensi.

* Ab Augustissimo Cæsare nominatus est ad Sedem Archiepiscopalem Mechliniensem.

Festa dies aderat, Latiis quâ missus ab oris*
 Nuntius, Austriacæ jam non novus incola terræ,
 Impositâ de more manu sacrare parabat
 Alsatium. Ornantur splendenti altaria cultu.
 Aurati volvunt tripodes laquearia circum
 Undantem thuris nebulam : quæ munera nostris
 Mittit Arabs templis. Cæli se visa repentè
 Atria dividere, & rutilam devolvere nubem
 Tecta super. Domus insolito splendore reluxit.
 Astitit extemplo, ruptâque è nube refulsit
 Forma Deæ non visa priùs, quæ munera Divûm
 Missa manu per inane tulit : capitique micantem
 (Multiplici gemmâ medium cingente pyropum)
 Imposuit Mitram, Sacri gestamen honoris.
 Aurum dat digitis, crux aurea pectore pendet.
 Ingredierisque novus (Sacris de more peractis)
 Antistes. Comites prisco tibi fœdere juncti †
 Ornatu simili assistunt, quibus Infula textit
 Nuper Sacra caput : studiisque poliverat olim
 Roma diu paribus : tecto quoque foverat uno.

Finibus Austriacis redeuntem & rura petentem
 Belgiaca, excepit læto* Mechlinia plausu.
 Quippe ubi cara subis dilectæ moenia sponsæ,
 Omnia lætitiâ testantur. Fonte relicto
 Adfuit, & summis placidum caput extulit undis
 Dilia, festivâ redimitus arundine frontem,
 Muscosamque tenens humero super incubat urnam.
 Urbs excita ruit : turris tonat ære canoro :
 Floribus & ramis via sternitur : atria prima
 Obsidet, & templi subeuntem limina ducit
 Ordo sacer, festasque Patrem comitatur ad aras.

Ponè

* Viennæ consecratur Archi-episcopus ab Illustrissimo tunc Nuntio Apostolico, nunc Eminentissimo S. R. E. Cardinali Spinola.

† Assistunt Episcopi duo, ipsius olim Romæ in Collegio Germanico & Hungarico Condiscipuli.

* Viennâ redux in Ecclesiam suam Metropolitanam solemniter introducitur.

Ponè aditus rumpit patefacto cardine vulgus
 Densum humeris. Nequeunt expleri corda tuendo
 Ora optata viri, majestatemque verendam,
 Flagrantesque oculos, & plenum Numine pectus.
 Deinde ubi nox atrâ involvit caligine terras,
 Surripuitque diem : festivis compita flammis
 Urbe micant totâ, tenebrasque incendia vincunt.
 Nec non tecta super fulgenti stridula sulco
 Ignea tela volant. Densus crepat ictibus aër
 Sulphure disrupto, & nidorem ad sidera mittit.

Non stetit hîc, sed crevit honor. Te Cæsaris armis
 Ipse novo rursus donatum munere Clemens
 Præficit * : adversum non ut bellator in hostem
 Agmen agas, fractisve irrumpas moenia portis :
 Eugenio fors illa datur, qui marte secundo
 Protegit imperium : propria est tibi cura, capaces
 Militibus bello læsis adhibere ministros,
 Lucrarique animas pugnantum, & reddere cælo.

Ipse etiam patrios lato qui limite fines
 Protulit, creptasque feris tenet hostibus arces
 Carolus Austriacæ stirpis decus, ô quibus auxit
 Alsatium donis ! quanto & dignatus amore !
 Primores inter Proceres, quibus intima credit †
 Consilia, arcanæque aperit penetralia mentis,
 Te comitem ascivit. Quo non speciosius ullum
 Pignus habere potes mentisque animique benigni.
 O quantum decus Alfacidis mirantibus addis !
 Lento aliis, celeri vênit tibi gloria passu.
 Respice quotquot habet totus, quâ panditur, orbis
 Spectatâ virtute viros : ex agmine tanto
 Ecquis erit quem fama suis velocius alis
 Extulit, & geminæ cumulavit honoribus aulæ ?
 Unica (ne titulos inter locus iste vacaret)

Pur-

* Eodem anno constitutus est à Pontifice Delegatus Apostolicus ad Exer-
 citus Cæsareo-Regios.

† Ab Augustissimo Imperatore anno eodem adscribitur Consiliariis actua-
 libus intimis.

Purpura restabat. Meritis hanc denique misit
 Roma tuis ; defertque Albano sanguine cretus
 Præstanti ingenio juvenis , cui mascula virtus
 Ætatem antevolat , superatque laboribus annos.
 An quisquam Ausonia ex omni tibi gratior illo
 Dona ferat ? Potuitne Italâ tibi mittere Clemens
 Urbe virum , qui Pontificis testetur amorem
 Certiùs , insolitique ostendet signa favoris ?
 Ille iter emensus , nostrasque allapsus ad oras
 Comiter hospitio accipitur : reparansque vigorem,
 Membraque quassâ viâ , paulatim assuescere cælo
 Incipit , & nostri miratur frigora veris.

Miraturque urbes varias , quas tramite distans
 Separat exiguo tellus , & ad æthera ductas
 Immani turres spatio , sonitumque metalli
 Sublimen , & celsis modulantia nubibus æra.
 Gentibus ignotus Latiis decor : inclyta quamvis
 Mille artis Roma ostentans monimenta vetustæ,
 Templorum mole augustâ , Statuisque superbis
 Pyramides Nili superet , Rhodiosque Colossos.
 Scilicet & nostris sua sunt spectacula terris ,
 Inferiora quidem , atque Italæ cedentia famæ :
 At non hospitibus tamen aspernanda Latinis ,
 Iudicio peregrina solent qui expendere justo.

Interea lustrare oculis dum singula gaudet ,
 Ausoniâ nostras hospes qui accessit ad oras :
 Intenti cives operi pompæque futuræ
 Ornamenta parant. Galeam pars limat & ensen :
 Pars aptat loricae humeris : hi concava tergunt
 Scuta , atque albentem subigunt in cote securim.
 Arma nitent fulgore novo , solemque laceffunt.
 Festivi rutilant habitus , nigrosque galeros
 Circulus extremo mordens discriminat auro.
 Hic celerem discit vexilla rotare per orbem ,
 Et nunc ferre humeris : agili nunc volvere motu
 Pectora cervicemque super : nunc impete pronos
 Conniti ;

Conniti, atque humili tellurem stringere gyro.
 Lentam alii exercent liquefacto sulphure massam,
 Vimque atram nitri admiscunt : quæ fomite raptò
 Astra petet, lætoque dabit spectacula vulgo.
 Quisque suo insistent operi, properantque laborem.

Mittitur & magnam Gandæ legatus ad urbem,
 Nomine qui Alsatii sacras invitet ad aras
 Erardum, cui canitiem tegit Infula dignis
 Pressa comis : (sed blanda viro viridisque senectus)
 Sacrificâ qui voce, poli de sedibus altis
 Deducat Numen, celebretque altaria cantu :
 Quique, decus sublime, receptum ex urbe Galerum
 Cognato imponat capiti. Juvenescere visus
 Advolat, & votis properans respondet amicis.

Jamque dies optata aderat, sacrisque dicatam
 Ritibus exoriens Sol sparserat æthere lucem.
 Undique gens excita novos visura triumphos
 Confluit. Undantem capiunt vix mœnia turbam.
 Hospitibusque lares desunt. Pars sub Iove durant,
 Communesque epulas lætâ cinxere coronâ.
 Quis populi studiû memoret, pompamq; superbam?
 Excepit quâ compta novo Mechlinia cultu
 Tendentem ad Sacra Alsatum, quem Purpura totû
 Longa tegit. Comitem lateri se jungit euntis
 Sanguinis Albani Legatus, & oblitus ævo
 Erardus, tremulæ nescit qui damna senectæ.
 Quâ properat, sacrasque Patrem via ducit ad ædes,
 Picturâ cives fixisque tapetibus ornant
 Murorum latera, & triti calcantur odores.
 Quippe croci, cassæque, & flos spirantis anethi,
 Atque rosæ, fragilique thymus radice revulsus
 Spargitur. Apricis spoliantur honoribus horti.
 Ergo inter populi plausum, fremitumque calentem
 Alsatus templum ingreditur. Canit ore Philippus
 Sacrificans, gratesque Deo persolvit : & unâ
 Principis imposuit capiti quem Roma Galerum

Miserat, & sacrum pompæ finivit honorem.

Vestibus interea variis ornata juvenus,
Festivis lucem celebrare paratibus ardens,
Ordine progreditur longo. Micat ære tonanti
Densa humeros onerata acies : cui balteus auro
Intextus, lateri gladium suspendit avitum.
Primaque Belgiacis legio procedit in armis,
Prompta situm variare, & tergora vertere gyro
Multiplici, celerique aciem glomerare regressu.
Nunc passu æquato properant : nunc pectora densant
Frontibus adversis, & ludicra prælia miscent.
Æraque fumiferum volvunt sub naribus ignem.
Pulvere mox onerant agiles, humerisque reponunt
Arma suis. Alii Turcarum insignia gestant.
Longa pedes, Asiæ ritu, toga pendet ad imos.
Tortile tegmen habent capitis, cervixque tument
Orbe latet : lævâ confurgens conus ab aure
Erigit albentem nutanti vertice cristam.
Lata femur vagina terit ; cui cuspidis expers
Falcatum inferitur ferrum : quod acinace Medo
Certiùs in chalybem penetrat, galeasque sonantes
Dividit, & sparso diverberat ossa cerebro,
Marte ubi fulmineo concurrunt agmina, & inter
Europamque Asiamque manus Bellona cruentat.
Hispanum hos agmen sequitur, vestigia celsò
Tarda ferens passu. Magnæ his pro corpore vires,
Magna animo virtus, & cedere nescia bello.
Si quæras, quæ forma viris ? quis cultus ? & arma ?
Pectora, ventre tenus, stringunt thoracibus arctis,
(Nam laxas humero tunicas odère fluentes.)
Quæque terit lumbos supremæ fibula braccæ,
Desinit in conum, & genuum internodia lambit.
Crura rotunda ; pedum brevis est mensura ; soluti
In tergum longè pendent à vertice crines.
Tum si fortè vocet stimulans in prælia Mavors,
Africaque usta fremat, belloque lacessat Iberos :

Mucronem

Mucronem accingunt lateri, qui cuspide longâ
 Tenditur à capulo, quique uno perforat ictu
 Corpora, & in tergum per crates pectoris exit.
 Barba nigrans ambit tenui curvamine malas:
 Auribus & retro flexos à fronte capillos
 Excipiunt, teretique caput texere galero.
 Quid memorem gentes alias, Parthosq; Polonosq;
 Atque Scythas, Persasque, sagittiferosq; Gelonos,
 Omnes distinctos armis, facieque, sonoque
 Oris, & ornatus patriæ pro more gerentes?

Agmine postremo Æthiopes cum dentibus albis
 Procedunt; flexâ circum cava tempora mappâ.
 Brachia tota patent, nigroque argentea collo
 Vincla gerunt: Brevibus cervix crispata capillis,
 Atraque frons, oculique rotatis orbibus al bent.
 Pluma latus pubemque tegit. Gens Solibus usta,
 Et Phaëthontæ servat vestigia flammæ.
 Hos juxta Satyri, montanaque numina Fauni,
 Corpora protecti foliis cannâque palustri
 Incedunt. Tum sylvestri si fistula cantu
 Personuit; coeunt alacres, pedibusque bisulsis
 Dant saltus incompressos, & brachia nectunt.
 Lætitiâ pompamque dies producit, anhelos
 Donec equos pronus Sol gurgite mergit Ibero,
 Accenditque oriens rutilantes Hesperus ignes.
 Non cum luce tamen cessant spectacula. Seram
 Ignibus ante fores structis populisque Senatusque
 Incendunt noctem. Celsæ quoque culmine turris
 Artifici fabricata manu dissolvitur ingens
 Machina cum strepitu, & flammâ ad sidera volvit.

At nunc meta eadem numeris & honoribus esto.
 Etti Musa rudem citharam jam comprime. Tantus
 Scilicet ut digno celebretur carmine Princeps,
 Virgilio ingenium & vitæ non sufficit ætas.
 Ante tamen posito vates quam sine quiescam,
 Unum oro: facilis minimorum hæc vota clientum

322 CARDINALI ALSATIO CARM. GRATUL.
 Suscipe : Dent longæ Superi tibi tempora vitæ,
 Canitiemque sacram, & plenos virtutibus annos.
 Dent servare gregem incolumem : dent vertere mor-
 Sacrilegos, stabulisque lupos arcere rapaces. (sus
 Denique dent rigidos positis jam cornibus hircos
 Flectere, & Ausoniæ reduces adjungere caulæ.
 Sic uno grex unus erit sub Præside, & ingens,
 Vertice submisso & meritum testatus honorem,
 Romanam Petri Cathedram venerabitur Orbis:
 Et Fidei tandem Impietas concedet avitæ.
 Sic neque cogetur gladio sævire potenti
 Cæsar, & auxilio Romam fulcire gementem,
 Indomitamque fugare aciem, quæ fulminis iram
 Despicit insultans, simul & jura omnia vertit,
 Damnato Latium toties errore fâtigans.



LIVINI
MEYERI

E SOCIETATE JESU
ELEGIARUM
LIBER IV.

ELEGIA I.

DE VETERUM POETARUM

Laudibus, qui Elegias scripserunt.

C Allimachi cupiat si quis cognoscere manes,
 Umbri respiciat nobile vatis opus.
 Hic Latio Graias docuit sermone Camœnas
 Posse loqui, Musas instituitque rudes.
 Non mihi fas tenerum tecum conferre Properti,
 Nasonem, aut à quò Delia nomen habet:
 Aut aliquem invidiâ veterum perstringere vatum.
 Absit ab ingenuis versibus iste furor.
 Litem alius moveat triplici de carmine iudex,
 Cuique volet palmam, fertaque prima ferat.
 Hactenus arbitrium prudens suspendit Apollo,
 Noluit & Musas vincat ut una duas.
 Pieridesque Deæ vatum tria nomina gaudent
 Æternis Pindi scribere corticibus.
 Ite pares à me. Vario tamen ore Properti
 Nescio quid nobis dulce Poëta canis.
 Et sive Iōnio victrices æquore puppes
 Concinis : Iōniis Musa superbit aquis.
 Sive triumphato scandis Capitolia Nilo:
 In niveis victrix Musa triumphat equis.
 Seu responsuris illidis carmina saxi:
 Reddita vocali carmina rupe sonant.
 Sive canis silvas : silvæ sentire videntur,
 Et flectunt virides ad tua verba comas.
 Et tibi subsultant teneri cum matribus agni,
 Pastor ut argutis ludis arundinibus.
 Et modò nescio quid tumido grave pectore spiras,
 Nunc teris imparibus mollia prata rotis.
 Quidquid habet varium natura, Propertius æquans
 Carmine, nativo cuncta colore refert.

Quod si quis querat, Quid

Quid referam teneros vates quibus uritur ignes?

Ah nimis ex vero turpis amator erat!

Me miserum! hâc unâ peccarunt parte Poëtæ.

Cetera divini plena decoris habent.

Dum domitumbello Euphratem, Crassosq; piatos,

Vectaque trans Tigrim Cæsaris arma canit:

Arduus in nubes & majestate verendus

Fertur, quôque solet Jupiter ore, tonat,

Utque canit, Latius ruit in certamina miles,

Et Furiae circum tympana pulsa volant.

Idem inter virides æstivo sole cicadas

Cantat, & ad cytisos pastor ovesque redit.

Scilicet huic omnes numeros concessit Apollo,

Pleniùs & nulli Delphica favit humus.

Nec tibi displiceat si quando abruptus, hiansque,

Nec semper leni tramite versus eat.

Crede mihi, placet asperitas in carmine, quando

Aspera res verbis materiesque subest.

Aspice naturam, nihil est ornatius illâ,

Et tamen hæc dispar, dissimilisque sibi est.

Flore nitet tellus, eadem quoque sentibus horret.

Hic nemora, hic montes, hic fata læta vides.

Aspice currentes variis erroribus amnes,

Quos patriis fessos accipit æquor aquis.

Non semper placido labuntur flumina tractu,

Sæpè strepunt raucis turbida vorticibus.

Felix, qui potuit naturam claudere versu,

Et rebus facies arte referre suas!

Nec minùs Aufoniæ decus immortale Tibullus

Pieriâ cultis versibus arte valet.

Hic elegos limâ tenuat, spacioque coërcet

Comptior, & causas mille decoris habet.

Calliope infantem gremio formosa tenellum

Abdidit, & nutrix ubera plena dedit.

Ferrea quid juvenem rapuistis fata Poëtam?

Eheu! Parnassi gloria quanta jacet.

Non illo affectus variare peritior alter,
 Et dare cycneis geminea lora rotis.
 Invida fors inopi licet abstulit omnia vati,
 Optavit nullas carmine dives opes.
 Martis opus cædes, strictosque exhorruit enses,
 Quæque venenatâ cuspide tela volant.
 Aëniis tantum recitare sororibus ignes
 Cura fuit, dulces & celebrare choros.
 Donec spectabis septem de collibus orbem
 Roma, tui vatis fama perennis erit.
 Nec te præteream Pelignæ gloriâ gentis,
 Cui tulit ingenio Græcia nulla parem.
 Credibile est toto Musas Helicone relicto
 Carmine natalem concelebrasse tuum.
 Phœbus & antiquam linquens sine vindice Delon
 Adfuit, ornatas flore tegente comas.
 Ter puerum lauro, ter myrti fronde recenti,
 Ter tetigit purâ Bellerophontis aquâ.
 Et ventura canens tactis oracula cunis,
 Impulit auratæ fila sonora lyra.
 Cresce puer, dixit, mutataque corpora canta,
 Sacraque Romanis non abolenda focis.
 Terra parum fuerat, cælum tibi stellifer Atlas
 Pandet, & ingenio subditus orbis erit.
 Finibus Ausoniis orientia sidera dices,
 Et cur prisca Deis hostia cæsa cadat.
 Et veteres ritus, sacrasque ex ordine luces,
 Unde stet antiquæ Religionis honor.
 Accipietque novum sublimis epistola nomen,
 Quam mittet Domino quæque relicta suo.
 Ah utinam volucres pueri vitare sagittas
 Possis, qui teneri nomen Amoris habet.
 Ille suum vatem Scythicas, non Cæsar, in oras
 Mittet, & exilii tædia longa dabit.
 Illic obscenas elegis lacrymantibus artes
 Optabis læsos non meminisse Deos.

Define, quid frustra Capitolia lenta fatigas?

Accipiet cineres barbara terra tuos.

Te tamen æternis adscribet fama Poëtis,

Nomen & à longa posteritate feres.

Atque aliquis duri damnabit Cæsaris iras,

Supplicio dignum teque minore canet.

Finierat Phœbus : Parcæ doluisse feruntur,

Staminaque invitâ pulla dedisse manu.

Quam nequirit Cæsar, non Pontus, & ultimus orbis

Tollere, ab exilio Musa superstes erit.

ELEGIA II.

AD AMICOS

De adventu Veris.

Cernitis? aprici Boream vicere calores,
Lunaque jam mites candida junxit equos.
Fusca colorato declinant nubila cælo.

Aspicit ex æquo Phœbus utrimque polos.

Garrulaque antiquos Prochne meditatur amores,

Ovaque queis foveat, tecta laremque parat.

Jam peregrina suas visura ciconia turres

Advolat, & rostro prospera signa dedit.

O ita ! canescat profugis Aquilonibus orbis

Barbarus : ad Belgas mitior aura redi.

Belgæ, mite genus, potiùsque caloribus aptum

Et Zephyris : Zephyro proxima turba fumus.

Adde suburbani faveant quod vatibus horti,

Villaque quam circum lucus & umbra tegit.

Et gelidæ vivis manant quæ rupibus undæ,

Quæque super purâ cymba palude volat.

En, ut cespitibus certant se fundere flores,

Gemmaque sub teneris luxurians foliis

Restituit primas ramis silvestribus umbras,

Dulce reclinatis vatibus hospitium.

328 ELEGIARUM LIBER IV.

Hùc citharam mihi Musa refer. Vos dura valete
Frigora, naturæ deficientis onus.

Non facit ad versus hiemis violentia nostros.

Si placet, hirsutos Æole tunde Getas.

Illic te longos fas sit sævire Decembres.

Usta stet æterno barbara terra gelu.

Illuc, quidquid erit nebularum & grandinis, Auster

Devehat : ad Belgas tu modò Phœbe redi.

Sed nitidus purusque redi ; tibi pampinus uvas

Debet, & è spicis aurea ferta Ceres.

Tunc recubans silvæ vates sub fronde recenti,

Incipiam laudes dicere, Phœbe, tuas.

Intonsofque canam crines, Pythonaque cæsum,

Et quondam Actiaco prælia gesta mari :

Et medicas Pindi crescentes vallibus herbas,

Quas facer æterno Pegasus imbre fovet :

Delphicaque extremis quæsitæ oracula terris,

Nec cedunt magno quæ tua templa Jovi :

Et frontem semper juvenem, expertemque senectæ,

Et referam citharæ carmina prima tuæ :

Carmina quæ constat te post insana Gigantum

Prælia, victori concinuisse Jovi.

Ergo redi, terrisque novos immitte calores.

Dî faciant, numquam pigra recurrat hiems.

ELEGIA III.

IN PODAGRAM

Verno tempore redeuntem, quo morbi alii levare solent.

EN iterum nostros morfu depascitur artus,
Hei mihi Tartareo nata podagra lacu !

Hujus ad aspectum fugiunt Somnusque, Famesque,

Nec tua dona Ceres : nec tua Bacche juvant.

Quà graditur, Dolor & Gemitus comitantur euntē,

Et Macies, quæ vix ossa perusta tegit.

Credi-

Credibile est nigro serpentum sanguine pastam
 Invisum terris imposuisse pedem.
 Quodque magis cruciat, sensumq; inducit amarum,
 Illa renascentis tempore veris adest.
 Vere tamen reliqui fugiunt veniente dolores,
 Corporibusque salus læta redire solet.
 Quantum erat, ô superi! differre in tempora brumæ
 Non vitanda malæ toxica nigra luis.
 Omnia tunc languent: tunc anni pigra senectus
 Incipit, & rebus forma vigorque perit.
 Arida tunc varii redeunt in corpora morbi,
 Vixque domus querulis luctibus ulla vacat.
 Huic oppressa gravi quatiuntur pectora tussi:
 Hunc petit alternâ febris anhela die:
 Illi lethiferâ venter distenditur undâ:
 Huic geminum mordax urit arena latus.
 Certè ego perferrem meliùs quemcumque dolorem,
 Si mea cum multis juncta querela foret.
 Scilicet est aliquod communi in sorte levamen:
 Quodque ferunt multi, leniùs urget onus.
 Flamma minùs torquet quæ latè incendia volvit,
 Quàm privata tuas quæ populatur opes.
 Hæc igitur nostros incendit causa dolores,
 Quod cogar, salvis omnibus, esse miser.
 Cetera cùm foveat, soli mihi mitior aura
 Asperior brumâ, deteriorque redit.
 Aspice naturam, cùm sol tepefacta reducit
 Tempora: nîl illâ lætius esse potest.
 Tunc mundi facies renovatur: tunc mala cedunt
 Frigora: tunc prægnans rore tumescit humus.
 Sedula tunc pullis implumibus incubat ales,
 Piscis & altrici semina credit aquæ.
 Quæque diu sine fronde stetit, sine floribus arbor,
 Pubescit, niveas induiturque comas.
 Omnia cùm valeant, sumantque à sole vigorem:
 Unum, quem lædant, tempora veris habent.

Ergo

Ergo temperies cunctis gratissima rebus,
 Lethiferum nostro corpore virus alit.
 Noster & ex ipso fumit medicamine vires
 Morbus, & auxilio quod solet esse, gravat.
 Quid mihi nunc prodest imbres vitasse, nivesque,
 Prataque brumali candida facta gelu?
 Quique nocent fibris, nervosque vaporibus urunt,
 Manè pruinosos non adiisse lacus?
 Quid servata juvat mensæ frugalis honestas,
 Asparagos timidâ nec tetigisse manu?
 Denique quid juvat arbitrio vixisse medentûm,
 Collaque difficili supposuisse iugo?
 Num minùs articulos medicis incognitus humor
 Vexat, &, heu! noctes non finit ire breves?
 Ite procul fallax medici genus: arte caducâ
 Nullam languenti si mihi fertis opem.
 Nec sale conditam, nec aceto tangere cœnam,
 Nec cancro vesci, nec mihi pisce licet.
 Omnia, cùm valeo, mihi fercula grata negatis:
 Cùm jaceo, nihil ars, quo relevemur, habet.
 Nil mihi vobiscum posthâc. Vos consulat ille,
 Munere qui vestro bis miser esse volet.
 Vos quoque, quos cruciant eadem contagia morbi,
 Æternum medicis dicite, quæso, vale.
 Unum erit auxilium patienter ferre dolorem.
 Certior hâc nostris nulla medela malis.
 Adde quod æternæ requies ventura salutis
 Non longi merces longa doloris erit.
 Cumque diu justorum animæ crucientur ab igne,
 Post obitum flammæ spe brevioris alor.
 Hic dolor offensi minuet mihi vindicis iram,
 Supplicio partem detrahet ille meo.
 Hâc spe nulla brevis vitæ tormenta recuso.
 Omne erit ardenti mitius igne malum.
 At vos, ô medici, mea si dementia læsit,
 Parcite: mordacis vox fuit illa mali.

Vos infana decet contemnere verba furentum,
 Irrita quæ sanâ postmodò mente velint.
 En ego nunc stolidæ revoco convitia linguæ,
 Et moneo, dictis ne sit habenda fides.
 Multa genus vobis debet mortale, nec arte
 Utilius medicâ, quâ patet, orbis habet.
 Sæpe necaturos vario medicamine morbos
 Pellitis, & vitæ tempora longa datis.
 Nec quisquam est adeo letho conterminus, ut non
 Incolumis vestrâ restituatur ope.
 Sola Machaoniis non est sanabilis herbis
 Quæ mordet nervos articulosque lues.
 Fortè tamen, vestris sanus si legibus utar,
 Rarius, aut solito mitius æger ero.

ELEGIA IV.

DE VITA BEATA,

Ubi præ ceteris ruris simplicitas commendatur.

Discite mortales vitæ præcepta beatæ,
 Quoque solet virtus tutâ latere loco.
 Vera canam : non me docuerunt fallere Musæ,
 Et nimium vates candida turba fumus.
 Virtus Eois variata palatia gemmis
 Præterit : immodicus crimina luxus habet.
 Non raucum subit illa forum ; prætoria vitat :
 Atria sollicitis litibus ista vacant.
 Non malè quæsitâ peregrino litore merces
 Advehit infano per freta longa mari.
 Otia ruris amat. Pateat Neptunus avaris,
 Quæque sub infami gurgite monstra natant.
 Unda vale : mihi tuta placent : ego rura bidente
 Parva colam, tumidos despiciamque Notos.
 Ut pretium desit, pretium secura voluptas
 Pensat : naufragio gemma petita venit.

Quis

Quis petat Eoos freta per saxosa pyropos,
 Quasque ferax merces ultimus orbis habet?
 Aptius hîc carpis, nullis terrentibus Euris:
 Matura incurvis poma sub arboribus:
 Quæque racemiferis dependent vitibus, uvas,
 Et quæ mella cavo cortice condit apes.
 Ast ubi sol fessum declinat serior axem,
 Dum roseo vesper cuncta colore notat,
 Quàm bene vicinis epulæ sonuere sub antris!
 Credite, cespitibus nulla procella nocet.
 Innocuis sed rivus aquis, exersque veneni
 Labitur, & viridem rore maritat humum.
 Et philomela super certat, volucresque sonoræ
 Pæne inter cyathos, ferculaque ipsa volant.
 Quis non hîc curasque graves, & pectoris ægri
 Vulnera, sollicitos abjiciatque metus?
 Hactenus est tutum. Via longior omnibus undis
 Terret, & horrendo mota tridente sonat.
 Vos quoque turritæ celsis cum mœnibus urbes
 Cedite, non apta est gratia vestra mihi.
 Rure quies, non urbe venit; mens rure beatur.
 Livor abest: Candor Simplicitasque colit.
 Rura colunt Superi: pastor nam Phoebe fuisti.
 Luna tibi ante alias Latmia terra placet.
 Jupiter in silvis & Cressæ collibus Idæ
 Vagiit, & puero mella tulistis apes.
 En succincta feras sequitur Diana fugaces,
 Pinifer & Faunos Panaque lucus habet.
 Bacche pater mites decerpis collibus uvas,
 Nec pudor est ederis implicuisse caput.
 Quid memorem Satyros, per quos cava fistula pri-
 Edidit ignotâ garrulitate sonos? (mos
 Flava Ceres campis & cælo gaudet aperto:
 Prima rudem ferro sollicitavit humum.
 Nec vada, nec rivi, nec eunt sine Numine fontes,
 Quasque tegat Nymphas quilibet amnis habet.
 Deni-

Denique nullus agros de tot Cælestibus odit.

Præfertur patrio rus geniale polo.

Simplicitas Dîs nuda placet, non atria curant

Aurea, non fastus aula superba tuos.

Hîc Fraus, hîc habitant vigiles ad crimina Curæ,

Sæpius & Baccho mista venena rubent.

Ambitioque tibi similes facit Icare multos,

Et Phaëtonteæ semita trita viæ.

Inunc, & Zephyros demens & flumina vita.

At me ruricolæ vivere more juvet.

Ut mea nocturno defigam lumina cælo,

Et discam cursus candida Luna tuos.

Suspiransque alti stellata palatia mundi,

Languidus (ô !) patriæ tangar amore meæ.

Hîc Pietas, hîc cana Fides vestigia jungent,

Et comites Virtus sedula quotquot habet.

Et modò me colles, humilis modò ripa tenebit,

Tollat ut ardores rivus & umbra meos.

Et potero longo tellurem vertere sulco,

Nec patiar laxas vitibus ire comas.

Arbor & inciso peregrinos cortice fetus

Proferet, & mensis grandia poma dabit.

Et nunc dempta cavo tollam ova recentia nido,

Quæque latent, foliis abdita præda, nuces.

Ipse fatigatos ducam ad præsepia tauros,

Ipse feram niveo pabula fera gregi.

Matribus occurrent teneri balatibus agni,

Uberaque adpulso plena prement capite.

Divitiæ valeant, valeant cum litibus urbes,

Vosque, quibus somnos cura dat atra breves.

Me juvet ignotis finire mapalibus ævum,

Inque suburbanâ consenuisse casâ.

Donec pallida mors, vitalibus ultima rebus,

Injiciat furvas in mea membra manus.

Tum verò in sacra corpus tumuletur arena,

Ilicis obscuræ quâ vetus umbra cadit.

Non

Non ego marmoribus Regum, magnisque sepulcris
 Invideo, cineri sit satis urna meo:
 Parva quidē, tamen ampla satis sine sumptibus ullis,
 Quam suprà tellus non onerosa tegat.
 Sospes ab exequiis cælestes spiritus oras
 Aspiciet felix, Elysiamque domum.
 At vos, qui fastu contemnitis ista superbo,
 Cerberus expectat, Cimmeriusque lacus.

ELEGIA V.

UNDE JUPITER STATOR

A Romanis olim appellatus sit.

Nunc Jovis incipiam Statoris dicere causas,
 Nominis antiqui quod sit, & unde decus.
 Solemnes dederat populo spectacula ludos
 Romulus, & fictis annua sacra focis.
 Venerat ad pompam latè vicinia simplex,
 Nescia fallaces turba latere dolos.
 Dum populus plaudit, dum læta altaria fumant,
 Incidit in casses, Romule, præda tuos.
 Virginibus raptis matres flevêre Sabinæ.
 Flere vetat Tatiùs, Bella parentur, ait.
 Roma recens stabat, populis sublime futuris
 Imperium : parvæ tunc locus urbis erat.
 Hùc celer, & vindex, collecto flore juventæ
 Advolat, & muros obsidione premit.
 Quique rapi jussit, raptas defendere bello.
 Admonet, & causâ corda potente movet.
 Ut repetat, Tatio ; velit ut retinere, Quirino
 Suadet amor : stimulo pugnat uterque pari.
 Agmina constiterant nudis splendentia telis,
 Principium pugnæ buccina curva dedit.
 Fraxineam Tatiùs libraverat arduus hastam.
 Pectus Romani perculit illa ducis.

Primus Tarpeium tepefecit sanguine montem
 Hostius ; huic Latiae cura cohortis erat.
 Urgent victores fausto clamore Sabini.
 Ortus in Aufonio milite terror erat.
 Agmina dum titubant , murorum conditor aras
 Respicit , & frustra supplicat ille Jovi.
 Terga fugæ dederant : medio sublimis in arvo
 Romulidum Tatius clade superbus , ait :
 Hæc pro virginibus cecidit prior hostia raptis.
 Quò fugitis ? nullos nunc habet ara Deos.
 Iusta profanatos victoria vindicat ignes ,
 Et Venus ultrices admovet ipsa faces.
 Disce Deos fictis , Tatium quoque fallere sacris
 Impie , de Superis hæc tibi poena venit .
 Gaude sorte tuâ nigris Menelæe sub undis ,
 Et iterum hîc pœnas altera Troia dabit.
 Romule debueras cladis memor esse priorum ,
 Exemploque avidas abstinuisse manus.
 Et minor est Paridis quàm vestri infamia raptûs :
 Fecerat hunc Helene , sed tamen una , reum.
 Una parum fuerat , multas violare Quirinus
 Sustinuit , numero multiplicante scelus.
 Adde quod invitas rapuistis , at ille volentem.
 Dignior hoc Troiâ Roma perire fuit.
 Dixerat : at contra Romanæ conditor urbis
 Instat , & armatas tendit ad astra manus.
 Mars pater ô ! (nostri frustra nisi sanguinis auctor
 Crederis , & Superos Silvia finxit avos)
 Tuque Palatinæ custodia Jupiter arcis ,
 Adsis militibus dexter uterque meis.
 Vos turpem prohibete fugam , vos stare Quirites
 Cogite : servati debita thura dabunt.
 Non Veneris nobis temerare cubilia stupro
 Cura fuit , facto simplice crimen abest.
 Quis furor est fastu contemnere nostra superbo
 Conjugia , instantes & remove procos ?

Jupi-

336 ELEGIARUM LIBER IV.
Jupiter ignoscas, longos tibi Roma nepotes
Spondet, io nuptis tu modo dexter ades.
Audiit, inspiratque animos, martemque fugatis
Integrat : auxilio est Roma superba Jovis.
Pace Duces coeunt, finitaque bella quiescunt.
Accipiunt generos hospita castra suos.
Urbs invicta manet. Statori Romulus ex hoc
Templa Jovi, sacram constituitque diem.
Nam quia Rex Superum fugientes stare Quirites
Jusserat, à stando nomina Stator habet.

ELEGIA VI.
DE CRYPTIS SUBTERRANEIS,

Propè trajectum ad Mosam.

MOenia Trajecti tenui mons tramite distans
Respicit, ad fluvii prætereuntis aquas.
Noctis magna domus : subter cava viscera terræ
Duceris, occultas rupe tegente vias.
Non duce se quisquam, non se sine lumine nocti
Misceat : audentem talia, fata manent.
Tecta prius nullo vinces Minoia filo,
Dædaleâ & poteris sospes abire domo,
Quàm labyrintho gressus revocare sub antro,
Dum miser incertis quæris iter manibus.
Non tamen hîc formamq; viri taurique bimbrem,
Non timeas clausis bella movenda feris.
Sat tenebræ terroris habent, vastique recessus,
Cæcæque in innumeras compita secta vias.
Nuper ad ingressus antri perterritus hæsi.
Visus eram Stygios vivus adire lacus.
Pandit longa fores nigro spelunca recessu,
Irradiat pronus limina prima dies.
Vix tria suspenso tuleram vestigia gressu,
Luce dies sensim deficiente cadit.

Dein

Dein tenebras face discutimus, noctemque fugamus
 Ignibus : ex omni semita parte patet.

Et nunc porticibus longis spaciamur, onusque

Fornicis ex æquo multa columnâ tenet.

Et modò jurares lato succedere templo,

Nunc humilis curvo vertice radis iter.

Longiùs ingressus (caligine terga sequente)

Tendis ad argutæ garrula saxa Deæ.

Rupibus hîc longum resonat vocalibus Echo,

Sola peregrinos docta referre sonos.

Et memor antiquæ nimium formosa repulsæ,

Montibus his misero tuta pudore latet.

Parte aliâ faxis stillat lacrymantibus humor,

Liquitur & tenui fonte perennis aqua.

Hæc ubi transieris, vocemque represserit Echo,

Mille per ambages fessus ad antra redis.

Egressusque diem lætus solemque salutas,

Læsaque inassuetâ lumina luce stupent.

Quodque magis mirere, seges super & bona messis

Luxuriat, celsis conspicienda jugis.

Immensique cavo nituntur fornice montes,

Et speciem mundi terra latentis habet.

Vix mihi credetis, sed credite : præmia falsi

Nulla peto ; testi res dabit ipsa fidem.

Non hoc vincat opus fumosis Vesuvius antris,

Ætnaque qui Siculas murmure terret aquas.

Si quod habent nomen, flammis irâque Gigantum

Dedecorant : tellus sulphure nostra caret.

Quidquid in Ausonia posuit natura superbum,

Id superant montes, terra Brabanta, tui.

Quos tibi spectandi subeat si cura viator,

Dicetur nostro carmine majus opus.

ELEGIA VII.

AD JACOBUM WALLIUM

Cum in extrema senectute adhuc carmina scriberet.

ERgo paulatim vacuas properamus ad urnas,
 Et senibus prono verba tremunt capite.
 Nec juvat, Aonio vates quod luseris antro,
 Triverit & doctas sacra corona comas.
 Nigra importunæ pulsanda est janua mortis
 Omnibus : has leges ferrea fata ferunt.
 At tu dignus eras nullam sentire senectam.
 Sic decuit Phœbum consuluisse tibi.
 Qui puero citharam, citharæ qui tradidit usum,
 Numen & ad cultum contulit omne tuum,
 Debuerat stabilem pariter tribuisse juventam.
 O ! ubi sunt herbæ Delphica terra tuæ !
 Quid queror immites properare volatibus annos ?
 Injiciet nullas vana querela moras.
 En trahit in præceps tremulum declivior ætas,
 Occupat & sensus ægra senecta tuos.
 Lumina jam majus poscunt errantia prælum,
 Atque aliquid claro fidere noctis habent.
 Vix pes officium subit & vestigia firmat,
 Exilesque cavâ percipis aure sonos.
 Invalidumque latus declinat spina, tremitque
 Dexterâ rugosis arida pollicibus.
 Solus in intactis vivit pulmonibus ardor
 Igneus, & Phœbi spiritus ille manet.
 Quod venit à Superis non est mortale, nec ulla
 Temporis aut morbi sentit adesse vices.
 Corpora mutantur senio, quæruntque sepulcrum,
 Deque mora lethi sæpè queretur anus.
 Quid referam Priami, Pylii quid Nestoris annos ?
 Hei mihi ! quod fuerant, ignis avarus habet.

Felix!

Felix ! ingenio qui temporis altior alas
Effugit , ætatis nec grave sentit onus.
Ecce Tomitanæ quem deflevêre volucres,
Carmen olorino concinit ore senex.
Et tamen extremum vates languebat ad Istrum
Exul , & exhaustis viribus æger erat.
Nec deerant animo Scythicæ fastidia terræ,
Longaque quæ gelidus frigora Pontus habet :
Bellaque , præcipitesque aurâ stridente sagittæ,
Infestusque truci semper ab hoste locus.
Et quod præcipuè miserum flevisse putandum,
Mitior ad nullas Cæsaris ira preces.
Omnia cùm premerent , vicit tamen omnia fervor
Igneus , & fato mens bona major erat.
Scilicet Aoniæ superabant omnia Musæ,
Et comes in longas sola Thalia vias.
Hujus ad exemplum tua fit facunda senectus,
Quosque canat versus vena senilis habet.
Et sive Iönio , seu tu canore Latino
Ludis , habet priscos utraque Musa sales.
Ut malè deficiat corpus , tamen integra mens est :
Hæc manet ingenii firma tenaxque sui.
Illa per immensum spaciabitur incola cælum,
Carminaque ad Superos nobiliora canet.
Scilicet agnati repetunt commercia cæli,
Quos niger hinc vates eripit ille dies.
Excipe , quos teneræ damnat lascivia Musæ.
Hos procul Elysi cymba severa vehet.
Sera tamen Walli veniat tibi , quæ cava claudet
Lumina , te Belgis eripietque dies.
Tunc poterit versis ad fontem currere Lisa
Fluctibus , & scissis flere Thalia comis.
Ipse ego non figam viridi tua busta smaragdo,
Non tua marmoreus claudet & ossa lapis :
Sed cineri fundam violas , lauroque perenni,
Æternùmque ederæ fronde virente tegam.

Illic præteriensque leget, flebitque viator
 Quæ meus ad tumulum carmina scribet amor:
 Hic sacri recubant Heliconia pectora Walli.
 Accessit ripæ gloria, Lisa, tuæ.
 Altera de cultis veniet tibi fama libellis,
 Posteritasque tuum longa videbit opus.
 Donec & arfuri veniant rata tempora mundi,
 Wallius æterno carmine notus erit.
 Nil moror, infernæ jam solvite pensa sorores.
 Vatibus à tumulo gloria major adest.

ELEGIA VIII. ORPHEI QUERELA,

Post Euridicen bis amissam.

DAmnati reditus, & lucis amara cupido,
 Et malè per Stygios umbra reventa lacus!
 Bisque oculis sperata tuis malè sidera conjux!
 O cithara in luctus facta sonora novos!
 Non potuit Lethe, non Styx prohibere canentem,
 Tangeret infernos ne mea Musa Deos?
 Scilicet Euridicen dum sic concessit amanti,
 Hei mihi! quàm nobis Æacus hostis erat!
 Nonne fuit melius si me clausisset Averno,
 Torvus in obscuro qui regit amne senex?
 Euridicen certè fato conjunctus haberem.
 Divisis gravior nunc sua pœna venit.
 Me Rhodope, regio tenet illætabilis illam.
 Ipse suam frustra vir cupit, illa virum.
 At malè lætus eram, nec inania vota timebam,
 Audierat cantus pallida turba meos.
 Scilicet ut fuscas audax orator ad arces
 Immiti cecini carmina blanda foro:
 Tempore vidi illo vultu Minœa sereno,
 Et Phlegethonteum leniùs ire vadum.

Aridus

Aridus oblitus neglexit Tantalus undas,
 Et Tityus nullas pectore sensit aves.
 Sisyphus in saxi tunc primum mole refedit,
 Supplicium tacitæ continuere rotæ.
 Quæque prius fagos & saxa sequentia duxit,
 Experta est faciles hîc quoque Musa Deos.
 Reddite, dicebam, dulces mihi conjugis annos,
 Debuit ad vestras ferior ire domos.
 Quò rapitis teneræ florentia tempora vitæ,
 Filaque præcipiti scinditis atra manu?
 Parcite, fat celeri volvuntur tempora motu,
 Et nimum fati prona brevisque via est.
 Non opus est ferro, non nigri peste veneni,
 Non avidam morbis accelerare necem.
 Parva mora est, veniet tacitè rugosa senectus,
 Corporaque ad tumulum sponte caduca trahet.
 Vos, si iusta peto, precibus faveatis amanti,
 Et vidui mites damna levate tori.
 Ut puto, vos nullo conjux mea crimine læsit,
 Nec meruit lucas noxia vita breves.
 Audiit & Minos & qui regit Æacus umbras,
 Nuptaque sub certa conditione datur.
 Dum petitur tellus, retrò si lumina flectas,
 Irrita sunt culpâ dona futura tuâ.
 Lætus ago grates, citharæque revertor ad usus,
 Et Dominæ carmen connubiale cano.
 Illa comes sequitur : pallentes linquimus oras,
 Et vada lethææ trajiciuntur aquæ.
 Dum vehimur, pigræ nocuere papavera ripæ,
 Excidit ex animo lexque Deusque meo.
 Noverat hoc Minos. At non ego fallere doctus
 Condebam tacito gaudia vana sinu.
 Crudeles Divi! quid me lufistis amantem,
 Redditaque est uno raptaque nupta die?
 Hei mihi! cur umquam fallacia visere regna,
 Perque feros manes impetus ire fuit?

Cur mihi Persephone visa est mollita canendo
 Ferrea Tartarei vertere jura fori?

Credule, nescisti non exorabile fatum,
 Nescisti furdis auribus ire preces?

Cùm semel est Stygio Proserpina rapta Tyranno
 Dicitur hùc frustrà vota tulisse Ceres.

Illa quidem testata Jovem est, testata Dianam,
 Et quæcumque triplex Numina mundus habet.
 At Dea pro natâ gemitus effudit inanes.

Non audituri litoris ista fides.

Vera tamen Stygiis reditura paludibus uxor
 Juncta comes lateri (non ego fallor) erat.

Regnaque jam mundi mecum melioris adibat,
 Quà via clivoso panditur arcta jugo.

Agnovi solitumque gradum, consuetaque verba,
 Quo nupta est primum tempore, talis erat.

Deque colo nebant triplices nova stamina Parcæ,
 Cesserat & roseo luridus ore color.

Adde quod Alcides invitis Thesea fatis
 Dicitur antiquo restituisse lari.

Nec timuit furto Ditem vexare recenti,
 Cerberon audaci traxit ad astra manu.

Causa mea est melior: cur non mihi ducere manes
 Conjugis, & cantu munera pacta licet?

At retrò spectasse nocet. Periisse sub ipso
 Debuerat flexu, vel riguisse caput.

Ah ego quàm vellem, ne tu dilecta perisses,
 Starem Trinacriis saxea forma jugis!

Præcipitive fugâ tecum revolutus abissem,
 Nec mihi post misero nota fuisset humus.

Euridice tamen ignoscas; mihi summa petenti,
 Nulla pedum pulsu signa sequentis erant.

Respicio infelix: at dum mea lumina flecto,
 Ipsa cadis pronâ sæpè voluta viâ.

Non aliter quàm si vivo quis corpore membrum
 Dividat, attonito voxque colorque fugit.

Utque

Utque animus rediit, de fatis questus iniquis
 Aspersi lacrymis proxima saxa meis.
 Optantemque mori Stygiæ vetuere sorores,
 Invitus superas cogor adire domos.
 At vos ô cari citharæ solamina manes
 Accipite; hæc vobis ultima dona fero.
 Euridicen silvæ, Euridicen cava saxa sonabunt,
 Semper in Euridices nomine mœstus ero.
 Et jam nulla meos inflectet femina sensus,
 Vincula conjugii nec renovabit amor.
 Luridus, & solis traducam montibus annos,
 Aggemet & nostris turtur amica malis.
 Umbra maritalem donec tua viderit umbram
 Velocem portent hunc mihi fata diem!

ELEGIA IX.

AD AMICUM

Fidei propaganda causâ in Americam navigantem.

Sic te Divus amor patriâ procul ire reliquâ
 Cogit, & Hesperiaë visere regna domûs?
 Carbasque ignotis audacia pandere ventis,
 Phœbus ubi fessos condit anhelus equos.
 Usus amicitiaë nec te, lacrymæque tuorum
 Flectere, sollicitæ nec valuere preces?
 Non pater absentis poscens solatia nati,
 Non genitrix passas imbre rigante comas?
 Turbaque tot fratrum, quorum suspiria nullus
 Finiet, à portu te properante, dies.
 Nec te, quod primis fueris mihi junctus ab annis,
 Mutuus ex aliqua parte moratur amor?
 Aspera montano riguerunt pectora ferro.
 Votaque cum nullo pondere nostra cadunt.
 Ibis, & (ô!) numquam rediturus! te procul æquor
 Ereptum ex oculis in vaga regna feret.

344. ELEGIARUM LIBER IV.

At saltem scopulos & mille pericula ponti

Respice : fallaces trux habet unda vias.

Quid memorem virides immania corpora Phocas,
Cæcaque veloci saxa timenda rati?

O quoties validis malum inclinantibus Austris,
Pro tumultu Superis anxia vota feres!

Non tibi vicinos spondebit navita portus.

Haud tenui tellus distat utrimque freto.

Immensum est quod scandis iter: dum labitur annus,

Vix Brasilos fines salva carina premet.

Ne tamen ignores (quoniam dare lintea certum)

In tabula pictas exhibet orbis aquas.

Aspice quâ patriis illudit fluctus arenis :

Ut pateat vastis Nereüs æquoribus.

Litora Gallorum, circumque Britannica saxa
Oceanus gyro te feret ipse suo.

Naufragiis infame fretum ; syrtesque latentes

Occulit infido Tethys iniqua sinu.

Quod superest, ponto pinus tua curret Ibero.

Hinc vagus Æorides, Hesperidesque leges.

Scilicet hîc notas spectabis denique stellas,

Nec mora jam ex oculis Belgicus axis erit.

Forsthan & tanges torrentem fidere Zonam,

Oppositum Boreæ conspiciasque latus.

Sideraque alterius vertentia cardine mundi,

Et primùm Australi signa notanda polo.

Æole parce precor, ventosque immitte secundos,

Et freta cærulei sternite tuta Dei.

Vestrum crimen erit talis jactura carinæ.

Qui vehitur, cælo vela jubente movet.

Non ille Americæ spectator inutilis urbes

Visere, non merces classe referre parat.

Est aliud quò vota pius, cursusque, ratemque

Dirigit, instabiles spernere doctus opes.

Eminùs albentes metitur messibus agros,

Quæque suas poscunt barbara rura manus.

Hîc

Hic fidei radiis pressas caligine mentes

Imbuet, & sacris crimina tollet aquis.

Cælestesque animas patrio transcribet Olympo,

Deque triumphato præmia Dite feret.

Jam nunc absentem Stygiæ tremuere paludes,

Lapsaque de templis Numina vana suis.

O! ne spes tantas hiemis violentia fallat,

Neu bibat æquoreas naufraga puppis aquas!

Neve ratis densâ circum valletur arenâ,

Quâ fluit arenti parcior unda vado.

Sed tamen hoc melius, quàm si te cura parentum

Indecorem patriâ contumulasset humo.

Quid petitur nostris nisi mors ignava sepulcris?

Verte ratem, comitem me tibi junget amor.

Et mihi facta via est, & me feret æquor euntem,

Est mihi per gentes impetus ire feras.

Non me terruerint pharetræ, non lethifer arcus,

Quæque illic sævâ bella bipenne gerunt.

Dummodò Romanæ rudibus primordia legis

Sacra feram, ritus edoceamque novos.

Puppis ubi est, ventusque favens? retinacula nautæ

Solvite. Provehimur: patria terra vale.

Quid loquor, aut ubi sum, quo nos infania dulcis

Abripit? Heu votis terra negata meis!

Te via longa juvat, nos clausis mœnia portis,

Duraque nescio quo fata adamante tenent.

I, vince Hesperios populos, properavit ad Euros

Et comites nostros altera classis habet.

Scilicet ut Belgas videat domus utraque solis,

Sacraque Christiadûm mundus uterque colat.

Nec timeas nostro madefactas sanguine clavas,

Crudaque nodosis vulnera stipitibus.

Martyribus fœcunda dabit nova germina tellus,

Et glebâ fructus uberiore feret.

Barbara cælesti mansuescent pectora cultu,

Moxque dabunt victas relligione manus.

Tu

346 ELEGIARUM LIBER IV.

Tu modò da segeti falces, spicasque secato.
 Accipient fruges horrea plena suas.
 Nec mora, desertis habitabunt oppida silvis,
 Justaque civili fœdera lege colent.
 Et tandem humano desuescet sanguine vesci
 Americe, & tumulis funera tota feret.
 Forfan & eveniet cùm te complexus ad Indos,
 Non expectatâ litora puppe premam:
 Sicque superfusis adstringam colla lacertis,
 Ut sciat ista memor dicere posteritas.

ELEGIA X.
 AD APOLLINEM

Pro pace.

O Pindi decus, & citharæ moderator Apollo,
 Et primus mites inter habende Deos!
 Carmina quæque novem canitis diversa sorores,
 Ducitis & faciles voce juvante choros:
 Dicite, Flandriacis ecquis feret otia terris,
 Blandaue compositâ fœdera pace dabit?
 Quæ mala discordes impellunt toxica Reges?
 Sanguine mutatis labitur amnis aquis.
 Quando erit ut posito mitescant secula bello?
 Fallimur, an vestræ juncta querela mea est?
 Communis nos causa movet: fera prœlia vates
 Odimus, & Musæ tempora pacis amant.
 Odistis sævas mitissima Numina cædes,
 Odistis placidæ tristitia bella Deæ.
 Ipse cruentatos Phœbus pater horruit enses,
 Horruit & vultus Mars violente tuos.
 Non hunc arma juvant, sed operti floribus horti,
 Quos circum puro nectare rivus alit.
 Sed nemus, & frondes inter philomela recentes,
 Sed testudineæ carmen inerme lyræ,

Otia

Otiæque & mites in apricis collibus auræ,
 Et quæ vomeribus gramina reddit humus.
 Pomaque quæ cultis Autumnus spondeat hortis,
 Uvaeque sub flavis aurea palmitibus.
 Ista decent te regna pater. Vos arma tubæque
 Ite procul : meritis vulnera ferte Getis.
 Non tua sunt Marti, sed dulcibus apta Camœnis
 Pectora ; nec dispar vatibus ardor inest.
 Blanda graves veluti fugiunt examina fumos,
 Sic procul à curis libera Musa fugit.
 Hæc eadem Scythicum vates periturus ad Istrum,
 Olim lugubri carmine questus erat.
 Quid fuit ut Latias optaret visere sedes,
 Et fugere extremo rura propinqua polo?
 Nempe quod Aufoniis depulso finibus hoste,
 Augustus populis causa quietis erat.
 Nec deerant focii, concordia pectora, vates,
 Nec deerant numeris apta theatra suis.
 Prælia Sauromatas urgebant aspera gentes,
 Cana gelu, nullo vere tepebat humus.
 Hoc fuit ingenium potuit quod frangere tantum:
 Justior hæc vati nulla querela fuit.
 Hujus ad exemplum (quamquam mea distat ab illo)
 Excusanda suo tempore Musa venit.
 Scribimus, & sævo muri pulsantur ab hoste,
 Ustæque Troianâ mœnia clade gemunt.
 Me miserum ! exercent cur bella tenacia Belgas,
 Dedita nec Musis pectora Marte carent?
 Pax redeat, positoque metu te candida vatum
 Turba colet : sacris consule Phœbe tuis.
 Non Belgis vates, sed vatibus otia defunt,
 Et Mæcenates tempora dura negant.
 Ipse vides languere inopi mea carmina venâ,
 Vix aliquid vivi dura vigoris habent.
 Qualiacumque tamen iudex mirabitur æquus,
 Si sciat hæc gladios inter & arma cani.

Quis,

348 ELEGIARUM LIBER IV.

Quis, nisi mentis inops, sterili de litore messem
 Speret, & in sicco crescere monte rosas?
 Lilia quis scopulis, quis acutis mitia faxis
 Poma, vel è pleno flumine mella petat?
 Quàm volucres silvis, quàm gaudent rore cicadæ,
 Quàm viridi taurus gramine, piscis aquis:
 Otia tam vates mansuetaque regna sequuntur,
 Antraque sollicitos non habitura metus.
 Otia præcipuè Phœbum precor, otia Musas.
 Quid magis optari dulce piumve potest?

ELEGIA XI.

LUDOVICI MAGNI

TRAJECTIO RHENI

Ex Gallico Poëmate D. Boileau Latinè reddita.

EMinet Alpinis Adulæ mons nobilis oris,
 Fonte suo Batavum notus ad usque mare.
 Hic caput & ripas celatus arundine Rhenus
 Spectat nascentes ire superbus aquas.
 Fortè sopore gravis muscosæ languidus urnæ
 Incubuit, tremulo quâ strepit unda vado:
 Cum subitis ripæ clangoribus insonuère,
 Et cava tinnitum vallis & urna dedit.
 Erigitur, celeresque oculos circum undique volvens
 Rhenus, in absentes prospicit altus aquas.
 Ecce citæ veluti, timidissima turba, columbæ
 Accipitrem fugiunt, tectaque nota petunt,
 Naiadum chorus omnis adest; celeresque timore
 Aula natatrices accipit uda Deas.
 Dumque tenent aliæ timidis complexibus urnam,
 Una fugæ causas, Fonte jubente, refert.
 Vidimus ignotas acies, populumque ferocem
 Vincula litoribusnectere serva tuis:

Heroem-

Heroemque Jovi similem, seu lumina spectes

Ignea, seu fufas clara per arma comas:

Seu spumantis equi velocia terga prementem,

Et stimulantem oculis agmina mille suis.

Nequidquam fera tempeftas Aquilonibus orta

Sæviit; audaci remige rupit iter.

Nec potuere acies, adverfisq; agmina ripis

Sistere viâtrices, aut prohibere manus.

Tale nihil, Latii post tempora Cæſaris, umquam

Invitis doluit maximus amnis aquis.

Rhenus ad hæc totis infrenduit horridus antris,

Altior & motis fluctibus intumuit.

Atque ita: post domitum captivo gurgite Scaldim,

Nos quoque fors eadem, ſervitiumque premet?

Dixit, & excutiens limoſam ad tempora barbam,

In faciem veteris tranſit & ora ducis.

Nec mora, fulgenti conduntur caſſide vultus,

Quemque manu premeret, lucidus enſis erat.

Addidit & fronti rugas, irasque, minasque,

Longaque, nube latens, litora miles obit.

Jamque peregrinas Belgarum aſpexerat oras,

Ultima quâ Batavos alluit unda lacus.

Hic acies ripâ ſpectat trepidare relictâ,

Territaque in celerem vertere terga fugam:

Agmina magnanimos urgere natantia Gallos,

(Prô pudor!) & mediis fluctibus ire truces.

Tum verò impatiens iræ, velamina nubis

Discutit, & celiſ clamat ab aggeribus:

Quò ruitis famæ immemores certique triumphî?

Nullane vos patriæ cura cadentis habet?

Ecce ſuperbus init fluctus camposque liquentes

Hoſtis, & à tergo, ni prohibetis, adeſt.

Quis labor eſt, ſummæ deſenſos aggere ripæ

Nantia cum dominis mergere ſigna ſuis?

Si quid adhuc virtutis ineſt, convertite ſigna,

Obviaque illuſtri pectora ferre neci.

Ipſe

Ipse ego commotis illidam fluctibus agmen,
 Vorticibusque premens in freta longa feram.
 Dixerat : ardentesque oculos ad flumina Rhenus
 Torfit, & adversas hostibus urfit aquas.
 Pluribus hortari vetuit furor. At pudor illos,
 Gloriaque exstimulans sub sua signa vocat.
 Protinus audaci complentur milite ripæ,
 Æraque in aggeribus concava mille locant.
 Stat patriam tutari armis, stat pellere ripis
 Agmina, & ignavæ terga negare fugæ.
 Interea præsens acies Lodoicus euntes
 Ordinât, & sceptrô castra potente regit.
 Illius imperio Grammontius infilit undis,
 Ausus in adversas ire natator aquas.
 Exultat sub aquis sonipes; generosaque tollit
 Pectora; flaventes verberat unda jubas.
 Hujus ab exemplo totas innare phalanges
 Fluctibus, & videas flumina summa tegi.
 Apparent cristæque leves galeæque micantes,
 Atque aliquis summis tympana pulsât aquis.
 Impatiens Rex ipse moræ, missurus in undas
 Pectora, majestas ni prohiberet, erat.
 Stat tamen hortator pugnæ, remisque carinas
 Instruit : hæ celeres per vada summa volant.
 Aspicit hæc oculis Rhenus, quos ira tremendos
 Fecerat, ut silvis tigris in Armeniis,
 Aut velut Hircanus fremuit leo; quem vaga circum
 Turba reluctantem barbaraque hasta premit.
 Nec mora, fulmineo tonuerunt aggere ripæ:
 Unda repercussos vertit ad astra globos.
 Litora conduntur caligine pulveris atrâ,
 Ivit & infectis tardior amnis aquis.
 Jamque diu nutans dubiis victoriæ pennis
 Ambigit, atque acies inter & arma volat:
 Donec diverso Lodoicum in litore stantem
 Vidit, & ad noti subvolat ora ducis:

Rega-

Regalesque assueta comas incingere lauro
 Gestit, & Heroi nectere ferta suo.
 Scilicet ille oculis dubiam convertere sortem,
 Ipsaque sub leges mittere fata potest.
 Jam fractæ Batavorum acies, Rhenusque subactus
 Præbuit invito colla superba iugo.
 Quid referam victasque arces, fluviosque, lacusque,
 Oppidaque, & captis Nerea litoribus?
 Maturam ut velox segetem depascitur ignis,
 Cum levis à tergo flatus & aura juvat:
 Oppida sic marti cessere Batavica Gallò,
 Nostraque tunc primum lilia vidit hiems.
 Swolla cadit, Campumque, Ultrajectumq; nec alti
 Mœnia defendunt vix adeunda lacus.
 Apti quidem vinci, sed non tamen apti referri
 Nomina, hyperboreo barbariora gelu.
 Dî facerent toto Princeps Oriente redires
 Victor, & Euxinis mars tuus iret aquis!
 Illic ut canerem victas felicius urbes,
 Regnaque nominibus nobiliora suis:
 Et nemus Idæum, & Paridi quoque cognita tempe,
 Et veteris captas Laomedontis opes.
 Hei mihi quàm lentè Troiam expugnastis Achivi!
 Viderunt fessas cur duo lustra rates?
 O quantò citius cecidisset milite nostro
 Ilios, & nullis Pergama victa dolis!
 Spem facis à victis nobis Lodoice Batâvis,
 Sentiat ut nostras ultima terra manus.

EPISTOLA.

CAPRARA SERINIÆ.

ARGUMENTUM.

*Postremo Turcico bello (quod Turcarum Imperator contra pacta sancitaque moverat) liberatâ gravi obsidione Viennâ , Austriæ metropoli , ac superatis non unâ victoriâ hostibus , res Othomannicæ retrò fluere cœperant. Quippe non jam Strigonium solûm & Novarinum , sed & Cassoviam , reliquamque ferè superiorem Hungariam arma Germanica occupaverant. Cælum quoque rebellibus Hungaris adversari visum. Nam & fulmen cecidit ad Comitis Teckelii latus , & ipse paullo post in vincula raptus , avectusque Constantino-
polim. Quo fato exterritus Petenafius Comes , partes Teckelii & rebellium deferens , ad castra Cæsarea cum copiis suis transit. Igitur qui partem tunc exercitus Germanici moderabatur Dux Caprara , captâ recens Cassoviâ , cûm ad Mungatsiam moveret , hanc ad Seriniam Teckelii conjugem epistolam scripsit , quâ suadet , ut cladibus tandem suorum commota , se & arcem suam victori dedat.*

FOrsitân Hungariæ cladem tibi rumor ad aures
 Pertulit , & nostrâ parta tropæa manu.
 Forsan & à celsæ spectasti turribus arcis
 Castra triumphali nostra micare face.
 Nec dubito quin jam cæsis Turcisque viroque,
 Agnoscas miseræ fata sinistra domûs :
 Utque pio cælum pugnet pro Cæsare bello ,
 Et Superi causam cœptaque nostra probent.
 Fallor , an invidiâ conatibus æmula nostris
 Ureris , ardentes fusa rubore genas ?

Pone

Pone truces animos ; meliùsque precantia pacem
Occurrant animo mitia verba tuo.

Hoc ego si taceam , fortuna miserrima suadet.

Hei mihi si contrà , quàm monet illa , facis !

Tristibus eventis temeraria bella frequenter

Damnat , & (heu !) serò pars superata gemit.

Respice te , sortemque tuam , cladesque tuorum ,

Atque animo vires experiare tuas.

Scilicet imparibus concurrens femina signis ,

Nec tibi terrorem Cæsaris arma ferent ?

Ut tamen & numero fidas animisque tuorum ,

Ut vigilent castris millia multa tuis :

Nîl agis : invitis quisquis movet agmina Divis

Concidet : exemplum Thracia victa dedit.

Illa potens armis , causâque potentior ibat

Cæsar , & ultores traxit ad arma Deos.

Qui causâ vicit , pariter superavit & armis.

Perfidiaë pœnas Thessala terra dedit.

Causa tua est similis , neque tu melioribus armis

Uteris in cladem perniciemque tuam.

Quid memorem quæ signa polus tibi certa furoris

Detulit , & cœptis sidera læva tuis ?

Fulmina dicuntur cælo delapsa sereno ;

Nubilus in medio vir tuus igne fuit.

Ille truci quamvis tantùm trepidaverit ictu ,

Et tulerit solas flamma propinqua minas :

Non ita vitavit cælestes devius iras ,

Debeat ut post hæc signa timere nihil.

Sæpè fugit tumidas ratis inclinata procellas ,

Et , semel ut pereat , sæpè minatur hiems.

Altera tempestas , quod proxima distulit , affert ,

Quæque diu fugit retia sentit avis.

Si tamen ista tuus timuit tibi scribere conjux ,

Et mala te miseram forsitan ista latent ,

Accipe (nec pudeat : fas est & ab hoste doceri)

Accipe Capraræ verba notata manu.

Invenies illic Romani Cæsaris armis,
 Plurimaque auspiciis mœnia victa meis.
 Quæ simul aspicias, fortis meminisse decebit,
 Quæ serò victis sæpè dolenda venit.
 Consilium, non arma tibi fert litera nostra:
 Atque utinam lectâ cautior esse velis!
 O ne femineos pudeat submittere fastus.
 Cur tua victori reddere castra neges?
 Hactenus armari licuit: si denique nescis
 Cedere; non virtus, sed furor illud erit.
 Quis nisi mentis inops, contra cælumque Jovemque
 Arma ferat, capiti nîl metuatque suo?
 Ista Gigantei jam dudum infania belli
 Ignibus æthereis corripienda fuit.
 Arma lupi taboque madentia spicula mordent,
 Et malè luctando vulnera plura ferunt.
 Te quoque, si pugnes plus quàm prudentia suadet,
 Exitus haud dispar, fataque dura manent.
 Forsitan undè tibi mittatur epistola quæris?
 Credula suspecto ne capiare dolo.
 Scilicet ex illis vênit tibi mœnibus, undè
 Mars meus ad muros destinat ire tuos.
 Quàm propè nostra tuâ Cassovia distat ab arce,
 Tam propè Cæsareus jam tibi miles adest.
 Nunc etiam motis procedunt agmina castris,
 Famaque victores buccina ducit equos.
 Fallor, an attonitam commovit epistola mentem,
 Utque decet, bello proximior tremis?
 An caput Hungariæ nostris cessisse triumphis
 Abnuis, hâcque mihi credere parte negas?
 Crede tamen, nostris Cassovia viribus impar
 Cessit, & Austriacas nobilis auxit opes.
 Odrysii fugère duces, Istroque relicto,
 Thracia quos misit, mœsta recepit equos.
 Læta super nostras volitat victoria turmas,
 Spargitur & castris multa corona meis.

Luta triumphatæ contraxit cornua frontis :

Palluit ad vultus Cæsaris illa mei.

Quid memorē lauros? quid partos marte triumphos?

Oppida quid nostrâ capta, vel uisâ manu?

Strigonii muros, Novarinaque valla tenemus,

Redditaque est domino Vatsia prisca suo.

Diruta victoris Segedini mœnia flammis,

Et cecidit nostro milite fortis Arath.

Vieta caput regni Cassovia : nec tulit ultrâ

Spernere Teutonicas arx Eperina minas.

Si de tot captis numerum perscribere coner

Urbibus, immensi fama laboris erit.

Nec minùs ut campis exercitus ibat apertis,

Clangeret & multâ pugna cruenta tubâ,

Sternuntur totis inimica cadavera campis,

Atque aquilis Scythico rostra cruore madent.

Jamque iterum, jam sæpè cadunt; victoriapalmas

Multiplicat : victor præmia miles habet.

Nec modò Pannoniæ nostris cessere phalanges,

Vietaque non tantùm Bistonis ora jacet,

Spes quoque vestra cadit : ducibus Serinia victis

Adjuvor, & castris stant tua signa meis.

Agmina deseruit Petenasius impia Thracum,

Movit & exemplo millia multa suo.

Nec pudor est illi se jungere Cæsaris armis,

Nec pudor est culpæ poenituisse suæ.

Si tuus exemplo conjux foret usus eodem,

Non sceleris poenas ille daturus erat.

Sed bene consuluit factis fortuna pudendis;

Ducitur Ismario victima grata duci.

Qui malè speravit populo solamen ab illo,

Vincula pro meritis officioque refert.

Non tamen insulto; doleo quoque casibus illis:

Atque utinam salvum dent tibi fata virum!

Sed vereor, quotiesque subit miserabile bellum,

Spes mea non falso vieta timore cadit.

Qui fuit hortator pugnæ, cadat hostia, dicent:
Sanguine placanda est vindicis ira Dei.

Vertat in auctorem belli fortuna sinistri,
Cur toties nostris ossibus albet humus?

Victima pro cæsis tot millibus una litanda est:
Occidat. Hæc populi vota furentis erunt.

Interea profugus redit ad tentoria miles,
Viribus & cresco per tua damna novis.

Explicat & plenas ingens exercitus alas,
Et mihi, quâ vincam, copia martis adest.

Nec mora : junguntur socialia fœdera dextris,
Et fidei testes cogimus esse Deos.

Quis tibi nunc animus? quas concipis anxia curas?
Hei mihi si fatis non moveare tuis!

Hei mihi si quid adhuc bello temeraria fidas,
Et tibi spes tutas suadeat ulla moras!

Parce precor, pacemque armis Serinia præfer.
Stulta, quid imbelles atterit hasta manus?

Dic mihi, femineis jactabis tela lacertis,
Et tua veloces gloria vertet equos?

Forsan Amazonides imitaberis æmula matres,
Abdita flaventes cassidis ære comas?

Et poteris mediâ vallum defendere lunâ,
Et mea nocturno fallere castra dolo?

Scilicet Austriadæ fugient tua signa cohortes,
Ipsa triumphali celsa veheris equo,

Et veteres inter numeraberis heroïnas,
Accedet titulis Hungara terra tuis:

Femineosque animos veniens mirabitur ætas,
Quasque ferēs lauros, secula fera canent.

Define : nequidquam pretiosa pericula versas,
Atque animos fallax ludit imago tuos.

Sic quondam Iōnios sperans Cleopatra triumphos,
Pernici fugit Cæsaris arma rate.

Illa quidem bello cecidit : tu vincere speras?
Tu tua plus hujus tela valere putas?

Tu petis Austriacæ spoliū sublime ruinæ?

Tu patriæ lapsas una tueris opes?

Crede mihi, vanâ temeraria luderis aurâ.

Hei mihi si factis exitus ista probet!

Non minor est armis Cæsar Germanicus illo,

Niliacæ quondam quem timuere rates.

Hunc tremuit Nilus, Tanais perterritus illum:

Femineas premet hic, pressit ut ille minas.

An tibi barbaricis lentus de cædibus Ister

Excidit, & nostrâ Thracia victa manu?

Nescis extremis trepidet Mæotis ut undis,

Horreat ut nostras Taurica terra minas?

At reor, in mediis secura paludibus hostem

Arcebis muris, nec timor ullus erit.

Udaque præcípites defendent mœnia fossæ,

Nec poterit gelidis mars meus ire vadis.

Quippe carebat aquis, nec erat quod cingeret arcem

Flumen, & obliquis curreret aggeribus,

Cùm cecidit nostris Novarinia victa sub armis,

Et cava subiectis vinea naret aquis.

Crede mihi, nullis aquilæ prohibentur ab undis,

Perque vagos amnes & freta lata volant.

Jam tibi prædicunt minitantiæ rōstra ruinam:

Quid facies, victor dum tua castra pream?

Dum tua fulgebit tonitru Mungatſia nostro,

Plurimaque adversam victima planget humum?

Turpius ah! cedes, & debellata rogabis,

Quam tibi nunc veniam Cæsar opemque parat.

Jam potes imperio melius te jungere nostro,

Et melius famæ consulere ipsa tuæ.

Nec tibi difficiles aditus ad fœdera nostra

Finge, dabit focias Austria sponte manus.

Eia age præsidio sis tuta Ragotſia nostro,

Nec tibi, qui noceat, barbarus hostis erit.

Respice depositis, quæ mars tuus improbat, armis,

Quanta tibi Cæsar commoda paxque ferat.

358 ELEGIARUM LIBER IV.

Scilicet Aufriades inter pulcerrima matres
 Ibis, odoratis gemmea tota comis:
 Et tua nobilitas augustæ cognita stirpi,
 Inter erit nostras conspicienda nurus.
 Rustica quid gelidis ignotaque montibus hæres?
 Non facit ad mores tam gravis aura bonos.
 Quid juvat heu! nivibus, Scythiæq; Aquilonibus uri,
 Et caput in rigidâ semper habere lupâ?
 Rupibus atque hiemes longas durare remotis,
 Vixque tui tutam mœnibus esse loci?
 Est quærenda tuis natalibus altera tellus.
 Imperii nescis luxuriantis opes.
 Hic tibi delicias Ister, vicinaque tempe,
 Ruraque credibili fertiliora dabunt.
 Seu placeat lustrare nemus venatibus aptum;
 Ipsa leves arcus, aurea tela geres:
 Et socias inter Diana videbere Nymphas,
 Nuda genu, pavidas excipiesque feras.
 Seu magis in ripa libeat concurrere cymbis,
 Insula formosas quâ jacet inter aquas.
 Seu, dum bruma riget, nitidæ penetralibus aulæ
 Fallere jactato frigora longa trocho.
 Denique quæ nequeat tibi litera cuncta referre,
 Plura tuis coram moribus apta leges.
 Si tamen arva magis placeant Mungatlia nostris,
 Arbitrio dabitur terra tenenda tuo.
 Ne modò præsidio careas & milite nostro,
 Qui tibi securæ causa quietis erit.
 Hæc sunt jussa mei Serinia Cæsaris : illâ
 Parcere subjectæ conditione parat.
 Si sapis, haud socias dubites admittere dextras:
 Sic tibi non hostis, sed novus hospes ero.
 Mutua firmabit melius præsentia fœdus,
 Atque animo dices verba minora meo.
 Forsitan absentis moveat te cura mariti,
 Et cupias reduci fida manere viro?

Scilicet

Scilicet immitis quem stringunt vincla Tyranni.

Hei mihi quàm vanas spes alit ista moras!

Non ego falsa loquor, tenebris & carcere claudi

Dicitur, at fatis occubuisse reor.

Proxima cùm surget tenebris aurora fugatis,

Aspicias campis agmina nostra tuis.

Aut pacem inveniam, vel tu mea bella videbis,

Victaque cum fatis fera querere tuis.

EPISTOLA.

SERINIA CAPRARÆ.

ARGUMENTUM.

Serinia varias prætens rationes, se & arcem suam dedere recusat. Atque imprimis avidam sese gloriæ ostendit, potiusque pro tutandis mœnibus mori paratam, quàm turpi (ut putabat) proditione inurere famæ suæ maculam, & fidem, quam marito suo obstrinxerat, violare. At verò objectam sibi temeritatis ac pertinaciæ notam, si desperatis rebus, cedentibus ceteris, una oblucri pergat, vertit in argumentum constantiæ, fortitudinis, fidelitatis; egregio muliebris fastûs venturis seculis documento. Victa tandem bello, & in Austriam abducta, captivitatis sortem, quam vitare licuisset, suâ sibi pertinciâ ascrivit.

Scribis ut Austriacis Cassovia cesserit armis,
Et memorem sortis me cupis esse meæ.

Tu quoque fortunam (ne quid peccaveris illâ)

Quæ favet, adversam posse venire puta.

Utile consilium, si tu tamen uteris illo,

Ne monitor monitis corripiare tuis.

Me simul hortaris ne quid temeraria peccem,

Scilicet ut faciles dem tibi victa manus.

Nîl ego peccabo, nisi si peccare putetur,
 Conjugii renuit quæ violare fidem.
 Si scelus esse putas, tuear quod jura meorum,
 Quod foveam fido pignora cara sinu:
 Hoc suadet natura scelus. Temeraria dicar
 Judice te: cælo judice fortis ero.
 At mihi (sic fingis) cælum dat signa furoris,
 Et mea judicio causa maligna tuo est.
 Gratulor augurio. Quæ te tamen Attica Delphos
 Edocuit fati sidera læva mei?
 Sit mihi libertas similis, dicam impia vobis
 Bella geri, & causæ de levitate querar.
 Sed nîl dissimulas, pugnataque prælia jactas,
 Et metuis ne quâ tristior esse velim.
 Vincula certa viri, delapsaque fulmina narras,
 Et venisse meos in tua castra duces:
 Multaque præterea, quorum si singula credam,
 Sit mea simplicitas grata futura tibi.
 Quare, ne fastûs mea fortè silentia culpes,
 Hæc responsuris accipe verba notis.
 Haud equidem invideo partos tibi marte triumphos,
 Nec mihi (ne fingas) fama molesta tua est.
 Invidiâ segnes, fortes virtute moventur.
 Ne quâ degenerem, tu mihi calcar eris.
 Fama mihi virtusque placent: damnamus inertes,
 Fortunamque sequi femina turpe reor.
 Qui tulerit sortem quam dat Deus, integer ille est;
 Sive adversa sibi, sive secunda venit.
 Hæc Dea plebeias animas, generosaque prodit
 Pectora: desidia est succubuisse malis.
 Et vitium est rebus nimis exultare secundis,
 Aurea nec fortis frena tenere suæ.
 Non ego te damno: tua nota modestia nobis.
 Quis prohibet laudem me quoque ferre meam?
 Laus tua sit Caprara, carens victoria fastu:
 Laus mea, victrices non timuisse manus.

Parti quemque suæ summa est mansisse fidelem
 Gloria : res factis est manifesta tuis.
 Scilicet Hungariam, gesto pro Cæsare bello,
 Es pretium fidei dignus habere tuæ.
 Illa tuis armis cessit, tibi gratulor illam,
 Illa tibi æternum subdita nomen erit.
 Quæ tua fama foret, si nunc fortasse lateres
 Finibus extremæ transfuga Vallachiæ?
 Aut tua Threiciis junxisses arma sagittis
 Perfidus, & patriæ proditor ipse tuæ?
 Qualis ad Austriacos versis Petenasiis armis
 (Prò pudor!) infami dicitur isse fugâ.
 Illum etiam nostris infestum currere muris
 Fama est, nec capiti parcere velle meo.
 Dñ melius! Scythicisque cadat precor ante sagittis.
 Obrutus, aut nostro vulnus ab ense ferat!
 Perfidie meruit pœnam. Quid fiditis illi?
 Sorte levi versâ, transfuga rursus erit.
 Casibus adversis virtus mavortia crescit,
 Vulneribusque suis ira leonis adest.
 At capreæ, & pavidum lepores genus, ilia rumpunt
 Cursum, ut silvis cornua prima sonant.
 Ipse vides profugis tibi quid speretur ab istis,
 Quos levis in celerem concitat aura fugam.
 Impie non puduit Petenasi foedera pacta,
 Promissamque mihi fallere velle fidem?
 Ne memorem heroës alios, Mungatisia nostra
 Quos tenet, absenti pectora fida viro,
 Virtutem certè poteras vel ab hoste doceri,
 Si qua tibi famæ cura superstes erat.
 Principio belli gemeret dum marte Vienna,
 Quò tulerat vires Turcia tota suas:
 Austria barbaricis cum ferveret undique flammis,
 Ipse dolens patriâ Cæsar abiret humo:
 Austriaci tamen arma duces tenuêre fidemque,
 Nec timidæ imbelles terga dedêre fugæ.

Mars

362 ELEGIARUM LIBER IV.

Mars pater, æternâ digna est ea gloria lauro,
 Hunc potes & fastis annumerare diem,
 Quo steterunt fortes contra tot millia pauci,
 Nutaret Latii dum caput Imperiî.

Perfidus hoc poterat, si non inglorius esset,
 Exemplo sortem discere ferre suam.

Et poterat mala fata novi spe vincere belli,
 Et semel adversos esse putare Deos.

Nunc quia deseruit domini vexilla prioris,
 Perfidiaë toto nomen ab orbe feret.

Hæc quoque tu narras? nec te pudet illa referre?
 Illius exemplo sollicitanda fui?

Sic tibi nota fui Serinia? Terra dehiscat
 Ante mihi, & meritam regna sub atra ferat!

Non sum adeò laudis famæque oblita meorum,
 Erronem simili quæ levitate sequar.

Te quoque, cùm tantum tua suasis epistola crimen,
 Credibile est tacitis erubuisse notis.

Non tibi cum verbis (si te modò novimus ipsum)
 Convenit, & factis destruis illa tuis.

Verba nefas suadent: animo, ne persequar, oras.
 Ignoscas: animum, non tua verba sequar.

Crede mihi, quid nos deceat tua facta loquuntur,
 Tu mea me vobis claudere castra doces.

Tu facis, ut bello Mungatfia mœnia tuter,
 Ut subeam longâ pulcra pericla morâ.

Moribus Austriadûm belli contemnere casus
 Instruor, hostiles nec timuisse minas.

Quam petis & precibus verbisque minacibus arcem,
 Si tradam, à factis dicar abire tuis.

Cùm peterent Thraces muros & Cæsaris urbem,
 Hostibus in mediis te duce tuta fuit.

In te quod laudas, in nobis carpere noli,
 Ut mihi vestra fides, nostra probanda tibi est.

Non potes absolvi, nisi nos absolveris ipse.

Cur veniam facto, quod facis ipse, neges?

Ergo

Ergo ego si damner, mecum damneris oportet,
 Unaque supplicii causa duobus erit.
 Sed nec ego admittam tantum Serinia crimen.
 Sit mihi pro patria dulce perire mea.
 Aut mihi continget defensis gloria muris,
 Aut melior belli mors mihi finis erit.
 Utque tuis impar concedam femina telis,
 Non inhonora mei fama cruoris erit.
 Sæpè tulit victis æternum gloria nomen,
 Famaque de miseris cladibus alta venit.
 Troia ignota foret, si non incensa fuisset:
 Illius in toto jam volat orbe cinis.
 Parce precor fassæ: ne jam temeraria dicar,
 Exemplo didici fortior esse tuo.
 Utque tibi Cæsar, sic vir mihi femina laudis
 Subjicit, & stimulos addit uterque pares.
 Et mihi militiæ cura est: tu Cæsaris arma,
 Ipsa mei miles conjugis arma sequor.
 Nec tibi sit mirum dicar quod femina miles,
 Non erit hæc generis gloria prima mei.
 Non tamen historias mens est revocare priores,
 Heroësque meæ commemorare domus.
 Dummodo degeneri maculem ne sanguine stirpem,
 Hoc satis ad laudes temporis hujus erit.
 Quare ne proavis indigna Ragotsia dicar,
 Parce animum blandis sollicitare dolis.
 Tuque tuo domino maneat, ego fida marito,
 Exemplum ut famæ simus uterque bonæ.
 Quid mihi delicias Istri nemorumque recessus
 Objicis, & luxus, Austriacasque nurus?
 Quid quereris solis desertam ducere vitam
 Montibus, arctoo quâ furit aura gelu?
 Et propè persuades, & te facit aula disertum,
 Atque aliæ poterant hâc quoque parte capi.
 Omniaque invitant; & ni pietasque fidesque
 Obstet, in amplexus fœderis ire velim.

Sed

Sed tamen exiguo dicar Serinia felix,
 Si probitas tantas spernere possit opes.
 Impius est quisquis mercatur crimine regnum.
 Integra sim : quæso vilis inopsque vocer.
 Non mihi sint tanti gemmæ, non Austria tota,
 Ut levitas famæ nota sit ulla meæ.
 Si tibi regna Asiæ totusque parabitur orbis,
 Dic mihi, perfidiæ crimine dives eris?
 Justior es, malisque fidem præferre coronæ,
 Et calces facili Persica sceptrâ pede.
 Sic ego te novi; sic me quoque noverit hostis:
 Nec dubito, tacitus quin mea facta probes.
 Quid memorem thalami socialia fœdera nostri?
 Hæc quoque me fidam causâ secunda facit.
 Fœdera militiæ te tantum : me quoque lecti
 Jura tenent, & Hymen sub sua signa vocat.
 Finge dari mea castra tibi Mungatisiaque arva,
 Quæ tuus, ut scribis, Cæsar habenda petit:
 Cæsar Teutonicis Istrum qui territat armis,
 Quique minus victor, quam pius, esse cupit.
 Finge dari mea castra tamen. Num fida marito
 Dicar? num thalami fœdera nosse mei?
 Debita num parvis servare nepotibus arva?
 An potius natis dira noverca canar?
 Fortunâque levis dicar cecidisse sinistrâ,
 Atque probaturis femina victa malis?
 Denique num reducem excludam scelerata maritum?
 Quem frustra fatis occubuisse putas.
 Vivit enim, fidosque absens mihi nutrit amores,
 Atque abiens fidei pignora multa dedit:
 Et tibi commendo, dixit, cum mœnibus arcem,
 Conjugii dotem fac tueare tui.
 Hanc tibi vir servo: neque me, dum vita manebit,
 Arguet oblitam fœderis ulla dies.
 Verte (quid indecori parvos premis agmine muros?)
 Verte acies, coepti pœniteatque tui.

Ire per extremum tua gloria debuit Istrum,
 Quid teris hîc longas obsidione moras?
 Quam tibi victa dabit victori femina laudem?
 Desere dotales invidie raptor opes.
 Non cupit has Cæsar : qui cùm mitissimus audit,
 A scriptis certè diffidet ille tuis.
 Ista tuis tantùm mihi vênit epistola verbis,
 Nec partem in tanto crimine Cæsar habet.
 Tristibus imperiis clementia Principis obstat.
 I, malè concepti contrahe vela doli.
 Imperat hoc Cæsar : nam qui tot possidet urbes,
 Millia tot victi jugera vasta soli.
 Quem sibi finitimum modò Transilvania sentit,
 Cui parat & famulas volvere Dravus aquas,
 Danubiusque suas jam dudum tradidit urbes,
 Invidus hic parvæ scilicet arcis erit?
 Quæ procul Hungariæ summis in finibus hæret,
 Rus breve, & æterno frigore triste solum.
 Quam si possideat Cæsar tuus, ipse relinquat,
 Et dignam sceptro non putet esse suo.
 Nam velut hic magna Princeps dominatur in aula,
 Maxima sic illum vincere regna decet.
 Perque Asiæ fines aquilas urgere volantes,
 Ut minuat titulos barbara terra suos.
 Aut procul injiciat captivo vincula Nilo,
 Addat & imperio thurea regna suo.
 Utque decet, superare pares, transire minores
 Pergat, nec minimis magnus adesse velit.
 Sic poterit fortis pariter mitisque vocari,
 Fortunâque geret prælia digna suâ.

F I N I S.




S U M M A
P R I V I L E G I I.

CAROLUS VI. Dei gratia Romanorum
Imperator semper Augustus ; Hispaniarum
& Indiarum Rex Catholicus, &c. Archidux Au-
striæ, Dux Burgundiæ, Brabantiae, &c. Diplo-
mate suo sanxit, ne quis per sexennium præter
EUGENII HENRICI FRICK, Typographi
Bruxellensis voluntatem librum cui Titulus:
LIVINI MEYERI è *Societate JESU Poematum*
Libri duodecim in Belgio imprimat, sive alibi lo-
corum impressum in has inferioris Germaniæ di-
tiones importet, aut venalem exponat. Qui secus
faxit exemplarium confiscatione atque alia gravi
pœna mulctabitur ; uti latius patet in litteris da-
tis Bruxellis 3. Septembris 1727.

Signat.

J. D E W A H A.
























208

LIVINI
METERI

21

+ colorchecker classic

calibrite



100 90 80 70 60 50 40 30 20 10 0 mm